

Dayak Paser: Bible, Unlocked Literal Bible for 1 John, 1 Peter, 1
Thessalonians, 1 Timothy, 2 Corinthians, 2 John, 2 Thessalonians, 2 Timothy,
3 John, Colossians, Ephesians, Galatians, Hebrews, John, Jude, Luke,
Matthew, Philemon, Philippians, Revelation, Romans, Titus

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

- Share — copy and redistribute the material in any medium or format.
- Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

- Attribution — You must attribute the work as follows: "Original work available at <https://BibleInEveryLanguage.org>." Attribution statements in derivative works should not in any way suggest that we endorse you or your use of this work.
- ShareAlike — If you remix, transform, or build upon the material, you must distribute your contributions under the same license as the original.
- No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Matthew

Chapter 1

¹Endo doko karan-karan kturunan Yesus Kristus, pea Daud, pea Abraham. Abraham ² nempea se Ishak, Ishak nempea se Yakub, Yakub nempea se Yehuda ai erai buntung-erai buntung yo, ³Yehuda nempea se Peres ai Zerah ngket Tamar, Peres nempea se Hezron, Hezron nempea se Ram, ⁴Ram nempea se Aminadab, Aminadab nempea se Nahason, Nahason nempea se Salmon, ⁵Salmon nempea se Boas ngket Rahab, Boas nempea se Obed ngket Rut, Obed nempea se Isai, ⁶Isai nempea se raja Daud. Daud nempea Salomo ngket bawe Uria, ⁷Salomo nempea se Rehabeam, Rehabeam nempea se Abia, Abia nempea se Asa, ⁸Asa nempea se Yosafat, Yosafat nempea se Yoram, Yoram nempea se Uzia, ⁹Uzia nempea se Yotam, Yotam nempea se Ahas, Ahas nempea se Hizkia, ¹⁰Hizkia nempea se Manasye, Manasye nempea se Amon, Amon nempea se Yosia, ¹¹Yosia nempea se Yekhonya ai erai buntung-erai buntung yo des olo nte noding epo Babel. ¹²Sundok noding epo Babel, Yekhonya nempea se Sealtiel, Sealtiel nempea se Zerubabel, ¹³Zerubabel nempea se Abihud, Abihud nempea se Elyakim, Elyakim nempea se Azor, ¹⁴Azor nempea se Zadok, Zadok nempea se Akhim, Akhim nempea se Eliud, ¹⁵Eliud nempea se Eleazar, Eleazar nempea se Matan, Matan nempea se ¹⁶Yakub, Yakub nempea se Yusuf song Maria, io ngmekus Yesus yo nulek Kristus. ¹⁷Eka-eka yo keo: opat belas kturunan ngket Abraham sampe Daud, opat belas kturunan ngket Daud sampe jman nte noding epo Babel, diang opat belas kturunan ngket jman nte noding epo Babel sampe Kristus. ¹⁸Yesus Kristus ene kino mekus ktindo: Des jman Maria, ine-Iyo, sundok nanu nte kawen diang Yusuf, skali yo io klandung ngket Roh Kudus, onon se dero bolum besong bawe. ¹⁹Koe Yusuf song yo, ulun yo buen kno ai belo kakan ngmai karan bawe yo mbo onon ulun deo, io keo ptua lang kno kakan ngendikah diang suni-suni. ²⁰Tapi des io ngnanam nau ptua ene, mlekat Tuhan melak epo io lang nupi ai ngulek: "Yusuf, pea Daud, nang ka iko gaer nembawe Maria nte ko bawe, koe pea lang buntung yo ene ngket Roh Kudus. ²¹Io anta ngmekus pea song ai iko anta nampa karan Io Yesus, koe Io dko yo nte nylamat umat-Iyo ngket dosa dero." ²²Nau umbang ene jadi apa gnenap firman Tuhan tete nabi: ²³Sbeta yo, pea ngelok ene anta kbuntung ai ngmekus pea song ai dero anta nampa karan Io Imanuel" yo ene: Allah diang taka. ²⁴Sundok io uat ngket turui, Yusuf nglaku kati yo ptua mlekat Tuhan ene epo io. Io ngalek Maria jadi bawe io, ²⁵tapi belo kerai turui diang io sampe io ngmekus pea yo song ai Yusuf nampa karan Io Yesus.

Chapter 2

¹Sundok Yesus kinomekus ela Betlehem ela tana Yudea des jaman raja Herodes, ulet doko ulun-ulun majus ket timur epo Yerusalem ²ai rkunti: "Ela mone Iyo, raja ulun Yahudi yo bayu kinomekus ene? Kain sundok kito bintang-Iyo ela timur ai kain ulet nte nyembah Iyo." ³Des raja Herodes kringo ene tkojet io diang pupus Yerusalem. ⁴Koe ene iyo ngumpul eka imam pnguntok diang ahli Taurat bangsa Yahudi, iyo tindu lako ulek dero, ela mone Mesias ene anta kinomekus. ⁵Dero ngulek epo iyo: "Ela Betlehem mbo tana Yudea, koe keo tnulis lang kitab nabi: ⁶Ai iko Betlehem, tana Yehuda, iko makse yo paling idik mbo ekang dero yo mrenta Yehuda, koe ket iko se anta nyuli erai kongo pngutok, yo nte mimpin umat-Ku Israel." ⁷Laju diang suni-suni Herodes momba ulun-ulun majus ene ai diang titip buntit ngunti epo dero, des mone bintang ene melak. ⁸Bayu iyo nyuyu dero epo Betlehem, ulek iyo: "Malan ai sinolidik beta-beta nau umbang Pea ene peles sundok ikam ruku Iyo, bnere epo aku apa aku ulet low epo nyembah Iyo." ⁹Sundok kringo pnyurah raja ene, laju malan dero. Eti ka, bintang yo eti dero tadah timur ene keo mbo onon dero malan sampe ulet ai brenti mbo awa, yo montuk diang awa Pea ene keo. ¹⁰Des dero kito bintang ene, ego beta dero. ¹¹Sumba dero epo lang lou ene ai kito Pea ene diang Maria, ine-Iyo, laju sujud nyembah Iyo. Peles dero ngingkang awa kakas plean dero laju mie persembahan epo Iyo, yo doko mas, kmenyan ai mur. ¹²Koe sundok pinoknop lang nupi, apa belo mulik epo Herodes, dero uli epo ja dero tete boyan yo mak. ¹³Des ulun-ulun majus ene brangkat, melak doko mlekat Tuhan epo Yusuf lang nupi diang ngulek: "Uat aut, alek Pea ene diang ine-Iyo, buyo epo Mesir diang nongos mbo mne sampe Aku berfirman epo iko, koe Herodes anta meto Pea ene nte ngempate Iyo." ¹⁴Uat doko Yusuf, alek iyo Pea diang ine-Iyo malom ene low, laju makat epo Mesir, ¹⁵nongos mbo lane sampe Herodes mate. Nau ene apa gnenap firman Tuhan tete nabi: "Ket Mesir Aku momba Pea-Ku." Des Herodes tau, se io akal ulun-ulun majus ene, io mara beta. Io nyuyu ngempate eka bang pea ela Betlehem diang lekum naine, yo ene bang pea yo umur duo taun epo iwa, sengkono diang des yo pentau iyo ket ulun-ulun majus ene. ¹⁷Diang ktine gnenap lou firman yo sname koe nabi Yeremia: ¹⁸"Keo oyon mbo Rama, tangis tungul yo luway beta; Rahel ngnangis pea-pea iyo, ai io belo kakan sinompaye, koe dero belo keo oli." ¹⁹Des Herodes mate, melak doko mlekat Tuhan epo Yusuf lang nupi mbo Mesir, ulek iyo: ²⁰"Uat iko, alek Pea ene diang ine-Iyo trus brangkat epo tana Israel, koe dero yo kakan ngempate Pea ene, sundok mate." ²¹Laju Yusuf uat, alek yo Pea ene diang ine-Iyo laju malan epo tana Israel. ²²Tapi des iyo kringo, se Arkhelaus jadi raja ela Yudea ngganti Herodes, uma iyo, io takut epo lane. Koe nsehat lang nupi, brangkat doko Yusuf epo Galilea. ²³Des ulet ela lane io nongos mbo kota nan karan se Nasaret. Nau ktine ene apa gnenap firman Tuhan yo sname koe nabi-nabi, se Io ene anta nulek: Ulun Nasaret.

Chapter 3

¹Des ene nyoret Yohanes Pembaptis mbo padang gurun Yudea ai nyampe: ²"Tobat aut, koe Krajaan Allah sundok dempet!" ³Sebeta yo iyo ene doko yo kno nabi Yesaya des io ngulek: "Keo oyon ulun nengou-nengou mbo padang gurun: Nraduh ta boyan nte Tuhan, pinolonus ta boyan nte- Iyo." ⁴Yohanes makai jubah bulu onta ai ktinggang upak, ai okan singkap iyo upan ai tita wani. ⁵Jadi ulet doko epo iyo ulun yo nongos mbo Yerusalem, ngket pupus Yudea ai ngket pupus denia lekum Yordan. ⁶Trus ulak ngaku dosa iyo dero bnaptis koe Yohanes mbo atang Yordan. ⁷Tapi des io kito deo ulun farisi ai ulun Saduki ulet nte baptis, io ngulek epo dero: "Ikam yo upus nipo muro. Ise yo ngulek epo ikam, se ikam kuli bjyo ngket mara roa yo anta ulet?" ⁸Jadi arus ngasil bua yo sengkono diang tobat. ⁹Ai nang ngomoy, se ikam kuli ngulek lang kesong kam: Abraham ene bapa kain! Koe aku ngulek epo ikam: Allah kuli nampa pea-pea nte Abraham ngket batu-batu endo! ¹⁰London sundok keo mbo tondal kayu ai tongku kayu yo belo di ngasil bua yo buen, pasti tnotou ai noding epo lang api. ¹¹Aku ngebaptis ikam diang danum nte tanda tobat, tapi io ulet sori se aku pawak olay kuasa se aku ai aku belo di snaron nte ngosu trumpak-Iyo. Io anta ngebaptis ikam diang Roh Kudus ai diang api. ¹²Kakas pniaw sundok mbo kayang-Iyo. Io anta ngembrese awa penggiling-Iyo ai ngumpul gandong-Iyo epo lang slipir, tapi dasa uyam ene anta tuna-Iyo lang api yo belo dapet plonsop. ¹³Jadi ulet doko Yesus ngket Galilea epo Yordan epo Yohanes nte iyo baptis. ¹⁴Tapi Yohanes ng usan Iyo, ulek io: "Aku doko yo perlu baptis-Ko, ai Iko yo ulet epo aku?" ¹⁵Trus Yesus nuing, Ulek-Iyo epo iyo: "Koe ka nau ene terjadi, koe ktine doko moko yo taka bgenap eka ptua Allah." Ai Yohanes lou ngaya nte Iyo. ¹⁶Sundok bnaptis, Yesus peles baling ngket lang danum ai des ene lou langit wingkang ai Io kito Roh Allah kati mpulu dara diwa epo ombon Iyo, ¹⁷trus taro dingo doko oyon ngket sorga yo ngulek: "Endo doko Pea-Ku yo tengkosang-Ku, epo Iyo bute Aku sengkono kesong."

Chapter 4

¹Des Yesus oit Roh epo padang gurun nte uwok soba. ²Ai sundok puasa opat pulu olo opat pulu malom, pnyundok-
iyo Yesus kiso se siet lauw. ³Laju ulet doko tukang nyoba ai ngulek epo-Iyo: Ena beta Iko Pea Allah, suyu kotah apa
batu-batu endo jadi jaja." ⁴Tapi Yesus nuwing: "Sundok keo tnulis: Ulun belo di bolum ja-ja tinggen, tapi ngket
tongku firman io baling ngket bouwa Allah." ⁵Sundok ene uwok moit-Iyo epo Kota Susi ai mayak-Iyo epo ban
bungan Bait Allah, ⁶laju ngulek epo-Iyo: "Ena beta Iko Pea Allah, platu Ko tah kompu Ko epo iwa, koe keo tnulis:
Nau umbang Ko, Io njmmuyu mlekat-mlekat-Iyo ai dero anta nampen Iko ban kayang dero, apa botis Ko belo
mngku epo batu." ⁷Ulek Yesus epo io: "Keo low tnulis: Nang iko nyoba Tuhan Allah ko!" ⁸Ai uwok ene nua moyit-
Iyo epo usuk tunden yo ombo beta ai mmkelak epo-Iyo eka krajaan mbo dnnia endo diang kbuen-iy, ⁹ai ngulek
epo-Iyo: "Eka-eka ene anta die ku epo Iko, ena Iko nyongkop nymbah aku." ¹⁰Des ene Yesus ngulek epo-iy: "Makat
iko, uwok! Koe keo tnulis: Iko ene arus nymbah Tuhan, Allah ko, ai pulun epo-Iyo bute iko ngaya. ¹¹Laju uwok ene
ngndikah-Iyo, ai eti ka doko mlekat-mlekat ene ulet epo nyndro Yesus." ¹²Tapi des Yesus kringo se Yohanes sundok
tnangop, Io ngliki epo Galilea. ¹³Io ngndikah Nasaret epo nongos mbo Kapernaum, ela isan gntung, mbo kampong
Zebulon ai Naftali, ¹⁴apa gnnap firman yo snampe koe Nabi Yesaya: ¹⁵"Tana Zebulon ai tana Naftali, boyan epo
tadah tasik, kampong ela mpai atang Yordan, Galilea, tana bangsa-bangsa yo mak, ¹⁶ bangsa yo nongos mbo lang
seom, sundok kito walla yo olai ai nte dero yo nongos mbo dnnia yo bslingu diang pngmate, sundok ulet
wala," ¹⁷Mulai ngket ene Yesus ngulek: "Betobat ikam, koe Kerajaan Sorga sundok dmpet!" ¹⁸Des Yesus desung
malan nyarak isan gntung Galilea, Io kito duo kongo ulun erai buntung, yo ene Simon nulek se Petrus, ai Andreas,
okong-iy. Dero desung ngnjala mbo gntung, koe dero tukang ngnjala esa. ¹⁹Yesus ngulek epo dero: "Dido, nyarak
Aku, ai ikam anta tampa-Ku jadi pngnjala ulun." ²⁰Trus dero oli des ene se nape jala ene ai lumpat diang Io. ²¹Ai
sundok Yesus malan ngket lane, Io kito nuwa keo duwo kongo ulun erai buntung, yo ene Yokobus pea Zebedeus ai
Yohanis erai buntung-iy diang uma dero, Zebedeus, desung nngkuen jala dero mbo lang praw. Yesus momba
dero ²² ai dero des ene se ngnddikah praw diang uma dero, trus njarak Io. ²³Yesus nua nglekum mbo pupus Galilea;
Io nutui matuk lang lou-lou sbayang ai ngesah soal Injil Krajaan Allah diang mkale eka roton ai nau numbang
gramas mbo ekang bangsa ene. ²⁴des sampe kabar nau umbang-iy mbo Siria ai noit doko epo-Iyo eka ulun yo
triaw pnymbolum-iy, diang ssa, bjnnis karan roton ai bnasa, diang snumban, diang roton ngmbekat ai pokung,
trus Yesus mkale dero. ²⁵Des ene ulun ngldoyun nyarak-Iyo. Dero ulet ngket Galilea ai ngket Dekapolis, ngket-
Yerusalem ai ngket Yudea ai ngket mpai Yordan.

Chapter 5

¹Des Yesus kito ulun deo ene, Io dombo epo ban tunden ai des Io tunge, ulet doko murid-murid-Iyo ngompoh-Iyo.

²Jadi mulai doko Yesus bsara ai nutui matuk dero, ulek-Iyo: ³"Ego beta doko ulun yo kao mbo onon Allah, koe dero ene yo ngmpun Krajaan Sorga. ⁴Ego beta doko ulun yo pngnanam luai, koe dero anta sinompae. ⁵Ego beta doko ulun yo belo di kois koroi, koe dero anta ngmpun dnia. ⁶Ego beta doko ulun yo slau ai krengan se yo beta, koe dero anta tinompuas. ⁷Ego beta doko ulun yo sawai, koe dero anta kono ksawai. ⁸Ego beta doko ulun yo brse kesong-iyoy, koe dero anta kito Allah. ⁹Ego beta doko ulun yo moit damai, koe dero anta nulek pea-pea Allah. ¹⁰Ego beta doko ulun yo knurow knsa koe yo beta, koe dero doko yo ngmpun Krajaan Sorga. ¹¹Ego beta doko ikam, ena koe Aku ikam pinosala ai knurow knsa ai epo ikam pinotnah eka yo triaw. ¹²Snang ai ego ka, koe upa kam olai mbo sorga, koe ktine low sundok knurow knsa nabi-nabi yo onon se ikam." ¹³"Ikam ene garam dnia. Ena garam ene jadi tawai, diang ise io kinomasin? Belo keo oli jodo-iyoy makse noding ai toda ulun. ¹⁴Ikam ene trang dnia. Kota yo ban tunden belo anta di melim. ¹⁵Ktine low ulun belo di neket plita laju mayak-iyoy la iwat kepit, tapi mbo ban blai plita apa mtrang nte eka-eka ulun mbo lang lou ene. ¹⁶Ktine doko moko-iyoy trang ko ene kuwala mbo onon ulun, apa dero kito gawi gata ko yo buen ai ngmulia Bapa-ko yo mbo sorga. ¹⁷Nang ka ikam ngomoi, se Aku ulet nte nembelo aturan Taurat ktine low kitab nabi-nabi. Aku ulet makse di nte nembelo-iyoy, tapi nte mgnap-iyoy.

¹⁸Jadi Aku ngulek epo ikam: Se beta-beta-iyoy kola-kola belo pian mapos langit ai dnia endo, ndok erai urup ketine lou erai titik belo anta tinombelo ngket aturan Taurat onon eka-eka ene trjadi. ¹⁹Koe ene ise-ise ulun yo nembelo erai bute ka ngket prenta aturan Taurat tontan yo paling idi, ai nutui matuk-iyoy ktine epo ulun yo mak, io anta tunge mbo awa yo iwa tingen mbo lang Krajaan Sorga; tapi ise-ise ulun yo nglaku ai nutui matuk eka prenta-prenta aturan Taurat, io anta tunge mbo awa yo ombo mbo lang Krajaan Sorga. ²⁰Koe ktine Aku ngulek epo ikam: Ena bolum keo agama kam belo di kono aso se bolum keo agama ahli-ahli Taurat ai ulun-ulun Farisi, se beta-beta-iyoy ikam belo anta sumba epo lang Krajaan Sorga. ²¹Ikam sundok kringo firman yo snampe epo itak kakah taka: Nang ngmpate; ise-ise ulun yo ngmpate arus nukum. ²²Tapi Aku ngulek epo ikam: Tongku-tongku ulun yo mara roa balo epo eraibuntung-iyoy arus nukum; ise-ise ulun yo ngulek epo eraibuntung-iyoy: Kaper! arus nadap epo Mahkamah Agama ai ise-ise ulun yo ngulek: golu! arus snrah epo lang nraka yo dolan nyelop-nyelop. ²³Koe ene, ena iko mie persmbahan-ko ban mezbah ai iko taro kno se yo keo lang kesong eraibuntung-ko epo iko, ²⁴tape ka persmbahan-ko mbo onon mezbah ene ai malan nte bdamai ile diang eraibuntung-ko, bayu mulik nte mie persmbahan-ko ene. ²⁵Resi-resi bdamai diang bali-ko nyndipot iko aso sama-sama diang io mbo boyan, apa bali-ko ene nang nyrah iko epo hakim ai hakim ene nyrah iko epo Plisi ai iko pinosumba epo lang sper. ²⁶Aku ngulek epo iko: Se beta-beta-iyoy iko belo anta baling ngket lane, ena utang-ko belo pian bnayar eka. ²⁷Ikam sundok kringo firman: Nang bjinah. ²⁸Tapi Aku ngulek epo ikam: Tongku-tongku ulun yo meti bawe ulak kakan balo se-iyoy, sundok bjinah diang io mbo lang kesong-iyoy. ²⁹Jadi ena mato-ko yo sanan mktang iko, snungkit skali ai noding, koe buen ube nte ngko ena erai ngket bagian kompu-ko belo keo, se kompu-ko goluh noding epo lang nraka. ³⁰Jadi ena tangan sanan-ko mktang iko, tnotok ka ai oding ka ene, koe buen ube nte ngko ena erai ngket bagian kompu-ko belo keo, se kompu-ko goluh sumba nraka. ³¹Sundok snampe low firman: Ise-ise ulun yo nytuar bawe-iyoy arus mie surat stuar epo-iyoy. ³²Tapi Aku ngulek epo ikam: Tongku-tongku ulun yo nytuar bawe-iyoy yo makse koe jinah, io nampa bawe-iyoy bjinah; ai ise-ise ulun yo kawen diang bawe yo sinotuar, gawi io ene jinah. ³³Ikam sundok kringo low firman yo sundok snampe epo itak kakah taka, nang bsumpah eta-eta, tapi sumpah ene arus negop onon Tuhan. ³⁴Tapi Aku ngulek epo ikam: Nang beta bsumpah tontan sindai bute, tontan diang langit, koe langit ene awa takhta Allah, ³⁵ktine low pakai diang dnia, koe dnia ene awa pnoda botis-Iyoy, ktine low pakai diang Yerusalem, koe Yerusalem ene kota Raja Olai; ³⁶nang beta low bsumpah pakai diang utok ko se, koe iko belo di keo kuasa nte nmbura ai nmbuyung endok erai buti balo. ³⁷Ena oo, arus beta ikam ngulek: oo, ena belo, arus beta ikam ngulek: belo. Ise yo sisa se ene ulet ngket yo triaw. ³⁸Ikam sundok kringo firman: Mato ganti mato ai kukut ganti kukut. ³⁹Tapi Aku ngulek epo ikam: Nang beta ikam nglawan ulun yo triaw gawi epo ikam, tapi ise-ise ulun yo nampar pasik sanan-kam, die ka low epo-iyoy pasik sei-kam. ⁴⁰Ai epo ulun yo kakan ngadu iko koe nngkakan baju-ko, srah ka low jubah-ko. ⁴¹Ai ise-ise ulun ka yo maksa iko malan koro erai mil, dalan ka diang io koro duo mil. ⁴²Dnie beta epo ulun yo tindu epo iko ai nang nolak ulun yo kakan nginjam ngket iko. ⁴³Ikam sundok kringo firman: Tinongkosang beta sama-sama ulun kam ai knekoi beta bali kam. ⁴⁴Tapi Aku ngulek epo ikam: Tinongkosang beta bali kam ai bdoa beta nte dero yo ngurow ngsa ikam. ⁴⁵Koe diang ktine doko ikam jadi pea-pea Bapa-kam yo mbo sorga, yo mtimbul mato olo nte ulun yo dat ai nte ulun yo buen ai mdiwa uran nte ulun yo kono ai nte ulun yo belo keo yo kono.v 46 Ena ikam nngkosang ulun yo nngkosang ikam, ise upa kam? Belo be pnage be low nggawi ktine? ⁴⁷Jadi ena ikam pulun mie salam epo eraibuntung-eraibuntung kam tingen, ise

Ingkat-iyó se gawí ulun yó mak? Belo be ulun yó belo tau se Allah low keo gawí ktine? ⁴⁸Koe ene arus beta ikam belo keo bilamolón,sama kati Bapa-kam yó mbo sorga ene belo keo bilamolón."

Chapter 6

¹Knop beta-beta, nang iko nglaku aturan agama ko onon ulun apa eti dero, koe ena ktine, iko belo di kuli upa ngket Bapa-ko yo mbo sorga.²Jadi ena iko mie die sokoi nang iko ngesah epo ulun nau ene, kati yo gawi ulun yo gawal btondek tinggen lang lou-lou smbayang ai mbo boyan-boyan alus, apa dero pkolai ulun. Aku ngulek epo iko: Beta-beta yo dero sundok kuli upa-iyu.³Tapi ena iko mie die sokoi, mba di koyoh tau tangan sei-ko ise gawi tangan sanan-ko.⁴Arus yo die sokoi-ko ene dneie diang melim, jadi Bapa-ko yo kito yo melim anta males-iyu epo iko.⁵"Ai ena ikam bdoa, nang beta bdoa kati yo gawi ulun yo btondek tinggen. Dero gawal ngontai doa dero diang akat lang lou-lou smbayang ai mbo tikungan-tikungan boyan, apa dero eti ulun. Aku ngulek epo ikam: Beta-beta yo dero sundok kuli upa-iyu.⁶Tapi ena iko bdoa, sumba epo lang kamar-ko, tnokom jawong ai bayu bdoa epo Bapa-ko yo keo mbo awa yo melim. Jadi Bapa-ko yo kito yo melim anta males-iyu epo iko.⁷Aso nua lang doa-ko ene nang beta iko anyal balo kati pnepet ulun yo belo tau se Allah. Dero ngomoi se koe deo pmnsara doa dero anta tinompaning.⁸Jadi nang beta ikam kati dero, koe Bapa kam tau ise yo prlu kam, onon ikam tindu epo-Iyu.⁹Koe ene bdoa doko ktindo: Bapa kain yo mbo sorga, Pinokudus beta karan-Ko,¹⁰ulet beta Krajaan-Ko, jadi beta ptua-Ko mbo dnia kati mbo sorga.¹¹Die beta kain olo endo okan singkap yo puli¹²ai ampun beta kain diang sala-sala kain, kati kain low ngampun ulun yo keo sala epo kain;¹³ai nang beta moit kain nte soba, tapi awat beta kain ngket yo triaw. (Koe Iko doko yo mpun Krajaan ai kuasa ai kmulia sampe turai-turai-iyu. Amin.)¹⁴Koe ena ikam ngampun sala ulun, Bapa kam yo mbo sorga anta ngampun ikam low.¹⁵Tapi ena ikam belo ngampun ulun, Bapa kam low belo anta ngampun sala kam.¹⁶"Ai ena ikam puasa, nang beta nruwow nau wae kam kati yo gawi ulun yo gawal btondek tinggen. Dero ngensut saya wae dero, apa ulun kito se dero desung puasa. Aku ngulek epo ikam: Se beta-beta yo dero sundok kuli upa-iyu.¹⁷Tapi ena iko puasa, nlnge utok-ko ai snempuy wae-ko,¹⁸apa nang itan ulun se iko desung puasa, tapi Bapa-ko tinggen yo keo mbo awa yo melim. Jadi Bapa-ko yo kito yo melim anta males-iyu epo iko.¹⁹"Nang beta ikam nmbun pengkeo mbo dnia; mbo dnia ggat ai daki ngrusak-iyu ai pngako ngugah ai ngako-iyu.²⁰Tapi tmbun beta nte ngkam pengkeo mbo sorga; mbo sorga gegat ai daki belo di ngrusak-iyu ai pngako belo di ngugah diang ngako-iyu.²¹Koe mbo mone pengkeo ko keo, mbo mne low kesong-ko keo.²²Mato ene plita kompu. Ena mato-ko buen pa doko mupus kompu-ko;²³ena mato-ko dat, seom ka doko mupus kompu-ko. Jadi ena pa yo keo mbo iko lensop, seom ene jadi seom ji.²⁴Ndok belo erai kongo ulun kuli bgawi nte dua tuan. Koe ena ktine, io anta kekoi se yo erai kongo ai nngkosang yo mak, ktine low io anta stia epo yo erai kongo ai belo ngaya nte yo mak. Ikam belo kuli bgawi nte Allah ai nte Mamon."²⁵Koe ene Aku ngulek epo ikam: Nang ka water nau bolum-kam, anta ise nte ngkam okan ai isop, ai nang ka water low nte kompu-kam, anta ise nte ngkam pakai. Belo be bolum ene pawak pnting se kuman ai kompu ene pawak pnting se pakaian?²⁶Eti ka mpulu-mpulu ombon taka, yo belo di skulo ai belo di ngutik asil ai belo di ngona nguyu lang longkong, tapi pakan Bapa-kam yo mbo sorga. Mba be ikam ene pawak ombo se mpulu-mpulu ene?²⁷Ise ikam yo koe water-iyu kuli nambah budah tundok siku nau bolum-iyu?²⁸Ai ise moko ikam water se pakaian? Eti ka bungo bakung mbo umo, yo tumbu ulak belo bgawi ai belo pan ngndalin,²⁹tapi Aku ngulek epo ikam: Salomo lang eka khebat-iyu belo pini spakai kbuen bungo bakung ene.³⁰Jadi ena ktine Allah ngraji dikut mbo umo, yo olo ndo keo ai manin noding epo lang api, belo be Io anta aso pawak ngraji ikam, o ulun-ulun yo kurang prsaya?³¹Koe ene nang ka ikam water ai ngulek: Ise yo anta nte kain okan? Ise yo anta nte kain isop? Ise yo anta nte kain pakai?³²Eka ene eto bangsa-bangsa yo belo tau se Allah. Tapi Bapa-kam yo mbo sorga tau, se ikam prlu eka-eka ene.³³Tapi eto ile Krajaan Allah ai yo beta ngket-Iyu, jadi eka-eka ene annta tnambah nte ngkam.³⁴Koe ene nang beta ikam water nte olo manin, koe olo manin keo ksusah-iyu se. Ksusah erai olo sukup ka nte erai olo."

Chapter 7

¹"Nang iko mutus, apa iko belo di pnutus. ²Koe diang pmutus yo pakai ko nte mutus, iko anta pnutus ai pnyukat yo pakai ko nte nyukat, anta snukat epo iko. ³Ise moko iko meti uras alus lang mato erai buntung ko, pdahal plong kayu lang mato ko se iko belo tau? ⁴Timbe nau ko kate ngulek diang erai buntung ko: Koe ka aku nembaling uras alus ngket lang mato ko, pdahal keo plong kayu lang mato ko se. ⁵O ulun yo btondek tingen, tinombaling ile plong kayu lang mato ko, apa iko kate meti diang jlas nte nembaling uras alus lang mato erai buntung ko." "Nang iko mie kakas yo kudus nte koko ai nang iko nurak mutiara ko nte bawi, apa nang kanja iyo, bayu io mulik nte mrinsit iko." ⁷"Tnindu, pasti dneie epo iko; neto, pasti iko kuli; knetok, pasti jawong ningkang nte ngko. ⁸Koe tongku ulun yo tindu, nrima ai tongku ulun yo meto, kuli ai tongku ulun yo ngetok, jawong ningkang nte iyo. ⁹Keo be lelu ikam yo mie batu nte pea iyo, ena io tindu jaja, ¹⁰mie nipo, ena tindu esa? ¹¹Jadi ena iko yo dat ka tau pendie yo buen nte pea-pea ko, nyait da Bapa ko ela sorga! Io anta mie yo buen nte dero yo tindu diang Iyo." ¹²"Ise pengkakan ko apa ulun nggawi nte ko, tampa ktine low epo dero. Ene nau umbang atok eka-eka ukum Taurat diang kitab nabi-nabi. ¹³Sumba ta ngket jawong yo sidet ene, koe sae jawong ai lega boyan yo tadah epo bnasa, ai deo ulun yo lalo ngket ne; ¹⁴Koe sidet jawong ai boyan idik yo tadah epo pnyembolum, ai kurang ulun yo kuli. ¹⁵"Jaga-jaga diang nabi-nabi plesu yo ulet ngruku iko yo memenau kati domba, sebata yo dero ene sengkala yo prenges. ¹⁶Ngket bua yo doko ikam anta tau se dero. Kuli be ulun ngupei bua anggur ngket jaba dui ktine low bua ara ngket dikut kdui? ¹⁷Ktine low tongku tonga kayu yo buen ngasil bua yo buen, tonga kayu yo dat ngasil bua yo dat low. ¹⁸Belo anta tonga kayu yo buen ngasil bua yo dat, ktine low tonga kayu yo dat belo anta ngasil bua yo buen. ¹⁹Ai tongku tonga kayu yo belo ngasil bua yo buen, pasti tnotow ai noding epo lang api. ²⁰Jadi ngket bua yo doko ikam anta tau se dero. ²¹Belo di tongku ulun yo momba Aku: Tuhan, Tuhan! anta sumba lang Krajaan Sorga, tapi yo nglaku ise yo ptua Bapa-Ku ela Sorga. ²²Des olo pngabis deo ulun yo momba Aku: Tuhan, Tuhan, Belo be kain sundok ngulek yo anta terjadi makai karan-Ko ai ngusa uok makai karan Ko, ai mkeyo deo tanda ajaib diang makai karan Ko low? ²³Des ene low aku trus trang epo dero ai ngulek: Aku belo pini tau se ikam! Buyo ngket Aku, ikam eka-eka yo nampa dat!" ²⁴"Tongku ulun yo nempaning pemesara-Ku endo ai nggawi yo, io sama diang ulun yo bijaksana, yo nengkuat lou iyo ombon batu. ²⁵Laju diwa uran diang owa, ai brubu mitek lou ene, tapi lou ene belo di mokombe koe tnengkuat ombon batu. ²⁶Tapi tongku ulun yo kringo pemesara-Ku endo ai belo nggawi iyo, io sama diang ulun bungang, yo nengkuat lou iyo ban krisik. ²⁷Laju diwa uran diang ulet owa, ai brubu yo kono lou ene, jadi roros lou ene ai meroa rusak yo. ²⁸Des Yesus sundok ngesah ene, eran ngrengao ulun deo ene kringo tutui batuk-Iyo, ²⁹Koe Iyo nutui batuk dero kati ulun yo keo kuasa, belo di kati ahli-ahli Taurat dero.

Chapter 8

¹Sundok Yesus diwa ngket tunden, ulun deo ngelenduyun nyarak Io. ²Ulet erai kongo ulun yo roton kodong epo-Iyo, laju nyongkop nymbah Io ai ngulek: "Tuan, Ena Tuan kakan, Tuan kuli mkale aku." ³Yesus nyokoi kayang-Iyo, mulem ulun ene ai ngulek: "Aku kakan, Ale ka iko." Des ene peles ulun ene ale ngket roton kodong io ene. ⁴Sundok ene Yesus ngulek epon iyo: "Knop-knop iko, nang iko ngesah nau umbang endo epo ulun mak, tapi pkelak ko kompu tonga ko epo imam ai die ko prsmbahan kati yo snuyu koe Musa, nte bukti epo dero." ⁵Des Yesus sumba mbo Kapernaum, ulet erai kongo kmndan tntara nyruku Io ai tindu awat epo-Iyo: ⁶"Tuan, batak ku bgaleng ela lou koe roton pokung ai io ene ssa beta." ⁷Yesus ngulek epo iyo: "Aku nindo daro mkale iyo." ⁸Tapi tuing kmndan tntara ene epo-Iyo: "Tuan, Aku belo snaron nrima Tuan lang lou ku, ontus Ko ka erai buku pmnsara, jadi batak ku ene pasti ale. ⁹koe aku endo anak bua lou, ela iwat ku aso keo tntara yo pangkat io imbat aku. ena aku ngulek epo tntara yo pangkat io imbat aku ene: diduh iko!, io laju daro, diang epo yo mak aku ngulek: pondo iko!, Io ulet peles, ktine low epo batak ku aku ngulek: gawi ko endo! gnawi koe iyo." ¹⁰Sundok Yesus kringo otang ene, Io eran laju ngulek epo dero yo lumpat-Iyo: "Aku ngulek epo ikam, beta-beta yo ka, iman kolai endo belo Aku pini ruku mbo lang erai kongo ulun Israel." ¹¹Aku ngulek epo ikam: Deo ulun nindo ulet ngket timur ai barat ai tunge kuman kerai diang Abraham, Ishak diang Yakub mbo lang Krajaan Sorga, ¹²tapi anak-anak Krajaan ene ube noding epo lang awa yo seom ji, lane nindo keo ruku tangis diang rgigep kukut." ¹³Yesus ngulek epo kmndan tntara ene: "Uli ka iko, jadi ka mbo iko kati yo iko prsaya." Des ene peles ulun batak yo ene ale. ¹⁴Des dero sampe mbo lou Petrus, Yesus kito se ampu Petrus yo bawe bgaleng koe mekom. ¹⁵Io ngop tangan ulun bawe ene, laju ale peles mekom yo ene. io uat laju nglayan-Iyo. ¹⁶Desung dnia ilang ilot deo ulun moit epo Yesus ulun yo snumban uwok, diang erai buku pmsara Yesus ngusa roh-roh ene diang mkale ulun-ulun yo sesa koe roton. ¹⁷Umbang ene trjadi apa gnep lang pirman yo snampe koe nabi Yesaya: "Io ene nindo yo nantai siet smoleng taka ai mkale roton san taka." ¹⁸Des Yesus kito se deo ulun nglekum-Iyo, Io nyuyu btual epo mpai. ¹⁹Ulet apo erai kongo ahli torat laju ngulek epo-Iyo: "Guru, aku kakan lumpat Iko, epo mombe-mombe ka Iko bju." ²⁰Yesus ngulek epo iyo: "Sngkalaw ene keo liang ai mpulu keo salai, tapi Pea Ulun belo keo awa nte awa mayak utok-Iyo." ²¹Keo ulun yo mak, erai kongo ngket murit-Iyo, ngulek epo-Iyo: "Tuhan, kate be aku malan ile nte nglowong uma ku." ²²Tapi Yesus ngulek epo iyo: "Lumpat Aku ka iko, koe ka ulun-ulun mate nglowong ulun-ulun dero yo mate." ²³Sundok ene Yesus dombo epo lang praw diang murit-murit-Iyo lumpat-Iyo low. ²⁴Kolan-kolan ka se brubu ries mbo gntung sae ene, sampe praw dero ene tulung umbak, tapi Yesus desung turui. ²⁵Murit-murit-Iyo ngenduko Io, Ulek dero: "Tuhan, awat endo, taka sesa." ²⁶Io ngulek epo dero: "Ise moko ikam takut, ikam yo kurang prsaya?" Sundok ene Yesus uat laju nmpnger riut diang umbak ene, ngket ene riut diang umbak mbo gentung ene tno beta. ²⁷Ulun-ulun mne eran, ulek dero: "Ise jnis Ulun endo, moko panan riut ai gntung ngaya ba nte-Iyo?" ²⁸Des dero sampe mbo mpai, yo ene mbo dnia ulun Gadara, ulet ngket tadah kubur duo kongo ulun yo snumban uwok ngruku se Yesus. Dero ene prnges beta, koe ene ndok belo erai ulun keo ronulalo mbo boyan mne. ²⁹Dero nyoyar, ulek dero: "Ise urusan-Ko diang kain, O Pea Allah? Bahe Iko epo dido nte mssa kain onon se ampe des yo?" ³⁰Belo di oroh ngket awa dero mne keo jut kawan bawi desung meto nte okan. ³¹Setan-setan ene tindu epo-Iyo, ulek dero: "Ena Iko ngusa kain, suyu-Ko ka kain wensut epo lang kompu jut kawan bawi enduh." ³²Yesus ngulek epo dero: "Daro ka ikam!" sundok ene dero baling laju sumba epo lang kompu bawi-bawi ene. ngket ene bawi-bawi ene sntuyun ngket krbing epo lang gntung laju mate lian monsor. ³³Ulun-ulun yo ngnjaga bawi ene buyo, sampe dero mbo kota, dero ngesah nau umbang ene, ktine low nau umbang ulun-ulun yo snumban setan ene. ³⁴Ulun-ulun erai kota baling nyruku se Yesus, des dero ruku se Io, dero maksa apa Io oroh ngket dnia dero mne.

Chapter 9

¹Sundok ene dombo ka Yesus epo lang praw laju kentas. Trus sampe doko Io mbo kota-Iyo se. ²Jadi oit ulun ka doko epo-Iyo erai kongo ulun yo belo klian malan koe pokung yo bgaleng ban awa pnurui-iyu. Des Yesus kito iman dero, ngulek ka doko Io epo ulun pokung ene: "Persaya beta ka, o pea-Ku, dosa-ko sundok nampun." ³Jadi ngulek ka doko tenu-tenu kongo ahli-ahli Taurat lang kesong dero: "Io nguja Allah." ⁴Tapi Yesus tau kno dero, laju ngulek: "Ise moko ikam ngnanam yo triaw mbo lang kesong-kam? ⁵Ise llu yo paling sepel beta nte ulek: Dosa-ko sundok nampun, ena belo ngulek: Uat ka ai malan ka? ⁶Tapi apa ikam tau, se mbo dnia endo Pea Ulun keo kuasa nte ngampun dosa" - laju Io ngulek epo ulun pokung ene - : "Uat ka ai engkat awa pnurui-ko ai uli ka epo lou-ko!" ⁷Ai uat ka doko ulun ene laju uli. ⁸Jadi ulun deo yo kito nau ene takut laju ngmulia Allah yo sundok mie kuasa ktine ene epo ulun. ⁹Sundok Yesus malan ngket mne, Io kito se erai kongo ulun yo nan karan se Matius tunge mbo lou bea, laju Io ngulek epo-iyu: "Lumpat Aku ka." ¹⁰Jadi akat ka doko Matius laju lumpat Io. ¹¹Sundok ene des Yesus kuman mbo lou Matius, ulet ka doko deo pnage bea ai ulun dosa ai kuman sama-sama diang Io ai murid-murid-Iyo. ¹²Montuk des ulun Farisi kito nau ene, bsra ka doko dero epo murid-murid Yesus: "Ise moko guru kam kuman sama-sama diang pnage bea ai ulun dosa?" ¹³Yesus kringo ene laju ngulek: "Makse ulun slomai yo prlu dokter, tapi ulun kroton. ¹⁴Jadi malan aut ai bguru beta-beta atok firman endo: Yo pengkakan-Ku yo doko kesong kosang jadi makse prsmbahan, koe Aku ulet makse nte momba ulun yo kono enta, tapi ulun dosa." ¹⁵Sundok ene ulet ka doko murid-murid Yohanes epo Yesus ai ngulek: "Ise moko kain diang ulun Farisi puasa, tapi murid-murid-Ko belo?" ¹⁶Tuing Yesus epo dero: "Sngkono be nau iyo ena tman-tman pnganten song diang susah-susah kola-kola pnganten ene diang dero? Tapi anta sampe des yo pnganten ene nalek ngket dero bayu montuk des ene doko dero anta puasa. ¹⁷Ndok belo erai ulun nambal baju usang diang diris bayu, koe ena ktine diris pnambal ene anta nngrenset baju ene, jadi tambah sae rensset-iyu, Ktine low anggur yo bayu belo di natok epo lang kantong upak yo usang, koe ena ktine kantong ene anta rensset, jadi-iyu anggur ene bkoding ai kantong ene rusak low. Tapi anggur yo bayu ona ulun lang kantong yo bayu low, apa diang ktine belo keo yo rugi." ¹⁸Desung Yesus bsara ktine epo dero, ulet ka doko erai kongo pngutok blai smbayang, laju nymbah Io ai ngulek: "Pea-ku bawe bayu ka mate, tapi kompos aut ai payak ta kayang-Ko ban-iyu, apa io jadi bolum. ¹⁹Peles low beta Yesus akat ai nyarak ulun ene sama-sama diang murid-murid-Iyo. ²⁰Montuk des ene erai kongo bawe yo sundok duo blas taun roton bawe ngompoh Yesus ngket sori ai ngop tompak jubah-Iyo. ²¹Koe ulek-iyu lang kno-iyu: "Tontan bulem-ku tingen jubah-Iyo, aku anta ale." ²²Tapi Yesus skuleng ai meti io ulak ngulek: "Pturon beta-beta pngnanam-ko, o pea-Ku, iman-ko sundok nylamat iko." ²³Jadi ngket des ene ale beta doko bawe ene. ²⁴Des Yesus sampe mbo lou pngutok blai smbayang ene ai kito tukang main suling nte mbo pegenate ai ulun deo nangis nungul, ²⁵bsara ka doko Io: "Oroh-oroh ikam, koe pea endo mba di mate, tapi turui." ²⁶Tapi dero ngoka Io. ²⁷Sundok ulun deo ene nusa, Yesus sumba ai ngop tangan pea ene, laju uat ka doko pea ene. ²⁸Jadi sampe ka doko kabar nau umbang ene mbo lekum dnine mne. ²⁹Des Yesus nerus dalan-Iyo ngket lane, duo kongo ulun posa nyarak-Iyo ulak momba-momba, ulek dero: "Tngkosang-Ko ta kain, o Pea Daud." ³⁰Sundok Yesus sumba lang lou, ulet low duo kongo ulun posa ene ngompoh-Iyo ai Yesus ngulek epo dero: "Prsaya be ikam se Aku kuli mkale-iyu?" ³¹Dero nuing: "Oo Tuhan, kain prsaya." ³²Laju Yesus mulen mato dero ulak ngulek: "Jadi beta epo ikam kati iman kam." ³³Jadi kolat ka doko oli mato dero. Des ene low Yesus diang beta-beta keo pesan epo dero, ulek-Iyo: "Jaga beta apa nang keo ulun tau nau umbang endo." ³⁴Tapi dero baling ai ngesah nau umbang kbuen Io mbo lekum dnine mne. ³⁵Desung duo ulun posa ene baling, noit low epo Yesus erai kongo ulun pepe yo snumban uok. ³⁶Des sundok uok ene nusa, tau ka doko ulun pepe ene bsara. Jadi eran ka doko ulun deo ene, ulek dero: "Yo ktine ene belo pini itan ulun mbo Israel." ³⁷Tapi ulun Farisi ngulek: "Diang kuasa tuon uok Io ngusa uok." ³⁸Ktine beta Yesus malan nglekum epo eka-eka kota ai kampong; Io nutui matuk lang low-low awa smbayang ai nyampe Injil Krajaan Sorga ulak mkale eka masam roton ai siet smoleng. ³⁹Kito ulun deo ene, Yesus ulet kanam kosang kesong Yesus epo dero, koe dero mole ai belo di keo snanda kati domba yo belo keo pngamu. ⁴⁰Jadi ulek-Iyo epo murid-murid-Iyo: "Asil nte utik memang deo, tapi nte bgawi kurang. ⁴¹Koe ene tnindu beta-beta epo tuan yo mpun asil nte utik ene, apa Io ngirim pnggawi nte ngutik asil ene."

Chapter 10

¹Yesus momba duo blas murid-Iyo ai mie kuasa epo dero nte ngusa roh-roh triaw ai nte mkale eka masam roton ai siet smoleng.²Endo doko karan duo blas rasul ene: Yo tla Simon yo nulek Petrus ai Andreas eraibuntung-iyoy, ai Yakobus pea Zebedeus diang Yohanes eraibuntung-iyoy,³Filipus ai Bartolomeus, Tomas ai Matius pnage bea, Yakobus pea Alfeus, ai Tadeus,⁴Simonulun Zelot ai Yudas Iskariot yo nyrah-Iyo.⁵Duo blas murid ene suyu Yesus ai Io keo pesan epo dero: Nang beta ikam siat epo boyan bangsa yo mak ktine low sumba epo lang kotaulun Samaria,⁶tapi malan ka epo domba-domba yo mapos ngket ulun-ulun Israel.⁷Malan ai snampe beta-beta: Krajaan Sorga sundok dmpet.⁸Pinokale betaulun krotan; pinonyuli betaulun mate; pinokale betaulun roton kodong; nusa beta uok-uok. Ikam sundok kuli ene diang dnien tingen, koe ene die low diang die tingen.⁹Nang beta ikam moit mas, pirak, tmbaga lang bolit towing kam.¹⁰Nang beta ikam moit nguyu nyarak boyan, nang beta ikam moit baju sloar duo pasang, trumpak pan goloi, koeulun bgawi arus kuli upa-iyoy.¹¹Ena ikam sumba kota ktine low kampong, etoka mbo mneulun yosngkono ai nongos ka diang-iyoy sampe ikam brangkat.¹²Ena ikam sumba louulun, die ka salam epo dero.¹³Ena dero sngkono nrima-iyoy, salam-ko ene diwa ombon dero, ena belo, salam-ko ene mulik epo iko se.¹⁴Jadi enaulun belo nrima ikam ai belo di nmpaning pmnsara kam, baling ka ai dikah ka lou ai kota ene ai tompus ka bondul-iyoy ngket botis kam.¹⁵Aku ngulek epo ikam: Se beta-beta-iyoy ka des olo kiamat tana Sodom diang Gomora anta aso mean ukuman-iyoy se kota ene.¹⁶”Eti, Aku nyemuyu iko kati domba epo ekang sengkalau, koe ene arus yoy iko serdik kati nipyoy ai buen kesong kati dara.¹⁷Tapi ati-ati epo eka-ekaulun; koe keoyoy kakan nyerah iko epo majelis agama ai dero anta ngesa iko lang lou ibadat dero.¹⁸Ai koe Aku, iko anta pnatak epo onon pnguasa-pnguasa ai raja-raja nte bukti nte dero ai ulun-ulun yoy belo tau se Allah.¹⁹Ena dero nyerah iko, nang ka iko water anta ktimbe ai ise yoy arus nte ngko ulek, koe eka-ekane anta dnien epo iko des ene low.²⁰Koe makse iko yoy bsara, tapi Roh Bapak ko; Io anta yoy bsara lang iko.²¹Ulun anta nyerah erai buntung iyo nte pate, ktine lou uma anta epo pea iyo. Ai bang pea anta nglawan ulun tuo iyo ai anta ngempate dero.²²Ai ikam anta knekey koe eka-ekaulun koe karan-Ku; tapi ulun yoy btahan sampe pnyundok yoy pasti slamat.²³Ena dero ngurow ngesa iko lang kota yoy erai, buyo epo kota yoy mak; koe Aku ngulek epo iko: Sebetyoy iko belo pian sundok nuntun kota-kota Israel,Pea Ulun sundok ulet.²⁴Erai murid belo anta lengkat se guru iyo, ene low batak ngket tuan iyo.²⁵Sukup ka nte murid ena ioy jadi sama kati guru iyo ai batak ena sama kati tuan iyo. Ena mpu lou nulek Beelzebul, aso da atok low iyo.²⁶Jadi nang ka ikam takut se dero, koe ndok belo erai yoy btokom ene anta belo anta belo ningkan ai ndok belo erai yoy melim ene anta belo tinonoan.²⁷Ise yoy ulek Ku epo ikam lang seom, ulekka ene lang pa; ai ise yoy knonis epo tlingo kam, sampe ka ene ngket ombon sapo.²⁸Ai nang ka ikam takut se dero yoy kuli ngempate kompu, tapi belo keo kuasa nte ngempate nyawa; tnakutka epo Io bute yoy keo kuasa nte ngempate nyawa diang kompu mbo lang nraka.²⁹Belo be mpit jnual duo kikuy erai duit? Tapi ndok belo erai kikuy yoy toyak epo tana ena belo koe ptua Bapa ko.³⁰Ai iko, balo mbo utok ko low sundok nitung eka.³¹Koe ene nang ka ikam takut, koe ikam aso rarang se mpit deo.³²Tongku ulun yoy ngangkan se Aku mbo onon sama ulun, Aku ngangkan ioy low mbo onon Bapa-Ku yoy mbo sorga.³³Tapi ise yoy belo ngangkan se Aku mbo onon sama ulun, Aku low belo ngangkan se ioy mbo onon Bapa-Ku yoy mbo sorga.”³⁴”Nang iko ngontus, se Aku ulet nte moit pmekat mbo dnia; Aku ulet belo di nte moit pmekat, tapi mendau.³⁵Koe Aku ulet nte nyeing ulun ngket uma iyo, pea bawe ngket ine iyo, nantu bawe ngket ampu bawe iyo,³⁶ai musu ulun ene ulun-ulun erai low iyo.³⁷Ise-ise yoy kosang diang ine uma iyo lengkat se epo Aku, ioy belo sengkono nte Oki; ai ise-ise yoy kosang epo pea yoy song ai bawe lengkat se epo Aku, ioy belo sengkono nte Oki.³⁸Ise-ise yoy belo moson salib iyo ai lumpat Aku, ioy belo sengkono nte Oki.³⁹Ise-ise yoy nahan kesong iyo,iyo anta mapos kesong iyo, ai ise-ise yoy mapos kesong iyo koe Aku, ioy anta kuli iyo.⁴⁰Ise-ise yoy nrima ikam, ioy nrima Aku, ai ise-ise yoy nrima Aku, ioy nrima Iyo yoy nyemuyu Aku.⁴¹Ise-ise yoy nrima nabi kati nabi, ioy anta nrima upa nabi, ai ise-ise yoy nrima ulun yoy kono kati ulun kono, ioy anta nrima upa ulun kono.Ai ise-ise yoy mie danum roni erai sangkir tingen epo erai kongo ulun biasa endo, koe ioy murid-Ku, Aku ngulek epo ikam: Sebetyoy ioy belo anta mapos upa yoy ngket iyo.”

Chapter 11

¹Des Yesus sundok mie pesan epo duo blas murid-Iyo, malan Io ngket lane epo nutui matuk ai nyampe Injil lang kota-kota dero.² Lang sper Yohanes kringo nau gawi gata Kristus,³ Laju nymuyu murid-murid-Iyo ngunti epo-Iyo: "Iko be yo anta ulet ene ena belo arus be kain minte ulun yo mak?"⁴Yesus nuing dero: "Malan ka ia ulek ka epo Yohanes ise yo dingo kam ai itan kam: ⁵ Ulun posa kito, ulun pokung malan, ulun kodong jadi ale, ulun simpong kringo, ulun mate tinom bolum ai epo ulun kao snampe kabar buen. ⁶ Ego bah ulun yo belo di noli ai belo di nolak Aku."⁷Des murid-murid Yohanes malan, mulai doko Yesus ngesah epo ulun deo ene nau Yohanes: " nte ise ikam malan epo padang gurun? meti bulu yo guwai guwai kukui riut ? ⁸jadi Nte ise ikam malan? meti ulun yo spakai buen? ulun yo spakai buen ene awa io mo istana raja.⁹Nte ise ikam malan? meti nabi? beta, ai Aku ngulek epo ikam, aso lengkat se nabi. ¹⁰ Koe nau umbang io keo tnulis:Eti ka, Aku nymuyu wakei-Ku ono se Iko, io anta ngraduh boyan-Ko, onon-Iko.¹¹Aku ngulek epo ikam sebetayo keo ngket dero yo kinomekus koe bawe belo pini nyoret erai ulun yo olai se Yohanes pembaptis, tapi yo paling idi lang krajaan sorga, aso olai se io. ¹²ngket pngnyoret Yohanes Pembaptis nok tempo ndo, krajaan sorga bnelok ia ulun yo ngembelok ene nyoba bskaku. ¹³Koe eka nabi ai kitab taurat nyampe pentau Tuhan nok pngenyoret Yohanes ¹⁴ ai- ena ikam kakan nrima-io - ene doko Elia yo anta ulet ene. ¹⁵ Ise keo tlingo, io arus nmpaning!¹⁶Diang ise anta Aku mmerawet nau pokan endo? Dero ene sama kati pea-pea yo tunge la pakot ai momba tman-tman dero: ¹⁷ Kain nyiup suling nte ngkam, tapi ikam belo nuyo, kain nglagu legu luwai, tapi ikam belo nangis nyoru.¹⁸Koe Yohanes ulet, io belo kuman, ai belo isop ai dero ngulek: Io snumban uwok. ¹⁹ Nua Pea Ulun ulet, Io kuman ai isop, ai dero ngulek: eti ta, Io Ulun galak kuman, ai pngisop, tman pnage beo ai ulun dosa. Tapi hikmat Allah sinongkono koe gawi ene."²⁰Laju Yesus mulai mtegur kota-kota yo belo btobat, walau mne Iyo paling deo nampa mujizat-mujizat-Iyo: ²¹ "ssa beta iko Khorazim! ssa beta iko betsaida! koe ena mo tirus diang mo sidon jadi mujizat-mujizat yo sundok jadi mo ekang ikam, sundok ola dero btobat ai nangis nyoru. ²² Tapi Aku ngulek epo ikam: des olo kiamat, tanggung Tirus diang Sidon anta mean se ukuman ko. ²³ Ai iko kapernaum, anta be iko pinokombo sampe langit? Belo, iko anta pinodiwa sampe dnia ulun mate! koe ena mo sodom jadi mujizat-mujizat yo sundok jadi la ekang ikam, kota ene aso tngkorong sampe olo ndo. ²⁴ Tapi Aku ngulek epo ikam: des olo kiamat, ukuman sodom ene anta aso mean se ukuman kam."²⁵Des ene ngulek Yesus: Aku ngulek sukur epo-Iko, Bapa, Tuhan langit ai dnia, koe eka eka ene ona-Ko nte ulun paham ai pintar, Tapi Iko mkelak epo ulun ulun biasa. ²⁶ Ya Bapa,ene doko yo sngkono mo Iko. ²⁷ Eka sundok snrah epo- Aku koe BapaKu ai nok belo erai kongo ulun yo tau se Pea makse Bapak bute nok belo erai kongo ulun yo tau se Bapak makse Pea bute ai ulun yo epo io Pea ene sngkono kesong mmekelak yo.²⁸Dido ngompoh Aku, eka yo mole lokoi ai pnyekoit boyat, Aku anta miye moang epo iko. ²⁹ Noson beta pngelambar yo payak-Ku ai bguru epo Aku, koe Aku belo di kois koroi ai buen kesong apa pnymbolum ko kuli tnang. ³⁰ Koe pngelambar yo payak Ku ene buen kanam ai pnyekoit-Ku lou mean.

Chapter 12

¹Des jman ene, montuk olo Sabat, Yesus malan mbo umo gandong. Koe slau, murid-murid Iyo ngutik bua gandong ai kuman iyo. ²Kito ene, bkesah doko ulun-ulun Farisi epo-Iyo: "Eti Ko ta, murid-murid Ko keo gawi yo kinondion des olo Sabat." ³Tapi tuing Yesus epo dero: "Belo be ikam ngebaca ise yo gnawi koe Daud, des io diang dero yo nyarak iyo slau, ⁴timbe nau io sumba lang lou Allah ai timbe nau dero kuman roti nurai yo belo kate nokan, nte iyo ai diang dero yo nyarak iyo, ena belo koe imam-imam? ⁵Ktine low, belo be ikam ngebaca lang kitab Taurat, se des olo-olo Sabat, imam-imam ngelanggar ukum Sabat lang Bait Allah, tapi belo di sala? ⁶Aku ngulek epo ikam: Ela mendo keo yo ngombo se Bait Allah. ⁷Ena memang ikam paham ptua firman endo: yo PengkakanKu yo ene pngosang ai makse persembahan, pasti ikam belo di ngukum ulun yo belo di sala. ⁸Koe Pea Ulun ene doko Tuhan ombon olo Sabat." ⁹Des malan ket lane, Yesus sumba lang lou sembayang dero. ¹⁰Ela mne keo erai kongo ulun yo pate bika tangan iyo. Dero ngunti diang Iyo: "Kate be mengkale ulun montuk olo Sabat?" Ptua dero ene apa kuli memesala Iyo. ¹¹Tapi Yesus ngulek epo dero: "Ena erai kongo ngket ikam keo domba ai domba ene latu lang luang montuk olo Sabat, belo be io nangop ai nembaling iyo? ¹²belo be ulun pawak rarang se uman domba? Koe ene kate keo gawi buen mbo olo Sabat." ¹³Trus ulek Yesus epo ulun ene: "Sokoi ta tangan ko!" peles io nyokoi, langsung ale tangan iyo, jadi ale kati tangan yo bika. ¹⁴Laju baling doko ulun-ulun Farisi ene ai bpekat nte ngempate Iyo. ¹⁵Tapi Yesus tau kno dero peles Iyo makat ngket lane. Deo ulun yo nyarak Yesus ai Io mkale eka-eka dero. ¹⁶Io diang bol-bol ngusan dero memetau ise Io ene, ¹⁷apa pinognap firman yo snamepe koe nabi Yesaya: "Eti ka, ene Batak-Ku yo pili Ku, yo tengkosang Ku, yo epo yo kesong Ku sengkono; Aku anta mayak roh-Ku mbo-Iyo, ai Io nyengkono ukum epo bangsa-bangsa. ¹⁸Io belo anta selentuing ai belo anta keo oyon ries ai ulun belo anta kringo oyon-Iyo ela boyan-boyan. ¹⁹Bulu yo tepok blopek belo anta di tembekat-Iyo, ai sumbu yo idik dolan yo belo di anta plensop-Iyo, sampe Io nampa ukum ene kuret. ²⁰Ai epo Iyo doko anta bangsa-bangsa ngarap. ²¹Sundok ene doko noit erai kongo ulun yo snumban uok epo Yesus. Ulun ene posa ai pepe, laju Yesus mkale iyo, peles low ulun ene bunyal ai kito. ²²Ulun deo yo keo mbo mne jadi eran, laju ngulek: "Io endo ungka yo Pea Daud. ²³Tapi des ulun Farisi kringo ene, dero ngulek: "Diang Beelzebul, tuon uok, Io ngusa uok. ²⁴Tapi Yesus tau akal dero, laju ngulek epo dero: "Tongku-tongku krajaan yo sangko lawan diang erai-erai pasti ancur ai tongku-tongku kota ktine low pngempanan yo sangko lawan diang erai-erai belo anta tahan ola. ²⁵Ene low doko ena iblis ngusa iblis, io tbagi-bagi low ai nglawan iyo se; timbe nau krajaan iyo kate btahan? ²⁶Jadi ena Aku ngusa setan diang kuasa Beelzebul, diang kuasa ise murid-murid kam ngusa iyo? Koe ene dero ka yo anta jadi pmutus ngkam. ²⁷Tapi ena Aku ngusa uok diang kuasa Roh Allah, sebata yo Krajaan Allah sundok ulet epo ikam. ²⁸Ktine low ktimbe nau ulun sumba lang lou ulun galak ai ngrampas pengkeo iyo, ena belo bnolit ile ulun yo galak ene? sundok bnolit ile bayu kuli ngrampas lou ene. ²⁹Ise yo belo diang Aku, io nglawan Aku ai ise yo belo di nembun sama-sama diang Aku, io ngoker. ³⁰Koe ene Aku ngulek epo ikam: Eka dosa ai uja ulun nampun, tapi nguja Roh Kudus belo anta nampun. ³¹Ena ulun bunyal yo nglawan Pea Ulun, io nampun, tapi ena io nglawan Roh Kudus, io belo anta nampun, ela dnia endo belo, ai dnia yo anta ulet belo low. ³²Ena keo tonga kayu yo ulek ko buen, pasti buen low bua yo; ena keo tonga kayu yo ulek ko dat, pasti dat low bua yo. Koe ngket bua yo tonga kayu ene ulun tau. ³³O ikam yo upus nipo muro, timbe nau kam kate bunyal nau umbang yo buen, ena ikam se yo dat? Koe yo baling ngket bowa ene nyoret ngket kesong. ³⁴Ulun yo buen nembaling nau umbang yo buen ngket awa pngona yo buen ai ulun yo dat nembaling nau umbang yo dat ngket awa pngona yo dat. ³⁵Tapi Aku ngulek epo ikam: Tongku bunyal yo belo otang yo nulek koe ulun ene arus tnggung montuk olo kiamat. ³⁶Koe kati pemesara kam, ikam pinokono, ai koe kati pemesara kam low ikam anta nukum. ³⁷Des ene tenu-tenu kongo ahli Taurat diang ulun Farisi ngulek epo Yesus: "Guru, kain kakan kito nau tanda ngket Iko." ³⁸Tapi tuing Iyo epo dero: "Pokan yo triaw ai belo stia endo tindu tanda. Tapi epo dero belo anta dnine tanda yo mak se tanda nabi Yunus. ³⁹Koe kati Yunus lang buntung esa tolu olo tolu malom, ktine lou Pea Ulun tolu olo tolu malom lang tana. Des jman kiamat, ulun-ulun Niniwe anta nyuli sama-sama diang pokan endo ai ngukum iyo low. Koe ulun-ulun Niniwe ene btobat des kringo kabar ngket Yunus, sebata yo mbo mendo keo yo lengkat se Yunus! Des jman kiamat, ratu ngket selatan ene anta nyuli sama-sama diang pokan endo ai io anta nukum iyo low. Koe ratu endo ulet ngket tompak dnine nte nempaning hikmat Salomo, sebata yo mbo mendo keo yo lengkat se Salomo!" ⁴⁰Ena roh triaw baling ngket ulun, io nyabu ka oli epo awa-awa yo tana dat meto awa nongos. Tapi io belo di ruku. ⁴¹Laju io ngulek: Aku anta mulik nua epo lou yo sundok dikah ku ene. Malan doko io ai ruku low ene osaw, brese snapu ai natur buen. ⁴²Laju io baling diang moit turu roh yo mak yo triaw aso se io trus dero sumba peles nongos mne. Pnyundok yo nau ulun ene tambah triaw ngket nau yo ono. Ktine low anta pengkono pokan yo triaw endo. ⁴³Des Yesus aso bkesah diang ulun deo ene, Ine-Iyo diang erai buntung-erai buntung Iyo akat ela baling ai bkomer ngruku Iyo. ⁴⁴Erai kongo ngulek diang Iyo: "Eti Ko ta, ine-Ko diang erai buntung-erai buntung Ko keo ela baling ai bkomer ngruku Iko." ⁴⁵Tapi tuing Yesus epo

ulun yo nyampe kesah ene epo Iyo: "Ise ine-Ku? ai ise erai buntung-erai buntung Ku?" ⁴⁹Bayu Iyo ngulek, ulak nutui epo tadah murid-murid Iyo: "Ndo ine-Ku ai erai buntung-erai buntung Ku! ⁵⁰Koe ise-ise yo nggawi ptua Bapak-Ku ela Sorga, iyo ene erai buntung Ku song, iyo ene erai buntung Ku bawe, iyo ene ine-Ku."

Chapter 13

¹Des olo ene Yesus baling ngket lang lou ene laju tunge mbo isan gntung. ²Deo ulun ulet bloyun-loyun nglekum-Iyo, koe ene Io dombo epo lang prau laju tunge mbo mne, tapi ulun-ulun deo ene eka-eka yo akat mbo nyarak diwe. ³Io deo nutui matuk dero diang mrawet nau enah enduh epo dero. Ulek-Iyo: "Ulun yo tukang skulo ene baling nte skulo. ⁴Des jman yo nabur bini, bini oit io ene keo tenga yo latu mbo nyarak boyan, laju ulet mpulu nungka kuman yo ndok eka. ⁵Keo tenga yo latu mbo dnia yo jut batu, yo belo di beka keo tana yo, bini ene kate se moti koe keo bgamat idik2 tana yo. ⁶Tapi des mato olo melak, yo layo laju pnyundok yo krep koe belo keo wakat. ⁷Keo tenga yo latu mbo lang orop, orop ene tambah mroa nylingu oti ene turai pate. ⁸Ai keo low yo latu mbo tana buen kate sampe kbua: keo yo kate ngasil jatus lipat, keo yo onom pulu lipat, keo yo tolu pulu lipat. ⁹Ise yo keo tlingo, moko yo io nmpaning!" ¹⁰Murit-murit-Iyo ulet laju ngunti epo-Iyo "Ise moko Iko nutui matuk dero diang pmrawet?" ¹¹Tuing Yesus: "Epo ikam sundok dnine krunia nte tau rasia Krajaan Sorga, tapi epo dero belo. ¹²Koe ise yo keo, epo io anta dnia sampe ruak ruau; tapi ise yo belo keo ise2, ise yo keo mbo io nalek eka. ¹³Koe ene doko Aku ngulek diang pmrawet epo dero; koe beta ko dero meti, dero ene belo di kito, koe dero nmpaning, dero ene belo di kringo ai belo tau rti. ¹⁴Epo dero ene gnep nuuat Yesaya, ktindo otang iyo: Dero ene dor nempaning tapi belo tau unong; dero ene dor kito, tapi belo tau rti. ¹⁵Koe kesong ulun-ulun endo sundok buntat, ai tlingo dero boyat nte nempaning, diang mato dero pinoringit; apa belo dero meti diang mato dero, belo nempaning diang tlingo dero ai belo tau unong diang kesong dero, nte dero skuleng apa Aku mmkale dero. ¹⁶Tapi untung beta mota kam yo kito, diang tlingo kam yo kringo ¹⁷Koe Aku ngulek epo ikam: Sbeta yo deo nabi diang ulun-ulun buen kakan kito kati pngkito kam, tapi dero belo kito, ai kakan kringo kati kati pngkingo kam, tapi belo dero kringo. ¹⁸Koe ene tempaning kam rti pmrawet nau umbang ulun tukang skulo ene. ¹⁹Epo tongku ulun yo nempaning pirman umbang krajaan sorga, tapi belo tau unong, ulet yo tuju gawi triau laju ngalek ise-ise yo sundok nulo lang kesong dero; yo ene bini yo toyak mbo nyarak boyan. ²⁰Bini yo tnias mbo dnia jut batu, yo ene ulun yo nempaning pirman ene laju nrima yo diang pngnanam ego. ²¹Tapi iyo belo kate tumbu wakat ai belo kate tahan ola. Ena ulet sngsara ai kono ptunjol koe pirman ene, peles ulun ene murtad. ²²Bini yo toyak mbo tenga orop ene, kati ulun yo nmpaning pirman, tapi water diang nau pnymbolum dero ai kakan bolum srba, nyngkatel pirman ene nampa belo tau keo bua. ²³Yo tnias mbo tana buen yo ene ulun yo nmpaning pirman ene ai tau rti iyo, koe ene yo keo bua, keo yo jatus lipat, keo yo onom pulu lipat, keo yo tolu pulu lipat. ²⁴Yesus ngesah nau pmrawet yo mak nua epo dero, ulek Iyo: "Umbang Krajaan Sorga ene kati ulun yo nabur bini yo buen mbo umo iyo. ²⁵Tapi des desung eka ulun turui, ulet bali iyo nabur bini dikut mbo ekang gandong ene, laju buyo. ²⁶Des gandong ene tumbu ai mulai baling bua, melak low dikut ene. ²⁷Batak-batak ulun yo keo umo ene ulet epo iyo ai ngulek: Tuan, bini buen apo, yo ulu tuan mbo umo ene? ngket mbe dikut ene? ²⁸Tuing tuan ene, 'keo bali ku yo keo gawi ene. Batak-batak ene ngulek epo iyo: kakan be tuan apa kain epo ngukat dikut-dikut ene? ²⁹Tapi iyo ngulek: Koyoh ka, koe gandong ene tau lumpat rukat montuk ikam ngukat dikut ene. ³⁰Koe ka sama tumbu mne sampe des jman nte ngani. Des ene aku ngulek epo tukang ngani: Kumpul kam ile dikut ene, binorokos nte tuna; sundok ene kumpulkam gandong ene epo lang longkongku. ³¹Yesus ngesah nau pmrawet yo mak nua epo dero, Ulek Iyo: "Umbang Krajaan Sorga ene kati bigi jabung, yo nalek laju tnabur mbo umo iyo. ³²Bigi jabung ene bini yo paling alus, tapi ena sundok tumbu, jabung ene paling olai ngket pnykulo jnis deli yo mak, yo jadi keo tonga, sampe mpulu-mpulu ulet nampa salai mbo paka-paka yo. ³³Diang Iyo ngesah low umbang pmrawet ktindo epo dero: "Umbang Krajaan Sorga ene kati kompil roti yo nalek koe ulun bawe laju bnobo diang jlpong gandong opat pulu liter sampe kmbong beta. ³⁴Eka-eka ene ptutui batuk Yesus epo ulun deo diang pmrawet, ndok belo erai Iyo keo nutui matuk dero ena belo diang pmrawet, ³⁵Apa gnep pirman yo snampe koe nabi: "Aku kakan ngingkang bowa-Ku diang pmrawet, Aku kakan ngulek umbang yo melim ngket dnine nampa. ³⁶sundok ene Yesus malan ngket ulun deo ene, sumba epo lang lou. Murit-murit-Iyo ulet ai ngulek epo-Iyo: "Jelas ko epo kain pmrawet umbang dikut mbo umo ene." ³⁷Io nuing, ulek-Iyo: "Ulun yo nias bini buen yo ene Pea Ulun; ³⁸umo ene dnine endo. Bini yo buen ene pea-pea Krajaan ai dikut ene pea-pea yo triau. ³⁹Bali yo nabur bini dikut yo ene iblis. Jman nte ngani ene olo balik bekat, ai yo tukang-tukang ngani ene mlekat. ⁴⁰Kati dikut-dikut yo knumpul laju tnuna epo lang api, ktine low des jman olo balik bekat anta. ⁴¹Anta Pea Ulun nyuyu mlekat-mlekat-Iyo, dero ngumpul ise-ise yo nampa tang ai eka ulun yo gawi triaw ngket lang krajaan-Iyo. ⁴²Eka-eka dero noding epo lang bliku api; mbo lane dero nangis nontoi diang ngrigep kukut. ⁴³Des ene ulun-ulun buen brse anta keo pa kati pa olo lang Krajaan Bapa dero. Ise yo keo tlingo, moko yo nte nempaning!" ⁴⁴Umbang Krajaan Sorga ene kati rta yo nruku koe ulun lang tana, ona koe yo nua lang tana ene. koe kanam ego yo ngenjual eka-eka pngkeo iyo nte moli tana ene. ⁴⁵Ktine low umbang Krajaan Sorga ene kati erai kongo ulun tukang dagang yo meto mutiara yo buen nau. ⁴⁶Des sundok ruku mutiara yo uman yo larang, io ngjual ndok eka pngkeo iyo nte moli mutiara ene. ⁴⁷Ktine low umbang Krajaan Sorga ene kati

rengge tasik yo noseng mbo tasik, laju kuli bmasam jnis esa. ⁴⁸Des sundok punet, rengge ene dnurut epo diwe, dero tunge ngumpul esa yo buen epo lang pti tong, esa yo belo buen oding dero. ⁴⁹Ktine low mbo pnyundok dnia: Mlekat-mlekat ulet nte ngmakse ulun akal triau ngket ulun buen, ⁵⁰bayu moding ulun yo triau epo lang bliku api; mbo lane keo tangis tontoi diang ngrgigep kukut. ⁵¹Unong be ikam eka-eka ene?" Dero nuing: "O,o kain unong." ⁵²Yesus ngulek epo dero: "Koe ene tongku ahli Torat yo kuli ptutui batuk ngket umbang Krajaan Sorga ene kati ulun mpu lou yo nembaling rta yo bayu diang yo usang ngket lang pnykona iyo. ⁵³Sundok Yesus ngesah nau pmrawet-pmrawet ene, Iyo malan ngket awa mne, ⁵⁴Sampe Iyo mbo kota-Iyo, Yesus nutui matuk ulun-ulun mbo mne lang lou ibadat dero. Dero eran laju ngulek: "Ngket mbe yo kuli pntau ene ai kuasa nte nampa mujisat-mujisat ene? ⁵⁵Mak be Iyo ene pea tukang kayu? Mak be ine Iyo yo karan se Maria diang erai buntung- erai buntung-Iyo: Yakobus, Yusuf, Simon ai Yudas? ⁵⁶Ai mba be erai buntung - erai buntung Iyo yo bawe keo litak lituk ekang taka? Jadi ngket mbe Iyo kuli eka-eka ene. ⁵⁷Dero belo sngkono kesong laju nolak se Iyo. Yesus ngulek epo dero: Nabi ene hormat ulun mbo mone-mone, belo ube mbo dnia iyo se ai lang lou blai iyo se." ⁵⁸Koe dero belo prsaya, belo deo mujisat tampa-Iyo mbo mne.

Chapter 14

¹Des ene sampe doko pamusara-pamusara nau umbang Yesus epo Herodes, raja mbo denia mne. ²Trus io ngulek epo prewa-prewa io: "Ndo doko Yohanes tukang baptis; io sundok nyuli ngket ekang ulun mate ai ene doko tukuniyo kuasa-kuasa ene keo gawi mbo lang -Iyo."³Koe onon ene Herodes sundok nyemuyu nangop Yohanes, mansongiyo ai nguongiyo lang sper, koe keo tukun diang Herodias, bawe Filipus erai buntungiyo. ⁴Koe Yohanes pini ngaeiyo, ulekiyo: "belo kate iko nembawe Herodias!" ⁵Herodes kakan ngempateiyo, tapi io takut se ulun deo yo nganggap se Yohanes ene nabi. ⁶Tapi des olo ulang taun Herodes, nuyo ka doko pea bawe Herodias mbo ekang dero ai mesenang kesong Herodes, ⁷sampe Herodes berputus anta miye epo io ise ka pninduiyo. ⁸Jadi des sundok suyu ineiyo, pea bawe ene ngulek: "Die ko ta aku mndo utok Yohanes tukang baptis ene ombon par talam." ⁹Laju nyoru ka kesong raja, tapi koe io sundok berputus ai koe peri-periyo suyuiyo ka oli nte miyeiyo. ¹⁰Io nyemuyu ngempung utok Yohanes mbo sper ¹¹ai utok Yohanes ene lou oit ulun ban par talam, trus dnie epo bawe ngelok ene ai io moitiyo epo ineiyo. ¹²Sundok ene ulet ka murid-murid Yohanes tukang baptis ene ngalek antuiyo ai nglowongiyo. Laju dero brangkat memetau ene epo Yesus. ¹³Sundok Yesus kringo kabar ene makat Io ngket mne, ai kakan bedeing iyo ba diang peraw epo awa yo belo rame. tapi ulun deo kringo ene ai nyarak Io ngelalo te-te boyan tana ombo ngket kota-kota dero. ¹⁴Des Yesus sungket epo tana ombo, Io kito ulun deo beta, jadi timbul ka doko pengananam kosang epo dero jadi Io mkale dero yo kroton.Desung ilang ilot, murid-murid-Iyo ngompoh Io ai ngulek: "awa endo deing ai denia mulai seom. Suyu Ko ta uli ulun deo ene apa dero kuli moli nte dero okan mbo kampung-kampung." ¹⁵Tapi ulek Yesus epo dero: "Belo di koyoh dero uli, ikam arus makan dero." ¹⁶Tuing dero: "Yo keo mbo kain mendo puluniyo limo bis jaja, ai duo kukuy esa." ¹⁷Yesus ngulek: "Oit kam ta dido epo Aku." ¹⁸Laju suyu Io ulun deo ene tunge ban dikut. Ai sundok Io ngalek limo bis jaja ai duo kukuy esa ene, Yesus nyonda epo langit ai mengulek berkat, trus ngrinsi-ngrinsi jaja ene ai mieiyo epo murid-murid-Iyo, trus murid-muridIo ngmbagi ene epo ulun deo. ¹⁹Ai dero kuman ndok boting. Sundok ene ulun ngumpul bas bis roti yo kasan, duo blas kepit ponu. ²⁰Yo lumpat kuman kira-kira limo ribu kongo bang song, belo pian bang bawe ai pea-pea. ²¹Sundok ene Yesus nyemuyu resi-resi murid-murid-Iyo dombo epo lang praw ai ono se Io epo mpai, des ene Io nyemuyu ulun deo ene uli. ²²Ai sundok ulun deo ene suyu-Iyo uli, Yesus dombo epo usuk tunden nte bedoa sederai. Des denia sundok malom, Io ba-ba la mne. ²³Peraw murid-murid-Iyo sundok tenu-tenu mil koroiyo ngket pantai ai goling giloi koe umbak, koe wayat sakal. ²⁴Kira-kira jam tolu malom ulet ka doko Yesus epo dero malan ban danum. ²⁵Des murid-murid-Iyo kito se Io malan ban danum, dero tekojet ai besara ries: " Nduh uwok!", trus dero nyoyar-nyoyar koe takut. ²⁶tapi resi Yesus ngulek epo dero: "tnang ka ikam! Aku endo, nang takut!" ²⁷Laju Petrus besara ries ai nuing Io: "Tuhan, ena Iko ene, suyu ta aku ngompoh Iko malan ban danum." ²⁸Ulek Yesus : "kompoh ka! " Jadi Petrus diwa ngket praw ai malan ban danum ngompoh Yesus. ²⁹Tapi des io kiso kanam tapi riyut, io jadi takut ai mulai lotong laju nyoyar: "Tuhan, awat ta aku!" ³⁰Peles Yesus nyokoi tangan- Iyo, ngop io ai ngulek: "O ulun kurang persaya, ise moko iko water?" ³¹Laju dero dombo epo lang praw ai riut lou jadi teno. ³²Ai ulun-ulun io keo mbo peraw nyembah Io, Sebetaiyo Iko Pea Allah." ³³Des ampe ela mpai dero sungket mbo Genesaret. ³⁴Des ulun-ulun mne tau se Yesus , dero nyampe kabar ene epo pupus ja mne. Jadi eka ulun yo kroton noit epo-Iyo. ³⁵Dero tindu apa kate mulem tompak jubah-Iyo. Jadi eka ulun yo mulem-Iyo jadi ale.

Chapter 15

¹Sundok ene ulet doko tenu-tenuulun Farisi diang ahli Torat ngket Yerusalem epo Yesus ai ngulek.² Ise mko murid-murid-Io nglanggar adat istiadat itak kakah taka? Dero belo mui kayang des onon kuman."Tapi tuing Yesus epo dero: "Ise mko ikam lou nglanggar suyu Allah koe adat istiadat itak kakah kam?"Koe Allah befirman: Tunduk diang ine uma ko; ai nua: Ise yo mator nyumpah ine uma yo pasti kono ukum pate.⁵Tapi ikam ngulek: Ise-ise yo ngulek epo ine uma yo: Ise yo keo ela aku yo dapet pnakai nte nmbolum ngko, sundok pnakai nte die sokoi epo Allah,⁶ulun ene belo kotoh oli tunduk epo ine uma yo. Diang ktine firman Allah mbo ikam belo pnakai koe adat istiadat kam se.⁷O ulun pura-pura persaya! Beta doko ulek Tuhan tete Yesaya nau umbang kam:⁸Bangsa endo ngmulia Aku diang biwi bowa yo, pdahal kesong yo oroh ngket Aku.⁹Belo keo jodo dero smbayang epo-Aku, pdahal tutui batuk yo tutui batui dero ene ptua ulun."¹⁰Laju Yesus momba ulun deo ai ngulek epo dero:

¹¹"Tempaning ai knanam beta: makse yo sumba lang bowa yo nglonsa ulun, tapi yo baling ngket bowa, ene dko yo nglonsa ulun."¹²Jadi ulet doko murid-murid-Iyo ai ngunti epo-Iyo: "Iko tau se pmensara-Ko ene sundok jadi batu nte tutur ulun-ulun Farisi?"¹³Tuing Yesus: "Tongku-tongku pnyekulo yo belo dinulo koe Bapa-Ku yo mbo sorga anta nukat diang wakat-wakat yo."¹⁴Koe ka dero ene. Dero ulun posa yo ngayak ulun posa. Ena ulu posa ngayak ulun posa, pasti dero duo toyak epo lang luang."¹⁵Laju Petrus ngulek epo-Iyo: "Jelas ko ta pmerawet ene epo kain."¹⁶Tuing Yesus: "Ikam lou belo pian paham ene?"¹⁷Tau be ikam tau se eka-eka yo sumba lang bowa diwa epo lang buntung trus noding epo pndosan?"¹⁸Tapi ise yo baling ngket bowa ene ngket kesong ai ene doko yo nglonsa ulun.¹⁹Koe ngket kesong nyoret eka akal dat, ngempate, zinah, pokeng koreng, pengako, sumpah kowau ai uja.

²⁰Ene doko yo nglonsa ulun. Tapi kuman diang kayang yo belo di bnui belo nglonsa ulun."²¹Laju Yesus malan ngket mne ai bsimpeh epo kampong Tirus diang Sidon.²²Jadi ulet doko erai kongo bawe Kanaan ngket ja eme ai momba: "Tngkosang ta aku, o Tuhan, pea Daud, koe pea ku bawe sumban uwok ai sesa beta."²³Tapi Yesus sama skali belo di nuing yo. Laju murid-murid-Iyo ulet ai tindu epo-Iyo: "Suyu ta io buyo, io nyarak taka diang nyoyar-nyoyar."²⁴Tuing Yesus: "Aku snuyu nte epo domba-domba yo mapos ngket ulun-ulun Israel tingen."²⁵Tapi bawe ene epo dmpet ai nyembah Iyo ulak ngulek: "Tuhan awat ta aku."²⁶Tapi Yesus nuing: "Belo sengkono ngalek roti yo snedia nte pea-pea diang nebir yo epo koko."²⁷Ulek bawe ene: "Beta Tuhan, tapi koko ene kuman uras-uras okan yo toyak ngket meja mpu yo."²⁸Laju Yesus nuing ai ngulek: "O mena, olai iman ko, mko ene jadi se epo iko kati yo pngkakan ko." Des ene se lou pea yo ale.²⁹Sundok ngendikah kampong ene Yesus malan nyarak pinggir gentung Galilea ai dombo epo ombon tenggelung laju tunge mbo mne.³⁰Sundok ene ulun deo bloyun-loyun ulet epo-Iyo moit ulun pokung, ulun tempang, ulun posa, ulun pepe ai deo aso yo mak, laju mayak dero montuk botis Yesus ai Io mmekale dero eka-eka.³¹Laju bengong ulun deo ene kito ulun pepe bunyal, ulun tempang ale, ulun pokung malan, ulun posa kito, ai dero ngmulia Allah Israel.³²Laju Yesus momba murid-murid-Iyo ai ngulek: "Kesong-Ku timbul kosang epo ulun deo ene. Sundok tolu olo dero nyarak Aku ai dero belo keo nte okan. Aku belo kakan nyuyu dero diang siet lau, nindo dero tanjal nyarak boyan."³³Ulek murid-murid-Iyo epo-Iyo: "Ktimbe mbo awa deing endo taka kuli roti nte nmboting ulun yo deo beta endo?"³⁴Ulek Yesus epo dero: "Tenu roti keo mbo ikam?" "Turu," tuing dero, "ai keo aso tenu-tenu esa alus."³⁵Laju Yesus nyuyu ulun deo ene tunge mbo tana.

³⁶Sundok ene Io ngalek turu roti ai esa-esa ene, ngusap sukur, mrinsi-mrinsi yo ai mie yo epo murid-murid-Iyo, laju murid-murid-Iyo magi ene lou epo ulun deo.³⁷Ai dero eka-eka kuman sampe boting. Sundok ene ulun ngumpul bis-bis roti yo sisa, turu kepit ponu.³⁸Yo lumpat kuman ene opat ribu bang song pian nitung bang bawe ai bang pea.³⁹Laju Yesus nyuyu ulun deo ene uli. Io dombo prau ai btual epo kampong Magadan.

Chapter 16

¹Sundok ene ulet doko ulun-ulun Farisi ai saduki kakan nyoba Yesus. Dero tindu apa Io memekelak tanda ngket sorga epo dero.² Tapi tuwing Yesus: "Des olo nayap koe langit meya,ikam ngulek: Olo anta buen,³ai des ma olo,koe langit meya ai jou,ikam ngulek: Olo dat. Nau langit ikam tau nembeda yo tapi tanda-tanda zaman belo. ⁴Pokan yo triau ai belo stia endo tindu se tanda.Tapi epo dero belo anta dniye tanda yo makse se tanda nabi Yunus."Laju Yesus ngendikah dero trus brangkat.⁵Des jeman murid-murid Yesus kentas gentung,dero tlengo moit roti. "Yesus ngulek epo dero:"Ati-ati ai awas-awas se ragi ulun Farisi ai Saduki." ⁷ Koe ene dero bekenanam ai ngulek epo sama dero se:"Ene nulek ke-Iyo koe taka belo moit roti." ⁸Des Yesus tau ise yo pengesah dero,Io ngulek: "Ise moko ikam ngesah soal belo keo roti? O'ulun-ulun yo kurang persaya!⁹Belo pian low ikam paham? Belo be ikam knop aso se limo roti nte limo ribu ulun ene trus tenu kepit roti kumpulkam sundok ene? ¹⁰ Ktine low se turu roti nte opat ribu ulun ene trus tenu kepit kumpulkam sundok ene?"¹¹Ktimbe moko ikam belo paham se makse roti yo ptua Ku.Aku ngulek epo ikam:awas-awas diang ragi ulun Farisi ai Saduki." ¹²Des ene bayu dero tau se makse ptua-Iyo apa dero awas-awas diang ragi roti,tapi diang tutui batuk ulun Farisi ai Saduki.¹³Sundok Yesus sampe mbo ja Kaisaria Filipi,Io ngunti epo murid-murid-Iyo: "Ulek ulun,Ise si Pea Ulun ene?" ¹⁴Tuwing dero: "Keo yo ngulek: Yohanes Pembaptis,keo low yo ngulek: Elia ai keo low ngulek: Yeremia ena belo erai kongo ngket nabi-nabi." ¹⁵Laju Yesus ngunti epo dero: "Tapi ise ulek kam,ise se Aku endo?" ¹⁶Tuwing Simon Petrus:"Iko ene Mesias,Pea Allah yo bolum!"¹⁷Ulek Yesus epo iyo: "Ego beta iko Simon pea Yunus koe makse ulun yo ngulek ene epo iko,tapi Bapa-Ku yo mbo sorga. ¹⁸Ai Aku low ngulek epo iko: Iko ene Petrus ai ban batu karang endo Aku anta nengkuat jemaat-Ku ai dnia ulun mate belo anta nguasa iyo.¹⁹Epo iko anta diye Ku kunci Kerajaan Sorga.Ise yo bolit ko mbo dnia endo anta bebolit mbo sorga ai ise yo oke ko mbo dnia endo anta noke mbo sorga." ²⁰Laju Yesus ngusan murid-murid-Iyo apa nang mere epo ise-ise ulun se Io Mesias.²¹Ngket jman ene Yesus mulai ngenjelas epo murid-murid-Iyo se Io arus malan epo Yerusalem ai kiso kanam deo kbenasa koe bang tuo-tuo,imam-imam pngutok ai ahli-ahli Taurat,laju pnate ai pinosuli des olo ke tolu. ²²Tapi Petrus ngendurut Yesus epo bika ai ngae Io,ulek iyo: "Tuhan, apa Allah mekoro nau umbang ene! Nau ene belo anta kono Iko." ²³ Laju Yesus skuleng ai ngulek epo Petrus: "Buyo ta Iblis.Iko jadi batu nte tutur Oki,koe iko makse ngenanam ise yo knanam Allah,tapi ise yo knanam ke ulun." ²⁴Laju Yesus ngulek epo murid-murid-Iyo: "Tongku-tongku ulun yo kakan lumpat Aku,io arus belo nyanda kompu iyo,moson salib iyo ai lumpat Aku. ²⁵Koe ise yo kakan nylamat kesong iyo se,io anta mapos kesong kesong iyo;tapi ise-ise yo mapos kesong iyo koe Aku,io anta kuli iyo." ²⁶ Ise jodo yo ulun kuli eka-eka dnia tapi mapos kesong iyo? Ai ise yo dapet die yo nte nganti kesong iyo?"²⁷Koe Pea Ulun anta ulet lang kmulia Bapa-Iyo bjuyang diang mlekat-mlekat-Iyo;des jman ene Io anta ngembales tongku-tongku ulun kati gawi gata dero. ²⁸ Aku ngulek epo ikam: Se beta-beta yo mbo ekang ulun yo keo mbo mendo keo yo belo anta mate onon se dero kito Pea Ulun ulet jadi Raja lang Kerajaan-Iyo."

Chapter 17

¹onom olo sundok ene Yesus moit Petrus,Yakobus ai Yohanes eraibuntungiyo, ai sama-sama diang dero, Io dombo epo usuk tunden, mbo mne dero ba-ba. ²laju Yesus wesut nau mbo onon mato dero; wae-Iyo kualo kati nau mato olo ai pyepakai-Iyo jadi bura ktarang kati pa olo.³ai nitan epo dero Musa ai Elia desung bunyal diang-Iyo. ⁴ulek Petrus epo Yesus: " Tuhan ego beta kain keo ela mendo. ena Iko kakan, kate ka aku nengkuat tolu kemahn, erai ente Engko, etai ente Musa ai erai iyo ente Elia."⁵Desung io bsurah kolan-kolan diwa jaun keo pa nylingu dero ai engket lang jaun ene keo oyon yo ngulek:" endo doko pea yo knosang koe Ku, epo-Iyo ene aku skono, tinompaning nte-Iyo." ⁶Kringo ene nyongkop murid-murid-Iyo diang dero takut beta. ⁷laju Yesus ulet epo dero diang nengku dero ulak ngulek:" akat ikam nang takut!" ⁸ai des dero nyonda, endo belo kito erai kongo ulun yo mak puluniyo Yesus tinggen.⁹Des dero diwa engket tunden ene, Yesus ngulek epo dero:" nang kam kesah pngkito kam ene epo ndok erai kongo ulun ono pea ulun pinosuli engket ekang ulun mate." ¹⁰laju murid-murid-Iyo ngunti epo-Iyo: ena ktine ise moko ahli-ahli taurat ngulek se Elia arus ulet ono?"¹¹tuung Yesus:" betaiyo Elia anta ulet ai nengkuen bmasam nau umbang ¹²jadi Aku ngulek epo ikam: Elia sundok ulet, tapi ulun belo tau se io, diang gawigata dero seiyo kati ptua dero se. Ketine lou pea ulun anta ssa koe dero." ¹³Montuk des ene lou ngerti ka doko murid-murid Yesus se Io bsara nau umbang Yohanes tulang baptis.¹⁴Des Yesus ai murid-murid-Iyo mulik epo ulun deo ene, ulet doko erai kongo ulun ngruku Yesus ai nyembah, ¹⁵ulek io: Tuhan tengkosang-ta peaku, io roton ngembekat ai sesa beta. io jono lutu epo lang api ai jono lou latu epo lang danum. ¹⁶Aku sundok moit io epo murid-murid-Ko, tapi dero belo di kuli mekale io."¹⁷ulek Yesus:" o ikam pokan iyo belo persaya ai iyo tang, kola-kola aso Aku nongos ekang ikam? kola-kola aso Aku arus sabar epo ikam? oit ka pea ene epo mdo!" ¹⁸Diang ries Yesus ngae io, laju baling ka doko uok ene engket io ai des ene lou pea ene ale peles.¹⁹sundok enemurid-murid Yesus ulet ai des dero ba-ba diang Iyo, dero ngunti:" koe be kain belo kuli ngusa uok ene?" ²⁰Iyo ngulek epo dero:" koe ikam kurang persaya. koe ene Aku ngulek epo ikam: se beta-betaiyo ena ikam keo Iman kolai bigi jabung tinggen ikam kuli ngulek epo tunden endo: wensut engket mendo epo lane,-tunden ene anta wensut, ai belo anta keo yo belo jadi nte engkam ²¹jenis endo belo dapet nusa ena diang bdoa ai puasa, ²²Des jeman Yesus ai murid-murid-Iyo sama-sama ombo Galilea, Io ngulek epo dero:" pea ulun anta snerah epo lang kayang ulun. ²³ai dero anta ngempate Iyo ai mbo olo ketolu Io anta pinosuli." koe ene kesong murid-murid-Iyo jadi nyoru beta.²⁴Des Yesus ai murid-murid-Iyo ulet la kapernaum ulet ulun pnage bea Bait Allah epo Petrus ai ngulek:" belo dimayar be guru ko bea duo dirham ene ?" ²⁵tuungiyo:" mayar de." ai des Petrus sumba lou, Yesus bur ngunti:" ise san ko, Simon? engket mbe raja-raja dnia endo ngalek bea ai pajak? engket rayat iyo be ena belo engket ulun nyumba?"²⁶tuung Petrus : " engket ulun nyumba!" keo ene Yesus ngulek epoiyo:" jadi bebas deko rayakiyo. ²⁷jadi apa taka nang jadi batu ente dero tutur, malan aut mintan epo gentung. jadi esa tla yo bintang ko, tnakop ai ingkang ka bowaiyo, pasti iko ngruku sen opat dirham lang bowaiyo, alek ene ai bayarka epo dero, nte Oki diang nte engko lou."

Chapter 18

¹Montuk des ene murid-murid ene ngompoh Yesus ai ngunti: "Ise yo olai tingen lang Krajaan Sorga?"²Jadi Yesus momba pea alus ai mayak-iyu mbo ekang dero ³laju ngulek: "Aku ngulek epo ikam, se beta-beta-iyu, ena ikam belo btobat ai jadi kati pea alus endo, ikam belo anta sumba epo lang Krajaan Sorga."⁴Tapi ise-ise ulun yo kakan mmkiwa pngnanam kesong ai jadi kati pea alus endo, io doko yo olai tingen lang Krajaan Sorga. ⁵Jadi ise-ise ulun nrima pea kati endo lang karan-Ku, io nrima Aku." ⁶"Tapi ise-ise ulun yo mktang erai ngket pea-pea alus endo yo prsaya epo Aku, pawak buen nte-iyu ena erai batu pnggiling sniret mbo biung-iyu laju io pinolotong epo lang tasik."⁷Lamat beta dnia diang eka sara mktang dero: beta ko pmktang arus keo, tapi lamat beta ka ulun yo nglaku-iyu. ⁸Ena tangan-ko ktine low botis-ko mktang iko, totok ai oding ka ene, koe pawak buen nte ngko sumba epo lang bolum diang tangan pungkong ai tempang se diang goluh duo botis kayang noding epo lang api kden.⁹Ai ena mato-ko mktang iko, sungkit ka ai oding ka ene, koe pawak buen nte ngko sumba epo lang bolum diang mato bika bute se noding epo lang api nraka diang mato duo.¹⁰Pinoknop beta, nang ngomoi iwa erai kongo ngket pea-pea alus endo. Koe Aku ngulek epo ikam: Keo mlaekat dero mbo sorga yo trus meti wae Bapa-Ku mbo sorga."¹¹(Koe Pea Ulun ulet nte nylamat yo mapos.)¹²Ktimbe san kam? Ena erai kongo ulun keo jatus kukui domba, tapi erai kukui ngket ene tang, belo be io jadi nape yo sie pulu sie kukui ene mbo tunden laju malan meto yo tang ene?¹³Jadi Aku ngulek epo ikam: "Se beta-beta-iyu ena io kuli ngruku-iyu, pawak roa ego-iyu koe yo erai kukui ene se yo sie pulu sie kukui yo belo di tang. ¹⁴Ktine low Bapa kam yo mbo sorga belo di nengkakan apa ndok erai kongo ngket pea-pea endo mapos".¹⁵"Ena eraibuntung-ko nglaku dosa, knae doko io iwat opat mato. Ena io ngringo nasehat-ko iko sundok kuli-iyu nua. ¹⁶Ena io belo di ngringo iko, oit ka erai kongo ena belo duo kongo ulun nua, apa diang pmnsara duo tolu kongo yo tau beta, soal ene belo keo nte kerong-kerong."¹⁷Ena io belo di kakan ngringo dero, sampe ka oli nau umbang ene epo jmaat. Jadi ena io belo di kakan low ngringo jmaat, eti ka io kati ulun belo tau se Allah ena belo kati pnage bea."¹⁸Aku ngulek epo ikam: Se beta-beta-iyu ise yo siret kam mbo dnia endo anta bsiret mbo sorga ai ise yo oke kam mbo dnia endo anta loke mbo sorga."¹⁹Aso nua Aku ngulek epo ikam: Ena duo kongo ngket ikam mbo dnia endo pkat tindu ise ka low, pnindu dero ene anta dnine koe Bapa-Ku yo mbo sorga. ²⁰Koe mbo mone duo tolu kongo ulun bkumpul lang karan-Ku, mbo mne Aku keo mbo ekang dero. ²¹Sundok ene ulet ka Petrus ai ngulek epo Yesus: "Tuhan, sampe tenu derang aku arus ngampun eraibuntung-ku ena io nglaku dosa epo aku? Sampe turu derang?"²²Yesus ngulek epo-iyu: "Makse! Makse sampe turu derang, tapi sampe turu pulu derang turu derang."²³Koe nau umbang Krajaan Sorga sama kati erai kongo raja yo kakan britung diang batak-batak-iyu. ²⁴Des io mulai britung ene, nadap ka doko epo-iyu erai kongo yo keo utang spulu ribu talenta, ²⁵Tapi koe ulun ene belo di klian mayar eka utang-iyu, raja ene nyuyu apa io jnual diang pea bawe-iyu ai eka pngkeo-iyu nte mayar utang ene. ²⁶Jadi nyongkop ka doko batak ene nymbah io, ulek-iyu: Sabar ka ile, eka utang-ku anta bayar ku abis. ²⁷Laju ulet kanam kosang lang kesong raja ene se batak ene, sampe io ngmbebas-iyu ai ngapus utang ene. ²⁸Tapi des batak ene baling, io ruku se batak yo mak yo keo utang jatus dinar epo-iyu. Io nangop ai nyiak tman-iyu ene, ulek-iyu: Bayar utang-ko! ²⁹Jadi nyongkop ka doko tman-iyu ene ai tindu epo-iyu: Sabar deh ile, utang ku ene anta bayar ku eka. ³⁰Tapi io belo trima ai nyarah tman-iyu ene epo lang sper sampe eka utang-iyu bnayar. ³¹Kito ene tman-tman-iyu yo mak jadi dat kanam beta laju nyampe eka yo trjadi ene epo tuan dero. ³²Raja ene nyuyu momba ulun ene ai ngulek epo-iyu: O batak yo triaw, eka utang ko sundok apus-ku koe pnindu-ko epo aku. ³³Belo be iko low arus nengkosang tman ko kati aku sundok nengkosang iko?"³⁴Jadi mara ka doko tuan-iyu ene oli ai nyarah-iyu epo plisi, sampe io mayar eka utang-iyu. ³⁵Jadi Bapa-Ku yo mbo sorga anta nglaku ktine low epo ikam, ena tongku ikam belo ngampun eraibuntung kam diang bol kesong kam."

Chapter 19

¹Des Yesus sundok diang tutuy batuk-Iyo ene, berangkat doko Io ngket Galilea ai ulet mbo ja Yudea yo mbo empai atang Yordan. ²Ulun deo beloyun-loyun nyarak Io ai Io lou mekale dero mbo lane. ³Jadi ulet doko ulun-ulun Farisi epo-Iyo nte nyoba Io. Dero rekunti: "Kate be ulun nytuar baweiyo diang tulan ise masam?" ⁴Tuing Yesus: "Belo be ikam ngbaca, se Io yo nampa ulun ngket tla nampa dero song ai bawe?" ⁵Ai firman-Iyo: "Koe ene song anta ngendikah ine umaiyo ai kerai diang baweiyo, keduoiyo oli jadi erai isi erai daya ⁶Ketine doko dero makse duo oli, tapi erai. Koe ene, ise yo sundok pinokerai koe Allah, belo kate senetuar koe ulun. ⁷Ulek dero epo-Iyo: "Ena ktine, ise moko Musa nyuyu nte miye surat setuar ena ulun nyetuar baweiyo?" ⁸Ulek Yesus epo dero: "Koe ketokeng kesongkam Musa ngizin ikam nyetuar bawekam, tapi ngket tla belo di ktine. ⁹Tapi Aku ngulek epo ikam: Ise-ise ulun nyetuar baweiyo, makse koe zinah, trus kawen diang bawe yo mak, io nggawi zinah." ¹⁰Murid-murid ene ngulek epo-Iyo: "Ena ktine nau umbangiyo besong bawe, lebih buen nang kawen." ¹¹Tapi Io ngilek epo dero: "Belo di eka ulun kuli ngerti pemesara endo, suma dero yo keo karunia bute. ¹²Keo ulun yo belo kuli kawen koe io kinomekus ktine ngket buntung ineiyo, ai keo ulun yo tnampa ktine koe ulun mak, ai keo ulun yo nampa iyo se ktine koe nau pengkakan iyo se koe Kerajaan Sorga. Ise yo paham mokoioyo io paham. ¹³Trus ulun moit pea-pea alus epo Yesus, apa Io mayak kayang-Iyo ombon dero ai ngendoa dero, tapi murid-murid-Iyo ngemara ulun-ulun ene. ¹⁴Tapi Yesus ngulek: "Koe ka pea-pea ene, nang ka mombong-mombong dero ngompoh Aku; koe ulun-ulun yo ktine ene yo mpun Kerajaan Sorga." ¹⁵Trus Io mayak kayang-Iyo ombon dero ai Io oli berangkat ngket mne. ¹⁶Keo erai kongo ulun ulet epo Yesus, ai ngulek: "Guru, gawi buen ise yo arus gawiku nte kuli bolum kden?" ¹⁷Tuing Yesus: "Ise moko iko ngunti epo Aku nau ise yo buen? Suma erai Bute yo buen. Tapi ena iko kakan sumba po lang bolum, gaya ka eka petua Allah." ¹⁸Ulek ulun ene epo-Iyo: "Perenta yo mone?" Ulek Yesus: "Nang ngempate, nang bezinah, nang ngako, nang ngulek saksi eta, ¹⁹tunduk epo ine uma ko ai tinong kosang sama ulun kati iko se." ²⁰Ulek ulun burok ene epo-Iyo: "Eka-eka ene sundok sarakku, ise aso yo nokon kurang?" ²¹Ulek Yesus epoiyo: "ena iko kakan sempurna, malan aut, jenual doko eka pengkeo ko ai deniye epo ulun-ulun kao, jadi iko anta kuli arta mbo sorga, ulet ka oli epo dido ai lumpat ka Aku." ²²Des ulun burok ene keringo pemesara ene, malan doko io diang kesong nyoru, koe deo pengkeoiyo. ²³Yesus ngulek epo murid-murid-Iyo: "Aku ngulek epo ikam, se beta-betaiyo poyoh beta ulun tataw nte sumba po lang Kerajaan Sorga. ²⁴Sindai nua Aku ngulek epo ikam, aso sepel erai kukuy unta sumba lang luang pilos se erai kongo ulun tataw sumba po lang Kerajaan Allah." ²⁵Des Murid-murid kringo ene, tekojet beta doko dero ai ngulek: "Ena ktine, ise po yo kuli sinolamat?" ²⁶Yesus meti dero ai ngulek: "Nte ulun nau umbang ene belo anta dapet, tapi nte Allah eka-eka nau umbang ene dapet ba." ²⁷Trus Petrus nuing ai ngulek epo Yesus: "Kain endo sundok ngendikah eka ise masamm ai lumpat Iko; jadi ise po yo anta kuli kain?" Ulek Yesus epo dero: "Aku ngulek epo ikam, se beta-betaiyo des nampa denia bayu nua, ena Pea Ulun nongos mbo penunge kemuliaan-Iyo, ikam, yo sundok lumpat Aku, anta tunge lou mbo ombon duo belas penunge nte ngemutus kedu belas suku Israel. ²⁸Ai tongku-tongku ulun yo koe karan-Ku ngendikah lowuiyo, erai buntungiyo song ene lou erai bungtungiyo bawe, ine umaiyo, pea-pea ene lou umoiyo, anta kuli nua jatus lipat ai anta kuli bolum yo kden. ²⁹Tapi deo ulun yo ono tingen anta jadi sori tingen, ai yo sori tingen anta jadi yo ono tingen."

Chapter 20

¹"Ene low Krajaan Sorga sama kati mpu lou yo ngket ma beta meto ulun nte bgawi mbo kbong anggur iyo. ²Sundok io pekat soal upa diang ulun bgawi ene erai dinar erai olo, io nyuyu dero bgawi mbo kbong anggur iyo. ³Kira-kira jam sie ma io baling ai kito nua ulun-ulun mak yo beay mbo pasar. ⁴Ulek iyo epo dero: Daro ikam epo kbong anggurku ai aku mayar ikam diang upa yo sengkono nau gawi. Pnyundok yo dero malan low. ⁵Kira-kira jam duo blas ai jam tolu duluy io baling nua ai sama kati gawi yo ono nde. ⁶Kira-kira jam limo nayap io baling nua ai ruku nua diang ulun-ulun yo mak, trus ulek iyo epo dero: Ise moko ikam belo keo gawi ka mndo tambus olo? ⁷Ulek dero epo iyo: Koe belo keo ulun yo ngupa kain. Ulek iyo epo dero: Daro ka low ikam epo kbong anggur ku. ⁸Des malom mpu kbong ene ngulek epo mandor iyo: Bnomba ulun-ulun bgawi ene ai bnayar upa dero, mulai yo ket sumba sori sampe yo sumba ono. ⁹Ulet doko dero yo mulai bgawi kira-kira jam limo ai tongku dero nrina erai dinar. ¹⁰Sundok ene ulet low dero yo bgawi ket tla, omoy dero kuli paling roa, tapi tongku kongo dero kuli erai dinar low. ¹¹Des dero nrina ene, dero ngrepengut epo mpu kbong ene. ¹²Ulek iyo: Dero yo sumba sori ene suma bgawi erai jam, iko nyama dero diang kain yo bgawi boyat erai olo pong kono keke langot. ¹³Tapi mpu kbong ene nuing erai kongo ket dero: erai buntung, aku belo di belo adil epo iko. Belo be taka sundok pekat erai dinar erai olo? ¹⁴Alek ka mpun ko trus malan ket ndo; aku kakan mie yo sumba sori endo sama kati ngko. ¹⁵Belo be aku bbas makai mpun ku se sengkono kati ptua kesong ku? Iri be ikam koe aku sawai kesong? ¹⁶Ktine doko ulun yo sori tingen anta jadi yo ono tingen ai ulun ono tingen anta jadi yo sori tingen. ¹⁷Des Yesus kakan malan epo Yerusalem, Io momba dua blas murid-Iyo pinoseing ai ngulek epo dero ela tenga boyan: ¹⁸"Tempo ndo taka malan epo Yerusalem ai Pea Ulun kakan snerah epo pngutok imam-imam diang ahli-ahli Taurat, ai dero kakan ngukum Iyo diang ukum pate. ¹⁹Ai dero anta nyarah Iyo epo bangsa-bangsa yo belo tau se Allah. Apa Io nte uja-uja, nte kurow ai snalib, des olo ktolu Io pinonyuli. ²⁰Ulet ka doko ine pea Zebedeus diang pea-pea iyo ene epo Yesus, laju nyongkop onon-Iyo kakan keo pnindu epo-Iyo. ²¹Ulek Yesus: "Ise pengkakan ko?" Tuing iyo: "Suyu Ko ta, apa keduo pea ku endo kuli tunge anta lang Krajaan-Ko, yo erai mbo tadah sanan Ko ai erai yo tadah sei Ko." ²²Tapi Yesus nuing, ulek Iyo: "Iko belo tau, ise pnindo ko ene. Kuli be iko ngisop ktowong, yo arus isopKu?" Ulek dero epo Iyo: "Kain kuli." ²³Yesus ngulek epo dero: "Ktowong Ku memang anta isop kam, tapi nte tunge ela sanan ai ela sei Ku, Aku belo keo hak mie yo. Ene anta dnine epo ulun-ulun yo sundok pinotoko koe Bapa Ku." ²⁴Kringo ene mara spulu kongo murid yo mak epo duo erai buntung ene. ²⁵Tapi Yesus momba dero laju ngulek: "Ikam tau, se pmerenta-pmerenta bangsa-bangsa mrenta rayat iyo diang prenges ai pngutok-pngutok ene ngenjalan kuasa iyo diang kois koroi epo dero. ²⁶Ena ikam belo di ktine. Ise yo kakan jadi nuon mbo ngket ikam se, moko yo io nte jadi playan kam, ²⁷ai ise-ise yo kakan jadi ulun kinonuon mbo ekang ikam, moko yo io nte jadi batak kam; ²⁸sama kati Pea Ulun ulet belo dikakan nlayan, tapi ube nte nglayan ai nte mie kesong Iyo nte pnous ulun deo." ²⁹Des Yesus diang murid-murid Iyo baling ngket Yerikho, ulun deo nglenduyun nyarak Iyo. ³⁰Keo duo kongo ulun posa yo tunge mbo isan boyan kringo, se Yesus lalo, trus dero momba: "Tuhan, Pea Daud, tkosang ta kain!" ³¹Tapi ulun deo ene ngae dero apa dero suni. Tapi dero tambah ries momba, ulek dero: "Tuhan, Pea Daud, tkosang ta kain!" ³²Laju Yesus nongos ai momba dero. Io ngulek: "Ise ptua kam Oki gawi nte ngkam?" ³³Tuing dero: "Tuhan, apa mato kain kuli meti." ³⁴Jadi Yesus timbul kesong kosang, laju Io mulem mato dero, des ene peles dero kuli meti laju nyarak diang Iyo.

Chapter 21

¹Des Yesus diang murid-murid Iyo dempet se Yerusalem ai ulet mbo Betfage yo keo mbo tunden Zaitun, Yesus nyuyu duo kongo murid Iyo ²diang psan: "Daro ikam epo kampung yo keo mbo onon ikam ene, mne ikam ruku kledai bawe bnolit diang keo anak yo dmpet iyo. Oke kam kledai ene ai noit ine diang anak yo epo Aku. ³Ena keo ulun ngo ikam, ulek kam: Tuhan se yo kakan makai iyo. Io belo anta di ola nempuli yo." ⁴Nau umbang ene ktine apa gnenap firman yo snampe koe nabi: ⁵"Nulek ta epo putri Sion: Neti, Raja ko ulet ngompoh iko, Io belo di kois korong ai nendung kledai, kledai pmoit yo aso burok." ⁶Malan ka doko murid-murid ene ai nggawi kati yo ptua Yesus epo dero. ⁷Dero moit kledai bawe ene diang anak yo, bayu nglapit yo diang diris dero laju Yesus dombo low epo ombon kledai ene. ⁸Ulun deo beta yo keo mbo mne nguar diris dero mbo boyan, keo low yo notok gregey diang daon kayu ai meje yo nyarak boyan. ⁹Ulun deyo yo malan onon Yesus, ai yo nyarak yo ket sori nampa oyon, ulek dero: "Hosana nte Pea Daud, dnine berkat Iyo yo ulet lang karan Tuhan, hosana mbo awa yo paling ombol!" ¹⁰Des Io sumba mbo Yerusalem, gempar ka doko mupus kota ene, ai ulun ngulek: "Ise ulun endo?" ¹¹Ulun deo ene nuing: "Endo doko nabi Yesus ngket Nazaret mbo Galilea." ¹²Laju Yesus sumba epo lang Bait Allah ai ngusa eka ulun yo bdagang mbo natar Bait Allah. Io nelinggang meja-meja awa tukang nganti sen diang pnunge-pnunge penjual dara ¹³ ai ngulek epo dero: "Keo tnulis: Lou-Ku nulek lou doa. Tapi ikam nampa yo nte awa ulun akal gramas." ¹⁴Ulet ka doko ulun-ulun posa diang ulun-ulun tempang epo Iyo lang Bait Allah ene, ai dero pkale Iyo. ¹⁵Tapi des imam-imam pngutok diang ahli-ahli Taurat kito musisat-musisat yo tanpa Iyo ene ai pea-pea yo momba lang Bait Allah: "Hosana nte Pea Daud!" kesong dero ngriten, ¹⁶ laju dero ngulek epo Iyo: "Kringo be Iko ulek pea-pea endo?" Ulek Yesus epo dero: "Aku kringo; belo pini be ikam ngebaca: Ngket bowa taru-taru ai pea-pea yo aso nete Iko sundok nyedia puji-pujian?" ¹⁷ Laju Io ngendikah dero ai malan epo baling se kota epo Betania ai nsan mbo mne. ¹⁸Des aso ma beta desung yo malan mulik epo kota, Yesus kiso sietlaw. ¹⁹ Dmpet boyan Io kito tonga ara laju Io ngompoh epo mne, tapi Io belo ruku ise-ise makse daon-daon tingen. Ulek Iyo epo tonga kayu ene: "Iko turai belo anta tau mua oli!" Peles des ene low krep ka doko tonga ara ene. ²⁰Kito nau ene ngrengao murid-murid Iyo, trus ngulek: "Timbe nau tonga ara ene ise moko kolan-kolan krep?" ²¹ Tuing Yesus se dero: "Aku ngulek epo ikam, sebata yo ena ikam persaya ai belo kerong-kerong, ikam kuli nggawi lengkat se yo kati gawi Ku epo tonga ara ene, tapi low ena ikam ngulek epo tunden endo: Rengkat ai bturak epo lang tasik! nau umbang ene pasti jadi beta. ²² Ai ise-ise ka yo tindu kam lang doa diang persaya beta-beta, ikam pasti nrima yo." ²³ Laju Yesus sumba lang Bait Allah, des Io nutui matuk ela mne, ulet imam-imam pngutok diang tuo-tuo bangsa Yahudi ngruku Iyo, peles ngunti: "Diang kuasa ise Iko gwani ene? Ai ise yo mie kuasa ene epo Iko?" ²⁴ Tuing Yesus epo dero: "Aku keo pnindu erai pngunti epo ikam ai ena ikam tau nuing epo Aku, Aku ngulek low epo ikam diang kuasa ise Aku nggawi ene. ²⁵ Ngket be baptisan Yohanes ? Ngket sorga be ngket ulun?" Dero bkesah sama dero, ai ngulek: "Ena taka ngulek: Ngket sorga, Io pasti ngulek: Ena ktine, ise moko ikam belo persaya diang iyo?" ²⁶ Tapi ena taka ngulek: Ngket ulun, taka takut diang ulun deo, koe eka ulun ngotus Yohanes ene nabi." ²⁷ Bayu dero nuing Yesus: "Kain belo tau." Yesus nuing low epo dero: "Ena ktine, Aku belo ngulek low diang ikam diang kuasa ise Aku nggawi ene." ²⁸ Ise san ko nau endo: Keo ulun keo duo pea song, io ulet ngruku pea yo tuo trus ngulek: Peaku malan ka ai bgawi olo ndo mbo kbong anggur. ²⁹ Tuing pea ene: O, o, bapa. Tapi io belo malan. ³⁰ Laju io nyeruku pea yo kduo, ai ngulek ktine low. Tuing pea ene: Aku belo kakan. Tapi pnyundok iyo noli trus malan low. ³¹ Ise lelu dero duo yo ngaya ptua uma yo?" Tuing dero: "Yo sori." Ulek Yesus epo dero: "Aku ngulek epo ikam, sebata yo tukang tindu bea ai lonte yo ono sumba Krajaan Allah se ikam. ³² Koe Yohanes ulet nte nutui boyan yo kono nte ngkam, ai ikam belo persaya se iyo. Tapi tukang tindu bea diang lonte persaya diang iyo. Tontan ikam kito, tapi ikam belo tau noli ai belo persaya low diang iyo." ³³ Tinompaning pmerawat yo mak. Keo mpu tana muka kbong anggur ai nampa pagar lekum. Io ngali luang nte awa mia anggur diang nampa pmeo awa ndurung lang kbong ene. Laju io memesewa kbong ene epo penggawi-penggawi kbong laju io se malan epo dnina yo mak. ³⁴ Des duni musim panen, io nyuyu batak-batak iyo nte ngruku penggawi-penggawi ene nte nrima asil yo nte iyo. ³⁵ Tapi penggawi-penggawi nangop batak-batak iyo ene: dero mupuk yo erai, ngempate yo mak ai nurak yo mak low diang batu. ³⁶ Laju mpu tana ene nyuyu low batak-batak yo mak, deo se yo tla, tapi pengkono dero sama kati tman-tman dero ene. ³⁷ Pnyundok yo io nyuyu pea se ngruku dero, ulek iyo: Ena pea ku pasti dero takut. ³⁸ Tapi des penggawi-penggawi ene kito pea iyo ene, dero bkesah sama dero: Io ene ahli waris, alo taka ngempate iyo, apa warisan ene nte taka. ³⁹ Dero nangop io laju nurak io epo baling se kbong anggur ene laju ngempate iyo. ⁴⁰ Jadi ena mpu kbong anggur ene ulet, ise yo anta gawi iyo epo penggawi-penggawi ene?" ⁴¹ Ulek dero epo Iyo: "Io anta mrindas ulun-ulun triaw gawi ene ai kbong anggur ene anta snewa epo penggawi-penggawi yo mak, yo kakan nyerah hasil sampe des jman iyo." ⁴² Ulek Yesus diang dero: "Belo be ikam pini baca lang Kitab Suci: Batu yo noding koe tukang-tukang bangunan sundo jadi batu penjuru: hal kjadian nget pihak Tuhan, ene hal yo ajaib mbo mato taka. ⁴³ Koe ene, Aku

ngulek epo ikam, se Krajaan Allah anta nalek ngket ikam ai anta dnle epo bangsa yo ngasil bua Krajaan ene.⁴⁴ Ai ise-ise yo toyak mitek batu ene, io pasti tempur ai ise-ise yo kono sengkinan batu ene, io tme."⁴⁵Des imam-imam pngutok diang ulun-ulun Farisi kringo pemerawet-pemerawet Yesus, dero tau, se dero ene yo pinotua koe Iyo.⁴⁶ Laju dero bkomer nte nangop Iyo, tapi dero takut diang ulun deo, koe ulun deo ene ngotus Iyo ene nabi.

Chapter 22

¹Laju Yesus bsara low lang pmrawet epo dero: ²"Nau umbang Krajaan Sorga sama kati erai kongo raja, yo nampa ungan nte pea-iyu. ³Io nyuyu batak-batak-iyu ngirak ulun-ulun yo sundok pnakot epo ungan ene, tapi ulun-ulun ene belo di kakan ngompoh. ⁴Io nyuyu nua batak-batak yo mak, pakot-iyu: Nulek beta deh epo ulun-ulun yo pnakot ene: Se beta-beta-iyu okan singkap, sundok sdia-ku, lmbu-lmbu song ai pnykamu-ku sundok sinomble; eka ene sundok sinodia, ulet aut epo kuman nyingkap mbo ungan endo. ⁵Tapi ulun-ulun yo pnakot ene belo di kakan nyanda; keo yo malan epo umo dero, keo yo malan epo ngurus penyetaket dero, ⁶ai yo mak nangop batak-batak-iyu ene, ngurow ai ngmpate dero. ⁷Jadi mara roa ka doko raja ene, laju nyuyu pasukan-iyu epo daro nte ngmpate pngmpate-pngmpate ene ai nuna kota dero. ⁸Sundok ene io ngulek epo batak-batak-iyu: Okan singkap nte ungan kawen sundok sinodia, tapi ulun-ulun yo pnakot nde belo di snghkono nte ene. ⁹Koe ene malan aut epo ensangan-ensangan boyan ai pnakot beta tongku ulun yo ruku kam lane epo kuman nyingkap nte ungan kawen ene. ¹⁰Jadi malan beta batak-batak ene ai dero ngumpul eka ulun yo ruku dero mbo boyan, ulun-ulun triaw ai ulun-ulun buen, sampe ponu doko belawang awa kuman nyingkap ungan kawen ene diang peri. ¹¹Des raja ene sumba nte nyruku peri-peri ene, io kito erai kongo ulun yo belo makai pakaian ungan. ¹²Io ngulek epo-iyu: O eraibuntung, ktimbe moko iko sumba epo dido belo nyua pakaian ungan? Tapi ulun ene suni-suni ka. ¹³Laju raja ene ngulek epo batak-batak-iyu: Bolit ka botis kayang-iyu ai tebir ka ulun ene epo lang seom yo seom ji, mbo lane doko anta keo tontoi ai kukut ngrgigep. ¹⁴Koe deo yo bnomba, tapi kurang yo pnili. ¹⁵Sundok ene malan ka ulun-ulun Farisi; dero brondeng ktimbe dero kuli nangop Yesus diang penyekunti. ¹⁶Dero nyuyu murid-murid dero diang ulun-ulun Herodian ngunti epo-iyu: "Guru, kain tau, Iko ene ulun jujur nutui matuk boyan Allah ai Iko belo di takut se ulun ise ka, koe Iko belo di nondek Iko se. ¹⁷Ulek ta epo kain ktimbe san-Ko: Kate be belo be mayar bea epo Kaisar?" ¹⁸Tapi Yesus tau ktriaw kesong dero ene laju ngulek: Ise moko ikam nyoba Aku, o ulun-ulun ungka ungke di tau? ¹⁹Pkelak ta epo Aku mato sen nte bea ene." Dero moit sen dinar epo-iyu. ²⁰Jadi Io ngunti epo dero: "Gambar ai tulisan ise endo?" ²¹Tuing dero: "Gambar ai tulisan Kaisar." Laju ulek Yesus epo dero: "Dnie ko epo Kaisar ise yo arus die kam epo Kaisar ai epo Allah ise yo arus die kam epo Allah." ²²Kringo ene eran doko dero ai ngndikah Yesus laju malan. ²³Des olo ene ulet ka epo Yesus tenu-tenu kongo ulun Saduki, yo keo pentau, se belo keo pngnyuli. Dero ngunti epo-iyu: ²⁴"Guru, Musa ngulek, se ena ulun mate diang belo keo nape pea, eraibuntung-iyu arus kawen diang bawe-iyu ene ai nngkuat upus nte eraibuntung-iyu ene. ²⁵Endo ekang kain keo turu kongo ulun eraibuntung. Yo tla kawen, tapi sundok ene mate. Jadi koe io belo keo upus, io nape bawe-iyu ene nte eraibuntung-iyu. ²⁶Ktine low yo kduo ai yo ktolu sampe diang yo kturu. ²⁷Jadi pngabis-iyu, sundok dero eka, bawe ene mate low. ²⁸Ise ngket turu kongo ene yo jadi song bawe ene des olo pngnyuli? Koe dero eka sundok nmbawe io. ²⁹Yesus nuing dero: "Ikam tang, koe ikam belo tau Kitab Suci diang kuasa Allah! ³⁰Koe des olo pngnyuli ulun belo di kawen ai belo di knawen tapi bolum kati mlaekat mbo sorga. ³¹Tapi nau otang pngnyuli ulun-ulun mate belo be ikam ngmbaca ise firman Allah, des Io ngulek: ³²Aku doko Allah Abraham, Allah Ishak ai Allah Yakub? Io makse di Allah ulun mate, tapi Allah ulun bolum." ³³Ulun deo yo kringo ene eran beta diang tutui batuk-Iyu ³⁴Des ulun-ulun Farisi kringo, se Yesus sundok nampa ulun-ulun Saduki ene nyruni, bkumpul ka doko dero ³⁵ai erai kongo ngket dero, erai kongo ahli Taurat, ngunti nte nyoba Io: ³⁶"Guru, ukum mone yo paling ombo lang ukum Taurat?" ³⁷Tuing Yesus epo-iyu: "Tinongkosang beta Tuhan, Allah-ko, diang bol-bol kesong-ko ai diang bol-bol eka pnymbolum-ko ai diang bol-bol eka kno buen-ko. ³⁸Ene doko ukum yo paling ombo ai yo tla. ³⁹Ai ukum yo kduo, yo sama diang ene, yo doko: Tinongkosang ko sama sama ulun sama kati kompu tonga ko se. ⁴⁰Mbo kduo ukum ene ka doko betondok eka ukum Taurat ai kitab nabi-nabi. ⁴¹Des ulun-ulun Farisi desung bkumpul, Yesus nguntin epo dero, ulek-Iyu: ⁴²"Ise san kam nau otang Mesias? Pea ise Io ene? Ulek dero epo-iyu: "Pea Daud." ⁴³Ulek-Iyu epo dero: "Ena ktine, ktimbe moko Daud koe ayak Roh kate momba Io Tuan-iyu, des io ngulek: ⁴⁴Tuhan sundok bsara epo Tuan-ku: Tunge ka mbo tadah sanan-Ku, sampe bali-bali-Ko payak-Ku mbo iwat botis-Ko. ⁴⁵Jadi ena Daud momba Io Tuan-iyu, bahe be Io pea-iyu low?" ⁴⁶Ndok belo erai kongo ulun yo kuli nuing nte-Iyu ene, ai ngket olo ene ndok belo erai kongo ulun oli yo ronu ngunti ise-ise epo-iyu.

Chapter 23

¹Koe ene Yesus ngulek epoulun deo ai epo murid-murid Iyo, ulek Iyo.² "Ahli-ahli Taurat diang ulun-ulun Farisi sundok tunge mbo pnunge Musa. ³Koe ene naya diang gnawi ise yo bnatuk koe dero epo ikam, tapi nang ikam nyarak ise yo gawi dero, koe dero nutui matuk tinggen tapi belo di nglakuiyo. ⁴Dero molit pnyekoit-pnyekoit boyat, trus mayak ombon pluko ulun, tapi dero se belo kakan mulem yo. ⁵Eka gawi yo nlaku koe dero ene apa eti ulun tinggen; dero makai tali sembayang yo sae ai jumbai yo anjang; ⁶Dero tuju tunge mbo awa yo paling kinonuon langungan ai ela ono tinggen ena mbo lou sembayang; ⁷Dero gawal ena pkombo ulun ela pakot ai gawal ena bnomba Guru. ⁸Tapi ikam, nang sampe nulek Guru; koe Guru kam erai bute ai ikam eka ene erai buntung. ⁹Ai ikam nang momba ise-ise low bapa mbo dnia endo, koe Bapa kam erai bute, yo ene Iyo yo keo mbo Sorga. ¹⁰Nang low ikam nulek se pngutok, koe erai bute pngutok kam, yo ene Mesias. ¹¹Ise-ise ikam yo paling olay, moko io yo nte jadi playan kam. ¹²Ai ise-ise yo pkombo iyo se, io anta pinokiwa ai ise yo mekiwa yo se, io anta pinokombo. ¹³Sesa beta anta ikam, o ahli-ahli Taurat diang ulun-ulun Farisi, o ulun-ulun ungka ungke tau, koe ikam nokom jawong-jawong Krajaan Sorga mbo onon ulun. Koe ikam se belo sumba ai ikam ngaur nte dero yo bkomer kakan sumba. ¹⁴Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke tau, koe ikam ngakal balu-balu ai ikam nipu ngakal mato ulun diang doa yo anjang-anjang. Koe ene pasti ikam nrima ukuman yo paling boyat. ¹⁵Sesa beta anta ikam, o ahli-ahli Taurat diang ulun-ulun Farisi, o ulun-ulun ungka-ungke di tau, koe ikam blayar ngentas tasik ai bange epo mone-mone mbo tana ombo, nte naket erai kongo tinggen nte lumbat agama kam ai des io sundok lumpat, ikam nampa iyo jadi ulun nraka, yo duo lipat triaw se ikam. ¹⁶Sesa beta anta ikam, o pngutok-pngutok posa, yo ngulek: Berputus koe Bait Suci, bputus ene belo keo jodo; tapi bputus koe mas Bait Suci, berputus ene ngemereket. ¹⁷O ikam ulun-ulun bungang ai ulun-ulun posa, ise yo pawak penting, emas be ena belo Bait Suci yo mekudus emas ene? ¹⁸Berputus koe mezbah, bputus ene belo keo jodo; tapi bputus koe persembahan yo keo mbo ban iyo, berputus ene ngemereket. ¹⁹O ikam ulun-ulun posa, ise yo pawak penting, persembahan be ena belo mezbah yo mkudus persembahan ene? ²⁰Koe ene ise yo berputus koe mezbah, io bputus koe mezbah ai low diang eka yo keo pnayak ban ene. ²¹Ai ise yo berputus koe Bait Suci, io bputus koe Bait Suci diang epo Iyo low, yo nongos mbo mne. ²²Ai ise yo berputus koe sorga, io bputus koe tahta Allah ai low koe Iyo, yo nongos ombon yo. ²³Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, Koe perpuluhan ngket slase, adas manis ai jinten bayar kam, tapi yo paling penting lang ukum Taurat belo di snanda koe kam, yo ene: adil diang bolum bako tengkosang ai stia. Yo erai gnawi tapi yo mak nang dnikah. ²⁴O ikam pngutok-pngutok posa, kiyongo yo keo lang pngisop kam noding, tapi onta yo keo lang ne tolon kam. ²⁵Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, koe ktowong diang pinggan tinombrese ela baling yo tinggen koe kam, tapi ela dalom yo ponu diang ako dalus ai mranggah. ²⁶O ulun Farisi yo posa, tinombrese ile ela dalom ktowong ene, pasti ela baling yo brese low. ²⁷Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, Koe ikam sama kati kubur yo nctet bura, ngket baling nau yobrese yo, tapi ela dalom yo ponu diang tulang-tulang ai deo masam mrota. ²⁸Ene low ikam, ela baling nau yo kono ela mato ulun, tapi ela dalom kam ponu diang ungka-ungke di tau ai kteriaw. ²⁹Sesa beta anta ikam, o ahli-ahli Taurat diang ulun-ulun Farisi, o ikam ulun-ulun ungka-ungke di tau, koe ikam nengkuat kubur nabi-nabi ai nengkuen tugu ulun-ulun saleh ³⁰ai ngulek: Ena kain bolum jman itak kakah kain, kain belo anta lumpat diang dero ngempate nabi-nabi ene. ³¹Tapi diang ktine ikam ngulek nte ngkam se, se ikam ene upus pngempate nabi-nabi ene. ³²Jadi, tinomponuka low gawi gata itak kakah kam! ³³O ikam nipo-nipo, o ikam upus nipo muro! Timbe nau ikam kate ngidar ngket ukum nraka? ³⁴Koe ene, eti ka, Aku nyuyu epo ikam nabi-nabi, ulun-ulun tau ba ai ahli-ahli Taurat: tenga ngket dero anta pate kam ai snalib koe kam, yo mak knesa koe kam mbo lou-lou sembayang kam ai kurow kam ngket kota epo kota, ³⁵apa ikam nanggunng ukuman pngerudak daya ulun-ulun belo sala mulai ngket Habel, ulun kono ene, sampe epo Zakharia pea Berekhya, yo pate kam mbo ekang awa kudus ai mezbah. ³⁶Aku ngulek epo ikam: sebata-beta yo eka-eka endo tnanggunng koe pokan endo! ³⁷"Yerusalem, Yerusalem, iko yo ngempate nabi-nabi ai nurak diang batu ulun-ulun yo snuyu epo ikam! Bjuli-juli Aku ngeno kakan ngumpul pea-pea kam, sama kati tino piak ngumpul anak-anak iyo iwat olar iyo, tapi ikam belo kakan. ³⁸Eti ka lou kam endo anta dnikah ai jadi luway. ³⁹Ai Aku ngulek epo ikam: Ngket tempo ndo ikam belo anta kito Aku oli, sampe ikam ngulek: Kuli berkat diko Iyo yo ulet lang karan Tuhan!"

Chapter 24

¹Sundok ene Yesus baling ngket Bait Allah, laju malan. Murit-murit-Iyo ulet nutui tadah nau umbang Bait Allah.

²Io ngulek epo dero: "Ikam kito eka-eka ene? Aku ngulek epo ikam, sbeta yo ndok belo erai batu mbo mndo yo aso toro bpayak ban batu yo mak; eka-eka ene kakan pinorata diang tana."³Des Yesus tunge nyderai ela tngglung Zaitun, ulet murit-murit-Iyo epo-Iyo nte bkesah surah diang Io. Ulek dero: "Ulek-Ko tah epo kain, Kola ene trjadi ai ise pleta pngulet-Ko ai pleta pnyundok dnia?"⁴Tuing Yesus epo dero: "Jaga-jaga ka ikam apa nang keo ulun yo nampa ikam tang!"⁵Koe deo ulun anta ulet diang makai karan-Ku ai ngulek: Aku endo Mesias, ai dero anta nampa tang deo ulun.⁶Ikam anta kringo rtimpok oyon prang ai dolit-dolit kabar se prang. beta ktine jaga-jaga ka nang ikam belo kturoh; Koe eka-eka ene mamang arus jadi, tapi ene belo pian pnyundok iyo.⁷Koe bangsa yo erai anta bprang nglawan bangsa yo mak, ai krajaan nglawan krajaan. Anta keo jman lau diang klakui mbo mone2 awa.

⁸Tapi eka-eka ene bayu pnindu kssa ulun onon se jaman bayu.⁹Des jman ene anta ikam snrah nte kurow, ai ikam anta pnate diang kono knekei koe eka bangsa koe leka karan-Ku,¹⁰ai deo ulun anta tbalik belo prsaya, diang dero bako srah ai bako kekei.¹¹Deo nabi plsu anta nyoret ai nampa tang deo ulun.¹²Koe makin deo ulun yo belo nyanda hukum Tuhan, moko ene deo ulun anta belo keo kanam kosang se erai-erai.¹³Tapi ulun yo btahan sampe pnyundok iyo, anta sinolamat.¹⁴diang Injil Krajaan endo anta knabar epo pupus dnia nte saksi epo eka bangsa, sundok ene bayu sampe pnyundok iyo."¹⁵Jadi ena ikam kito ulun yo Pngempate prnges akat mbo awa kudus, kati pirman yo keo tnulis koe nabi Daniel. (pesan nte yo ngmbaca endo: apa kinonanam beta-beta¹⁶des jman ene, ulun-ulun yo mbo Yudea arus makat epo tunden.¹⁷Ulun yo desung mbo awa beseruit ela ombon sapo nang ka yo diwa nte ngalek kakas keke ngket lang lou iyo,¹⁸ai ulun-ulun yo desung ela umo nang ka io uli nte ngalek diris laung iyo,¹⁹Belo kua beta yo bang bawe yo desung kbuntung diang desung nete pea des jman ene.²⁰Bdoa ikam, apa des jman ikam buyo belo montuk diang jman dnia roni ai belo montuk diang olo Sabat.²¹Koe des jman ene anta tkono ksa kurow yo deras, yo belo pini tkono ngket tla dnia keo sampe tempo endo ai belo anta keo tkono ktine oli.²²Ai ena ka jman yo belo pinokile, moko ene eka yo bolum belo anta keo yo slamat; tapi leka ulun-ulun yo sundok pnili, jman ene anta pinokile.²³Des jman ene ena ulun ngulek epo ikam: eti ta, Mesias keo mbo mndo, keo mbo mnduh, nang ikam prsaya.²⁴Koe Mesias-mesias plsu ai nabi-nabi plsu anta nyoret, ulak dero anta nampa pleta-pleta yo tau te nembengong diang mujisat-mujisat, ena ka montuk sngkono, dero nampa tang ulun-ulun yo sundok pnili ene lou.²⁵Knanam kam buen-buen, Aku sundok mere ono aut epo ikam²⁶Jadi, ena keo ulun yo ngulek epo ikam: eti kam, Io keo mbo tana keke sae, nang ikam epo lane; ena belo: eti kam, Io keo lang duang, nang beta ikam prsaya.²⁷Koe sama kati ilap yo bbeap ngket tadah timur nylalit pa yo sampe epo barat, ktine lou anta pngulet Pea Ulun.²⁸Mbo mone keo antu boto, mbo mne deo mpulu pnguman antu boto ngurop."²⁹Belo ola ngket jman knurou ene, mato olo jadi seom ai bulan belo keo pa' Bintong-bintong toyak ngrpotop ngket langit ai kuasa-kuasa ngket langit skukui.³⁰Des jman ene anta melak pleta Pea Ulun mbo langit ai eka bangsa mbo dnia anta nangis nungul. Dero kito se Pea Ulun ene ulet mbo ombon jaun mbo langit diang eka kuasa ai kmulia-Iyo.³¹Ai Io anta nyuyu baling mlekat-mlekat-Iyo ulak nyiup temburi yo ries oyon iyo laju dero ngumpul ulun-ulun yo sundok lang pili-Iyo ngket opat tadah trojok dnia, ngket tompak langit erai epo tompak langit yo mak.³²Alek kam ptutui batuk ngket pmrawet nau umbang tonga ara ene: Ena ka grgei-grgei mulai loma ulak mulai ktaruk, ikam tau se jman dnia langot sundok dmpet.³³Ktine lou ena ikam kito eka-eka endo, apa ikam tau se jman ene sundok dmpet, sundok mbo ela onon jawong.³⁴Aku ngulek epo ikam: Sbeta yo pokan endo belo anta mapos, onon se eka-eka ene trjadi.³⁵Langit ai dnia anta mapos, tapi pngesah-Ku belo anta mapos³⁶Tapi olo ise diang jman ise ene ndok belo erai ulun yo tau, mlekat-mlekat mbo sorga belo tau, ktine lou Pea, pulun Bapa bute yo tau."³⁷Koe kati umbang des mbo jman Nuh, ktine lou umbang yo anta des pngulet Pea Ulun.³⁸Koe kati umbang nau dero des onon se owa nyelop dnia ene kuman ai ngisop, kawen ai ngawen, sampe mbo olo nte Nuh sumba epo lang kpal olai,³⁹ai dero belo tau ise-ise, onon se danum nyelop dnia ene ulet laju mkabis dero eka, ktine lou nau umbang yo anta des pngulet Pea Ulun.⁴⁰Des jman ene ena keo duo kongo ulun mbo umo, yo erai kongo noit, yo erai kongo yo tenape;⁴¹ena keo duo kongo ulun bawe desung mutar batu pnggiling, yo erai kongo yo noit, yo erai yo tenape.⁴²Koe ene jaga-jaga ikam, koe ikam belo di tau des olo ise Tuhan kam ulet.⁴³Apa ikam tau endo: Ena mpu lou tau des jman ise mbo malom pngako kakan ulet, pasti io bjaga-jaga, belo anta mie boyan nte lou io kono ugah.⁴⁴Koe ene, moko yo ikam briga-iga, koe Pea Ulun ulet mbo des jman yo ikam belo ngira."⁴⁵"Ise ka batak yo stia ai buen akal? io ene yo nengkat koe mpu lou nte pngutok batak-batak yo mak, nte makan dero mak ene des jman iyo.⁴⁶Empu pngego batak ene des mpu lou ulet, kito yo desung nggawi tugas iyo.⁴⁷Aku ngulek epo ikam: Sbeta iyo anta mpu lou ene kakan ngengkat io nte jadi tukang meti noto nau pngeka pngkeo iyo.⁴⁸Tapi ena ka batak ene triau akal ulak ngontus lang kesong iyo:⁴⁹Mpu lou belo di ulet-ulet, laju yo mulai ngntu batak-batak yo mak ai kuman ngisop diang ulun-ulun tuju mauk,⁵⁰moko ene mpu lou ene anta ulet mbo olo yo belo lang kira batak ene,

ai mbo jman yo belo di tnoan iyo, ⁵¹batak ene kono ntu ndok kesong sori koe mpu lou, laju moding epo awa ulun-ulun mnapik. Lane dero nangis nontoi diang nrgigep kukut."

Chapter 25

¹Des ene nau umbang Krajaan Korga sama kati spulu bawe ngelok, yo ngalek plita-iyu ai malan epo ngruku pnganten song. ²Limo dero yo bungang ai limo dero yo pintar. ³Bawe ngelok yo bungang ene moit plita-iyu, tapi belo di moit lnga, ⁴tapi bawe ngelok yo pintar ene moit plita-iyu diang lnga lang jbul dero. ⁵Tapi koe pnganten ene ola belo di ulet-ulet lou, nyantuk ba dero laju turui. ⁶Des tenga malom dingo ka doko oyonulun momba: Pnganten ulet! Sinoruku ta io! ⁷Bawe ngelok ene eka uat laju ngraduh plita dero. ⁸Bawe ngelok yo bungang ene ngulek epo bawe ngelok yo pintar: Bnagi kain idi-idi lnga kam ene, koe plita kain lnsop. ⁹Tapi tuing bawe ngelok yo pintar ene: Belo, nindo belo puli nte kain ai nte ngkam. Ale ikam malan epo yo ngnjual lnga, boli ka lane. ¹⁰Tapi, des dero aso malan nte moli-iyu, ulet ka doko pnganten ene ai dero yo sundok ber iga-iga sumba sama-sama diang io epo blawang awa ungan kawen, laju jawong tnokom. ¹¹Ulet lou bawe ngelok yo mak ene ai ngulek: Tuan, tuan ingkang tah nte kain jawong! ¹²Tapi io nuing: Aku ngulek epo ikam, se beta-beta-iyu aku belo di tau se ikam. ¹³Koe ene, bjaga-jaga doko, koe ikam belo di tau olo ai anta des-iyu. ¹⁴"Koe nau umbang Krajaan Sorga ene sama katiulun yo kakan bju epo baling se ja, yo momba batak-batak io ai nape pngkeo-iyu epo dero. ¹⁵Erai kongo die io limo talenta, erai kongo nua duo ai erai kongo yo mak nua erai, tongku-tongku dero kati pnglian dero, laju io bju. ¹⁶Laju malan ka doko batak yo kuli limo talenta ene. io staket diang sen ene laju io kuli untung limo talenta. ¹⁷Batak yo kuli duo talenta ene, nggawi ktine lou untung io duo talenta. ¹⁸Tapi batak yo kuli erai talenta ene, malan epo nampa luang lang tana laju ngona sen tuan-iyu ene. ¹⁹Ola sundok ene uli ka doko tuan batak-batak ene laju britung diang dero. ²⁰Batak yo kuli limo talenta ene ulet ai io moit untumg limo talenta, ulek-iyu: Tuan, limo talenta yo tnape epo aku; eti ko ta, aku kuli untung limo talenta. ²¹Ulek tuan ene epo-iyu: Buen beta yo gawi ko ene, oh batak ku yo buen ai setia; iko sundok stia lang gawi yo idik, aku anta mie epo iko gawi yo olai. Sumba ka ai lumpat ka lang pngego tuan ko. ²²Laju ulet lou doko batak yo kuli duo talenta ene, ulek io: Tuan, duo talenta tuan nape epo aku; eti ko ta, aku sundok kuli untung duo talenta. ²³Ulek tuan-iyu ene epo-iyu: Buen beta gawi ko ene, o batak ku yo buen ai stia, iko sundok stia lang gawi yo idik, aku anta mie epo iko gawi yo olai. Sumba ka diang lumpat ka lang pngego tuan ko. ²⁴Jadi ulet lou doko batak yo kuli erai talenta ene ai ngulek: Tuan, aku tau se tuan eneulun rusi yo ngutik mbo awa yo tuanbelo di mewet ai yo ninduk mbo awa io belo ngulo. ²⁵Koe ene aku takut ai malan aku epo ngona talenta tuan ene lang tana: Nndo, trima ka mpun tuan! ²⁶Tuing tuan-iyu ene: o iko, batak yo triaw ai bontul, iko sundok tau, se aku ngutik mbo awa aku belo di mewet ai ninduk ngket awa aku belo di ngulo. ²⁷Koe ene arus yo sen ku ene die ko epoulun yo tukang naket sen diang sen, apa ena aku uli aku nrima yo diang untung yo. ²⁸Koe ene alek ka talenta ene ngket io ai die ka epoulun yo keo spulu talenta ene. ²⁹Koe tongkuulun yo keo, epo io anta dnne, apa pngkeo io mroa. Tapi ise yo belo keo, ise ise yo keo mbo io anta nalek ngket io. ³⁰Noding ka batak yo belo keo jodo ene epo lang seom yo seom ji. La lane keo tangis tontoi ai kukut ngrgigep. ³¹Ena Pea Ulun ulet lang kmulia-Iyu ai eka mlekat sama-sama diang Io, jadi Io anta tunge ban takhta kmulia-Iyu. ³²Laju eka bangsa anta knumpul onon-Iyu ai Io anta nyeing dero ngket sama dero, sama kati gmbala nyeing domba ngket bembe, ³³ai Io anta mayak domba-domba tadah sanan-Iyu, ai bembe-bembe ene tadah sei-Iyu. ³⁴Ai Raja ene anta ngulek epo dero yo tadah sanan-Iyu: Dido, ikam yo dnne berkati koe Bapa-Ku, trima ka Krajaan yo sundok sinodia nte kam ngket tla dnne tnampa. ³⁵Koe des Aku slau, ikam mie Aku kuman; des Aku krengan, ikam mie Aku danum; des Aku nyumba-nyumba, ikam mie Aku awa nongos; ³⁶des Aku bla'i, ikam moe Aku diris; des Aku kroton, ikam ngawat Aku; des Aku nukum, ikam nuntun Aku. ³⁷Ulun-ulun yo kono ene nuing Io, ulek dero: Tuhan, des mbe kain kito Iko slau ai kain mie Iko kuman, ai krengan trus kain mie Iko ngisop? ³⁸Des mbe kain kito Iko katiulun nyumba-nyuma, ai kain mie Iko awa nongos, ai bla'i jadi kain mie Iko diris? ³⁹Des mbe kain kito Iko kroton ai nukum lang pnjara ai kain nuntun Iko? ⁴⁰Raja ene nuing dero: Aku ngulek epo ikam, se beta yo eka yo gawi kam nte erai kongo ngket erai buntung-Ku yo paling hina endo, ikam sundok nggawi yo nte Oki. ⁴¹Ai Io anta ngulek lou epo dero yo ngket tadah sei-Iyu: makat ngket onon-Ku, oh ikamulun-ulun yo okan pator sumpah, makat epo lang api yo sundok sinodia nte iblis ai mlekat-mlekat io. ⁴²Koe des Aku slau, ikam belo mie Aku kuman; des Aku krengan, ikam belo mie Aku ngisop; ⁴³Des Aku katiulun nyumba-nyumba, ikam belo mie Aku awa nongos; des Aku bla'i, ikam belo mie Aku diris; des Aku kroton ai nukum ikam belo nuntun Aku. ⁴⁴Laju dero low anta nuing Io, ulek dero: Tuhan, des mbe kain kito Iko slau, ai krengan, ai katiulun nyumba-nyumba, ai bla'i ai kroton ai nukum ai kain belo di ngawat Iko? ⁴⁵Trus Io nuing dero: Aku ngulek epo ikam eka gawi gata yo belo gnawi koe kam nteulun yo paling ina endo, ikam belo nggawi yo low nte Oki. ⁴⁶Ai dero anta sumba epo awa knesa yo kden, tapiulun yo kono ene epo lang bolum yo kden."

Chapter 26

¹Des Yesus sundok diang eka tutuy batuk Iyo ene, Io ngulek epo murid-murid Iyo: ²"Ikam tau, se duo olo aso kakan neraya Paskah, Des ene Pea Ulun snerah nte salib."³Des jman ene bkumpul ka doko imam-imam pngutok diang ulun tuo bangsa Yahudi ela istana Imam Olay yo keo karan se Kayafas, ⁴ai dero ngrondeng ptua dat nte nangop Yesus ai nte ngempate Iyo. ⁵Tapi dero ngulek: "Nang des prayaan, apa belo timbul rame mbo ekang ra'yat."⁶Des Yesus keo mbo Betania, mbo lou Simon yo keo roton kodong, ⁷ulet ka erai kongo bawe nyruku Iyo moit erai jbul marmer batok lenga kewo yo larang. Lenga ene tota iyo ombon utok Yesus, yo aso desung tunge kuman. ⁸Kito ene murid-murid ene dat san ai ngulek: "Ise jodo ksa se endo?" ⁹koe lenga ene dapet jnual diang uman larang ai sen yo dapet nte die epo ulun-ulun kao."¹⁰Tapi Yesus tau kno dero laju ngulek: "Ise moko ikam nyusah bawe endo? Koe iyo sundok nggawi yo buen epo Aku. ¹¹Koe ulun-ulun kao majak keo diang ikam, tapi Aku belo di dor sama-sama diang ikam."¹²Koe diang nota lenga ene epo kompu-Ku, io sundok ngraduh nte nglowong-Aku. ¹³Aku ngulek epo ikam: Sebata yo ela mone ka Injil endo snampe mbo mupus dnia, ise nau gawi yo endo anta nulek low nte ngno iyo."¹⁴Ngket ene malan ka erai kongo ngket duo blas murid ene, yo nan karan se Yudas Iskariot, epo imam-imam pngutok. ¹⁵Io ngulek: "Ise yo kakan die kam epo aku, apa aku nyerah Io epo ikam?" Dero mayar tolu pulu perak epo iyo. ¹⁶Mulai ngket ene io meto jman yo buen nte nyerah Yesus.¹⁷Des olo tla ngket olo raya roti belo bragi, ulet ka murid-murid Yesus epo Iyo ai ngulek: "Ela mone ptua Ko kain ngraduh awa nte perjamuan Paskah nte Ngko?"¹⁸Tuing Yesus: "Malan ta epo kota nyruku erai kongo ulun ai ulek epo iyo: Psan Guru: des yo nte Oki sundok dmpet; lang lou ko doko Aku kakan ngraya Paskah diang murid-murid Ku."¹⁹Laju murid-murid ene nglaku ise yo suyu Yesus epo dero ai ngraduh nte Paskah.²⁰Des olo sundok malom, Yesus tunge kuman sama-sama diang duo blas murid ene. ²¹Ai des dero desung kuman, Io ngulek: "Aku ngulek epo ikam, sebata-beta yo erai kongo ngket ikam anta nyerah Aku."²²Ai diang kesong nyoru dero sengkelang ngulek epo Iyo: "Mak se aku be ene, Tuhan?"²³Io nuing: "Iyo yo sama-sama diang aku yo nyoso kayang iyo lang pinggan endo, io ene doko yo anta nyerah Aku. ²⁴Pea ulun memang anta brangkat kati yo sundok tnulis nau umbang Iyo, tapi jadi sesa beta ulun yo koe iyo Pea ulun ene snerah. Aso buen nte ulun ene ena io snon belo kinomekus skali."²⁵Yudas, yo kakan nyerah Iyo ene nuing, ulek iyo: "Makse aku be, Guru?" Ulek Yesus epo iyo: "Iko sundok ngulek yo."²⁶Ai des dero desung kuman, Yesus ngalek roti, bdoa, mrinsi-mrinsi iyo laju mie iyo epo murid-murid Iyo ai ngulek: "Alek ta laju noka, endo doko kompu-Ku."²⁷Sundok ene Io ngalek ktowong, ngulek sukur laju mie iyo epo dero ai ngulek: "Nisop ta, ikam eka-eka, ngket ktowong endo. ²⁸Endo doko daya-Ku, daya pemekat, yo tnudak nte ulun deo nte ngampun dosa. ²⁹Tapi Aku ngulek epo ikam: mulai ngket tempo ndo Aku belo anta ngisop oli asil tonga anggur endo sampe des olo Aku ngisop yo, yo ene yo bayu, sama-sama diang ikam lang Krajaan Bapa-Ku."³⁰Des sundok slegu legu pujian, malan ka Yesus diang murid-murid Iyo epo Tenggelung Zaitun. ³¹Ngulek ka doko Yesus epo dero: "Malom ndo ikam eka jadi bkukuy ba iman kam koe Aku. Koe keo tnulis: Aku anta ngempate gembala ai kawan domba ene anta jadi bambur. ³²Tapi des Aku sundok nyuli, Aku ono se ikam epo Galilea."³³Petrus nuing Iyo: "Tontan dero eka bkukuy iman yo koe Iko, aku belo anta."³⁴Yesus ngulek epo iyo: "Aku ngulek epo iko, sebata yo malom ndo, onon piak sluat, iko sundok belo ngaku se Aku tolu derang."³⁵Ulek Petrus epo Iyo: "Tontan ko aku arus mate sama-sama diang Iko, aku belo anta belo ngaku se Iko." Eka murid yo mak ngulek ktine low.³⁶Sampe ka doko Yesus diang murid-murid Iyo mbo awa nan karan se Getsemani. Laju Io ngulek epo murid-murid Iyo: "Tunge ta mbo mendo, Aku epo menduh ile nte bdoa."³⁷Ai Io moit Petrus diang duo pea Zebedeus lumpat Iyo. Mulai ka doko Io keo kanam nyoru ai ngrikitik, ³⁸laju ulek Iyo epo dero: "Kesong-Ku nyoru beta, kati kakan mate kanam iyo. Nongos ta mbo mendo ai jaga-jaga diang Aku."³⁹Io wensut epo ono idi-idi, laju nyongkop ai bdoa, ulek-Iyo: "O Bapa-Ku, ena kate, koe ka ktowong endo oro ngket Aku, tapi nang kati yo ptua-Ku, tapi kati yo ptua-Ko."⁴⁰Sundok ene Io mulik epo murid-murid Iyo ene, ai krapet dero desung turui ba. Ai Io ngulek epo Petrus: "Belo be iko klian jaga-jaga erai jam diang Aku?"⁴¹Bjaga-jaga ai bdoa ka, apa ikam nang kono pkono pkena: roh memang ngaya, tapi kompu tonga gle."⁴²Laju Io malan kduo derang yo ai bdoa, ulek Iyo: "O Bapa-Ku ena memang ktowong endo belo kate oro, ena belo kate belo Aku ngisop yo, jadi ka yo ptua-Ko!"⁴³Ai des Iyo mulik nua, Iyo krapet dero desung turui, koe mato dero sundok nyantuk beta. ⁴⁴Io belo nyanda dero mbo mne laju malan ai bdoa ktolu derang yo, ai ngulek doa yo ene nua.⁴⁵Sundok ene Io ulet nyruku murid-murid Iyo ai ngulek epo dero: "Turui ka tempo ndo ai smole ka. Eti, des Io sundok sampe, se Pea ulun snerah epo kayang ulun-ulun bdosa. ⁴⁶Uat aut, man taka malan. Iyo yo nyerah Aku sundok dmpet."⁴⁷Des Yesus aso bunyal ulet ka doko Yudas, erai kongo ngket duo blas murid ene, ai sama-sama diang iyo erai rombongan olay ulun moit mendau ai glegada, yo snuyu koe imam-imam pngutok ai tuo-tuo bangsa Yahudi. ⁴⁸Ulun yo nyerah Iyo sundok mie pleta endo epo dero: "Ulun yo arok ku anta, ene doko yo, tangop ka Iyo."⁴⁹Ai peles io ono se dero yo mak ngompoh Yesus, ulek iyo: "Salam Guru," laju ngarok Iyo. ⁵⁰Tapi Yesus ngulek epo iyo: "O tman, nte ene be iko ulet?" Maju ka doko dero ngop Yesus ai nangop

Iyo.⁵¹Tapi erai kongo ngket dero yo diang Yesus nyokoi kayang iyo, nyintak mendau iyo laju naris ai nadah yo epo hamba Imam Olai koe ene bekat tlingo iyo. ⁵²Koe ene ulek Yesus epo iyo: "Sulop mendau ko ene nua epo lang sarung iyo, koe ise yo makai mendau, anta sesa koe mendau. ⁵³O moy ko be, Aku belo kuli momba Bapa-Ku, apa Io resi nyuyu sisa se duo blas psukan mlekat nte ngawat Aku? ⁵⁴Ena ktine, ktimbe nau gnenap anta ise yo sundok tnulis lang Kitab Suci, yo ngulek, se arus jadi ktine?"⁵⁵Montuk des ene Yesus ngulek epo ulun deo: "Omoy kam Aku endo penjahat, moko ikam ulet lengkap diang mendau ai glegada nte nangop Aku? Pdahal tongku olo Aku tunge nutui matuk mbo Bait Allah, ai ikam belo nangop Aku. ⁵⁶Tapi eka endo jadi apa gnep kati yo tnulis lang kitab nabi-nabi." Laju eka murid ene ngendikah Iyo laju buyo.⁵⁷Sundok dero nangop Yesus, dero moit Iyo epo ngadap Kayafas, Imam Olai. Ela mne sundok bkumpul ahli-ahli Taurat ai pngentuo-pngentuo. ⁵⁸Ai Petrus nyarak Iyo ngket oro sampe mbo natar Imam Olai, ai des sundok sumba epo dalom, io tunge ekang pngawal-pngawal nte meti nau pnyundok plikara ene. ⁵⁹Imam-imam pngutok, mokin ube eka Mahkamah Agama meto ksaksian eta nte Yesus, apa Io dapet nte ukum pate. ⁶⁰Tapi dero belo kuli, beta ko nyoret deo saksi eta. Tapi pnyundok yo keo duo kongo, ⁶¹yo ngulek: "Ulun endo ngulek: Aku kuli meroros Bait Allah ai nengkuat yo nua lang tolu olo." ⁶²Laju Imam Olai ene akat, ai ngulek epo Iyo: "Belo be Iko nuing tundruh saksi-saksi endo epo Iko?" ⁶³Tapi Yesus nokon suni. Laju ulek Imam Olai ene epo Iyo: "Demi Allah yo bolum, ulek ta epo kain, beta be belo Iko ene Msias, Pea Allah." ⁶⁴Tuing Yesus: "Iko sundok ngulek aut. Tapi, Aku ngulek epo iko, mulai ngket tempo ndo iko anta kito Pea ulun tunge isan sanan Yo Mahakuasa ai ulet mbo ombon jaun ela langit." ⁶⁵Koe ene Imam Olai ene minsit baju Iyo ai ngulek: "Io nguja Allah. Ise saksi eto taka aso? Tempo ndo ikam sundok kringo uja Iyo. Timbe san kam?" dero nuing ai ngulek ⁶⁶: "Io arus nukum mate!" ⁶⁷Laju dero npus wae Iyo ai ngenjagur Iyo; ulun-ulun yo mak mupuk Iyo, ⁶⁸ai ngulek: "Soba ulek ta epo kain, Msias, ise yo malu Iko?" ⁶⁹Desung ene Petrus tunge ela baling mbo natar. Laju ulet batak bawe epo iyo, ulek iyo: "Iko dor low sama-sama diang Yesus, ulun Galilea ene." ⁷⁰Tapi iyo belo ngaku mbo onon eka ulun, ulek iyo: "Aku belo tau, ise ngko ene." ⁷¹Des io malan epo jawong pagar, erai batak yo mak kito iyo ai ngulek epo ulun-ulun yo keo mbo mne: "Ulun endo sama-sama diang Yesus, ulun Nazaret ene." ⁷²Ai io belo ngaku nua ai bsumpah: "Aku belo tau se ulun ene." ⁷³Belo di ola ngket ene ulet ulun-ulun yo keo mbo mne ngompoh Petrus ai ngulek: "Pasti iko low erai kongo ngket dero, ene tnoan ngket otang pemesara ko." ⁷⁴Mulai ka doko Petrus mator ai bsumpah: "Aku belo tau ulun ene." Ai des jman ene sluat ka doko piak. ⁷⁵Jadi knop ka doko Petrus diang ise yo ulek Yesus epo iyo: "Onon piak sluat, iko sundok belo ngaku se Aku tolu derang." Laju io malan epo baling ai nangis diang nyoru beta.

Chapter 27

¹Des olo mulai molo, eka imam-imam pengutok ai tuo-tuo bangsa Yahudi ngumpul ai ngalek pmeakat nte ngempate Yesus. ²Dero molit Io, laju moit-Iyo ai nyerah-Iyo epo Pilatus, pnguasa negeri ene. ³Montuk des Yudas, yo nyerah Io, kito, se Yesus sundok pnutus nukum mate, noli doko io. Laju io nempuli sen yo tolu pulu perak ene epo imam-imam pengutok ai tuo-tuo, ⁴ai ngulek: "Aku sundok bdosa koe nyerah daya ulun yo belo keo sala." Tapi tuwing dero: "Ise urusan kain diang ene? Ene urusan ko se!" ⁵Koe ene io low nurak sen perak ene epo lang Bait Suci, laju malan ngket mne mentiu nggeweng kompu io se. Imam-imam pengutok ngalek sen perak ene ai ngulek: "Belo dikate mesumba sen endo epo lang pti persembahan, koe endo sen daya." ⁶Sundok brondeng dero moli diang sen ene tana yo nulek Tana Tukang Blanga nte jadi awa kuburan ulun nyumba. ⁷Koe ene doko tana ene sampe des olo ndo nulek Tana Daya. ⁸Diang ketine gnap doko Firman yo snampe koe nabi Yeremia: "Dero nrima tolu pulu sen perak, yo ene uman yo tnetap nte erai kongo ulun ngaya nau umbang yo kati takser yo biasa mbo ulun Israel, ¹⁰Ai dero miye sen ene nte tana tukang blanga, kati nau yo pesan Tuhan epo aku." ¹¹Laju Yesus pinokadap epo wali negeri. Trus wali negeri ngunti epo-Iyo: "Iko be raja ulun Yahudi?" Tuwing Yesus: "Iko se ngulek yo aut." ¹²Tapi nte tunruh yo oret imam-imam pengutok ai tuo-tuo epo Iyo, tapi Io belo di nuwing ise-ise. ¹³laju ulek Pilatus epo-Iyo: "Belo be Iko kringo bukan main kdeo tunruh saksi-saksi endo epo Iko?" ¹⁴Tapi Io ndok belo erai buku nuwing, sampe wali negeri ene eran beta. ¹⁵Sundok jadi pnepet nte wali negeri nte ngutis erai kongo ulun nukum des tongku olo raya ene ngket pnindu ulun deo. ¹⁶Ai des jman ene keo lang sper erai kongo yo ulun tau ba ktiraw iyo yo nan karan se Yesus Barabas. ¹⁷Koe dero sundok bkumpul mbo mne, Pilatus ngulek epo dero: "Ise yo ptua kam lelu yo nutis nte ngkam, yesus Barabas ena belo Yesus, yo bnomba Kristus?" ¹⁸Io se memang tau, se dero sundok nyerah Yesus koe belo gawal. ¹⁹Des Pilatus desung tunge mbo pnunge pengadilan, bawe iyo nyampe pesan epo iyo: "Nang iko lumpat urusan ulun belo keo sala ene, koe Io ene aku sesa beta lang nupi ku malom nde." ²⁰Tapi koe kese imam-imam pengutok ai tuo-tuo, ulun deo bebetua belo kate belo diang pnindu apa Barabas nutis trus Yesus nukum mate. ²¹Wali negeri nuwing ai ngulek epo dero: "Ise lelu dero duo endo yo ptua kam yo utis ku nte kam?" Ulek dero: "Barabas." ²²Ulek Pilatus epo dero: "Ena ktine, ise yo arus nte oki gawi epo Yesus, yo bnomba Kristus?" Dero eka keo oyon: "Io arus snalib!" ²³Ulek iyo: "Tapi kejahatan ise yo gnawi ke-Iyo?" Tapi dero makin riyes keo oyon: "Io arus snalib!" ²⁴Des Pilatus kito se usaha anta sia-sia, malah sundok mulai nyoret kekacauan, iyo ngalek danum trus muih kayang iyo mbo onon ulun deo ai ngulek: "Aku belo keo sala epo daya ulun endo; ene urusan kam se!" ²⁵Ai eka ra'yat ene nuwing: "Koe ka daya-Iyo tnanggung kain ai pea-pea kain!" ²⁶Laju io ngutis Barabas nte dero, tapi Yesus ksa iyo laju serah iyo nte salib. ²⁷Laju tentara-tentara wali negeri moit Yesus epo gedung pengadilan, laju momba eka-eka pasukan bkumpul nglekum Yesus. ²⁸Dero ngosu pnyepakai-Iyo ai nyua jubah ungu epo-Iyo. ²⁹Dero ngendaro erai mahkota dui ai mayak ban utok-Iyo, laju miye Io erai banen bulu mbo kayang sanan-Iyo. Sundok ene dero nyongkop onon-Iyo ai ngolok-ngolok Io, ulek dero: "Salam, o'raja ulun Yahudi!" ³⁰Dero nepus-Iyo ai ngalek bulu ene trus malu bulu ene epo utok-Iyo. ³¹Sundok ngolok-ngolok se Io dero ngosu jubah ene ngket kompu-Iyo trus nyua nua pnyepakai-Iyo epo Iyo. Trus dero moit Io epo baling nte salib. ³²Des dero malan epo baling kota, dero mangkoruku diang ulun ngket Kirene yo nan karan se Simon. Ulun ene paksa dero nte moson salib Yesus. ³³Sampe ka doko dero mbo awa yo nan karan se Golgota, arti iyo: Awa Tengkorak. ³⁴Laju dero miye Io ngisop anggur sampur poru. Lipas Io nyoba, Io belo kakan ngisop iyo. ³⁵Sundok nyalib Io dero ngembagi pnyepakai-Iyo diang moding undi. ³⁶Laju dero tunge ela mne ngendurung Io. ³⁷Ai mbo ombon utok-Iyo pnsang tulisan yo ngulek alasan ise moko Io nukum: "Endo doko Yesus Raja ulun Yahudi." ³⁸Sama-sama diang Io snalib duo ulun triaw gawi, erai kongo ela tadah sanan ai erai kongo ela tadah sei-Iyo. ³⁹Ulun-ulun yo lalo mbo mne nguja Io ai ulak ngilik-ngilik utok, ⁴⁰dero ngulek: "O'Iko yo kakan meroros Bait Suci ai kakan nengkorong yo nua lang tolu olo, slamat ko tah kompu-Ko se ena Iko Pea Allah, diwa ta ngket salib ene." ⁴¹Ktine low imam-imam pengutok sama-sama ahli-ahli Taurat ai tuo-tuo ngolok-ngolok Io ai dero ngulek: ⁴²"Ulun yo mak sinolamat koe Io, tapi kompu-Iyo se belo kuli Io nyelamat! Io Raja Israel? Alo Io diwa ngket salib ene apa kain anta persaya epo-Iyo." ⁴³Io mayak harapan-Iyo epo Allah: alo ka Allah nylamat Io, ena Allah sengkono kesong epo-Iyo! Koe Io sundok ngulek: Aku doko Pea Allah." ⁴⁴Ndok ulun-ulun triaw gawi yo snalib sama-sama diang Io mesala-Iyo ketine low. ⁴⁵Mulai ngket jam duo blas seom pupus ja ene sampe jam tolu. ⁴⁶Kira-kira jam tolu Yesus momba diang oyon riyes: "Eli, Eli, lama sabakhtani?" Arti yo: Allah-Ku, Allah-Ku, ise moko Iko ngendikah Aku? ⁴⁷Kringo ene, tenu-tenu ulun yo akat mbo mne ngulek: Io momba Elia." ⁴⁸Lansung ulet erai kongo ngket dero; io ngalek bungo karang, nyoso yo epo lang anggur mosom, laju nginsang yo mbo erai banen bulu trus miye Yesus ngisop. ⁴⁹Tapi ulun-ulun yo mak ngulek: "Nang, alo taka meti, ulet be Elia nte nyelamat Io." ⁵⁰Yesus momba nua diang oyon riyes laju nyerah kesong-Iyo. ⁵¹Jadi eti ka doko, pemombong Bait Suci woka sindai ngket ombo epo iwa ai keo kelakui, ai tunden-tunden batu skak, ⁵²ai kubur-kubur wingkang ai deo ulun kudus yo sundok mate nyuli.

⁵³ Ai lipas pngenyuli Yesus, dero low baling ngket kubur, laju sumba epo kota kudus mekelak kompu epo deo ulun.

⁵⁴ Pengutok pasukan ai prajurit-prajurit iyo yo ngendurung Yesus jadi beta-beta takut des dero kito klakui ai ise yo sundok jadi, laju ngulek: "Beta-beta, Io endo doko Pea Allah. ⁵⁵ Ai keo mbo mne deo bang bawe yo meti ngket oro, yo ene bang bawe yo lumpat Yesus ngket Galilea nte nglayan Io. ⁵⁶ Mbo ekang dero keo Maria Magdalena, ai Maria ine Yakobus ai Yusuf, ai ine pea-pea Zedebeus. ⁵⁷ Des olo kakan malom ulet ulun tataw, ulun Arimatea, yo nan karan se Yusuf ai yo sundok jadi murid Yesus low. ⁵⁸ Io malan ngadap Pilatus ai tindu antu Yesus. Pilatus nyemuyu nyerah yo epo-iyo. ⁵⁹ Trus Yusuf ngalek antu ene, ngembungkus iyo diang diris yo bura brese, ⁶⁰ laju melumbi iyo mbo lang kubur iyo yo bayu, yo kali iyo lang tunden batu, ai sundok nyekoling erai botu batu olai epo bowa kubur ene, malan ka io. ⁶¹ Tapi Maria Magdalena ai Maria yo mak nongos mbo mne tunge mbo onon kubur ene. ⁶² Olo manin iyo, yo ene lipas olo braduh, ulet doko imam-imam pengutok ai ulun-ulun Farisi sama-sama ngadap Pilatus, ⁶³ laju dero ngulek: "Tuan, kain knop, se tukang pketang ene des bolum-Iyo ngulek: Lipas tolu olo Aku anta nyuli. ⁶⁴ Koe ene apa snuyu nte ngendurung kubur ene sampe olo yo ke tolu; ena belo, murid-murid-Iyo anta ulet nte ngako io, laju ngulek epo ra'yat: Io sundok nyuli ngket ekang ulun mate, sampe pemeketang yo paling sori anta pawak triaw asil yo se yo tla. ⁶⁵ Ulek Pilatus epo dero: "Endo tukang durung nte ngkam, malan ai durung beta kubur ene buen-buen." ⁶⁶ Laju malan ka dero ai diang awat tukang durung ene dero memeterai kubur ene ai ngendurung yo.

Chapter 28

¹Sundok olo Sabat lalo, desung mato olo nyoret olo tla minggu ene, malan ka doko Maria Magdalena ai Maria yo mak, nuntun kubur ene. ²Osung keo ka klakui ries koe pndiwa erai kongo mlaekat Tuhan ngket langit ai ngompoh batu ene ai nylunggang batu ene laju tunge ban ne. ³Wae-iyu kati nau ilap ai pnyepakai-iyu bura kati nau salju. ⁴Ai pngndurung-pngndurung ene nggewew koe takut ulak jadi kati nau ulun-ulun mate. ⁵Tapi apo mlaekat ene ngulek epo bang bawe ene: Nang ka ikam takut; koe aku tau se ikam meto Yesus yo snalib ene. ⁶Io mba di keo mbo mndo, koe Io sundok nyuli, sama kati yo sundok ulek-Iyo. Dido, eti ka awa Io lumbi. ⁷Ai resi malan aut ai nulek epo murid-murid-Iyo se Io sundok nyuli aut ngket ekang ulun mate. Io ono se ikam epo Galilea; mbo lane bayu ikam kito Io. Se beta-beta-iyu aku sundok aut ngulek ene epo ikam. ⁸Dero peles beta malan ngket kubur ene, diang takut ai diang ego mroa ai monsit resi-resi nte memetau ene epo murid-murid Yesus. ⁹Kolan-kolan Yesus mangkoruku diang dero ai ngulek: "Salam nte ngkam." Dero ngompoh-Iyo ai ngokop botis-Iyo ulak nyembah-Iyo. ¹⁰Jadi ulek Yesus epo dero: "Nang takut. Malan ai ulek ka epo eraibuntung-eraibuntung-Ku, apa dero brangkat epo Galilea. Jadi mbo lane doko dero bayu kito Aku." ¹¹Des dero mbo tenga boyan, ulet ka doko tenu-tenu kongo ngket pngndurung-pngndurung ene epo kota ai nyampe eka-eka nau ene epo imam-imam pngutok. ¹²Des sundok brondeng diang pngntuo-pngntuo, dero pkat laju mie roa bes sen epo tentara-tentara ene ¹³ai ngulek: "Ikam arus mere, se murid-murid-Iyo ulet des malom ai ngako-Iyo des ikam desung turui. ¹⁴Jadi ena nau ene dingo wali ngri, kain anta bsara diang io, apa ikam aman." ¹⁵Dero nrima sen ene ai nggawi kati yo pnesan epo dero. Jadi kabar ene dingo mupus mbo ulun-ulun Yahudi sampe olo ndo. ¹⁶Jadi sbelas murid ene brangkat epo Galilea, epo tunden yo sundok tutui Yesus epo dero. ¹⁷Des kito Io dero nyembah-Iyo, tapi tenu-tenu kongo kerong-kerong. ¹⁸Yesus ngompoh dero ai ngulek: "Epo Aku sundok dnle eka kuasa mbo sorga ai mbo dnla. ¹⁹Koe ene dnalan ka, tnampa eka-eka bangsa jadi murid-Ku ai tinombaptis beta dero lang karan Bapa ai Pea ai Roh Kudus, ²⁰ai tnutui bnatur beta dero eka nau umbang yo sundok suyu-Ku epo ikam. Jadi apa ikam tau, se Aku sama-sama diang ikam trus sampe balikbekat.

Luke

Chapter 1

¹Epo Teofilus yo mulia, Deo ulun yo sundok ngomer nyusun srita nau umbang ngket ayap alom yo sundok kjadian mbo taka, ²kati yo sampe dero epo taka, yo ngket tla nte kito nau ai nte playan Firman. ³Koe ene, ngket aku nyempeti nau eka-eka kjadian ene tuyu-tuyu mulai ngket tla yo, aku ngalek kputusan nte nulis yo mbo buku binonuen nte ngko, ⁴apa iko kate tau, se ise-ise yo tnutui bnatur epo iko ene beta-beta memang. ⁵Des jman Herodes, raja Yudea, Keo imam karan se Zakharia ngket rombongan Abia. Bawe yo yo ene low ulun ngket upus Harun, karan yo Elisabet. ⁶Dero duo ene sengkono mbo Allah ai bolum ngaya se ptua Allah, ai ise-ise yo sundok ttep Tuhan diang belo keo bila molon. ⁷Tapi dero duo ene belo keo pea, koe Elisabet ene aloi ai umur dero duo ene sundok tuo memang aut. ⁸Keo jman yo, des kono bagian pompo yo, Zakharia btugas nte imam ela onon Tuhan. ⁹koe des nundi kati biasa yo nte nentu ise lelu imam yo nte btugas, Io ene yo tnunjuk nte sumba epo lang bait susi ai nutung jombu mbo mne. ¹⁰Montuk desung ene eka umat bkumpul ela baling nte smbayang. Des ene memang jman yo nte nutung jombu. ¹¹Belo ola, Zakharia kito erai kongo mlekat Tuhan akat mbo tadah sanan Mezbah awa nutung jombu. ¹²Koe kito ene io tkojet laju keo kanam takut. ¹³Tapi mlekat ene ngulek epo io : "Nang iko takut, Zakharia, koe doa ko sundok sinorukui, Elisabet bawe ko ene anta ngmekus pea song nte ngko ai iko arus nampa karan pea ene Yohanes. ¹⁴Iko anta buen pngnanam ai ego, ktine low deo ulun yo lumpat buen pngnanam koe pngulet pea ko ene. ¹⁵Koe io ene anta olai mbo onon Tuhan, io ene belo anta ngisop anggur ai pngisop yo tau nte mauk, diang io ene nindo ponu diang Roh Kudus mulai ngket lang buntung ine io. ¹⁶Iyo anta nampa deo ulun Israel mulik epo Tuhan, Allah dero, ¹⁷io anta malan ono se Tuhan lang roh ai kuasa Elia nte nampa kesong bapa-bapa btulik epo pea-pea io ai kesong ulun-ulun triau epo akal ulun-ulun yo kono jadi diang ktine nyedia ente Tuhan umat yo skono nte-Iyo. ¹⁸Trus ulek Zakaria epo malaikat ene: "Ktimbe apa aku tau se soal ene anta jadi? koe aku sundok tuo ai baweku low sundok tuo." ¹⁹Tuing malaikat ene epo io: "Aku endo Gabriel yo nglayan Allah ai aku sundok snuyu nte ngesah diang iko ai nte nyampe kabar buen endo epo iko. ²⁰Sbeta yo iko anta jadi pepe ai mba di tau bunyal sampe olo, des eka-eka ene jadi, koe iko belo persaya pmensara ku yo anta sampe des yo melak se beta. ²¹Des ene ulun deo nginte Zakharia. Dero jadi bengong, koe io ola balo lang bait susi. ²²Des io baling, io belo tau bsra epo dero jadi dero tau, se io sundok keo pengkito lang Bait Suci. Laju io mie isarat epo dero, koe io nokon pepe. ²³Des sundok tugas io abis, io uli epo blai. ²⁴Tenu-tenu kola nua Elisabet,

bawe io, klandung ai kola lima bulan io belo nyoret ekang ulun.²⁵Endo doko tanda gawi gata Tuhan nte oki, tempondo Iyo kakan merse pgemai ku onon ulun ."²⁶Lang bulan ke onom Allah nyemuyu malaikat Gabriel brangkat epo kota mbo Galilea nan karan se Nasaret,²⁷epo ulun bawe ngelok yo sundok kinomanu diang yusuf engket kluarga Daud; karan ngelok ene Maria.²⁸ Des mlekat ene sumba mbo blai Maria, io ngulek: "Salam,o iko dne, Tuhan diang iko." ²⁹Maria tkojet kringo pngesah ene, trus ngunti lang kesong io, ise arti salam ene.³⁰Ulek malaekat ene epo io: "Nang takut, o Maria, koe iko kuli die sokoi ela onon Allah. ³¹Beta-beta yo, iko anta klandung diang ngmekus erai Pea song ai iko arus nampa karan Io Yesus. ³²Io anta jadi olai ai nulek Anak Allah Yo Paling Ombo. Diang anta Tuhan Allah mie epo Io' pnunge Daud, bapa ombon Io, ³³ai Io anta tetap jadi raja nte upus Yakub skola-kola yo diang Kerajaan-Iyo belo anta abis.³⁴Ulek Maria epo malaekat ene : "Ktimbe soal ene anta jadi, koe aku belo pian bsong?" ³⁵Tuing malaekat ene' epo io: " Roh Kudus anta diwa ombon iko ai kuasa Allah Yo Paling Ombo nte ngugu iko, koe ene Pea yo anta kmekus ko ene anta nulek kudus, Anak Allah.³⁶ Ai sbeta yo, se Elisabet, nyindai ko ene, io low, ulak tuo diang nulek se aloi ene, desung klandung pea song, endo nte io onom bulan aut. ³⁷Koe nte Allah belo keo yo belo dapet gawi." ³⁸Ulek Maria: "Sbeta yo, aku endo ulun nte Tuhan suyu, jadika epo aku jadi kati ulek ko ene." Trus malaekat ene ngndikah io. ³⁹Belo di ola balo sundok ene Maria brangkat ai peles malan epo daerah ela tunden-tunden epo tadah erai kota mbo Yehuda. ⁴⁰ Mbo mne io sumba lou Zakaria ai bsalaman epo Elisabet. ⁴¹ Des Elisabet kringo salam Maria, nyoet pea lang rahim io ai Elisabet jadi ponu Roh Kudus,⁴² trus bdoya diang oyon ries: "Ela ekang bang bawe iko kuli berkat, atok buntung ko kuli berkat. ⁴³ Aku endo ise sampe ine Tuhan ku ulet nuntun aku?"⁴⁴ Lau-lau beta, des aku kringo salam ko ene, pea lang buntung ku nyoet koe ego. ⁴⁵ Aso buen kanam bolum io, yo sundok persaya, koe ise yo nulek epo io ngket Tuhan, anta jadi."⁴⁶Ulek Maria: "Rohku ngmulia se Tuhan, ⁴⁷ ai kesong ku ego koe Allah, tukang slamat aku,⁴⁸ koe Iyo sundok nympti nau bolum hamba-Iyo ene se belo di ngkeh-ngkeh. sbetaiyo, mulai engket tempondo eka-eka pea opo lai sori ngulek se aku bulum snang, ⁴⁹ Koe yo paling kuasa sundok ngawi gawigata yo olai epo aku kudus karan-Iyo ene."⁵⁰ Ai die sokoi yo turun-temurun mitek ulun yo takut se Iyo. ⁵¹ Iyo memekelak kuasa-Iyo diang gawi kayang-Iyo se ai mtuar ulun-ulun yo sombong kesongiyo;⁵² Iyo mdiwa raja-raja emgket pnunge Io ai mkombo ulun-ulun yo snapa, ⁵³ Iyo nudak eka-eka yo buen epo ulun-ulun sietslau, ai tinombuyo ulun yo tatau malan diang kayang osau;⁵⁴ Iyo ngawat israel, playan-Iyo, koe Iyo kenop se diesokoi-Iyo. ⁵⁵ Kati yo jnanji koe-Iyo epo itak kakah taka, epo Abraham ai turunaniyo nte ndok kden."⁵⁶ ai Maria nongos bangsa tolu bulan diang Elisabet, sundok ene bayu uli nua epo lou iyo se. ⁵⁷ Sampe bulan ente Elisabet mekus ai Io ngemekus pea song, ⁵⁸ des ulun-ulun giling ginting ai mandi mokong Io krio, se Tuhan sundak mkelak pdie sokoi-Iyo yo olai beta epoiyo, eka-eka dero ego diang iyo.⁵⁹ Ulet dero des olo ke walu nte ngatep pea ene diang dero kakan nampa karan io Zakharia, kati karan uma io. ⁶⁰ Tapi ine io ngulek: "nang, karan io arus Yohanes." ⁶¹ Ulek dero epo io: "belo keo mo buyut moyang, itak opo, nyari nyindai pea rini ko yo karan ktine." Trus dero nguai epo uma io kakan ngunti karan ise yo kakan die-io epo pea iyo ene. ⁶³ Io tindu batu tulis, trus Io, nulis ktindo: "Karan io Yohanes." eka dero eran⁶⁴ Des ene lou wingkang bowa io ai ale pepe io trus bsurah diang memuji Allah. ⁶⁵ jadi takut eka ulun yo nongos mo naine, eka nau ene jadi lembon biwi bowa mupus nyarak tunden Yudea⁶⁶ Ai eka ulun yo kringo ene, ngnanam ai ngulek: "Jadi ise pea ene endo anta?" koe kayang Tuhan diang io. ⁶⁷ Zakharia, uma io, ponu diang Roh Kudus, trus io nyampe ngket Tuahan ulek io: ⁶⁸ Tuhan, Allah Israel, yo paling pnui, koe Io ulet nte ngawat umat-Io diang mie pnous nte dero. ⁶⁹ Io mie nte nylamat taka, tete upus Daud, batak-Io ene. ⁷⁰ Kati yo sundok ulek Tuhan ngket bai bareh tete bowa nabi-nabi-Io yo kudus-⁷¹ nte nylamat taka ngket musu-musu taka ai ngket kayang eka ulun yo kekei se taka. ⁷² nte mekelak rahmat-Io epo itak kakah taka ai mekenop anta janji -Io yo kudus, ⁷³ yo ene sumpah yo ulek Io epo Abraham, uma itak kakah taka, se Io miye taka, ⁷⁴ apa taka, lopus ngket kayang musuh, kuli sbayang epo-Io diang belo takut, ⁷⁵ lang kbrese ai yo kono mbo onon-Io kanjang-kanjang umur bolum taka. ⁷⁶ Ai iko, o' anakku, anta tinompapa nabi Allah Yo paling ombo; koe iko anta malan ono se Tuhan nte ngeraduh boyan nte-Io, ⁷⁷ nte miye epo umat-Io pentau soal keselamatan yo lang pengampunan dosa-dosa dero, ⁷⁸ koe rahmat ai sayang kosang ngket Allah taka, diang ise Io anta ngasi ngado taka, Mato olo ma ngket awa yo ombo, ⁷⁹ nte nampa pa nte dero yo nongos lang seom ai lang slingu maut nte nadah botis taka epo boyan damai sejahtera. ⁸⁰ Jadi anak ene tambah olai ai tambah galak roh iyo. Ai io nongos mbo padang gurun sampe epo olo io arus mekelak kompu iyo epo ulun Israel.

Chapter 2

¹Des jman ene Kaisar Agustus nampa aturan, nyuyu nyatat eka ulun mbo pupus dnia.²Ndo dko tla nyatat des jman Kirenius jadi pngutok pmerenta ela Siria.³Koe ene eka ulun ulet nnte catat, masing-masing la kota dero se.⁴Ktine lou Yusuf brangkat ngket kota Nazaret mbo Galilea epo Yudea, epo kota Daud yo karan se Betlehem,- koe io ngket suku ai upus Daud-⁵apa cnatat sama-sama diang Maria, saro yo, yo desung klandung.⁶Des dero mbo mne sampe des nte Maria kakan mekus,⁷ai io ngmekus Anak song, Anak yo tuo, laju bnedong diang ampik ai nlumbi mbo lang klekatuk, ngke belo keo awa nte dero turui nsan.⁸La kampung mne keo pngamu-pngamu domba, bembe yo nongos la jaba dikut ngendurung pnyekamu-pnyekamu dero des malom.⁹Kolan-kolan akat erai kongo mlekat Tuhan mbo dmpet dero diang kmulia Tuhan ktarang nglekum dero ai dero takut beta.¹⁰Trus ulek mlekat ene epo dero: " nang takut, koe sbeta iyo aku nyampe epo ikam pngego mroa nte eka-eka bangsa."¹¹Olo ndo sundok kinomekus nte ngkam tukang nylamat, yo ene Kristus, Tuhan, mbo kota Daud.¹²Ai ndo doko pnanda iyo nte ngkam: Ikam anta ruku erai kongo taru bnedong diang ampik ai lumpi lang klekatuk."¹³Ai kolan-kolan melak sama-sama diang mlekat ene deo tentara sorga yo muji Allah, ulek iyo:¹⁴"Kmulia nte Allah mbo awa yo paling ombo ai snang koyon mbo dnia nte ulun yo sengkono epo Iyo."¹⁵Sundok mlekat-mlekat ene ngndikah dero ai mulik epo sorga, pngamu-pngamu ene bunyal epo sama dero se: "man taka malan epo Betlehem nte meti ise nau umbang ela lane, kati yo snampe koe Tuhan epo taka."¹⁶Trus dero nrebe malan ai ngruku Maria diang Yusuf ai taru ene, yo desung lumbi lang klekatuk.¹⁷Des dero kito se-Io, dero nyampe ise yo sundok nulek epo dero nau umbang Pea ene. ¹⁸Eka ulun yo kringo bengong nau umbang ise yo sundok ulek gembala-gembala ene epo dero. ¹⁹tapi Maria ngona lang kesong eka nau umbang ene ai ngnanam iyo. ²⁰Gmbala-gmbala ene uli ulak muji ai ngmulia Allah koe ise-ise yo dingo dero ai pengitan dero, eka sengkono diang ise yo sundok nulek epo dero.²¹Des gnep umur walu olo Io harus knatep, Io dnne karan se Yesus, yo ene karan yo nontus koe mlekat onon se Io keo lang buntung ma Io. ²²Des gnep jman nte mllo mlius, kati hukum torat Musa, dero moit Io epo Yerusalem nte nyerah-Io epo Tuhan, ²³kati keo tnulis mbo hukum Tuhan : "Eka pea song yo tuo tingene harus knudus nte Allah", ²⁴ai nte mie persembahan korban kati yo ulek Firman lang hukum Tuhan, yo ene erai pasang tkukur ena belo dou kikuy anak dara. ²⁵Keo ulun mbo yerusalem karan se Simeon. Io ene ulun yo buen ai patoh, yo minte pngiburan nte Israel. Roh Kudus keo ombon io, ²⁶ai epo io sundok pinotau koe Roh Kudus, se io belo anta mate ena belo pian kito Mesias, yo ene Io yo sundok bnoso diang lnga urapan koe Tuhan. ²⁷Io ulet epo bait Allah koe Roh Kudus. Des Yesus, Pea ene, noit sumba koe ulun tuo-Io nte gadoh kati ise yo nulek mbo hukum torat, ²⁸io ngongkom Pea ene laju nente-Io ulak muji Allah. ulek io : ²⁹"Tempondo, Tuhan, Koe ka hamba-Ko endo bju lang damai sjahtra, sngkono kati diang Firman-Ko. ³⁰Koe matoku sundok kito nau selamat yo engket Iko ene, ³¹yo sundok sinodia koe Ko la onon eka bangsa, ³²yoene pa yo jadi beta nte bangsa-bangsa yo mak ai jadi kemuliaan nte umat-Ko, Israel."³³ai ine uma-Iyo bengong beta diang eka ise yo kenesah nau umbang Iyo. ³⁴Trus Simeon memberkati dero ai bunyal epo Maria, ine Pea ene : " sebetaiyo Pea endo tenetap nte metoyak ai nengkuat deo ulun mbo Israel ai nte jadi tanda yo ngoret ruok rame. ³⁵ai mendau anta nglosan kesong ko se, apa jadi beta pengenanam kesong ulun deo. ³⁶Ene lou la mne keo Hana, erai kongo nabi bawe, pea Fanuel engket suku Asyer. umur iyo sundok tuo aut. sundok kawen iyo bolum turu taon kolaiyo diang songiyo. ³⁷ai tmpo ndo iyo balu ai ketuo iyo walu pulu opat taon. Iyo belo pini ngndikah Bait Allah ai molo malom beibadah diang puasa ai bedoa. ³⁸Ai des ene lou ulet iyo epo mne ai ngulek syukur epo Allah ai bekesah nau umbang Pea ene epo eka-eka ulun yo minte pengelopos nte Yerusalem. ³⁹Ai des sundok eka yo harus gnawi kati hukum Tuhan. uli dero epo kota awa nongos jati, yoene kota Nazaret mbo Galilea. ⁴⁰Pea ene ktambah menduan ai jadi galak ponu hikmat, ai kasih karunia Allah keo la Iyo. ⁴¹Tongku taon ulun tuo Yesus malan epo Yerusalem des olo raya Paskah. ⁴²des Yesus umur duo belas taon, malan doko dero epo Yerusalem kati jati des olo raya Paskah ene. ⁴³Sundok olo-olo perayaan ene, des dero malan uli, nongos Yesus mbo Yerusalem belo di tau ulun tuo-Iyo. ⁴⁴Koe dero ngomoi se Io keo ekang ulun-ulun kerai dalan diang dero, erai olo koro dero malan, bayu dero meto Io ekang kluarga keluarga ai ulun-ulun yo bakotau diang dero. ⁴⁵Koe dero belo ruku Io, mulik dero epo Yerusalem ulak trus meto Io. ⁴⁶Des sundok tolu olo dero ruku Io lang Bait Allah; Io desung tunge ela ekang guru-guru agama, ulak nempaning ai rekunti epo dero. ⁴⁷Ai eka ulun yo nempaning Io ene eran beta koe kpintar-Iyo nuing pemesara dero ene. ⁴⁸Ai des ulun tuo-Iyo kito se Iyo, dero krengao, trus ulek ine-Iyo epo-Iyo: "Ise moko ktine gawi Iko epo kain? Uma-Ko ai aku diang nyoru meto Iko." ⁴⁹Tuing-Iyo epo dero : " ise moko ikam meto Aku? mba tau be ikam, se Aku arus keo lang belai Bapa-Ku?" ⁵⁰Tapi dero belo tau ise yo ulek Iyo epo dero ene. ⁵¹Trus Io uli sama-sama diang dero epo Nazaret; ai Io nokon bolum lang asi ado dero. Ai ine -Iyo ngona lang pngenanam ene nau umbang ene. ⁵²Ai Yesus tambah menduan ai ktambah pentau-Iyo ai tambah olai pngaruh Iyo ai gnawal koe Allah ai ulun.

Chapter 3

¹Lang taun kelimo blas ngket pmerenta Kaesar Tiberius ,des Pontius Pilatus nte jadi wakel negri Yudea ai Herodes raja wilayah Galilea, Filipus, erai buntung yo, raja wilayah Iturea ai Trakhonitus, ai Lisania raja wilayah Abilene, ²des jman Hanas ai Kayafas nte jadi Imam olai, ulet Firman Allah epo Yohanes, pea Zakharia, mbo padang gurun.³Des ene Yohanes ulet epo pupus daerah Yordan ai ngulek: "Tobat ai mie kompu ko nte bnaptis ai Allah anta ngampun dosa ko,⁴kati keo tnulis lang kitab nbuat-nbuat Yesaya: Keo oyon yo momba-momba mbo padang gurun: sinodia boyan nte-Tuhan, pinolonus boyan nte-Iyo.⁵tongku lbak anta tnimbun ai tongku tunden ai dulung jadi rata, yo blengkong pinolonus, io glutgensung pino solo, ⁶ai eka-eka ulun anta kito slamat ngket Tuhan."⁷Trus io ngulek epo ulun deo yo ulet epo iyo nte baptis, ulek iyo: "O iko upus nipo muro! Ise yo ngulek epo ikam apa kuli makat ngket pngemara yo anta ulet?"⁸Pinokelak bua-bua yo sengkono diang nau bolum sundok tobat. Ai nang kneno lang kesong kam: Abraham ene uma kain! Koe aku ngulek epo ikam: Allah kuli nampa pea-pea nte Abraham ngket batu-batu endo!⁹Kapak sundok sinodia mbo tondal kayu ai tongku tonga yo belo tau kbua buen, anta tnotou ai noding epo lang api."¹⁰Ulun deo ngunti epo iyo: "Ena ketine, ise nte kain gawi?"¹¹Tuing iyo: "ise-ise yo keo baju duo, buen yo ngembagi epo yo belo pian keo, ai ise io keo okan kinan, moko yo gawi yo ktine low."¹²keo ulet low pnage-pnage bea nte baptis ai dero ngunti epo iyo: "Guru, ise yo arus gawi kain?"¹³Tuing iyo: "Nang nage sisa se yo tnentu nte kam."¹⁴ai tentara-tentara ngunti lou epo iyo: "ai kain, ise yo arus gawi kain?"¹⁵Tuing Yohanes epo dero: "Nang ngrampas diang maksa, cukup ka diang upa kam."¹⁶Tapi koe ulun deo desung minte ai ngarap, ai eka dero ngunti lang kesong dero nau umbang Yohanes ene, nang-nang io ene Mesias,¹⁷Yohanes nuing ai ngulek epo eka-eka ulun ene: "Aku ngembabtis ikam diang danum, tapi Io aso ombo kuasa yo se aku anta ulet ai ngosu tali trumpak yo aku belo snaron. Io anta ngembabtis ikam diang Roh Kudus ai api.¹⁸Lewong keo mbo kayang Iyo nte ngembrese awa lisung gesar-Iyo ai nte ngumpul gandong Iyo epo lang longkong Iyo, tapi bondul jrami ene anta tuna-Iyo lang api yo belo dapet plonsop."¹⁹Diang deo nasehat yo mak Yohanes nyampe Injil epo ulun deo.²⁰Tapi des io sundok negur raja Herodes koe keo kjadian Herodias, bawe erai buntung iyo se, ai koe eka gawi gata triaw yo gawi iyo,²¹Raja ene nambah gawi triaw iyo diang msumba Yohanes epo lang penjara.²²Des eka ulun deo ene sundok bnaptis ai des Yesus low bnaptis ai desung bdoa, wikang ka langit ²³ai diwa Roh Kudus kati nau mpulu dara epo ombon Iyo. ai keo oyon ngket lngit: Iko endo Anak-Ku io tengkosangKu, epo iko bute aku sengkono."²⁴Des Yesus ngmulai gawi Yo, umur yo kira-kira tolu pulu taun ai ena kati mbo kesah ulun, io ene pea Yusuf, pea Eli, ²⁵pea Matat, pea Lewi, pea Malkhi, pea Yunai, pea Yusuf, 25pea Matica, pea Amos, pea Nahum, pea Hesli, pea Nagai, 26pea Maat, pea Matica, pea Simei, pea Yosekh, pea Yoda, 27pea Yohanan, pea Resa, pea Zerubabel, pea Sealtiel, pea Neri, 28pea Malki, pea Adi, pea Kosam,²⁹pea Matika, pea Amos, pea Nahum, pea Hesli, pea Nagai, ³⁰pea Maat, pea Matika, pea Simei, pea Yosekh, pea Yoda, 27pea Yohanan, pea Resa, pea Zerubabel, pea Sealtiel, pea Neri, ³¹pea Malki, pea Adi pea Kosam, pea Elmadam, pea Er, ³²pea Yosua, pea Eliezer, pea Yorim, pea Matat, pea Lewi, ³³pea Simeon, pea Yehuda, pea Yusuf, pea Yonam pea Elyakim, ³⁴pea Melea, pea Mina, pea Matata, pea Natan, pea Daut, ³⁵pea Isai, pea Obet, pea Boas, pea Salmon, pea Nahason, ³⁶pea Aminadab, pea Admin, pea Arni, pea Hezron, pea Peres, pea Yehuda, ³⁷pea Yakub, pea Ishak, pea Abraham, pea Terah, pea Nahor, ³⁸pea Seruk, pea Rehu, pea Peleg, pea Eber, pea Salmon, ³⁹pea Kenan, pea Arpakhsad, pea Sem, pea Nuh, pea Lamekh, ⁴⁰pea Metusalah, pea Henohk, pea Yaret, pea Mahalaleel, pea Kenan ⁴¹pea Enos, pea Set, pea Adam, pea Allah..

Chapter 4

¹Yesus, yo ponuh diang Roh Kudus, uli ngket atang Yordan, laju oit koe Roh Kudus epo padang gurun. ²Mbo mne Io nongos opat pulu olo kola yo ai snoba koe Iblis. Kola mbo mne Io belo kuman ise-ise ai sundok ene Io siet lau. ³Trus ulek iblis epo-Iyo: "Ena Iko Anak Allah, suyu Ko batu endo jadi roti." ⁴Tuing Yesus epo iyo: "Keo tenulis: Ulun bolum belo di ngket roti tingen." ⁵Trus io moit Yesus epo awa yo ombo ai lang ekang mato skitop io mekelak epo-Iyo eka kerajaan dnia. ⁶Ulek Iblis epo-Iyo: "Eka kuasa ene diang kemulian ene anta diye ku epo-Iko, koe eka ene sundok snerah epo aku ai aku miye iyo epo ise lelu iyo petua ku. ⁷Jadi ena Iko nyembah aku, eka iyo ene anta jadi empun-Ko." ⁸Tapi Yesus ngulek epo iyo: "Keo tnulis: Iko arus nyembah Tuhan, Allah ko, ai suma epo Iyo bute iko ibadah!" ⁹Trus iyo moit Yesus epo Yerusalem ai mayak Io ban bungan Bait Allah, trus ngulek epo-Iyo: "Ena Iko Anak Allah, ptoyak kompu-Ko ngket ndo epo iwa, ¹⁰koe keo tnulis: nau umbang Iko, Io anta nyemuyu malaikat-malaikat-Iyo nte ngenjaga Iko, ¹¹ai dero anta nyambut Iko diang kayang iyo, apa botis-Ko nang mitek batu." ¹²Yesus nuingiyo, ulek-Iyo: "Keo Firman: Nang iko nyoba Tuhan, Allah ko!" ¹³Sundok Iblis mekabis eka pencobaan ene, io mundur ngket-Iyo ai minte jeman yo buen. ¹⁴Lang kuasa Roh mulik Yesus epo Galilea. Trus deo keringo soal Iyo mbo lekum dnine mne. ¹⁵Des ene Iyo nutui matuk mbo blai-blai ibadat mbo mne eka ulun muji Iyo. ¹⁶Io ulet epo Nazaret awa Io olai anjang, ai kati penepet-Iyo des olo Sabat Io sumba epo blai ibadat, trus akat kakan ngembaca Alkitab. ¹⁷Epo Iyo dnine kitab nabi Yesaya ai sundok ingkang-Iyo, Io ruku tulisan, mbo mne keo tnulis: ¹⁸"Roh Tuhan keo mbo-Aku, koe ene Io sundok ngurapi Aku, nte mesampe kabar buen epo ulun-ulun kao, ai Io sundok nyemuyu Aku" ¹⁹nte nyampe kabar bebas epo ulun-ulun tawanan, ai pengkito nte ulun-ulun posa, nte nglepas ulun-ulun yo tnindas, nte nyampe kabar taun rahmat Tuhan sundok ulet. ²⁰Trus Io nokom kitab ene, miye yo nua epo petugas laju tunge; trus eka mato ulun lang lou ibadat ene betadah epo-Iyo. ²¹Trus Io mulai nutui matuk dero, ulek-Iyo: "Des olo ndo sampe atok tulisan ene des ikam kringo iyo." ²²Ai eka ulun ene ngembeta Iyo ai dero eran kesah surah yo buen yo kenesah koe Iyo, trus ulek dero: "belo be Io endo pea Yusuf?" ²³Trus Io ngulek epo dero: "Pasti ikam anta ngulek sempelo endo epo Aku: O' tabib, pkale Ko kompu tonga-Ko se. Gnawi mbo mndo lowu, mbo awa pengulet-Ko endo, eka yo dingo kain yo sundok terjadi mbo Kapernaum!" ²⁴Trus ulek Iyo nua: "Aku ngulek epo ikam, sebata yo belo keo nabi yo keo uman mbo awa pengulet iyo se." ²⁵Trus Aku ngulek epo ikam, ai ulek-Ku endo beta: Des jman Elia keo deo bawe balu mbo Israel des langit btokom kola tolu taon onom bulan des musim lau yo deras kono pupus negeri. ²⁶Tapi Elia senuyu makse epo nte erai kongo ulun ngket dero, tapi epo erai bawe balu mbo Sarfat, ela tana Sidon. ²⁷Ai des jman nabi Elisa deo ulun kodong mbo Israel ai ndok belo erai kongo ngket dero yo pinokale, suma Naaman, ulun Siria ene." ²⁸Kringo ene mara beta eka ulun yo mbo blai ibadat ene. ²⁹Dero akat, trus ngusa Yesus epo baling kota ai moit Iyo epo kerbing tunden, awa kota ene keo, nte nurak Iyo ngket kerbing ene. ³⁰Tapi Io malan lalo ngket ekang dero laju brangkat. ³¹Sundok ene Yesus malan epo Kapernaum, kota mbo Galelia, trus nutui matuk mbo mne des olo-olo Sabat. ³²Dero eran kringo tutui batuk-Iyo, koe kesah surah Iyo roa kuasa. ³³Mbo lang lowu ibadat ene keo erai kongo snumban ai iyo nyoyar diang oyon riyes: ³⁴"O' Iko, Yesus ulun Nasaret, ise urusan-Ko diang kain? Iko ulet kakan ngebenasa kain? Aku tau ise Iko: Yo Kudus ngket Allah." ³⁵Tapi Yesus ngusa diang ries, ulek-Iyo: "Suni, baling ngket iyo!" ai timpa setan ene doko oli ulun ene epo ekang ulun deo, laju baling ngket iyo ai belo mesiyet iyo. ³⁶Jadi eka ulun eran, trus bekesah dero sama dero, ulek dero: "bukan main kehebat pemesara yo ene! Koe diang roa wibawa ai kuasa Io mrenta epo roh-roh jahat ai dero baling oli." ³⁷Ai sampe kabar soal Iyo epo mone-mone mbo daerah ene. ³⁸Sundok ene Io ngendikah blai ibadat ene trus brangkat epo blai Simon, des ene ampu Simon yo bawe mekom payah trus dero tindu epo Yesus apa ngawat iyo. ³⁹Jadi Io akat mbo isan bawe ene, trus ngusa mekom ene, trus roton ene ngendikah iyo. Bawe ene peles uwat ai ngelayan dero. ⁴⁰Des mato olo tonop, eka ulun moit epo-Iyo ulun-ulun dero yo krotan, yo kono bemasam jenis roton, Io mayak kayang-Iyo ombon tongku dero ai mkale dero. ⁴¹Ngket deo ulun baling low setan-setan ulak nyoyar: "Iko ene Pea Allah," trus Io diang bol ngusan dero ai belo miye dero bsara, koe dero tau se Iyo ene Mesias. ⁴²Des olo molo, Yesus brangkat trus malan epo awa yo lengoh. Tapi ulun deo meto Iyo, trus ruku-Iyo ai ngomer nangkeng Iyo apa nang ngendikah dero. ⁴³Tapi Io ngulek epo dero: "mbo kota-kota yo mak lou Aku arus nyampe Injil Kerajaan Allah koe nte ene doko Aku senuyu." ⁴⁴Ai Iyo nyampe Injil lang blai-blai ibadat mbo Yudea.

Chapter 5

¹Des jman ene Yesus akat mbo pantai gentung Genesaret, deo ulun nglekum Iyo kakan nempaning firman Allah. ²Io kito duo prau mbo isan pantai. Pnaket esa ene sundok diwa ai desung mrese jala dero. ³Io dombo epo lang erai prau ene, yo doko prau Simon, laju nyemuyu io ngenjelu prau ene oro idik-idik se pantai. laju Io tunge ai nutui matuk ulun deo ngket ombon prau. ⁴Des sundok bunyal, Io ngulek epo Simon: "Btokon epo awa yo lontop ai bewet jala ko nte nangop esa." ⁵Simon nuing: "Guru, sundok erai malom putub kain bgawi bol psiken belo keo pengkuli ise-ise, tapi koe lko nte nyemuyu, aku mewet jala nua." ⁶Des dero sundok mewet jala ene, dero kuli esa mroa, sampe jala dero mulai rensset. ⁷Laju dero nguwai epo tman-tman epo prau yo mak apa dero ulet nte ngawat. dero ene ngompoh, trus dero sama-sama ngatok prau duo ene sampe ponu diang esa sampe duni karom. ⁸Des Simon Petrus kito nau ene laju io nyongkop onon Yesus ai ngulek: "Tuhan, oro iko ngket aku, koe aku endo ulun deo dosa." ⁹Koe io diang eka ulun yo sama-sama diang io bengong koe kdeo esa pengkuli dero ene; ¹⁰Ktine lou Yakobus ai Yohanes Pea-pea Zebedeus io jadi teman Simon. Ulek YESus epo Simon: "Nang takut, ngket tempo ndo iko nte ngenjala ulun." ¹¹Sundok dero nyelor prau dero epo tana ombo, dero ngendikah prampu dero, laju lumpat Yesus. ¹²Des Yesus keo lang kota. Ela mne keo ulun roton kodong. Des io kito Yesus, io nyongkop ai tindu: "Tuan, ena Tuan kakan, Tuan kuli mkale aku." ¹³Laju Yesus nyokoi kayang Io, ngop ulun ene, ai ngulek: "Aku kakan, iko jadi ale." Peles des ene low mapos roton kodong ene. ¹⁴Yesus ngusan nang ngesah epo ulun yo mak ai ngulek: "Daro iko, pkelak kompu tonga ko epo imam ai mie persembahkannte ngembrese kati yo snuyu koe Musa, nte bukti nte dero." ¹⁵Tapi nau umbang Yesus tambah oro dningo ai ulet ulun deo bloyun-loyun epo Iyo nte nempaning Iyo ai nte mengkale roton nsan dero. ¹⁶Tapi Io meto awa yo belo rame nte bdoa. Des olo Yesus nutui matuk, keo tenu-tenu kongo ulun Farisi diang ahli Torat tunge nempaning Iyo. Dero ulet ngket eka kampung-kampung mbo Galilea ai Yudea diang ngket Yerusalem. Kuasa Tuhan lumpat Iyo koe ene Iyo kuli memekale ulun kroton. ¹⁸Laju ulet tenu-tenu kongo ulun moson ulun pokung diang awa pnurui iyo; dero bkomer moit iyo sumba laju pnayak ela ono Yesus. ¹⁹Koe dero mba di kuli moit sumba koe jut ulun mbo mne, dero dombo epo ombon sapo lou, trus ngugah sapo ene, ai ngului ulun ene diang awa pnurui epo ekang ulun deo pas ela onon Yesus. ²⁰Des Yesus kito iman dero ene, Iyo ngulek: "O erai buntung, dosa ko sundok nampun." ²¹Tapi ahli-ahli Torat diang ulun-ulun Farisi ngnanam lang kesong dero: "Ise si ulun yo nguja Allah endo? Ise yo kuli ngampun dosa makse ko Allah bute?" ²²Tapi Yesus tau pngenanam dero, laju ngulek epo dero: "Ise yo kinonanam lang kesong kam?" ²³Ise lelu yo murah, ngulek: dosa ko sundok nampun, ena belo ngulek: uat ka, ai malan ka? ²⁴Tapi apa ikam tau, se ela dnia endo Pea Ulun keo kuasa nte ngampun dosa"-Trus Io ngulek epo ulun pokung ene -: "Epo iko Aku ngulek, uat angkat awa pnurui ko uli epo lou ko!" ²⁵Peles des ene low io uat, onon dero, trus ngangkat awa pnurui iyo ai uli epo lou iyo ulak muji Allah. ²⁶Eka ulun mne ngrengao, trus muji Allah, ai dero takut beta, ulek dero: "Olo ndo kain sundok kito nau umbang yo nembengong beta." ²⁷Sundok ene, des Yesus baling, Io kito ulun pnage bea, yo keo karan se Lewi, desung tunge mbo lou pnage bea. Yesus ngulek epo iyo: "Iko lumpat Aku!" ²⁸Lewi laju akat ai ngendikah eka-eka ene, trus lumpat Iyo. ²⁹Trus Lewi nampa pesta olai nte Iyo mbo low iyo se ai deo pnage bea diang ulun yo mak lumpat kuman diang Iyo. ³⁰Ulun-ulun Farisi ai ahli-ahli Torat datsan epo murid-murid Yesus, ulek dero: "Ise moko ikam kuman ngisop sama-sama diang pnage bea ai ulun bdosa?" ³¹Trus tuing Yesus epo dero, ulek Iyo: "Makse ulun slomai yo perlu pngawat roton, tapi ulun yo kroton;" ³²Aku ulet belo di momba ulun yo belo keo sala, tapi ulun bdosa, apa dero btobat." ³³Ulun-ulun Farisi ene ngulek lou epo Yesus: "Murid-murid Yohanes brebo puasa ai sembayang, ene lou murid-murid ulun Farisi, Tapi murid-murid Ko kuman ai ngisop." ³⁴Tuing Yesus epo dero: "Kuli be tman pnganten song snuyu puasa, pdahal pnganten ene diang dero?" ³⁵Tapi anta sampe des yo, ena pnganten ene nalek ngket dero, des ene doko dero anta puasa."Io ngulek lou pemerawet epo dero: "Ndok belo erai kongo ulun yo mrenset baju bayu nte nambal baju usang. Ena ktine, yo bayu ene rensset lou ai baju yo tuo ene belo anta sengkono ena tnambal ngket yo bnenset ngket baju bayu ene." ³⁷Ktine lou mba di keo ulun ngatok anggur bayu epo lang sut ngket upak yo usang, koe ena ktine, anggur yo bayu ene anta nglopong sut ngket upak ene ai anggur ene nrintin ai sut ngket upak ene pasti lopong. ³⁸Tapi anggur yo bayu arus nona lang sut upak yo bayu lou. ³⁹Ndok belo erai ulun yo sundok ngisop anggur yo usang ngeno ngisop anggur yo bayu, koe io pasti ngulek: Anggur yo usang ene yo buen."

Chapter 6

¹Des olo Sabat, des Yesus malan mo umo gandong, murid-murid-Io' ngutik buti gandong laju noka, desung dero misel yo diang kayang dero. ² Tapi tenu-tenu kongo ulun Farisi ngulek: "Ise moko iko nggawi ktine, yo nusan des olo Sabat?"³ Laju Yesus nuing dero: "Belo be iko ngmbaca ise gnawi koe Daud, des io diang dero yo lumpat io slau,"⁴ Ktimbe nau io sumba lang lou Allah diang ngalek roti sajian, laju noka ai mie yo epo dero yo lumpat ene, padahal roti ene belo di kate noka ena makse imam-imam?"⁵ Ulek Yesus nua epo dero: Pea Ulun ene yo doko Tuhan ombon se olo Sabat."⁶ Des olo Sabat yo mak, Yesus sumba epo lang lou ibadat, trus matuk. Mo mne keo erai kongo ulun yo mate tangan sanan io. ⁷ Tukang-tukang Taurat diang ulun-ulun Farisi nympti nau Yesus, nang-nang- Io' mmekale ulun des olo Sabat, apa dero kuli alasan nte mmesala Yesus. ⁸ Tapi Io' tau kno' dero, trus ngulek epo ulun yo mate tangan ene: "uat ai akat la botuk!" trus uat ulun ene laju akat.⁹ Trus Yesus ngulek epo dero: "Aku ngunti epo ikam: ise yo kate des olo Sabat, nggawi yo buen ena belo nggawi yo dat, nylamat kesong ulun ena belo mmenasa io?"¹⁰ Sundok ene Io' meti la gliling epo dero eka-eka, laju ngulek epo ulun kroton ene: "Sokoi tangan ko!" ulun ene nggawi ktine lou peles ale lou tangan io.¹¹ Koe ene ngrendek mara dero, laju dero brondeng, ise yo kakan gawi dero epo Yesus.¹² Des ene malan Yesus epo tunden nte smbayang, erai malom putup Io smbayang epo Allah.¹³ Des dnia molo, Io' momba murid-murid Io' ngruku-Io' laju mili dero duo blas kongo, yo nulek ke Io' rasul:¹⁴ Simon yo lou tampa Io' karan se Petrus, ai Andrias erai buntung Simon, Yakobus ai Yohanes, Filipus diang Bartolomeus, ¹⁵ Matius ai Tomas, Yakobus pea Alfeus, ai Simon yo bnomba se ulun Zelot, ¹⁶ Yudas pea Yakobus diang Yudas Iskariot yo dilonatu jadi penghianat.¹⁷ Laju Io' diwa diang dero ia smole mo awa yo rata: mne bekumpul deo ngket murid-murid-Io' ai deo ulun yo mak yo ulet ngket pupus Yudea ai ngket Yerusalem ai ngket kampong pantai Tirus diang Sidon.¹⁸ Dero ulet epo nempaning Io' ai nte' pkale ngket roton dero; dero lou yo snuban koe roh-roh triau pinokale lou.¹⁹ Ai eka ulun deo ene bkomer mulem Io' koe keo kuasa yo baling ngket Io' ai eka ulun mne pkale Io'.²⁰ Trus Yesus meti murid-murid-Io' ai ngulek: Eggo, iko yo kao, koe iko yo mpun krajaan Allah.²¹ Eggo, iko yo tempo ndo slau, koe iko anta yo tinomboting. Eggo, iko yo tempo ndo nangis, koe iko yo anta koka.²² Eggo iko, ena Koe Yesus, ulun kekei se iko, ai ena dero mmetenggang iko, ai ngongah iko ai nolak karan ko epo tadah yo triau.²³ Snang des ene ai eggo, koe sebata yo upa ko olai lang sorga; koe ktine lou itak kakah dero sundok nglaku epo nabi-nabi.²⁴ Tapi ssa ikam, ikam yo kaya, koe pengkeo ko iko sundok kuli nte mgeggo iko. ²⁵ Ssa ikam, yo tempo ndo boting, koe ikam anta slau. Ssa ikam, yo tempo ndo koka, koe ikam yo anta lngoh ia nangis.²⁶ Ssa ikam, ena eka ulun ngambung ikam; koe ktine lou itak kakah dero sundok nggawi nabi- nabi yo kro."²⁷ Tapi epo ikam, yo nmpaning Aku, Aku ngulek: tinongkosang musu ko ene. nggawi yo buen epo ulun yo kekei se ikam;²⁸ Tindu pngkeo nte ulun yo mator nyumpah ikam; smbayang nte ulun yo tuju ngmara iko.²⁹ Ise yo nenpeleng klpising ko yo erai, die lou klpising ko yo mak, ia ise yo ngalek jubah ko, koe ka iyo' ngalek baju ko lou, ³⁰ Die tongku ulun yo tindu epo iko; ia nang tindu tmpuli epo ulun yo ngalek mpun ko.³¹ Ai ise yo pngkakan ko apa ulun nggawi yo epo iko, gnawi ktine lou epo dero.³² Ai ena iko gawal epo ulun yo gawal epo iko, ise untung yo? ai ena ulun-ulun bdosa lou kosang se dero. ³³ Koe ena iko' nggawi buen epo ulun yo nggawi buen epo iko' ise untung yo? koe ulun-ulun yo dosa nggawi ktine lou.³⁴ Ai ena iko mmekinjani ise-ise epo ulun, koe iko' ngarap kakan kuli ise-ise ngket io,' ise untung ko? ulun-ulun dosa lou mmekinjani epo ulun-ulun dosa, apa dero kuli nua kerai kroa.³⁵ Tapi iko',knosang lou musu ko' gnawi yo buen epo dero, ai pinokinjam diang belo di ngarap se nte' bales, apa upa ko' olai ai iko' anta jadi pea-pea Allah Io' paling ombo, koe Io' buen epo ulun-ulun yo belo tau berterima kasi ai epo ulun-ulun yo triau. ³⁶ Arus iko' buen kesong, sama kati Bapa ko' buen kesong."³⁷ Nang iko nundruh, apa iko belo anta tnudruh. nang iko ngukum, apa iko belo anta dinukum; nampun, apa iko nampun lou.³⁸ Dnie, apa iko anta dneie; ena sukat yo buen, yo ninsok, yo knukui ai yo nyoak po baling anta tnudak epo lang pnampen ko. ise sukat yo pakai ko nte nyukat, ene anta snukat epo iko."³⁹ Yesus ngulek laju nimpuri epo dero: "kuli be ulun posa' ngayak ulun posa? Belobe dero duo sama-sama toyak lang luang?"⁴⁰ Murid belo anta di nglalo se guru iyo, tapi ise yo sundok tmat plajaran iyo anta sama diang guru iyo.⁴¹ Ise moko iko meti juras lang mato ulun, tapi plong kayu lang mato iko se belo iko tau?"⁴² Ise moko iko kuli ngulek epo erai buntung ko: koe ka aku nmbaling juras yo keo lang mato ko, pdahal plong kayu yo lang mato ko se, belo iko kito? o ulun mnapik, tmbaling ile plong kayu ngket lang mato ko, apa iko kito diang jlas nte nmbaling juras ene ngket lang mato erai buntung ko.⁴³ Koe belo keo tonga kayu yo buen, yo ngasil bua yo belo buen, ai lou belo keo kayu yo belo buen yo ngasil bua yo buen. ⁴⁴ Koe tongku kayu tinonoan ngket bua yo. Koe ngket jaba mpap ulun belo di ngutik bua ara ai ngket dui-dui belo di ngutik bua anggur.⁴⁵ Ulun yo buen nmbaling nau yo buen ngket lang kesong iyo, yo buen, ai ulun yo dat nmbaling nau yo dat ngket kesong yo dat. koe ise yo ulek bowa iyo, baling ngket kesong iyo."⁴⁶ Ise moko iko momba-momba Aku: Tuhan, Tuhan, padahal iko belo di nggawi ise yo ulek-Ku?"⁴⁷ Tongku ulun yo ulet epo Aku ai nmpaning pmesara-Ku diang nggawi yo - Aku anta mmekelak epo iko diang ise io dapet pinosama -,⁴⁸ io sama kati ulun yo nngkuat

lou: ulun ene ngakit lontop-lontop ai mayak tondal yo ban batu. Des ulet danum ai owa ngnjalus lou' ene, lou ene belo di skukui, koe lou ene turon tampa se yo.⁴⁹Tapi ise yo nmpaning pmesara-Ku, tapi belo di nggawi yo, io sama kati ulun yo nngkuat lou ban tana belo di tnontang. des ulet owa ngnjalus yo, lou ene laju roros, ai dras beta rusak yo.

Chapter 7Des Yesus sundok bunyal la ononulun deo, Io sumba epo Kapernaun.

²La mne keo erai kongo perwira yo keo erai kongo batak, yo knosang ke iyo. Batak ene desung krotan payah ai alang mate.³Des perwira ene kringo soal Yesus, io nyemuyu tenu-tenuulun tuo-tuo Yahudi epo-Iyo nte tindu, apa Io ulet ai mkale batak yo ene.⁴Dero ulet epo Yesus ai diang beta-beta tindu awat-Iyo, ulek dero: "Io pantas Ngko awat,⁵koe io kosang diang bangsa taka ai io yo ngongkos nengkuat blai ibadat kain."⁶Laju Yesus malan sama-sama diang dero. Des belo di oroh aso ngket blai perwira ene, perwira ene nyemuyu tman-tman iyo nte ngulek epo-Iyo: "Tuan, nang ka repot-repot, koe aku belo di snaron nrima Tuan lang blai ku,⁷koe san ku aku belo di snaron ulet epo Iko. Tapi ulek ka erai buku pmensara, jadi batakku pasti ale.⁸Koe aku se ulun iwa, ai la imbatku keo lou Prajurit. Ena aku ngulek epo erai kongo Prajurit ene: Malan!, jadi io malan, ai epo erai kongo ulun nua: Ulet!, jadi io ulet, ktine lou epo batakku: Gawi ka endo!, jadi pasti gawi io."⁹Des sundok Yesus kringo pmensara ene, Io eran se io, ai ulak skuleng epo ulun deo yo nyarak Io, Iyo ngulek: "Aku ngulek epo ikam, imam yo kolai endo belo pini Aku ruku, tontan ko ekang ulun Israel!"¹⁰Ai sundok ulun-ulun yo snuyu ene mulik epo lou, itan io batak ene sundok slomai aut.¹¹Sundok ene Yesus malan epo erai kota yo nan karan se Nain. Murid-murid-Iyo malan sama-sama diang Io, ai deo lou ulun beloyun-loyun lumpat-Iyo.¹²Sundok Io dmpet jawong penyumba kota, keo ulun mate yo nlembar epo baling, pea song pea tunggu ma io yo sundok balu, ai deo ulun ngket kota ene lumpat balu ene.¹³Ai des Tuhan kito balu ene timbul kosang lang kesong-Iyo ngke kasian, trus Io bunyal epo balu ene: "Nang nangis!"¹⁴Ulak ngompoh yo nlembar ene Io mulem, ai tukang pnglembar-pnglembar ene berhenti, Io ngulek: "O pea burok, Aku ngulek epo iko, nyuli iko!"¹⁵Jadi uwat se ulun ene ai tunge ai mulai bunyal, ai Yesus mie io epo ma io.¹⁶Eka-eka ulun mne takut ai ngmulia Allah, ulak bunyal: "Erai nabi olai sundok ulet mbo ekang taka," ai "Allah sundok nuntun umat-Iyo."¹⁷Jadi sundok tsebar kabar tentang Yesus la pupus Yudea ai la pupus kampong nai nine.¹⁸Des Yohanes kuli kabar soal eka-eka kjadian ene ngket murid-murid io,¹⁹ia momba duo kongo ulun ngket murid io ai nyemuyu dero ngunti epo Tuhan: "Iko beh yo anta ulet ene ena belo harus be kain minte ulun yo mak?"²⁰Des duo kongo ulun ene sampe epo Yesus, dero nguylek: "Yohanes Pembaptis nyemuyu kain ngunti epo-Iko: Iko be yo anta ulet ene ena belo harus be kain minte ulun yo mak?"²¹Des ene Yesus deo mmekale ulun ngket bmasam roton ai bmasam roton san ai ding ngket roh-roh triau, diang Io mie pngkito epo deo ulun-ulun posa.²²Ai Yesus nuing dero: "Malan ka, ai ulekka epo Yohanes ise yo itan kam ai dingo kam: Ulun posa kito, ulun pokung malan, ulun kodong jadi ale, ulun simpong kringo, ulun mate pinosuli ai ulun kao bnje kabar buen."²³Ai regok ngayo ulun yo belo jadi noli ai nangkai Aku."²⁴Sudok yo suyu Yohanes ene malan, mulai dko Yesus bsara epo ulun deo ene nau umbang Yohanes: "Nte mbe ikam malan epo padang gurun? Epo meti nau bulu yo skukui tapi riut?"²⁵Ena belo nte ise ikam malan? Meti ulu yo baju solo? Ulun yo baju buen ai yo bolum tatau, awa iyo mbo istana raja.²⁶Jadi nte isepo ikam malan? Meti nabi? Beta, ai Aku ngulek epo ikam, ene lengkat se nabi.²⁷Koe soal io keo tnulis: Eti ka, Aku nymuyu pngirak-Ku ono se Iko, io anta ngatur boyan-Ko la onon-Ko.²⁸Aku ngulek epo ikam: Mbo ekang dero yo kinomekus koe bangbawe ndok belo erai olai se Yohanes, tapi yo paling idik lang krajaan Allah aso olai se io."²⁹Eka ulun deo yo nmpaning pmesara-Iyo, ktine lou dero pnage bea nymbeta yo kono ngket Allah, koe dero sundok mie kompu tonga nte Yohanes baptis.³⁰Tapi ulun-ulun Farisi ai ahli-ahli torat nangkai ptua Allah epo kompu tonga dero, ngke dero belo kakan baptis Yohanes.³¹Ulek Yesus: "Diang ise si anta Aku mrawet ulun-ulun dero endo ai diang ise dero ene sama?"³²Dero ene kati nau bang pea yo tunge mbo pasar ai yo baku bomba: Kain nyiup suling nte ngkam tapi ikam belo dnuyo, kain nyanyi yo luai, tapi ikam belo di nangis.³³Koe Yohanes tukang baptis ene ulet, io belo kuman roti ai belo ngisop anggur, ai judi ulekkam: Io snumban ngke setan.³⁴Sundok ene oli Pea Ulun ulet, Io kuman diang nisop, jadi ulekkam: eti kam ta, io galak kuman ai tuju ngisop, tman pnage bea ai ulun yo bdosa.³⁵Tapi hikmat sinom beta koe eka ulun yo nrima io."³⁶Erai kongo ulun Farisi ngirak Yesus nte ulet kuman mbo lou io. Yesus ulet epo lou ulun Farisi ene, trus tunge kuman.³⁷Mbo kota ene keo erai kongo ulun bawe yo ulun tau ba se io ene ulun bedosa. Des bawe ene kringo, se Yesus ene desung kuman mbo lou ulun Farisi ene, io ulet moit erai jebul pualan yo atok lenga buen kewo.³⁸Ulak nangis io malan ngompoh akat dmpet Yesus, trus ngmbosa botis-Iyo diang olu io ai ngiso diang balo io, trus io ngarok botis-Iyo ai nglenga diang lenga buen kewo ene.³⁹Des ulun Farisi yo ngirak Yesus kito nau ene, io bunyal lang kesong io: "Ena Io endo nabi, pasti Io tau, ulun ise bawe yo mulem-Iyo ene; pasti Io tau, se bawe ene ulun bdosa."⁴⁰Trus Yesus ngulek epo io. "Simon, keo yo kakan ulek-Ku epo iko." Tuang Simon: "ulekka, Guru."⁴¹Keo duo kongo ulun yo skutang epo ulun tukang mkinjam sen. Yo erai kongo skutang limo jatus dinar, yo mak limo pulu.⁴²Koe dero belo kuli mayar, jadi io ngapus utang dero duo ene. Ise lelu dero yo paling kosang se io?"⁴³Tuang Simon: "Otus ku io yo paling deo yo napus utang io." Ulek Yesus epo io: "Beta ngko ene."⁴⁴Ai ulak skuleng epo tadah bawe ene, Io ngulek epo Simon: "Iko kito beh bawe endo? Aku sumba epo lou ko, tapi iko belo mie Aku danum nte mui botis-Ku, tapi io nmbosa botis-Ku diang olu mato ai ngmbrese diang balo io.⁴⁵Iko belo dingarok Aku, tapi ngket Aku sumba belo keo brenti io ngarok botis-Ku.

⁴⁶Iko belo nglenga utok-Ku diang lenga buen kewo, tapi io nglenga botis-Ku diang lenga buen kewo. ⁴⁷Koe ene Aku ngulek epo iko: Dosa yo deo ene sundok nampun, koe io sundok deo nampa gawi diang kosang. Tapi ulun yo idik nampun, idik lou yo nampa gawi diang kosang. ⁴⁸Trus yo ngulek epo bawe ene: "Dosa ko sundok nampun." ⁴⁹Ai dero yo tunge kuman sama-sama Io, ngnanam lang kesong dero: "Ise si Io endo, sampe Io kuli ngampun dosa?" ⁵⁰Tapi Yesus ngulek epo bawe ene: "Imanko sundok nylamat iko, malan ka diang slamat!"

Chapter 8

¹Belo ola sundok ene Yesus malan kliling engket kota epo kota ai engket kampung epo kampung nyampe Ijil kerajaan Allah. duo belar murit-Iyo sama-sama diang Iyo,²ai tenu-tenu kongo ulun bawe yo sundok pkale Iyo engket roh-roh triau ai bmasam roton, erai engket dero ene Maria yo nulek se Makdalena, yo sundok nlopos engket turu roh triau, ³Yohana bawe Khuza tukang ngatur pengkeo Herodes, Susana diang deo bawe yo mak. bang bawe-bawe endo ngembantu rombongan diang pengkeo dero.⁴Des ulun deo bloyun-loyun ulet, yo doko ulun-ulun engket kota-kota bgabung diang Yesus, bunyal doko Iyo diang pmrawet ktindo: ⁵"Keo ulun tukang nias baling epo nias. des iyo nias, keo yo latu la isan boyan, trus toda ulun ai okan mpulu sampe abis. ⁶ai keo lou latu mbo tana jut batu, sundok yo moti iyo krep ke belo keo kuli danum.⁷keo lou latu mbo lang orop, orop ene tumbu sama-sama ai nyengkatel oti yo sampe pete. ⁸yo mak latu mbo tana yo buen, sundok iyo moti kbua jatus lipat." sundok buyal ktine Yesus mries oyon Iyo: "ise iyo keo klingo ente nempaning, moko iyo ngringo!"⁹Murid-murid-iyo ngunti epo-Iyo, ise rti pmerawet ene. ¹⁰Laju lo nuing: "Epo ikam dnne karunia ente tau rasia kerajaan Allah, tapi epo ulun-ulun yo mak soal ene pinotau lang pmerawet, beta ko dero meti, tapi belo keo kito ai betako nempaning, tapi dero tau rti."¹¹Endo doko arti yo pmerawet ene: bini ene yo doko Firman Allah. ¹²yo latu mbo isan boyan yo ene ulun yo sundok nempaning; abis ene ulet Iblis laju ngalek firman ene engket lang kesong dero, apa dero nang persaya ai sinolamat. ¹³yo latu mbo tana jut batu yo doko ulun, yo sundok nempaning firman ene ,nrima diang ego, tapi dero belo kwakat, dero persaya ile-ile tingen ai des snoba dero jadi ulun belo persaya oli. ¹⁴yo latu mbo lang orop yo doko ulun yo sundok nempaning firman ene, ai lang penduan iyo oli dero sengkatel diang water ai pengkeo ai kanam bolum buen, koe ene dero belo ngasil bua yo nsak. ¹⁵yo latu mbo tana yo buen ene yo doko ulun, iyo sundok nempaning firman ene, ngona iyo lang kesong yo buen ai btahan sampe ngasil bua. ¹⁶"belo keo ulun yo nembolum plita sundok bolum mayak yo lang tpayam ai mayakiyo iwat pnurui, tapi lo mayakiyo ban blai pita, apa eka-eka ulun yo sumba epo lang lou kito paiyo. ¹⁷Koe dok berai iyo melim iyo belo anta belo pinokelak, ai belo keo iyo kinomelim iyo belo anta belo tinonoan ai jadi lekum tau ¹⁸Koe ene, tinompaning beta-beta. koe ise yo keo, lo dnne, tapi ise yo belo keo, engket lo nalek, diang yo eka mbo iyo,"¹⁹Ine ai erai buntung- erai buntung Yesus ulet epo-Iyo, tapi dero belo sampe se Iyo koe deo ulun. ²⁰Ulun ngulek epo-Iyo: "Ine-Ko ai erai buntung-erai buntung Ko keo la baling kakan ruku diamg Iko." ²¹Tapi Iyo ngulek diang dero: "Ine-Ku ai erai buntung-erai buntungKu io ene dero, yo nempaning firman Allah ai nglakuiyo."²²Des olo Yesus dombo po lang prau sama-sama diang murid-murid-Iyo, ai Iyo ngulek diang dero: "Man taka btual po empai gtung sae," peles dero btual. ²³des dero desung blayar, Yesus desung turui kolan-kolan ulet brubu ries la gtung ene, sampe-sampe prau ene sumba danum ai dero lang bahaya.²⁴Koe ene murid-murid yesus ngenduko Iyo,ulek dero: "guru, guru taka sesa!" laju Iyo uat, laju nempenger riut ai danum iyo ngaru ene, jadi riut ai danum ene tno. ²⁵Trus ulek Iyo epo dero: "Mombe persaya kam?" koe ene dero taku diang eran, laju bunyal dero sama dero: "Ise si ulun endo, sampe-sampe Iyo kuli mtua epo riut ai danum, ai dero patoh epo-Iyo?"²⁶Sundok ene yesus sombo po tana ombo diang murid-murid-iyo mbo tana ulun Gerasa la mpai Galilea. ²⁷Sundok Yesus dombo po tana ombo, ulet erai ulun song enket kota ene nyruku Iyo, ulun ene snumban koe setan-setan ai iyo sundok olah belo makai diris laung ai belo nongos lang lou, tapi ela kubur.²⁸Des iyo kito Yesus, iyo nyoyar ai nyongkop onon-Iyo ai bunyal diang oyon ries:"Ise urusan ko diang aku, oh Yesus pea Allah yo paling ombo? aku tindu epo iko, apa Iko nang nysa aku."²⁹Io ngulek ketine,koe yesus nymuyu roh dat ene baling ngket ulun ene. Koe jono roh ene matak-matak iyo, Nte ngenjaga iyo, iyo nerantai ai bnolit, tapi eka pemolit ene tembekat iyo, ai iyo oit setan ene epo awa yo lengoh.³⁰Yesus ngunti epo iyo: "Ise karan ko." Ulek iyo: "Legion," ke iyo snumban deo setan. ³¹Trus setan-setan ene tindu epo Yesus, apa iyo nang smuyu dero sumba epo lang jurang awa mate.³²Keo la mne jut bawi deo meto okan la ngrempa tunden, trus setan-setan ene tindu epo Yesus, apa Iyo nyie dero sumba epo lang bawi-bawi ene. Yesus ngaya penindu dero. ³³Trus baling setan-setan ene ket lang kompu ulun ene ai sumba epo lang bawi-bawi ene. Jut bawi ene sentuyun engket isan kowang epo lang gentung sae ene trus maten monsor.³⁴Des penjaga-penjaga bawi ene kito kejadian ene, dero monsit epo ngesah nau pengkito dero ene ela kota ai ela kampung-kampung nai nine. ³⁵Jadi baling ulun-ulun nte meti ise terjadi ene. Dero ngompoh Yesus ai dero nyruku se ulun yo sundok dikah setan-setan ene tunge dempet botis Yesus; iyo sundok makai diris laung dan iyo sundok koan. Ket ne dero jadi takut.³⁶Ulun-ulun yo sundok kito mato nau ene ngesah epo dero, ketimbe nau ulun snumban setan ene sundok sinolamat. ³⁷Lalu eka-eka ulun iyo ngawa mbo Gerasa tindu epo yesus, apa Iyo ngendikah dero, ke dero takut beta. Moko ene dombo doko Iyo po lang peraw, trus blayar nua. ³⁸Ulun yo sundok dikah setan-setan ene tindu apa lo senie lumpat diang Iyo. Tapi Yesus nyuyu lo brangkat, ulek-Iyo: ³⁹"Uli ka epo blai ko ai turenko ka eka iyo sundok gawi Allah epo iko." Ulun ene malan ngelekum pupus kota ai eke-eka ise iyo sundok gawi Yesus epo kompu tonga iyo.⁴⁰Des Yesus mulik, ulun deo nrima Iyo koe eka dero nginte-nginte Iyo. ⁴¹Jadi ulet doko erai

kongo ulun yo nan karan se Yairus. Iyo ene pengutok mbo lou ibadat. Ulak nyongkop mbo onon botis Yesus io tindu epo Iyo, apa Yesus ulet epo lou iyo, ⁴² koe pea iyo bawe songo-songo iyo, umur iyo kira-kira duobelas taun, duni mate. Desung malan epo daro Yesus kono jeleh-jeleh ulun deo. ⁴³ Des ene keo erai kongo ulun bawe yo sundok duobelas taun aut menderita roton bawe baling daya yo belo pian pini dapet pekale koe ulun. ⁴⁴ Iyo ngompoh Dempet epo Yesus ngket tadah sori ai iyo mulem tompak jubah-Iyo, ai des ene lou tekop daya iyo. ⁴⁵ trus ulek Yesus: "Ise iyo mulem Aku?" Keo belo keo yo mengaku, Petrus bunyal: " Guru, ulun deo nylikup ai ngenjleh Iko?". ⁴⁶ Tapi ulek Yesus: " Keo erai kongo ulun yo mulem Aku, koe san Ku keo kuasa yo baling ngket lang kompu tonga-Ku." ⁴⁷ Des bawe ene tau, se gawi yo ene tinonoan, iyo ngopoh diang ngerkitik, nyongkop mbo onon Iyo ai ngesah epo ulun deo ise moko iyo mulem Iyo ai se io des ene lou jadi ale. ⁴⁸ Ulek Iyo epo bawe ene: "o pea Ku, iman ko sundok nyelamat iko, malan ka diang slamat!" ⁴⁹ Desung Yesus aso bunyal, ulet erai kongo ulun ngket keluarga pengutok lou ibadat ene ai ngulek: " Pea ko sundok mate, nang aso iko ngrepot Guru!" ⁵⁰ Tapi Yesus kringo ene ai ngulek epo Yairus: "Nang takut, persaya ka, se pea ko anta slamat." ⁵¹ Des dero ulet la lou Yairus, Yesus ngusan ndok nang erai kongo sumba diang Iyo, yo makse se Petrus, Yohanes, ai Yakobus ai uma diang ine pea ene. ⁵² eka ulun nangis nungul koe pea ene. Tapi Yesus ngulek: " Nang nangis; io belo di mate, tapi turui." ⁵³ Dero ngoka Iyo, koe dero tau se pea ene sundok mate. ⁵⁴ trus Yesus ngop tangan pea ene ai bunyal ries, ulek Iyo: " o pea uat iko!" ⁵⁵ Jadi mulik roh pea ene ai des ene lou iyo uat laju akat. Bayu Yesus nyuyu dero mie pea ene kuman. ⁵⁶ Jadi eran doko ulun tuo pea ene, tapi Yesus ngusan dero mere epo ulun-ulun nau umbang kjadian ene.

Chapter 9

¹Yesus momba murid yo duo blas kongo ene, laju mie kuasa epo dero nte ngombo se setan-setan ai nte mkale roton san. ²Io nymuyu dero nte nyampe soal krajaan Allah ai nte mkale rotonulun. ³Ulek Io epo dero : "Nang moit ise-ise lang ju lang kam ene, nang moit goloi ai nguyu roti, nguyu sen ai pakaiian sampe duo stel. ⁴Ena ikam tinorima lang louulun, nongos ka ikam mne sampe ikam brangkat ngket ne. ⁵Ena iyo keoulun yo belo kakan trima se ikam, baling ka ikam ngket kota dero ai tompus kam bondul ngket botis kam nte mknop dero. ⁶Ket ne dero bju lekum epo kampong-kampong ulak ngabar Injil ai mkale rotonulun mbo mone-mone. ⁷Herodes, raja mbo dnia mne kringo se nau umbang ene ai iyo low keo kanam belo buen, koe keoulun yo ngulek se Yohanes sundok uat nyuli ket ekangulun mate. ⁸Keo low yo ngulek se Elia sundok nyoret nua, ai keo low yo ngulek se keo erai ngket nabi-nabi jman bai ene yo sundok nyuli. ⁹Tapi Herodes ngulek : "Yohanes ene sundok empung ku utok iyo. Ise jnis Ulun kam endo, yo kabar iyo kate sanggup gawi ktine?" Ket ne io bkomer apa kate ruku se Yesus. ¹⁰Des rasul-rasul ene uli, dero ngesah epo Yesus ise-ise yo sundok gawi dero. ngket ene Yesus moit dero, bdeing epo kota karan se Betsaida, apa dero ene tingen diang-Io. ¹¹Tapi deo apoulun iyo tau, ulak nyarak-Io. Io nrima ka se dero ai ngesah epo dero nau umbang Krajaan Allah, ai Io low mmkaleulun-ulun yo lako awat nte pkale. ¹²Des jman olo kakan tonop duo blas murid-Io ene ulet epo-Io laju ngulek : "Suyu-Ko tahulun deo ene malan, apa dero malan epo desa-desa ai kampong-kampong meto awa nte turui ai meto nte okan, koe ena mndo belo keo ise-ise. ¹³Tapi Io ngulek epo dero : "Ikam arus makan dero ene!" dero nuing : "Yo keo mbo kain pulun yo ka limo roti diang duo kikuy esa, tapi tau ka ena kain moli okan nte eka-ekaulun deo endo. ¹⁴Koe ela mne ene keo ungka limo ribu kongo yo bang song. Io ngulek epo murid-murit-Io : "Suyu kam dero tunge ngrpudu bangsa kdeo limopulu kongo erai jut yo. ¹⁵Murit-murit ene nglaku ai nyuyu ekaulun deo ene tunge. ¹⁶Sundok Io ngalek limo roti diang duo kikuy esa ene, Io nyonda epo langit, ngndoa brkat laju ngrinsi-ngrinsi roti ene, ai mie roti ene epo murid-murit-Io apa bnagi epoulun deo ene. ¹⁷Dero eka kuman ndok boting. bayu knumpul nua kasan roti ene keo ungka duo blas kepit kroa yo. ¹⁸Keo sindai Yesus Smbayang Io ba, ulet murid-murit-Iyo ngompoh-Iyo. laju Io ngunti epo dero' : "Ise ontusulun deo se Aku endo?" ¹⁹Tuing dero : "Yohanes tukang baptis, keo low yo ngulek : Elia, keo yo ngulek se erai ngket nabi-nabi ket bai ene yo sundok nyuli. ²⁰Yesus ngunti epo dero : "san kam, ise Aku endo?" Tuing Petrus : "Mesias ngket Allah" ²¹Ngket ne Yesus ngusan apa dero nang beta ngesah epo ise-ise soal ene epoulun mak. ²²Yesus ngulek : "Pea Ulun arus nanggung deo pengkono ai tnolak koe tuo-tuo, pngutok-pngutok imam diang ahli-ahli torat, ngket ne Io pnate laju pinosuli des olo ktolu. ²³Ulek Io epo dero eka-eka : "Tongkuulun yo kakan lumpat Aku, io arus nang ngaya pngnanam io se, moson salib io tiap olo diang lumpat Aku. ²⁴Koe ise-ise yo kakan nylamat kesong io, yo anta mapos kesong ube; tapi ise-ise yo mapos kesong yo koe Aku, io ene anta ubente nylamat iyo. ²⁵Ise jodoulun kuli se erai dnia, tapi io ngmbnasa ai ka ngrugi io se? ²⁶Koe ise-ise yo mai koe Aku ai koe pngesah-Ku, Pea Ulun mai low koeulun ene, Montuk Io ulet anta lang kmuliaan-Io ai lang kmuliaan Bapa diang mlekat-mlekat kudas. ²⁷Aku mere epo ikam : sbeta yo ngket ikam yo keo mbo mndo keo yo belo anta mate ena belo pian kito Krajaan Allah. ²⁸Bangsa walu olo ngket sundok eka tutui batuk Io ene, Yesus moit Petrus, Yohanes diang Yakobus dombo epo tunden epo sbayang. ²⁹Des Io desung sbayang, saya wae-Iyo waliu ai diris laung Io jadi bura ngrnsilak. ³⁰Dero kitoulun duo kongo bunyal diang Iyo, yo ene Musa diang Elia. ³¹Dero duo mmkelak kompu lang kmuliaan ai ngesah nau umbang epo ju-Iyo, yo kakan psundok-Io mbo Yerusalem. ³²Desung ene petrus diang tman-tman iyo turuy, des dero ruko dero kito Yesus lang kmuliaan-Iyo: diang duo kongoulun yo akat ela isan Io ene ³³Desulun duo kongo ene kakan ngendikah Yesus, Petrus ngulek epo-Iyo: "Guru, ego beta kain nongos mbo mndo. buen yo ena kain nampa tolu kemah, erai nte Ngko, erai nte Musa diang erai nua nte Elia." Tapi Petrus se belo di unong nau pngesah yo ene ³⁴desung io ngulek ktine, diwa nylikup dero. Des dero sumba lang jaun ene, dero jadi takut. ³⁵Dero kringo oyong ngket lang jaun ene, otang yo ktindo : "Endo Pea-Ku yo sundok pili-Ku, tempaning kam Iyo." ³⁶Des oyong ene dingo kito dero se Yesus ene toro yo ba-ba mne. Murit-murit ngelim pengitan dero ene, des jman ene dero belo keo ngesah epo ise-ise nau pngitan dero ene. ³⁷Mbo molo manin yo des dero diwa ngket tunden ene, deoulun ulet ngInduyun nyuruku Yesus. ³⁸Keo erai kongo ngket ekang dero ene momba, ulek iyo : "Guru, aku tindu apa lko meti pea ku, koe pea ku pulun yo ene. ³⁹Kolan-kolan yo kono sumban roh, kolan-kolan nyoyar ai roh ene ngukuy ngunsang kompu tonga yo sampe bowa iyo kbubus. Roh ene belo tau aut ngsa iyo ulak belo kakan oro ngket iyo. ⁴⁰Aku sundok tindu epo murid-murit-Ko apa dero ngusa roh ene, tapi dero belo kuli. ⁴¹Ulek Yesus : "Ikam endo pokaan yo belo prsaya ai tang, kola ptua kam aku aso ekang ikam ai sabar epo ikam? Oit pea ko ene dido!" ⁴²Des pea ene ngompoh Yesus, setan ene nguis iyo epo tana ai ngukuy-ngukuy kompu iyo. Tapi Yesus Ngur roh triaw ene diang ries mkale pea ene, laju nempuli pea ene epo uma iyo. ⁴³Ekaulun mbo mne ene ngrngao koe kito khebat kuasa Allah. Des dero ene aso kanam eran kito nau joun-Iyo ene, Yesus ngulek epo murid-murit-Iyo: ⁴⁴"Tempaning ai ona kam buen-buen pngesah-Ku endo : Pea Ulun anta snrah epo

lang kayang ulun." ⁴⁵Dero belo di unong nau pngesah ene, koe rti yo ene melim mbo dero, koe ene dero belo kuli ngmbayang rti yo. Ai dero belo ronu ngunti rti pngesah ene epo-Iyo. ⁴⁶Ngket ene ulet belo tau sngkono mbo murit-murit Yesus, dero bako awet ise yo nuon tinggen mbo sama dero. ⁴⁷Tapi Yesus tau atok lang utok dero. Koe ene Io ngalek erai kongo pea alus laju mayak mbo isan-Iyo, ⁴⁸laju ngulek epo dero : "Ise-ise ulun yo nrima pea endo lang karan-Ku, io nrima se Aku ; ai ise-ise ulun nrima Aku, io nrima Iyo yo nyuyu Aku. Koe yo paling idik ngket ekang ikam, iyo ene yo paling olai." ⁴⁹Yohanes nuing: "Guru, kain kito ulun yo ngusa setan makai karan-Ko, kain ngusan ulun ene, koe io makse se ulun taka." ⁵⁰Yesus ngulek epo iyo: "Nang kam usan, Koe ise-ise ulun yo belo nglawan ikam, yo ene ngket ikam." ⁵¹Des duni jman yo nte Yesus nengkat epo sorga, Io nadah pngeti Iyo nte malan epo Yerusalem, ⁵²Io ngirim tenu-tenu kongo utusan brangkat ono se Iyo. Dero brangkat sumba epo desa ulun Samaria nte nyiap ktindo ktitu nte-Iyo. ⁵³Tapi ulun-ulun Samaria belo kakan nrima se-Iyo, koe dalan-Iyo epo tadah Yerusalem. ⁵⁴Des duo kongo murit-Iyo, yo ene yakobus diang Yohanes, kito nau umbang ene, dero ngulek: "Tuhan, kakan be-Iko, apa kain nymuyu api diwa ngket langit nte mmtomo dero?" ⁵⁵Tapi Io skuleng ngae dero. ⁵⁶Ngket ne dero bju epo tadah desa yo mak. ⁵⁷Des Yesus diang murit-murit-Iyo desung malan nua, keo ulun mbo tenga boyan ngulek epo Yesus: "Aku kakan lumpat diang-Iko, epo mbe ka tadah-Ko malan." ⁵⁸Yesus ngulek epo iyo: "snkalau keo liang ai mpulu keo salai, tapi Pea Ulun belo keo awa nte awa mayak utok-Iyo." ⁵⁹Trus Io ngulek epo erai kongo ulun yo mak mbo mne: "Iko lumpat aku!" tapi ulun ene nuing: "aku tindu malan ile nte nglowong uma ku." ⁶⁰Tapi Yesus ngulek epo iyo: "Koe ka ulun mate nglowong ulun mate; tapi iko, malan ka ai sampe ko umbang krajaan Allah mbo mone-mone." ⁶¹Erai kongo yo mak nua ngulek: "Aku kakan lumpat-Iko, Tuhan, tapi aku tindu nte sabi ile diang kluarga ku." ⁶²Tapi Yesus ngulek: "Tongku ulun yo siap nte ngmbajak tapi skuleng epo sori, belo snaron mbo krajaan Allah.

Chapter 10

¹Koe ene Tuhan mili turu pulu murid yo mak, bayu ngutus dero duo-duo kongo malan ono se Iyo epo tongku kota diang awa yo kakan nte pngitek Iyo. ²Ulek Iyo epo dero: "Nte ani meroa tapi nte nggawi yo kurang. Koe ene tindu epo mpun ani, apa io ngirim ulun nte ngani ene." ³Malan aut, sbeta yo Aku nyemuyu ikam kati anak domba epo ekang jaba sengkalau. ⁴Nang moit pitisen, nguyu, trumpak, ai nang ngo diang ise-ise ulun kola ikam ela boyan. ⁵Ena ikam sumba lou,ulek ono-ono: Damai sjahtra nte lou endo. ⁶Ena mne keo yo sengkono nrima damai sjahtra, salam ko ene ktape mbo iyo. Tapi ena belo, salam ene mulik epo ikam nua. ⁷Nongos mbo lou ene, kuman nyingkap ise yo dneie epo ikam, koe ulun yo bgawi arus keo upa. Nang pindah-pindah lou. ⁸Ena ikam sumba mbo kota ai ikam tinorima mbo mne, nokan okan singkap yo dneie epo ikam. ⁹Ai pkale kam ulun-ulun yo keo roton mbo mne, ai ulek kam diang dero: Krajaan Allah sundok dmpet diang ikam. ¹⁰Tapi ena ikam sumba lang kota ai belo tinorima mbo mne, malan ikam epo boyan-boyana olai mbo kota ene ai ngulek diang ries. ¹¹Bondul kota kam yo preket mbo botis kain, kain nompus yo onon ikam; tapi ikam arus tau endo: Krajaan Allah sundok dmpet. ¹²Aku ngulek diang ikam: des olo ene Sodom aso mean tanggungan yo se kota ene. ¹³"Slaka ikam Khorazim! Slaka ikam Betsaida! koe ena ela Tirus ai ela Sidon keo musisat-musisat mbo eka-eka ikam, sundok ola dero btobat diang tangis tungul. ¹⁴Tapi sampe des nte mutus, tanggungan Tirus diang Sidon aso mean se tanggungan kam. ¹⁵Ai ikam Kapernaun, pinombo sampe langit be ikam? Belo, ikam pinodiwa sampe awa ulun mate! Ise yo nmpaning ikam, io nmpaning Aku; ai ise yo nolak ikam, io nolak Aku; ai ise yo nolak Aku, io nolak Iyo yo smuyu Aku. ¹⁷Turu pulu kongo murid ene ulet diang ego ai ngulek: "Tuhan, ene lou diang setan-setan belo ronoli diang kain koe karan-Ko." ¹⁸Trus ulek Yesus diang dero: "Aku kito iblis latu kati jlepan ngket langit. ¹⁹Sbeta yo Aku sundok mie kuasa epo ikam nte noda nipo diang kremau ai kuasa nte nantai penggalak musuh, nampa belo keo nte nengkono ikam. ²⁰Tapi ikam nang ego koe roh-roh ene takut se ikam, tapi ego koe karan kam keo tnulis mbo sorga. Des ene lou Yesus ego lang Roh Kudus ai ngulek: "Aku bsukur epo Iko, Bapa, Tuhan langit ai dnia, koe eka-eka ene ona-Ko nte ulun mukas ai pintar, tapi Iko mmekelak epo ulun yo biasa. O Bapa, ene yo sngkono diang-Iko. Eka sundok snerah epo-Aku koe Bapa-Ku ai ndok belo erai kongo ulun yo tau ise yo Anak se makse Bapa, ai ise yo Bapa se makse Anak ai ulun yo nulek se Anak ene kate ngulek soal ene." ²³Sundok ene Yesus skuleng tadah murid-murid-Iyo se ai ngulek epo dero: "ego yo kito ise yo pengkito kam. ²⁴Koe Aku ngulek diang ikam: Deo nabi ai raja kakan kito ise yo pngkito kam, ai kakan nmpaning ise yo pendingo kam, tapi belo di kringo. ²⁵Des jman ene akat erai kongo ahli Taurat nte nyoba Yesus, ulek iyo: "Guru, ise nte oki gawi apa kuli bolum yo kden?" ²⁶Tuing Yesus epo iyo: "Ise yo tnulis lang ukum Taurat? Ise yo baca ko mbo lane?" ²⁷Tuing ulun ene: "Sayang epo Tuhan, Allah ko, diang eka kesong ko diang eka jiwa ko ai diang eka penggalak ko, diang eka pngenanam buen ko, ai sayang epo ulun sama kati epo iko se." ²⁸Ulek Yesus epo iyo: "Tuing ko ene beta; gawi ko ka ktine, iko pasti bolum." ²⁹Tapi nte nyembeta nte iyo, ulun ene ngulek epo Yesus: "Ai ise po yo sama ulun?" ³⁰Tuing Yesus: "Keo ulun yo diwa ngket Yerusalem epo Yerikho; yo kono bungka prampok yo belo di ngrampas iyo tingen diang ptikas, tapi ngunu iyo lou, bayu ngndikah iyo diang kesong sori. ³¹Des ene lou keo erai kongo imam diwa tete boyan mne; io kito ulun ene, tapi io ngliki ulun ene ngket bika boyan. ³²Ene lou keo ulun Lewi ulet epo mne; des iyo kito ulun ene, iyo ngliki ngket bika boyan. ³³Bayu ulet erai kongo ulun Samaria, yo desung malan, epo awa ene; des io kito ulun ene, timbul kosang iyo. ³⁴Io ngompoh ulun ene, laju ngopop jail jungel ulun ene, des sundok nota diang lnga ai anggur, bayu yo nembot ulun ene epo ban kldai iyo, bayu moit epo pnginapan ai ngasi ngelah iyo. ³⁵Olo manin iyo io mie duo dinar epo mpun pnginapan ene, ulek iyo: "Asi ela ko iyo ai ena iko sboli sisa se endo, aku ngganti iyo, asal aku uli. ³⁶Ise lelu tolu kongo ulun ene, kati san ko, yo sama ulun yo kono kurow prampok ene?" ³⁷Tuing ulun ene: "Ulun yo kosang epo iyo." Ulek Yesus epo iyo: "brangkat, ai gnawi kati ene low!" ³⁸Des Yesus diang murid-murid Iyo ela boyan, ulet Io mbo erai kampong. Ulun bawe nan karan se Marta nrima Iyo ela lou iyo. ³⁹Ulun bawe ene keo erai buntung nan karan se Maria. Maria ene tunge dmpet botis Tuhan ai trus nmpaning kesah-Iyo, ⁴⁰des ene Marta pae beta nyedia okan singkap. Iyo ngompoh Yesus ai ngulek: "Tuhan, belo be Iko nyanda, se erai buntung ku belo nyanda aku pae ba-ba? Suyu Ko iyo ngawat aku." ⁴¹Tapi Tuhan nuing: "Marta, Marta, iko gaer beta ai nyusah iko se diang deo gawi. ⁴²Tapi erai tingen yo keo jodo: Maria sundok mili nte iyo yo paling buen, yo belo anta di nalek ngket iyo."

Chapter 11

¹Keo sindai mbo awa Yesus desung bdoa. Des Io brnti bdoa, erai kongo ngket murid-murid-Iyo ngulek epo Io: "Tuhan, batuk Ko ta kain bdoa, sama kati yo batuk Yohanes epo murid-murid-iyu."²Tuing Yesus epo dero: "Ena ikam bdoa, ktindo : Bapa, pinokudus ka karan-Ko, ulet ka Krajaan-Ko,³Die ka kain tongku olo puli okan singkap, ⁴diang ampun ka kain diang dosa kain, koe kain low ngampun tongku kongo ulun yo sala epo kain; ai nang moit kain epo lang pngkono pngkna".⁵Trus ulek-Iyo epo dero: "Ena keo erai kongo ikam des tenga malom malan epo lou tman-iyu ulak ngulek epo-iyu: Eraibuntung, pkinjam ko ta oki tolu roti, ⁶koe erai kongo tman ku yo desung malan epo bju singah mbo lou ku ai aku belo keo ise-ise nte die epo-iyu; ⁷ mungkin be tman-iyu ngket lang lou ene nuing : Nang ngangu aku, jawong sundok btokom ai aku diang pea-pea ku sundok turui; aku belo di kuli uat ai mie ene epo eraibuntung."⁸ Aku ngulek epo ikam: Beta ko io belo di kakan uat ai mie roti ene epo io koe ulun ene tman io, tapi koe nau ruyuk io ene, tman-iyu ene jadi uat low ai mie ise yo pinorlu nte io.⁹Koe ene doko Aku ngulek epo ikam: Tindu ka, apa iko anta dnue; eto ka, apa iko anta kuli; ktok ka, apa anta ngko ningkanj jawong.¹⁰Koe tongku ulun yo tindu, nrima ai tongku ulun yo meto, kuli ai tongku ulun yo ngtok, jawong ningkanj nte io.¹¹Uma mone ngket ikam, ena pea-iyu tindu esa ngket-iyu, anta mie nipo epo pea-iyu ene nte nganti esa? ¹² Ktine low, ena io tindu toli, anta dnue epo-iyu krmau? ¹³Jadi ena ikam yo triaw tau mie pndie yo buen epo pea-pea kam, nyaitda Bapa kam yo mbo sorga! Io anta mie Roh Kudus epo dero yo tindu epo-Iyo."¹⁴Keo sindai Yesus ngusa ngket lang erai kongo ulun jnis setan yo nampa ulun jadi pepe. Des setan ene baling, ulun ene tau bsara. Ulun deo mne jadi eran. ¹⁵Tapi keo dero mne yo ngulek : "Io ngusa setan diang kuasa Beelzebul, pngntuo setan".¹⁶Keo low yo tindu tanda ngket sorga epo-Iyo nte nyoba Io. ¹⁷Tapi Yesus tau kno dero laju ngulek : "Tongku krajaan yo sangko lawan diang sama dero se, pasti ancur, sama low kati ulun ngmpunan yo belo tau bsngkono diang sama dero se, pasti rusak."¹⁸Ena Iblis ene low belo bkerai ai bako lawan diang sama dero se, ktimbe nau kuasa dero kuli btahan? Koe ulek kam Aku ngusa setan diang kuasa Beelzebul.¹⁹ Jadi ena Aku ngusa setan diang kuasa Beelzebul, diang kuasa ise, murid-murid kam ngusa setan? Jadi koe ka dero nte tau sala kono-iyu ngkam. ²⁰Tapi ena Aku ngusa setan diang kuasa Allah, beta-beta-iyu Kerajaan Allah sundok ulet epo ikam.²¹Ena erai kongo ulun galak diang keo ba snjata-iyu ngnjaga lou-iyu se, pasti aman pngkeo-iyu. ²²Tapi ena keo erai kongo ulun yo aso galak se io nglawan ai mkalah-iyu, jadi ulun ene ngrampas eka snjata arapan io, ai magi-magi pngkuli-iyu ene. ²³Ise ulun yo belo sama-sama diang Aku, io nglawan Aku ai ise ulun yo belo moit ulun nte diang Aku , io nampa bulangtuar.²⁴Ena roh triaw baling ngket lang ulun, roh ene jadi nyabu belo tadah epo awa deing ai korengba layongba trus meto awa nongos, ai koe io belo keo kuli, roh ene ngulek: Alo aku mulik nua epo lou yo sundok dikah ku prne.²⁵ Jadi io brangkat ai kito se lou ene brse snapu diang natur buen. ²⁶Trus io baling ai moit turu roh yo mak yo triaw-triaw aso se-iyu ai dero sumba diang nongos mbo mne. Ene doko pnyundok yo nau ulun ene tambah gramas se nau-iyu ngket ono.²⁷Des Yesus aso bsara, ulet erai kongo bawe ngket ekang ulun deo ai ngulek epo-Iyo diang oyon ries: "Ego beta ine yo sundok nglandung Iko diang tete yo nete Iko."²⁸Tapi Io ngulek: "Yo ego beta yo doko dero yo nmpaning firman Allah diang nglaku-iyu."²⁹Des ulun deo ene ngrpudu nglekum-Iyo, Yesus ngulek: "Ulun dero endo doko pokan ulun triaw. Dero tindu tanda ajaib, tapi epo dero belo anta dnue tanda yo mak se se tanda nabi Yunus. ³⁰Koe sama kati Yunus jadi tanda nte ulun-ulun Niniwe, ktine low doko Pea Ulun anta jadi tanda nte ulun pokan dero endo."³¹Des olo kiamat, raja bawe ngket Selatan ene anta nyuli sama-sama diang ulun pokan dero endo ai io anta ngukum dero. Koe raja bawe ene ulet ngket tompak dnua nte nmpaning khebat pntau Salomo, aso da yo keo mndo endo lngkat se Salomo.³²Des olo kiamat ulun-ulun Niniwe anta nyuli sama-sama diang ulun pokan dero endo ai anta ngukum dero. Koe ulun-ulun Niniwe ene tobat des dero nmpaning pnuren Yunus, aso da yo keo mndo endo lngkat se Yunus!"³³"Ndok belo erai kongo ulun yo neket plita trus mayak yo iwat lou ena belo iwat kepit, tapi ban blai plita, apa eka ulun yo sumba kuli kito pa-iyu. ³⁴Mato ko ene plita kompu tonga ko. Ena mato ko buen, trang ba pupus kompu tonga ko, tapi ena mato ko triaw, jadi seom kompu tonga ko. ³⁵Koe ene jnaga buen-buen, apa trang yo keo mbo iko nang jadi nyeom. ³⁶Ena pupus kompu tonga ko trang ai belo keo yo seom, jadi pupus kompu tonga ko trang ba, sama kati ena plita mtrang iko diang pa-iyu."³⁷Des Yesus sundok nutui matuk, erai kongo ulun Farisi tindu epo Io nte kuman mbo lou-iyu. Jadi sumba doko Io epo lang lou ene, trus tunge kuman. ³⁸Des ulun Farisi ene kito nau ene ai io eran, koe Yesus belo mui kayang-Iyo onon kuman.³⁹Tapi Tuhan ngulek epo-iyu : "Ikam ulun-ulun Farisi, ikam mui ngket baling tingen piring ktowong, tapi ela dalom kam ponu uguh ai gawi triaw. ⁴⁰O ulun-ulun bungang, belo be Io yo nampa la baling ene, Io low yo nampa la dalom?"⁴¹ Tapi, dnue ta atok yo nte ulun yo belo keo ise-ise apa beta-beta yo eka ene anta jadi brse nte ngkam.⁴²Tapi slaka beta ikam, o ulun-ulun Farisi, koe ikam mayar perpuluhan ngket slase, ingu ai eka jnis deli, tapi ikam belo di nyanda yo adil diang kasih Allah. Yo erai arus nlaku, yo mak nang dnukah.⁴³Slaka beta ikam, o ulun-ulun Farisi, koe ikam gawal tunge mbo awa paling ono lang lou awa smbayang ai gawal nrima hormat mbo pasar."⁴⁴ Slaka

beta ikam, koe ikam sama kati kubur yo belo keo tanda; ulun-ulun yo malan ban mne mba di tau se mne kubur."⁴⁵Erai kongo ulun ngket ekang ahli-ahli Taurat ene nuing ai ngulek epo-Iyo : "Guru, diang ngulek ktine, Iko nyruna kain low."⁴⁶Tapi Io nuing: "Slaka beta ikam low, o ahli-ahli Taurat, koe ikam mayak pnykoit boyat yo belo di dapet oson ulun, tapi ikam se ndok belo mmpik pnykoit boyat ene budah diang erai grigi."⁴⁷Slaka beta ikam, koe ikam nngkuen kubur nabi-nabi, tapi itak kakah kam sundok ngmpate dero.⁴⁸ Diang ktine ikam ngaku, se ikam nymbeta gawi itak kakah kam, koe dero sundok ngmpate nabi-nabi ene ai ikam nngkuen kubur dero.⁴⁹Koe ene hikmat Allah ngulek: Aku anta nyuyu epo dero nabi-nabi diang rasul-rasul ai tenga ngket kdeo nabi-nabi diang rasul-rasul ene anta pate dero ai kurow dero,⁵⁰apa ngket pokan dero endo tnuntut eka daya nabi-nabi yo sundok rudak mulai ngket dnia tnampa,⁵¹ mulai ngket daya Habel sampe daya Zakharia yo sundok pnate ekang mezbah diang Lou Allah. Aso, Aku ngulek epo ikam : Eka-eka yo ene anta tnuntut ngket pokan dero endo.⁵²Slaka beta ikam, o ahli-ahli Taurat, koe ikam sundok ngalek kungsi pntau; ikam se belo di sumba epo dalom ai ulun yo bkomer nte sumba epo dalom bombong-bombong kam."⁵³Trus des sundok Yesus brangkat ngket mne, ahli-ahli Taurat diang ulun-ulun Farisi belo tau brnti mungun ai nyrang Io diang bjenis soal.⁵⁴Nte ene dero bkomer ngati Io, apa dero kuli nangop Io ngket pmnsara Io se.

Chapter 12Desung ene, beribu-ribu ulun deo bekumpul, sampe dero bako jleh-jleh. trus Yesus mulai nutuy matuk, yo ono epo murid-murid-Iyo, ulek-Iyo: " Ati-ati epo kompal, yoene pura-pura buen ulun Farisi.

²belo keo anta yo betokom yo belo anta ningkang ai belo keo yo melim yo belo anta melak. ³Koe ene ise yo ikam ngulek kam lang seom anta dedingo lang pa, ai ise yo konis kam po telingo lang duang anta pinosampe engket ombon sapo lowu. ⁴Aku ngulek epo ikam, teman-teman-Ku, nang ikam takut epo dero yo kuli nempate kompu tonga ai belo kuli ise-ise oli. ⁵Aku kakan nutuy po ikam ise yo arus takut kam, takut ka po Iyo, yo ena sundok ngempate, keo kuasa nte ngoding ulun po lang neraka. sebetaiyo Aku ngulek epo ikam, takut ka po Iyo! ⁶mba be mpit yo jenual limo kukuy duo sen? beta ko ktine ndok belo erai kukuy yo knewot koe Allah. ⁷Sampe balo la utok ko lou sundok eka nitung. Koe ene nang takut, koe ikam lengkat se uman mpit deo. ⁸Aku ngulek epo ikam: Tongku ulun yo ngangkan se Aku la ono ulun, Pea Ulun lou anta ngangkan iyo la onon mlekat-mlekat Allah. ⁹Tapi ise-ise ulun yo nangkai Aku la onon ulun, io anta tnangkai la onon mlekat-mlekat Allah. ¹⁰Tongku ulun yo ngulek ise-ise nte ngelawan Pea Ulun, io anta nampun; tapi ise-ise ulun yo menguja Roh Kudus, io belo anta nampun. ¹¹Ena Ulun mekadap ikam epo majelis-majelis, epo pemerenta-pemerenta ai penguasa-penguasa, nang ikam gaer ktimbe ai ise yo arus ulek kam nte ngembela diri kam. ¹²Koe des ene lou Roh Kudus anta nutuy matuk ikam ise yo arus ulek kam. ¹³Erai kongo ulun engket deo ulun ene ngulek epo Yesus: " Guru, ulek ko tah epo erai buntungku apa io ngembagi warisan diang aku. ¹⁴Tapi Yesus ngulek epoiyo: erai buntung, ise po yo nengkat Aku jadi pemutus ai pengeang ikam ?". ¹⁵Ulek-Iyo nua epo dero: " Awas ai Ati-ati epo yo uguh koe tontan ulun ruak ruaw pengkeoiyo, bolumiyo belo segeweng engket pengkeoiyo ene. ¹⁶Sundok ene lo ngulek epo dero pakai pemerawet, ulek-Iyo: "Koe erai kongo ulun tataw, tanaiyo ruak ruaw asiliyo. ¹⁷Io rekunti lang kesong iyo se: ise po yo arus oki gawi, koe aku belo keo awa la mone aku ngona asil tana-ku. ¹⁸Trus ulekiyo: endo yo anta gawiku, aku anta mekolai longkong-longkongku ai aku anta nengkuat yo aso olai ai aku anta ngona la mne eka gandong ai kakas-kakasku. ¹⁹Sundok ene aku anta ngulek epo kesongku: kesongku, keo la iko deo kakas, betembun nte betaun-taun kolaiyo; slokoi ka, kuman ka, ngisop ka, ai ego-ego ka! ²⁰Tapi firman Allah epoiyo: O iko ulun bungang, malom ndo peles kesongko nalek ngket iko, ai ise yo sundok senedia ko, nte ise ene oli? ²¹ktine doko jadiyo diang ulun yo ngumpul pengkeo nte iyo se, ena io belo tataw la onon Allah. ²²Yesus ngulek epo murid-murid-Iyo: " Koe ene Aku ngulek epo ikam: nang gaer diang bolum kam, ise yo kakan okan kam, ai nang gaer lou diang kompu kam, ise yo kakan ngkam pakai. ²³Koe bolum ene aso penting se okan singkap, ai kompu tonga ene aso penting se diris laung. ²⁴Eti ko tah okak-okak yo belo sekulo, belo nembot asil, ai belo keo longkong, tapi penakan koe Allah. nau umbang ikam ene pawak lengkat se mpulu-mpulu ene!. ²⁵Ise lelu ikam yo koe gaer iyo kuli nambah tundok siku mbo boyan bolumiyo. ²⁶Jadi, ena ikam belo kelian nampa kakas yo paling idik, ise moko ikam gaer diang soal-soal yo mak? ²⁷Eti ko tah bungo bakung, yo belo ngendalin ai belo ngendaro, tapi Aku ngulek epo ikam: Salomo lang eka kehebat iyo ene belo pini sepakai kebuen kati bungo ene. ²⁸Jadi, ena dikut la umo, yo olo ndo keo ai manin yo noding lang api, ene ka raji Allah, aso da ikam, o ulun yo kurang persaya! ²⁹Jadi, nang ka ikam nyoal ise yo anta ngkam okan ai ise yo anta nte ngkam isop ai nang ka nyoru kesong kam. ³⁰Eka-eka ene neto koe bangsa-bangsa la denia yo belo tau Allah. Tapi Umako tau, se ikam merlu beta eka-eka ene. ³¹Tapi eto ka kerajaan-Iyo, jadi eka-eka ene tenambah lou epo ikam. ³²Nang ka takut, O ikam klompok idik! Koe Uma kam sundok sengkono kesong miye ngkam Kerajaan ene. ³³Jual ka eka pengkeo kam ai biye ka nte ulun yo belo keo ise-ise! Alo nampa epok yo belo tau usang. yoene pengkeo mbo sorga yo belo tau eka, yo belo dapet kompos pengako ai yo belo dapet krusak gegat. ³⁴Koe la mone pengkeo ko keo, la mne lou kesong ko keo. ³⁵Searusiyo towing ko nokon seniret ai pelita ko nokon dolan. ³⁶Ai searusiyo iko sama kati ulun-ulun yo minte-minte tuaniyo uli ngket tama kawen, apa ena io ulet ai ngtok jawong, laju ningkang jawong nteyo. ³⁷ego beta batak-batak yo tinonoan kek tuaniyo aso bejaga des io ulet. Aku ngulek epo iko : sebetaiyo io anta nyiret towingiyo ai metawar dero tunge nte kuman, ai io ulet ngelayan dero. ³⁸Ai ena iyo ulet tenga malom, ena belo manin ma ai krapet dero ngawi ktine, jadi dero ego beta. ³⁹Apa ikam tau endo: ena mpu lowu tau jman pengako anta ulet, io belo anta ngizin lowu iyo kono bongkar. ⁴⁰Searusiyo iko lou siap ba, koe Pea Ulun ulet des iko belo ditau jman." ⁴¹Ulek Petrus: "Tuhan, kain be yo ontus Ko ene diang pemerawet ene belo be eka ulun lou?" ⁴²Tuing Tuhan: "Jadi ise po pengurus lowu yo setia ai tukang yo anta nangkai koe tuaniyo nte jadi pengutok eka-eka batakio nte miye okan epo dero des jman nte kuman? ⁴³Ego beta batak, yo tinonoan tuaniyo ngawi tugasiyo ene. des tuaniyo ene ulet. ⁴⁴Aku ngulek epo ikam: sebetaiyo tuaniyo ene anta ngangkat io jadi tukang jaga eka mpuniyo. ⁴⁵Tapi, ena batak ene triaw ai ngulek lang kesongiyo: tuanku endo belo ulet-ulet, trus mulai mupuk batak-batak song ai batak-batak bawe ai kuman ngisop ai mauk, ⁴⁶jadi tuan batak ene ulet des olo yo belo tinonoaniyo ai des jman io belo di tau, ai anta ngempate io ai nampa iyo kerai pengkono kati ulun-ulun yo belo setia. ⁴⁷Keo lou batak yo tau pengkakan tuaniyo, tapi yo belo keo nyedia ise-ise, ai belo nggawi ise yo petua tuaniyo, io anta kono deo pupuk katang. ⁴⁸Tapi ise-ise ulun belo tau pengkakan

tuaniyo ai nggawi ise yo arus gnawi yo tau nte kono pupuk katang, iyo anta idik kono pupuk katang. Tongku ulun epo iyo deo denie, engket iyo anta deo tnindu , ai epo ise yo deo tenape, engket iyo anta aso roa nua tnindu.⁴⁹"Aku ulet nte nurak api epo denia, Aku ngarap beta, api ene sundok dolan!⁵⁰Aku arus nrima baptis ai nyoru beta kesongKu, ena ene belo pian gnawi.⁵¹Otus kam, se Aku ulet nte moit damai mbo denia ? belo, ulek-Ku epo ikam, makse damai, tapi belo besengkono.⁵²Koe mulai engket tmpo ndo anta keo belo besengkono ngket limo kongo ulun lang erai lowu, tolu ngelawan duo ai duo ngelawan tolu.⁵³Dero anta bako belo besengkono, uma ngelawan peaiyo song ai pea song ngelawan umaiyo, ine ngelawan peaiyo bawe, ai pea bawe ngelawan ineiyo, ampuiyo bawe ngelawan nantuiyo bawe ai nantu bawe ngelawan ampuiyo bawe"⁵⁴Yesus ngulek nua epo ulun deo: "ena iko kito jaun dombo ngket tadah barat, peles iko ngulek: anta ulet uran, ai nau ene jadi beta.⁵⁵Ai ena iko kito riut besiup ngket tadah selatan, iko ngulek: olo anta langot takey, ai nau ene jadi beta.⁵⁶O ulun pura-pura buen, nau denia ai langit ikam tau ngembedaiyo, ise moko ikam belo tau ngembeda zaman endo?"⁵⁷Ai ise moko ikam belo tau mutus mbo ikam se ise yo kono?⁵⁸Koe ena iko diang baliko malan ngadap pemerenta, bekomer doko bedamai diang iyo kola-kola nyarak boyan, apa nang iko patakiyo epo hakim ai hakim nyerah iko epo pelisi ai pelisi ene ningkos iko po lang sper.⁵⁹Aku ngulek epo iko: Iko belo anta baling ngket lane, ena iko belo pian mayar eka utangko."

Chapter 13

¹Des jman ene ulet ka epo Yesus tenu-tenu kongo ulun moit kabar nau umbang ulun-ulun Galilea, yo daya dero sampur Pilatus diang daya korban yo die dero nte persembahan. ²Yesus nuing dero: "Omoy kam ulun-ulun Galilea endo pawak olay dosa-iyu se eka ulun Galilea yo mak, koe dero kono jodo nte ktine? ³Belo! ulek Ku epo ikam. Tapi ena ikam belo btobat, eka ikam anta tomo diang sara ktine. ⁴Ena be omoy kam yo walu blas kongo, yo mate sengkinan mnara dmpet Siloam, pawak olay pensala-iyu se pnsala eka ulun yo mak yo nongos mbo Yerusalem? ⁵Belo! ulek Ku epo ikam. Tapi ena ikam belo btobat, eka ikam anta tomo diang sara ktine." ⁶Trus Yesus ngulek pmerawet endo: "Keo ulun mpun tonga ara yo bolum mbo kbong anggur-iyu, ai io ulet nte meto bua mbo tonga ara ene, tapi io belo di ruku. ⁷Laju io ngulek epo yo ngurus kbong anggur ene: Sundok tolu taun aku meto bua mbo tonga ara endo ai aku belo pini ruku bua-iyu. Totow ka tonga kayu endo! Nte ise yo bolum mbo tana mndo diang persuma! ⁸Tuing ulun ene: Tuan, koe ka yo bolum taun endo aso, aku nyangkul tana lekum-iyu ai mie pupuk epo-iyu, ⁹bahe taun sori io mua; ena belo, totow ka! ¹⁰Keo des jman Yesus desung nutui matuk lang lou ibadat des olo sabat. ¹¹Ela mne keo erai kongo ulun bawe yo sundok walu blas taun snumban koe roh yo koe ene io krotan sampe dukuh klutuk-iyu ai io belo kuli akat diang lonus oli. ¹²Des Yesus kito ulun bawe ene, Io momba io ai ngulek epo-iyu: "Mena, roton ko sundok ale." ¹³Trus Io mayak kayang-Iyo ombon bawe ene, ai des ene low akat bawe ene, ai ngemulia Allah. ¹⁴Tapi pngutok low ibadat ene mara beta koe Yesus mkale ulun des olo Sabat, trus io ngulek epo ulun deo: "Keo onom olo nte bgawi. Koe ene ulet doko des olo ene nte pkale jadi nang montuk olo Sabat." ¹⁵Tapi Tuhan nuing io, ulek-Iyo: "Ulun-ulun mnapi, belo be tongku ikam nmbaling lembu ai kledai-iyu montuk olo Sabat ngket lang rban-iyu ai moit-iyu epo awa ngisop? ¹⁶Belo be bawe endo, yo sundok walu blas taun bolit iblis, arus nosu ngket bolit iyo ene, koe io ene upus Abraham? ¹⁷Des Io ngulek ktine, eka dero yo nglawan-Iyo kiso kanam mai ai eka ulun deo ego koe eka gawi gata mulia, yo sundok nlaku koe-Iyo. ¹⁸Jadi ulek Yesus: "Duni nau diang ise Krajaan Allah ene ai diang ise Aku anta mrawet-iyu? ¹⁹Io sama kati bigi jabung, yo nalek ai bnwet koe ulun mbo kbong-iyu; bigi ene moti trus jadi ktonga ai mpulu-mpulu ngensalai mbo paka-paka-iyu." ²⁰Ai Iyo ngulek nua: "Diang ise Aku anta mrawet Krajaan Allah? ²¹Io sama kati ragi yo nalek koe ulun bawe ai gnaru snampur lang jlpong trigu tolu takar sampe eka kembong." ²²Trus Yesus malan mupus ngket kota epo kota ai ngket desa epo desa ulak nutui matuk ai Iyo malan trus epo Yerusalem. ²³Ai keo ulun yo ngulek epo-Iyo: "Tuhan, mba di deo be ulun yo sinolamat?" ²⁴Tuing Yesus epo ulun-ulun mne: "Bkomer ko nte sumba lalo jawong yo sidet ene! Koe Aku ngulek epo ikam: Deo ulun anta bkomer nte sumba, tapi belo anta kuli. ²⁵Ena mpu low sundok uat ai sundok nokom jawong, ikam anta akat ela baling ai ngetok-ngetok jawong ulak ngulek: Tuan, ingkang jawong nte kain! Ai Io anta nuing ai ngulek epo ikam: Aku belo di tau ngket mone ikam ulet. ²⁶Jadi ikam anta ngulek: Kain sundok kuman ai ngisop onon Iko ai Iko sundok nutui matuk mbo boyan-boyang mbo kota kain. ²⁷Tapi Io anta ngulek epo ikam: Aku belo di tau ngket mone ikam ulet, buyo ngket onon-Ku, ikam eka-eka yo triaw gawi! ²⁸Ela lane doko keo tangis tungul ai kukut walo ngriot, ena ikam anta kito Abraham diang Ishak ai Yakub ai eka-eka nabi mbo lang Krajaan Allah, tapi ikam se tnimpa epo baling. ²⁹Ai ulun anta ulet ngket Timur ai Barat ai ngket Utara ai Slatan ai dero anta tunge kuman mbo lang Krajaan Allah. ³⁰Ai sbeta yo keo ulun yo sori tingen yo anta jadi ulun yo ono tingen ai keo ulun yo ono tingen anta jadi ulun yo sori tingen." ³¹Des jman ene ulet tenu-tenu kongo ulun Farisi ai ngulek epo Yesus: "Malan aut, dikah aut awa mndo, koe Herodes kakan ngempate Iko." ³²Tuing Yesus epo dero: "Malan aut ai ulek aut epo sengkalau ene: Aku ngusa setan ai mekale ulun, olo ndo ai manin, ai montuk olo yo ktolu Aku anta sundok. ³³Tapi olo ndo ai manin ai kuan Aku arus nrus dalan Ku, koe belo sngkono nabi pnate ena belo ela Yerusalem. ³⁴Yerusalem, Yerusalem, iko yo ngempate nabi-nabi ai nurak diang batu ulun-ulun yo snuyu epo iko! Jono Aku ngeno kakan ngumpul pea-peako, sama kati tino piak ngumpul anak-anak iyo iwat olar iyo, tapi iko belo kakan. ³⁵Sebeta yo low ko endo anta dnikah ai jadi lngoh. Tapi Aku ngulek epo iko: Iko belo anta kito Aku oli sampe des iko ngulek: Diberkati Io yo ulet lang karan Tuhan.

Chapter 14

¹Des jman olo Sabat Yesus ulet epo lou erai kongo ngket pngutok ulun-ulun Farisi nte kuman mbo mne. Eka yo keo mne nyemпти Io ndok tuyu. ²Kolan-kolan ulet ulun yo kroton lamput danum akat mbo onon-Iyo. ³Laju Yesus ngulek epo ahli-ahli Taurat ai ulun-ulun Farisi ene, ulek-Iyo: "Kate be, belo be mkale ulun des olo Sabat?"⁴Eka dero mne suni. Trus Io ngop tangan ulun kroton ene ai mkale-iyu ai nyuyu-iyu malan. ⁵Sundok ene Io ngulek epo dero: "Ise lelu ikam yo belo banget ngndurut nmbaling pea-iyu ktine low ena lmbu-iyu latu epo lang tinan, tontan ko des olo Sabat?" ⁶Dero belo kuli nglawan nte Io ene. ⁷Koe Yesus kito, se peri-peri bkomer tunge mbo awa paling kinonuon, Io ngulek pmrawet endo epo dero: ⁸"Ena ulun ngirak iko epo ungan kawen, nang tunge mbo awa paling kinonuon, koe bahe ulun ene sundok ngirak ulun yo aso kinonuon se iko, ⁹apa ulun ene, nang ngompoh ai ngulek epo iko: Die awa endo epo ulun enduh. Trus iko diang mai arus malan nte tunge mbo awa yo paling sori. ¹⁰Tapi, ena iko nirak, alo tunge mbo awa yo paling sori. Bahe mpu lou anta ulet ai ngulek epo iko: Tman, tunge la ono ka. Jadi diang ktine iko anta akinonuon onon wae mato eka-eka peri yo mak. ¹¹Koe ise-ise ulun yo mkombo-iyu se, io anta pinokiwa ai ise-ise ulun yo iwa-iwa ka nau, io anta pinokombo."Ai Yesus ngulek low epo ulun yo ngirak Io ene: "Ena iko nampa acara kuman molo be malom be, nang iko ngirak tman-tman ko ai eraibuntung-eraibuntung ko ai ampi ompang ko ai ulun-ulun dmpet lou ko yo tatau, koe dero anta males ene diang ngirak iko low jadi diang ktine iko kuli bales-iyu. ¹³Tapi ena iko nampa acara kuman, nirak ulun-ulun yo belo keo ise-ise, ulun-ulun pokung dekal ai ulun-ulun posa. ¹⁴Jadi iko anta ego beta, koe dero belo keo ise-ise nte males-iyu epo iko. Koe iko anta kuli bales-iyu des olo pngnyuli ulun-ulun yo kono. ¹⁵Kringo ene bsara erai kongo ngket peri-peri ene epo Yesus: "Ego beta ulun yo anta dnje kuman lang Krajaan Allah." ¹⁶Tapi Yesus ngulek epo-iyu: "Keo erai kongo ulun nampa acara olai nte kuman nyinkap ai io ngirak ulun deo. ¹⁷Duni aut acara kuman ene mulai, io nyuyu batak-iyu ngulek epo dero yo sundok nirak ene: Epo mndo aut, koe eka sundok sinodia ba aut. ¹⁸Tapi dero sama-sama tindu maaf. Yo tla ngulek epo-iyu: Aku sundok moli umo jadi aku arus malan meti-iyu; aku tindu maaf. ¹⁹Yo mak ngulek: Aku sundok moli limo pasang lmbu kbiri ai aku arus malan nyoba-iyu; aku tindu maaf. ²⁰Yo mak nua ngulek: Aku bayu kawen jadi aku belo kuli ulet. ²¹Jadi uli ka doko batak ene ai nyampe eka ene epo tuan-iyu. Laju roa doko mara mpu lou ene ai ngulek epo batak-iyu: Malan resi-resi epo mupus boyan ai gang-gang lang kota ai oit epo dido ulun-ulun yo belo keo ise-ise ai ulun-ulun yo pokung ai ulun-ulun posa. ²²Sundok ene batak ene ngulek: Tuan, ise yo suyu tuan ene sundok nlaku, tapi betako ktine aso keo awa. ²³Trus ulek tuan ene epo batak-iyu: Malan nua epo eka boyan ai pngentas ai paksa ulun-ulun yo keo mne apa sumba, koe lou ku arus ponu. ²⁴Koe Aku ngulek epo ikam: Ndok belo keo erai kongo ulun-ulun yo sundok nirak ene anta kiso kanam okan singkap-Ku ene. ²⁵Keo sindai deo ulun bloyun-bloyun nyarak Yesus malan. Ulak skuleng epo sori Yesus ngulek epo dero: ²⁶"Ena ulun ulet epo Aku ai io belo di kate tenggang ngket uma-iyu, ine-iyu, bawe iyu, pea-pea-iyu, eraibuntung-eraibuntung-iyu yo song be bawe, sampe kesong-iyu se, io belo kuli jadi murid-Ku. ²⁷Ise-ise ulun yo belo moson salib-iyu ai lumpat Aku, io belo kuli jadi murid-Ku. ²⁸Koe ise lelu ikam po yo ena kakan nngkuat mnara belo tunge ile ngitung ongkos-iyu, puli be sen-iyu nte nyundok gawi ene? ²⁹Apa ena io sundok mayak tondal-iyu trus belo kuli nyundok-iyu, nang-nang eka ulun yo meti-iyu, nguja io, ³⁰ulak ngulek: Ulun endo mulai nngkuat, tapi io belo klian nyundok-iyu. ³¹Ktine low, raja mone si yo ena kakan brangkat epo prang nglawan raja yo mak belo tunge ile nte ngnanam, klian be io diang spulu ribu kongo nte ngadap lawan yo ngompoh-iyu diang duo pulu ribu kongo ulun? ³²Ena belo, io anta nyuyu wakel yo nyndipot bali ene aso oro nte ngunti ktimbe ena damai. ³³Ktine low doko tongku-tongku kongo ikam, yo belo ngloas kompu tonga-iyu ngket eka pngkeo-iyu, belo kuli jadi murid-Ku. ³⁴Garam ene betako buen, tapi ena garam ene jadi tawai, diang ise io kinomasin? ³⁵Belo keo jodo-iyu oli nte umo be nte pupuk, jadi io oding ulun tingan. Ise yo keo tlingo nte nempaning buen yo io ngringo!"

Chapter 15

¹Jut pnage bea ai ulun-ulun dosa biasa yo ulet epo Yesus nte nmpaning Io. ² Laju memetau ulun-ulun Farisi ai tukang-tukang taurat ulek dero: "Io nrima ulun -ulun dosa ai kuman sama-sama diang dero." ³Laju Io ngulek pemerawet ene epo dero: ⁴ Ise llu ikam yo keo jatus kukui domba, ena io mapos erai kukui ngket dero, belo be io nape yo sie pulu sie kukui ene mo padang gurun ai malan meto yo tang ene sampe io ruku se yo? ⁵ Ena io ruku se yo, io mayak yo ban pluko io diang ego, ⁶Des sampe la lou' io momba tman-tman ai ulun-ulun likup lou io, ai ngulek epo dero: snang-snang diang aku, koe domba ku yo mapos ene nruku. ⁷ Aku ngulek epo ikam: ktine lou anta keo snang mo sorga koe erai kongo ulun dosa yo btobat, lengkat se kanam snang koe siepulu sie kongo ulun buen yo belo koyoh btobat. ⁸Ktina lou bawe mone yo keo spulu Dirham, ai ena io mapos erai buti, belo neket plita ai nyapu lou' diang meto yo beta-beta sampe ruku se yo? ⁹Ai ena io sundok ngruku yo, io momba tman-tman ai ulun-ulun likup lou io diang ngulek: senang-senang sama-sama taka diang aku, koe dirham ku yo mapos ene sundok ruku ku. ¹⁰ Aku ngulek epo ikam: Ktine lou anta keo senang mo mlekat-mlekat Allah koe erai kongo ulun dosa yo btobat. ¹¹Yesus ngulek nua: keo erai kongo ulun ngmpun duo pea song. ¹² Ulek io burok epo uma io: bapa, die epo aku tenga pngkeo yo mpun taka, yo nte oki memang. laju uma io magi-magi pngkeo pngkenan ene epo dero. ¹³Tenu-tenu oli pea yo burok ene ngenjual eka mpun io ene trus malan epo dnia yo oroh. la lane io nungka pengkeo io diang bolum nte ngaya ptua blis lang kompu io. ¹⁴ des solo bah pngkeo io, ulet lau mo lang dnia mne ai io lou mulai bnasa. ¹⁵Trus io malan ai bgawi mo ulun mo dnia mne. Ulun ene nymuyu io epo awa penyekamu nte ngnjaga bawi io. ¹⁶ laju io kakan ngatok buntung io, diang mpas yo nte pakan bawi ene tapi nok belo erai kongo ulun yo kakan mie epo io. ¹⁷Laju io knop nau umbang yo ulek io: bukan main kdeo ulun upa bapa ku yo ruak ruwau okan singkap, tapi aku mndo kakan maten sla'u. ¹⁸ Aku kakan uat ai malan ngruku uma ku ai ngulek epo iyo: Bapa, aku sundok dosa epo sorga ai epo bapa, ¹⁹ aku belo sngkono oli nulek pea bapa; tnampa ka aku kati ulun yo nupa koe bapa. ²⁰Jadi io uat ai malan epo ngruku bapa io. des io aso oro, uma io sundok kito se io laju keo pngnanam lang kesong iyo koe kanam kosang. uma io ene monsit nyrapet iyo laju ngokop ai ngarok iyo. ²¹ Ulek pea ene epo iyo: Bapa, aku sundok dosa epo sorga ai epo bapa, aku belo sngkono oli nulek pea bapa. ²²Tapi uma io ngulek epo batak-batak iyo: resi oit epo dido jubah yo paling buen, snua ene epo io ai tnempel cincin po grigi io diang trumpak po botis io. ²³ Ai alek kam anak lmbu yo bokol ene, laju sinomble ai mendo taka kuman ai snang-snang. ²⁴ Koe pea ku endo sundok mate ai jadi bolum nua, io sundok mapos ai nruku nua. jadi mulai dero bsnang-snang. ²⁵Tapi pea yo tuo aso la umo ai des io uli, dmpet se lou, io kringo oyon suling ai slegu nuyo-nuyo. ²⁶ Laju io momba erai kongo batak ai ngunti epo io ise nte dero ene. ²⁷ Tuing batak ene: okong ko ulet ai uma ko sundok nymble anak lmbu yo bokol, koe okong ko sundok nua ai uma ko kuli pea yo diang slamat. ²⁸ Jadi mara beta pea yo tuo ene, ai io belo kakan sumba. laju uma io epo baling bunyal diang io. ²⁹ Tapi io nuing uma iyo ulek io: sundok btaun-taun aku ngawat bapa ai belo pini aku nglagar ptua bapa, tapi epo aku belo pini bapa mie erai kukui anak bembe nte snang-snang diang tman-tman ku. ³⁰ Tapi bayu ka ulet pea bapa yo sundok gsa pengkeo pngkinan bapa sama-sama diang lonte-lonte, ise moko bapa nymble anak lmbu bokol ene nte io. ³¹Ulek uma io epo iyo: pea ku, iko ene trus sama-sama diang aku, ai eka pngkeo ku ene pengkeo ko lou. ³² Taka pantas snang-snang ai ego koe okong ko sundok mate ai jadi bolum nua, io sundok mapos nruku nua."

Chapter 16

¹Ai Yesus ngulek epo murid-murid-Iyo: "Keo erai kongo ulun tataw yo keo erai kongo ulun pngona sen. Epo io tnundruh, se pngona sen ene ngesa pngkeo-iyu. ²Trus io momba pngona sen ene ai ngulek epo-iyu: Ise dingo ku nau otang ko? Iko arus tanggung jawab nau gawi ko ene, koe iko belo kate oli bgawi jadi pngona sen. ³Kno lang kesong pngona sen ene: Ise oki gawi oli? Tuanku nmbaling aku ngket gawi ku jadi pngona sen. Nyangkul aku belo klian, ngdoja aku mai. ⁴Aku tau ise yo anta oki gawi, apa ena aku tinombaling ngket gawi ku jadi pngona sen ene, keo ulun yo anta nentu aku mbo lou dero. ⁵Trus io momba tongku kongo ulun yo keo utang epo tuan-iyu ene. Ulek-iyu epo yo tla: Tenu utang ko epo tuan ku? ⁶Tuwing ulun ene: Jatus tpayan lnga. Laju io ngulek epo ulun ene: Nndo doko surat utang ko, tunge ai tanpa surat utang yo mak tempo ndo low: Limo pulu tpayan. ⁷Sundok ene io ngulek epo yo ke duo: Ai tenu utang ko? Tuwing ulun ene: Jatus oson gandong. Ulek io epo ulun ene: Ndo doko surat utang ko, tanpa aut surat utang yo mak: Walu pulu oson. ⁸Trus tuan ene nengkuen pngona sen yo belo jujur ene, koe ksrdik akal-iyu. Koe pea-pea dnia endo pawak serdik epo sama dero se pea-pea trang. ⁹Ai aku ngulek epo ikam: Btman ka buen-buen makai Mamon yo belo jujur, apa ena Mamon ene belo kuli ngawat oli, ikam tinorima mbo lang lou kden. ¹⁰Ise-ise ulun yo stia lang soal-soal yo idi, io stia low lang soal-soal yo olai. Ai ise-ise ulun yo sala lang soal-soal yo idi, io sala low lang soal-soal yo olai. ¹¹Jadi, ena ikam belo stia lang soal Mamon yo belo jujur, ise yo anta nape epo ikam kakas yo beta-beta-iyu? ¹²Ai ena ikam belo stia lang pngkeo ulun mak, ise si yo anta nyrah pngkeo kam se epo ikam? ¹³Erai kongo batak ulun belo kuli bgawi nte duo tuan. Koe ena ktine io anta kekei se yo erai kongo ai kosang se yo mak, ena belo io anta stia epo yo erai kongo ai belo nyanda yo mak. Ikam belo kuli msenang Allah ai msenang Mamon". ¹⁴Eka-eka ene dingo ulun-ulun Farisi, yo batak-batak sen ene, ai dero nguja Io. ¹⁵Trus Io ngulek epo dero: "Ikam nengkuen ikam se mbo onon ulun, tapi Allah tau kesong kam. Koe ise io pinokolai koe ulun, Allah kekei. ¹⁶Aturan Taurat ai kitab nabi-nabi pnakai sampe jaman Yohanes; ai ngket des ene Krajaan Allah tnuren ai tongku kongo ulun ungka ungke selengayo sumba-iyu. ¹⁷Ono langit ai tana mapos se erai titik aturan Taurat pinokore. ¹⁸Tongku kongo ulun yo stuwar ngket bawe-iyu, laju kawen diang bawe yo mak, io nglaku pokeng koreng; ai ise-ise ulun yo kawen diang bawe yo stuwar ngket song-iyu, io nglaku pokeng koreng. ¹⁹"Keo erai kongo ulun tataw yo trus makai jubah ungu ai diris buen, ai tongku olo io bsnang-snang lang bolum keo ba. ²⁰Ai keo erai kongo ulun pendoja nan karan se Lazarus, kompu tonga io ponu diang ktikang boto, lumbi isan jawong lou ulun tataw ene, ²¹ai kakan mkale slau-iyu diang ise yo toyak ngket meja ulun kaya ene. Mokin koko-koko ulet ai ngndelap ktikang boto-iyu ene. ²²Sundok ene mate doko pngendoja ene, laju noit koe mlekat- mlekat epo ado ban po Abraham. ²³Uluu tataw ene mate low, laju nlowong. Ai desung io ssa bnasa lang dnia ulun mate, io nyonda epo ombo, ai ngket oro io kito Abraham, ai Lazarus tunge ban po iyo. ²⁴Trus io nyoyar, ulek-iyu: Bapa Abraham, tngkosang ko aku. Suyu ko tah Lazarus apa io nyoso lai grigi io epo lang danum nte mmrongin dola ku, koe aku desung siet lang dolan api endo. ²⁵Tetapi Abraham ngulek: Pea, knop ko iko, se iko kiso kanam bolum buen kola bolum ko, tapi Lazarus eka kbenasa. Tempo ndo io kuli pnyempae ai iko bol ksesa. ²⁶Aso makse ene mbo ekang kain diang iko bbenteng kowang yo belo dapet kentas, apa dero yo kakan brangkat ngket mndo epo ikam ketine low dero yo kakan ulet ngket lane epo kain belo kuli kentas. ²⁷Ulek ulun ene: Ena ketine, aku tindu epo iko, bapa, apa iko nyuyu io epo lou uma-ku, ²⁸koe aso keo limo kongo eraibuntung-ku, apa io beta-beta mkingat dero, apa dero nang sumba low lang awa ssa endo. ²⁹Tapi ulek Abraham: Keo mbo dero pnyampe Musa ai nabi-nabi; buen doko dero se nempaning pnyampe ene. ³⁰Tuwing ulun ene: Belo, Bapa Abraham, tapi ena keo ulun yo sundok mate ulet epo dero, dero anta btobat. ³¹Ulex Abraham epo io: Ena dero belo kakan nmpaning- pnyampe Musa ai nabi-nabi, dero belo low anta kakan persaya, tontan ulun nyuli ngket ekang ulun mate."

Chapter 17

¹Yesus ngulek epo murid-murid-Iyo: "Belo anta belo keo pmmeketang, tapi sesa beta ulun yo nggawi ene." ²Nte ulun ktine alo bnolit batu gilingan epo biung io, laju io pinolotong epo lang tasik, ono se yo mngktang ulun yo belo keo kuat kalu endo. ³Iko se hati-hati! ena erai buntungko nampa dosa, knae io ai ena io noli, nampun io. ⁴Tontan ko io nampa dosa epo iko turu derang lang erai olo diang turu derang io ulet epo iko ai ngulek: Aku noli, iko arus ngampun io. ⁵Trus ulek rasul-rasul ene epo Tuhan: "Tambah ta iman kain!" ⁶Tuing Tuhan: "Ena beta ikam keo iman kekolai bigi jabung tinggen, ikam kuli ngulek epo tonga ara endo: Rukat iko ai bkulo lang tasik, ai io anta ngaya ngko." ⁷Ise lelu ikam yo keo erai kongo batak yo gatoh tana nte awa skulo ai ngnjaga pnyekamu nte io, anta ngulek epo batak ene, sundok io uli ngket umo: Man taka kuman! ⁸Belo be ube yo anta ngulek epo batak ene: Sdia ta okan singkapku. Bolit se towing ko diang gadoh ta nte oki sampe sundok kuman ngisop. Ai sundok ene kate ka iko kuman ngisop. ⁹Keo be io btrima kasi epo batak ene, koe batak ene sundok nggawi ise yo snuyu epo io? ¹⁰Ktine lou ikam. Ena ikam sundok nggwai ise yo snuyu epo ikam, mko io ikam ngulek: Kain endo batak-batak yo belo keo uman; kain nggawi tinggen ise yo arus nte kain gawi. ¹¹"Lang dalan-Iyo epo Yerusalem Yesus malan nyarak ekang Samaria ai Galilea ¹²Des Io sumba desa ulet spulu kongo ulun kodong nyuruku Io. Dero ngrokonjong oro bes ¹³ai momba diang ries: "Yesus, Guru, tngkosang ta kain!" ¹⁴Laju Io meti dero ai ngulek: "Daro, pkelak kompu tonga kam epo imam-imam." desung dero la boyan dero jadi ale. ¹⁵Erai kongo ngket dero, des kito se io sundok ale, mulik ulak ngmulia Allah diang oyon ries, ¹⁶trus nyongkop onon botis Yesus ai nglek sukur epo-Iyo, Ulun ene ulun Samaria. ¹⁷Laju Yesus ngulek: "Belo be spulu kongo ulun ene nde sundok ale? Mombe yo sie kongo ulun ene?" ¹⁸Belo keo be dero mulik nte ngmulia Allah makse ngket ulun nyumba endo? ¹⁹Laju Io ngulek epo ulun ene: " Akat ai malan iman ko sundok nylamat iko." ²⁰Koe unti ulun-ulun Farisi, des mbe krajaan Allah anta ulet, Yesus nuung, ulek-Iyo: "Krajaan Allah ulet belo keo tanda-tanda yo nitan lansung, ²¹ulun lou belo kuli ngulek: Eti, io keo la mndo ena belo yo keo lalane! Koe sbeta io Krajaan Allah keo mbo ekang ikam." ²²Ai Io ngulek epo murid-murid-Iyo: "Anta sampe des ikam kakan kito erai olo ngket olo-olo Pea Ulun ene ai ikam belo anta kito io. ²³Ai ulun anta ngulek epo ikam: Eti, io keo lalane; eti, io keo lamendo! Nang ikam malan pomne, nang ikam lumpat. ²⁴Koe sama kati ilap ngrempea ngket tompak langit yo erai epo tompak langit yo mak, ktine lou dko nau umbang Pea Ulun des olo pngulet Iyo. ²⁵Tapi Io arus deo kiso kanam pengkono pengkna ile ai belo tinorima koe kokan endo. ²⁶Ai sama tkono kati des zman Nuh, ktine lou nau umbang io anta des olo-olo Pea Ulun: ²⁷dero kuman ai ngisop, dero kawen ai knawen, sampe des olo Nuh sumba lang praw olai, laju ulet owa nyelop dnia ai mmekabis dero eka-eka. ²⁸Ktine lou tkono kati des zman Lot: dero kuman ai ngisop, dero moli ai ngnjual, dero sekulo ai nengkuat lou blai. ²⁹Tapi des olo Lot malan baling ngket Sodom diwa dko uran api ai uran blerang ngket langit mmekabis eka-eka dero. ³⁰Ktine lou nau umbang yo anta des olo, des Pea Ulun mkelak kompu-Iyo. ³¹Ise-ise ulun des olo ene mbo awa bsrongin mbo loteng ai barang-barang yo keo lang lou, nang io diwa nte ngalek ene ai ktine lou ulun aso ela umo nang io uli. ³²Kenop-kenop se bawe Lot! ³³Ise-ise ulun yo bkomer nylamat kesong io, io anta mapos kesong io, ai ise-ise ulun yo mapos kesong io, io anta nyelamat kesong io. ³⁴Aku ngulek epo ikam: Des malom ene keo duo kongo ulun la ban erai awa pnurui, yo erai kongo anta noit ai yo mak anta tnape. ³⁵Keo duo kongo ulun bawe sama-sama nggiling, yo erai kongo anta noit ai yo mak anta tnape." Ena ³⁶keo duo ulun mbo umo, yo erai anta noit ai yo mak anta tnape. ³⁷Ulek dero epo Yesus: "Lamone, Tuhan?" Ulek-Iyo epo dero: "Lamone keo antu, la mne ngrepudu koniw ³⁷Ulek dero epo Yesus: "Lamone, Tuhan?" Ulek-Iyo epo dero: "Lamone keo antu, la mne ngrepudu koniw

Chapter 18

¹Yesus ngulek sontoh epo dero apa paham, se dero ene arus sbayang trus-trusan belo di diang pngenanam ayu.

²Ulek-Iyo: "Lang erai kota keo akim yo belo takut se Allah ai belo di tau ormat diang ulun.³Mbo kota ene keo erai kongo balu yo tuju nyruku akim ene ai ngulek ktindo: Bnela hakku ngket musuhku.⁴Tenu derang akim ene nolak. Tapi epo ola io bunyal lang kesong iyo se: Tontan aku belo takut se Allah ai belo di ormat se ulun,⁵koe balu endo krepot aku, koe ka aku nyengkono nte iyo,apa nang jono nyeruku aku ai pnyundok yo nyrang aku."Ulek Tuhan: "Knanam ka ise ulek akim ene! Belo be Allah nyengkono ulun-ulun yo sundok pili Iyo yo molo malom ngarap epo Iyo? Keo be Io ngulur-ngulur waktu onon ngawat dero? Aku ngulek diang ikam: Belo di ola Io nyengkono dero. Tapi, ena Anak ulun ene ulet, keo be Io ruku iman ela dnia?"⁹Nte tenu kongo ulun yo ngontus se io ene bolum lonus ai nganggap ulun yo mak ene iwa se iyo, Yesus ngulek sontoh ktindo: ¹⁰"Keo duo kongo ulun epo Bait Allah nte sbayang; erai kongo yo ulun Farisi ai yo mak ene tukang nentu bea."¹¹Ulun Farisi ene akat ai sbayang lang kesong, otang yo ktindo: O Allah, aku ngulek deo trima kasih epo-Iko, koe aku belo di kerai kati ulun yo mak, makse prampok, makse bngis, makse ulun yo paru bawe ai belo di kati nau ulun tukang tentu bea ene;¹² aku puasa duo derang erai minggu, aku mie sperspuluh ket eka-eka pengkuliku.¹³Tapi tukang nntu bea ene akat ela oro, io ndok belo ronu donga ngadap langit, io malah mupuk kompu tonga iyo se ai ngulek: O Allah, tngkosang aku yo roa dosa endo.¹⁴ Aku ngulek diang ikam: ulun endo uli epo lou iyo sbgai ulun yo sundok sngkono mbo Allah, ena ulun yo mak ene belo. Koe ise yo mngkombo diri, io pasti nrendah ai ise ngrendah, io pasti pinokombo¹⁵Ulet ulun-ulun moit bang pea dero yo aso alus nyruku Yesus, apa Io mulem dero. Kito ene mara murid-murid-Iyo epo ulun-ulun ene. ¹⁶Tapi Yesus momba dero ai ngulek: "Koe ka bang pea ene nyruku Aku, nang ikam ngusan dero, koe ulun-ulun kati ktine yo mpun Krajaan Allah. ¹⁷Aku ngulek diang ikam: Sbenar yo ise yo belo nyambut Krajaan Allah kati pea alus, io belo anta sumba.¹⁸Keo erai kongo pngutok ngunti epo Yesus,ulek iyo: "Guru yo buen, ise nte oki gawi nampa kuli bolum kkal?"¹⁹ Tuing Yesus: "Ise moko iko ngulek Aku buen? Ndok belo erai ulun keo yo buen makse Allah se. ²⁰Iko pasti tau soal printah Allah: Nang bjinah, nang ngempate, nang ngako, nang nampa eta, ormat diang ine uma ko." ²¹Ulek ulun ene: "eka ene aut sundok laku ku mulai ket aku aso burok bujang."²²Kringo ene Yesus ngulek diang iyo: "Aso erai yo pian nlaku ke ko: jual eka pngkeo ko bayu asil yo bnagi epo ulun-ulun miskin, diang ktine bayu iko kuli arta ela sorga, sundok ene ulet epo mndo peles lumpat diang Aku."²³ Des ulun ene kringo pnyurah ene, iyo jadi nyoru, koe iyo ene ulun tataw.²⁴Bayu Yesus meti iyo ai ngulek: "Poyo memang ulun roa sen sumba lang Krajaan Allah. ²⁵Koe paling gampang onta sumba luang pilos se ulun tataw sumba Krajaan Allah."²⁶Dero yo kringo ene, ngulek: "Ena ktine, ise yo kuli sinolamat?" ²⁷Ulek Yesus: "Ise yo belo dapet ke ulun dapet koe Allah."²⁸Petrus ngulek: "Kain endo sundok ngendikah eka pengkeo kain ai lumpat Iko." ²⁹Ulek Yesus epo dero: "Aku ngulek diang ikam, sebeta yo tongku ulun koe Krajaan Allah ngendikah lou blai iyo, bawe pan erai buntung iyo, ulun tuo diang pea iyo,³⁰ kuli ganti blipat ganda des tempo ndo low, ai anta yo kuli bolum yo kkal."³¹Yesus momba duo blas murid Iyo, bayu ngulek diang dero: "Tempo ndo taka malan epo Yerusalem ai yo sundok tnulis koe para nabi soal Anak Ulun ene pasti knelop. ³²Koe Io kakan snerah epo bangsa-bangsa yo belo knal se Allah, nte reko, nina ai tnepus,³³ai dero ngesa diang ngempate Iyo, ai olo ktolu Io nyuli."Tapi dero sama skali belo paham soal ene; pnyurah ene lontop beta arti yo nte dero, ai dero belo tau ise yo kinomaksud.³⁵Des Yesus duni ulet ela Yerikho, keo ulun posa tunge ela isan boyan ai ngmis.³⁶ Des ulun ene kringo ulun deo lalo, io ngunti: "Ise ene?" ³⁷Ulek ulun diang iyo: "Yesus ulun Nazaret lalo."³⁸Bayu io nyoyar: "Yesus, Pea Daud, tengkosang aku!"³⁹ Dero yo malan ela ono, negur iyo apa suni. Tapi tambah ries io nyoyar: "Pea Daud, tengkosang aku!"⁴⁰Yesus singgah peles nyuyu moit ulun ene ngadap Iyo.Des io dmpet diang Yesus. Yesus ngunti diang iyo:⁴¹ "Ise ptua ko Oki gawi nte ngko?" Tuing ulun ene: "Tuhan, apa aku kate kito!"⁴²Bayu ulek Yesus diang iyo: "Kito iko, iman ko sundok nylamat iko!" ⁴³Peles des ene lou io kito, trus lumpat Io diang memuliakan Allah. Eka raayat kito ai muji-muji Allah

Chapter 19

¹Yesus sumba epo kota Yeriko ai malan trus nglalo kota ene. ²Mbo mne keo erai kongo ulun nan karan se Zakheus, pengutok penage bea, ai io ulun yo tataw. ³Io bekomer nte meti ulun ise si Yesus ene, tapi io belo kuli koe ulun deo, koe kompu io baka. ⁴Koe ene monsit io nyelempono ulun deo, laju mengket tonga ara nte meti Yesus, yo anta lalo mbo mne. ⁵Des Yesus sampe epo awa ene, Io meti epo ombo ai ngulek: "Zakheus, resi aut diwa, koe olo ndo Aku arus nsan mbo blai ko," ⁶Trus Zakheus peles diwa ai nrima Yesus diang ego. ⁷Tapi eka ulun yo kito se ene ngamamai, ulek dero: "Io nsan mbo blai ulun dosa." ⁸Tapi Zakheus akat ai ngulek epo Tuhan: "Tuhan, tenga ngket pengkeo ku anta diye ku epo ulun kao ai ena keo ulun mak yo pengkeoiyo terjo ku anta tempuli ku opat lipat." ⁹Ulek Yesus epo iyo: "Olo ndo sundok terjadi selamat epo lowu endo, koe ulun endo pea Abraham lou. ¹⁰Koe Pea Ulun ulet nte meto ai nyelamat yo mapos. ¹¹Nte dero yo nempaning Iyo mbo mne, Yesus nyambung pemesara- Iyo diang pemerawet, koe Io sundok dmpet Yerusalem ai dero ngomoy, se Kerajaan Allah anta duni melak. ¹²Koe ene Io ngulek: "Keo ulun bangsawan bju epo negri yo oro nte nengkat jadi raja mbo mne ai sundok ene bayu uli. ¹³Io momba sepulu kongo batak iyo ai miye sepulu mina epo dero, ulek iyo: Pakai ka endo nte bdagang sampe aku ulet nua. ¹⁴Tapi ulun-ulun kerai bangsa diang iyo kekei se io, trus ngirim wakel nyendikui io nte ngulek: Kain belo kakan ulun endo jadi raja nte kain. ¹⁵Trus terjadi doko, des io uli, sundok io nengkat nte jadi raja, io semuyu momba batak-batak iyo, yo sundok diye iyo sen ene, apa tau tenu asil dagang tongku dero. ¹⁶Ulun yo tla ulet ai ngulek: Tuan, mina tuan yo erai ene sundok ngasil sepulu mina. ¹⁷Ulek iyo epo ulun ene: Buen beta gawi gata ko ene, o'batak yo buen; iko sundok stia lang soal idi, koe ene trima ko kuasa mbo nte sepulu kota. ¹⁸Ulet yo kedua ai ngulek: Tuan, mina tuan sundok ngasil limo mina. ¹⁹Ulek iyo epo ulun ene: Ai iko, trima ko kuasa nte limo kota. ²⁰Trus batak yo ketolu ulet ai ngulek: Tuan, endo doko mina tuan, aku sundok ngonaiyo lang sapu tangan. ²¹Koe aku takut se tuan, koe tuan ene ulun yo pernges; tuan ngalek ise yo belo pini tuan mayak ai tuan ngutik ise yo belo tuan ngulo. ²²Ulek iyo epo ulun ene: O' batak yo triaw, aku anta mutus iko ngaya nau pemesara ko se. Iko sundok tau se aku ulun yo pernges, yo ngalek ise yo belo pini aku mayak ai ngutik ise yo belo di aku ngulo. ²³Ena ktine, ise moko sen ku ene belo iko miye epo ulun tukang mutar sen? Apa des aku uli aku kuli ngalek iyo diang bungo iyo lou. ²⁴Laju ulek iyo epo ulun-ulun yo akat mbo mne: Alek ka mina yo erai ene ngket iyo trus diye ka epo ulun yo keo sepulu mina ene. ²⁵Ulek dero epo iyo: Tuan, io sundok keo sepulu mina. ²⁶Tuing iyo: Aku ngulek epo ikam: Tongku ulun yo keo, epo yo anta dniye, tapi ise yo belo keo, ngket iyo anta nalek, nua ise-ise lou yo keo mbo iyo. ²⁷Tapi anta eka musuh ku endo, yo belo gawal aku jadi raja dero, oit ka dero epo ndo trus pate ka dero mbo onon wae ku. ²⁸Ai sundok ngulek eka yo ene Yesus nyelempono se dero ai nrus dalam-Iyo epo Yerusalem. ²⁹Des Io sundok dmpet Betfage ai Betania, yo pas mbo tunden yo nan karan se Bukit Zaitun, Yesus smuyu duo kongo murid-Iyo, ³⁰diang psan: "Malan aut epo kampong yo ela onon ikam ene: Des ikam sumba mbo mne, ikam anta ruku erai kukui keledai burok preket unot, yo belo pini tendung ulun, noke keledai ene ai oit epo ndo. ³¹Trus ena keo ulun ngunti epo ikam : Ise moko ikam ngoke iyo? Tuing ka ketindo: Tuhan merlu iyo." ³²Laju brangkat dero yo snuyu ene, ai dero ruku eka-eka kati yo sundok ulek Yesus. ³³Desung dero ngoke keledai ene, bsara doko ulun yo mpun keledai ene : " Ise moko ikam ngoke kledai ene?" ³⁴Ulek dero: "Tuhan merlu iyo." ³⁵Dero moit keledai ene epo Yesus, laju nglapis iyo diang pakaian dero ai ngawat Yesus dombo epo ombon iyo. ³⁶Ai desung Yesus ban keledai ene dero nguwar pakaian dero mbo boyan. ³⁷Des Io dmpet Yerusalem, ela awa boyan truntun ngket Bukit Zaitun, mulai doko eka murid yo nyarak Iyo ego ai memuji Allah diang oyon riyes koe eka mujisat yo sundok itan dero. ³⁸Ulek dero: "Diberkatika Iyo yo ulet jadi Raja lang karan Tuhan, damai sjahtera mbo sorga ai kmuliaan mbo awa yo paling ombo!" ³⁹Tenu-tenu kongo ulun Farisi yo lumpat diang ulun deo ene ngulek epo Yesus: "Guru, kae murid-murid Ko ene." ⁴⁰Tuing- Iyo: "Aku ngulek epo ikam: Ena dero ene suni, batu endo anta nyoyar." ⁴¹Trus des Yesus sundok dmpet ai kito kota ene Io nangis nte kota ene, ⁴²ulek Iyo: "Adoh, bukan main kekuen iyo ena olo ndo low ikam tau ise yo perlu nte damai sjahtera kam! Tapi tempo ndo nau ene melim mbo mato kam. ⁴³Koe anta ulet olo iyo, se musuh kam anta nglekum ikam diang pmombong, laju ngepong ikam ai nken ikam ngket eka tadah, ⁴⁴ai dero anta ngempate ikam sama-sama diang penduduk kam ai ela pmombong kam dero belo anta noro ndok erai batu aso toro ban batu yo mak, koe ikam belo tau jman, des mbe Allah ngasi ngado ikam. ⁴⁵Trus Yesus sumba epo Bait Allah trus mulai Io ngusa eka ulun yo bjual mbo mne, ⁴⁶ulek-Iyo epo dero: "Keo tnulis: Blai-Ku ene blai doa. Tapi ikam nampa iyo salai triaw akal." ⁴⁷Tongku olo Io nutui matuk mbo lang Bait Allah. Imam-imam pengutok ai ahli-ahli Taurat diang ulun-ulun penting ngket bangsa Israel bkomer nte ngempate Iyo, ⁴⁸tapi dero belo tau, ketimbe arus nggawi yo, koe eka rayat gawal se- Iyo ai kakan nempaning Iyo.

Chapter 20

¹Des olon Yesus tutui matukulun deo mbo bait Allah ai ngampe injil, ulet ka doko imam-imam pengutok ai ahli-ahli torat ai pengentuo-tuo epo mne,² ai dero ngulek epo Yesus: "Ulek ta epo kain makai kuasa ise iko nglaku gawi ktine, ai ise yo mie kuasa ene epo Iko!"³ Tuing Yesus epo dero: "Aku lou kakan ngunti epo ikam, ulek kamta po Aku: ⁴Baptisan Yohanes ene, ket sorga be atau ngketulun?"⁵ Dero nenganam ene mbo sama dero, ai ngulek: "Ena taka ngulek: Engket sorga, Io anta ngulek: ise moko ikam belo persaya epo iyo?"⁶ tapi ena taka ngulek: ngketulun, eka-eka rayat anta nurak taka diang batu, koe dero persaya, se Yohanes ene nabi."⁷ Trus dero nuing, se dero belo tau ket mone baptisan ene. Ke ene⁸ jadi ulek Yesus epo dero: "Ena ketine, Aku lou belo ngulek epo ikam diang kuasa ise aku uku nglaku gawi ene."⁹ Trus Yesus ngulek memprawet endo epoulun deo: "keo erai kongoulun muka kebon anggur; trus kebon yo ene snewa epo tukang-tukang kebon trus iyo bju epo ja iyo mak nte ju iyo ola bes. ¹⁰Des sampe musim iyo. io nyuyu erai kongo batak io epo ngrukuulun tukang-tukang kebon ene, apa dero magi tenga asil kebon anggur ene epo iyo. Tapi tukang-tukang kebon ene ngatang batak ene ai nyuyu iyo uli diang kayang osau."¹¹ Sundok ene yo nyuyu batak yo mak, tapi batak ene kono katang lou ai kinomai ke dero, laju snuyu uli diang kayang osau. ¹²Sundok ene yo nyuyu batak iyo ke tolu, tapiulun ene kono pinojail dero, laju tnurak epo baling se kebon ene."¹³ Jadi ulek mpu kebon anggur ene: Ise oki gnawi oli? Aku anta nyemuyu peaku yo snyang; pasti iyo gnaer ke dero."¹⁴ Tapi des tukang-tukang kebon ene kito pea-io ene, dero brondeng, ulek dero: Io ene pewaris, alo taka ngempate iyo, apa warisan ene jadi mpun taka."¹⁵ Laju dero nurak iyo epo baling se kebon anggur ene ai ngempate iyo. jadi ise yo anta gawi mpu kebon anggur ene epo dero?"¹⁶ io anta ulet ai ngempate tukang-tukang kebon ene. ai mie kebon anggur ene epoulun-ulun yo mak." Keringo ene dero ngulek: "Nang-nang beta!"¹⁷ Tapi Yesus meti dero ai ngulek: "Ena ketine ise arti tulisan endo: Batu yo noding koe tukang-tukang bangunan ene sundok jadi batu pmeturon?"¹⁸ Ise-iseulun iyo latu mitek batu ene, iyo anta tunnyas, ai ise-ise yo kono skinan batu ene, iyo anta rmek."¹⁹ Laju ahli-ahli torat diang imam-imam pengutok ngomer nangop Iyo des ene lou, koe dero tau, se dero ene yo antus Iyo diang pemerawet ene, tapi dero takut seulun deo. ²⁰ahli-ahli taorat ai imam-imam pengutok nyempeti-nyempeti Yesus. Dero nyemuyu epo Iyo pmungun-pmungun kati nau ungka-ungkaulun buen, apa dero kuli ngnjebak-Iyo diang pengunti ai nyerah Iyo epo yo keo kuasa mbo dnia mne."²¹ Ulun-ulun ene ngunti epo Iyo: "Guru, kain tau, se eka-eka tutui batuk Ko beta, ai Iko belo di meto pinokolai, tapi diang beta-beta tutui matuk boyan Allah. ²²Kate be bebo be kain mayar pajak epo kaisar?"²³ Tapi Yesus belo diuro keno dero yo triau ene, trus ngulek epo dero: ²⁴"Pekelak kam tah epo aku dinar; gambar ai tulisan ise keo la mne?" Tuing dero: "Gambar diang tulisan kaisar."²⁵ Trus Yesus ngulek epo dero: "Ena ketine ko epo kaisar ise iyo arus die kam epo kaisar ai epo Allah ise yo arus die kam epo Allah!"²⁶ Ai dero belo kuli ngenjebak-Iyo lang pemensara iyo la ononulun deo. Dero bengong nau tuing Iyo ene, ai dero nyruni."²⁷ Des ene ulet epo Yesus, tenu-tenu kongoulun Saduki, yo belo di nyembeta se keo pngenyuli. Dero ngunti epo Iyo: ²⁸"Guru, Musa nulis prenta endo nte taka: Ena erai kongo, yo keo erai buntung song, mate ulak bawe yo aso keo, tapi iyo belo di keo nape pea, erai buntung iyo harus kawen diang bawe iyo nte mekeo upus nte erai buntung iyo ene."²⁹ Keo turu kongo dero erai buntung. Yo tuo tingen kawen diangulun bawe trus mate diang belo nape pea. ³⁰trus bawe ene knawen epo yo keduo, ³¹ai yo ketolu ai ketine lou eka-eka sampe ereai buntung yo keturu ene, dero eka-eka mate diang belo di nape pea. ³²Pyundok iyo bawe ene mate lou. ³³Ketimbe nau yo oli diang bawe ene, ise lelu dero yo jadi song iyo des olo pngenyuli? Koe eka dero turu ene sundok nembawe se io."³⁴ tuing Yesus epo dero: "Ulun-ulun denia endo kawen ai knawen, ³⁵tapi dero yo nontus sengkono nte kuli bagian lang denia yo mak ene ai lang pngenyuli engket ekanulun mate, belo kawen ai belo di knawen. ³⁶Ke dero belo di tau mate oli, dero sama kati malaikat-malaikat ai dero ene pea-pea Allah, ke dero sundok pinosuli."³⁷ Nau umbang pngenyuliulun-ulun mate, Musa sundok memetau ene lang tulisan lang jaba dikut kdui, mbo mone Tuhan nulek Allah Abraham, Allah Ishak, ai Allah yakub. ³⁸Iyo makse Allahulun mate, tapi Iyo Allahulun bolum, koe la onon Iyo eka-ekaulun bolum."³⁹ Kringo ene tenu-tenu kongoulun ahli torat ngulek: "Guru, tuing ko ene montuk beta."⁴⁰ Koe dero belo dironu nua rekunti ise-ise epo Yesus."⁴¹ Tapi Yesus ngulek epo dero: "Ketimbeulun moko ngulek, se Mesias ene pea Daud?"⁴² Koe Daud se ngulek lang kitab Mazmur: Tuhan sundok nyampe firman epo tuanku; tunge ta la tadah sanan-Ku, ⁴³sampe Aku nampa musuh-musuh-Ko jadi awa itek botis-Ko."⁴⁴ Jadi Daud momba Iyo se Tuan iyo, ketimbe moko Iyo, io pea iyo lou?"⁴⁵ Des ekaulun deo nempaning, Yesus ngulek epo murid-murid-Iyo ⁴⁶"ati-ati epo ahli-ahli torat yo gawal malan-malan makai baju anjang ai gawal pinokolai ela pasar, yo gawal tunge paling ono mbo lou sembayang ai mbo awa kinonuon la ungan,"⁴⁷ yo nolon lou balu-baluiyo ngakal matoulun diang doa yo anjang-anjang. Dero ene pasti anta nerima hukuman yo paling boyat."

Chapter 21

¹Des Yesus uat wae-Iyo, Io meti ulun-ulun tatau ningkos sen dero epo lang awa persembahan.²Ai Io meti low erai kongo balu kao ningkos duo peser epo lang awa persembahan ene. ³Laju Io ngulek: "Beta-beta yo Aku ngulek epo ikam, se balu kao endo mie pawak roa se eka-eka ulun mne. ⁴Koe eka-eka dero mie sen dero ngket pngkeo mroa ogot dero, tapi ulun balu endo mie ngket bolum belo ba, ndok ube sampe io mie eka-eka pngkeo-iyoy."⁵Des tenu-tenu kongo ulun bsara nau Bait Allah ai gawal beta se lou ene yo tnako diang batu yo buen-buen ai diang deo jnis kakas persembahan, Yesus doko ngulek: ⁶"Ise yo itan kam mne - anta sampe olo-iyoy des nte ndok belo erai batu yo nokon bepayak ombon batu yo mak, tapi eka-eka ene anta pinororos."⁷Jadi murid-murid ngunti epo Yesus, ulek dero: "Guru, kola ene anta terjadi? Ai ise nau tanda iyo ena ene anta terjadi?" ⁸Tuing-Iyoy: "Jaga beta-beta memang, apa ikam nang bkoit epo yo sala. Koe deo anta ulun ulet diang makai karan-Ku ai ngulek: Aku doko Io, ai: Des-iyoy duni aut. Nang beta ikam lumpat dero. ⁹Jadi ena ikam kringo nau prang ai paronglawan, nang ka ikam tkojet. Koe eka-eka ene arus terjadi ile, tapi ene belo di pian pnyundok-iyoy se duni aut."¹⁰Io ngulek epo dero: "Bangsa anta uat nglawan bangsa ai krajaan nglawan krajaan, ¹¹ai anta keo klakui ries ai mbo mone-mone awa anta keo roton pripit ai suyung, ai anta keo low nau umbang yo nkojet-nkojet diang tanda-tanda yo ebat ngket langit."¹²Tapi onon eka-eka ene ikam anta tngangop ai knurow; ikam anta snerah epo lou-lou awa sembayang ai sper-sper, ai anta ikam noit ngadap raja-raja ai pmerenta-pmerenta koe karan-Ku."¹³Koe ktine ene doko anta jadi des yo buen nte ngkam bsaksi."¹⁴Koe ene tngang ka lang kesong kam, apa nang ikam ngnanam ono nte ngkam tuing."¹⁵Koe Aku se anta mie epo ikam pmensara diang pentau, apa ikam belo di dapet lawan ai psala ulun yo ngebali ikam."¹⁶Ai ikam anta snerah low koe ulun tuo kam, eraibuntung-eraibuntung kam, ampi ompang kam ai tman-tman kam ai tenu-tenu kongo ikam ene anta pnate, ¹⁷ai anta eka-eka ulun kekoi se ikam koe karan-Ku."¹⁸Tapi ndok belo erai buti balo utok kam anta mapos. ¹⁹Ena ikam nokon tahan, ikam anta kuli bolum kam."²⁰Ena ikam kito se Yerusalem knepong koe tentara-tentara, apa ikam tau, se pngeroros-iyoy duni aut. ²¹Mbo des ene ulun-ulun yo keo mbo Yudea arus buyo epo tunden, ai ulun-ulun yo keo mbo lang kota arus baling, ulun-ulun yo ela baling se kota nang sumba nua epo lang kota, ²²koe ene doko des nte males mbo mone anta pas-pas kati eka-eka yo keo tnulis."²³Sesa beta doko bawe-bawe yo desung klandung ktine low yo desung nete taru montuk des ene! Koe anta ulet kbenasa bolum yo tlanjur kono mupus ja ai kmara roa mitek bangsa endo, ²⁴ai dero anta maten kono taris ai tngangop noit epo pupus bangsa, ai Yerusalem anta knanja koe bangsa-bangsa yo mba di tau se Allah, sampe cukup doko jman nte bangsa-bangsa ene."²⁵"Ai anta keo tanda-tanda mbo mato olo ai bulan ai bintang-bintang, ai mbo dnia bangsa-bangsa anta takut ai bengong ngadap kserow ai ombak olay mbo tasik. ²⁶Ulun anta mate koe kanam takut koe eka-eka ise yo nyengkinan dnia endo, koe kturon kuasa langit anta jadi skukui."²⁷Montuk des ene ulun jadi kito se Pea Ulun ulet lang jaun diang eka-eka kuasa ai kmulia-Iyoy."²⁸Ena eka-eka ene mulai terjadi, uat aut ai tadah ka epo ombo wae-kam, koe ikam duni sinolamat aut. ²⁹Laju Yesus ngulek pmerawet endo epo dero: "Eti kam tonga ara ktine low tonga ise ka. ³⁰Ena itan kam tonga-tonga ene sundok naruk burok, ikam se jadi tau, se des langot duni aut. ³¹Ktine low, ena ikam kito nau umbang ene terjadi, arus tau, se Krajaan Allah sundok dempet."³²Aku ngulek epo ikam: Beta-beta yo pokan endo belo anta lalo, onon eka-eka ene terjadi. ³³Langit ai dnia anta lalo, tapi pmensara-Ku belo anta di lalo."³⁴"Jaga diri nyawa kam se, apa kesong kam nang btengkoyat diang pesta kuman nyingkap mroa ogot ai mauk-mauk ai yo penting nte dnia endo tingen ai apa olo Tuhan nang ulet kolan-kolan epo ikam kati kono tongkop."³⁵Koe ene anta nakin eka-eka ulun yo nongos mbo dnia endo."³⁶Bjaga beta-beta trus ulak bdoa, apa ikam galak nte nglalo eka-eka yo anta terjadi ene, ai apa ikam tahan akat onon Pea Ulun."³⁷Mbo molo Yesus nutui matuk mbo Bait Allah ai mbo malom Io baling ai nsan mbo tunden yo nan karan se Bukit Zaitun. ³⁸Des ma-ma eka-eka ulun deo ngompoh-Iyoy mbo lang Bait Allah nte nempaning Io.

Chapter 22

¹Olo raya roti belo makai ragi yo nulek Paskah, sundok dmpet. ²Pngutok-pngutok imam diang ahli-ahli Torat meto boyan, ktimbe akal dero apa kuli ngempate Yesus, koe dero takut se ulun deo. ³Iblis sumba epo lang kompu Yudas, yo karan se Iskariot, erai kongo ngket lang duo blas kongo murit ene. ⁴Yudas ulet epo pngutok-pngutok imam diang pngutok pnjaga bait Allah ai brondeng diang dero, ktimbe io kate kuli nyerah Yesus ene epo dero. ⁵Dero ego beta laju bsngkono nte mie tenu-tenu kroa sen epo io. ⁶Ene sngkono mbo io, mulai ngket ene io meto jman yo buen nte nyrah Yesus epo dero, apa belo tnoan mbo ulun deo. ⁷Sampe des olo raya Roti Belo Bragi, yo ene olo ulun arus nymble domba Paskah. ⁸Yesus nyuyu Petrus diang Yohanes, ulek-Io "Daro ikam, gadoh kam prjamuan Paska nte taka apa taka kuman." ⁹Ulek dero epo-Io: "mombe ptua Ko awa kain gadoh yo?" ¹⁰Tuing-Io: "Ena ikam sumba epo lang kota, ikam nindo ruku diang ulun yo moson tpayan batok danum. sarak kam io epo lang lou yo pnyumba io, ¹¹ai ulek kam epo yo mpun lou ene: Guru ngunti epo iko: mombe rndong nte awa-Ku diang murid-murid-Ku nindo kuman Paskah?" ¹²nindo ulun ene nutuy epo ikam se keo awa ela loteng yo olai ai sundok lngkap, mne ikam arus gadoh yo." ¹³Ngket ne dero brangkat, dero ruku eka yo kati ulek Yesus epo dero ene. bayu dero gadoh nte Paskah. ¹⁴Desampe jman yo, Yesus tunge kuman breok diang rasul-rasul-Io. ¹⁵Ulek-Io epo dero: "Aku ngno beta kuman Paskah endo kerai diang ikam, onon se Aku mndrita. ¹⁶Koe ene Aku ngulek epo ikam: Aku belo anta kuman iyo oli sampe yo kuli pnyundok iyo lang Krajaan Allah. ¹⁷ngket ene Io ngalek ktowong anggur ngulek sukur, laju ngulek: "Alek endo laju bagi epo eka-eka ikam. ¹⁸Koe ene aku mere epo ikam: mulai ngket tempo ndo Aku belo anta ngisop oli asil tonga anggur sampe Krajaan Allah sundok ulet." ¹⁹Sundok ene Io ngalek roti, Ngulek sukur, ngrinsi-ngrinsi yo bayu mie epo dero, ukek-Io: "Endo doko kompu-Ku yo snrah nte ngkam; gawi kam kati endo nte mknop se Aku." ²⁰Ktine low nau gawi-Io se ktowong anggur mbo sundok kuman, Io ngulek "ktowong anggur endo doko pmkat bayu koe daya-Ku, yo smalir nte ngkam. ²¹Tapi, eti kam, tangan ulun yo nyrah Aku, keo kerai diang Aku mbo meja endo. ²²Koe Pea Ulun memang nte mate kati yo sundok rnsana Allah, tapi ssa beta yo ulun ene, yo koe yo Aku snrah!" ²³Ngket ne oli dero mulai bsoal, ise lelu dero yo anta keo gawi ktine. ²⁴Dero sampe ruok rame sama dero murid-murid Yesus, ise lelu yo paling noun ngket dero. ²⁵Yesus ngulek epo dero: "Raja-raja bangsa-bangsa mimpin rayat dero ai ulun-ulun yo bkuasa epo dero nulek pelindung-pelindung. ²⁶Tapi ikam belo di ktine, malah ka ube ise ikam yo paling kinonuon moko yo nte jadi yo paling burok ai pngutok nte playan. ²⁷Koe ise yo paling nuon: yo tunge kuman be, yo nglayan be? Mak be ube yo tunge kuman? Tapi Aku keo mbo ekang ikam nte jadi playan. ²⁸Ikam ene yo nokon nongos sama-sama diang Aku lang bjniis pngkono yo kono mitek Aku. ²⁹Diang Aku nte nentu hak-hak Krajaan nte ngkam, sama kati Bapa-Ku nentu yo nte Oki. ³⁰Se ikam ene anta kuman ai ngisop kerai meja diang Aku lang Krajaan-Ku diang ikam anta nte tunge la ombon tahta nte ngakim duo blas suku Israel. ³¹Simon, Simon, eti ko! Iblis sundok tindu nte niau iko kati gandong, ³²tapi Aku sundok bdoa nte ngko, apa imanko nang rorop. diang iko, ena iko sundok tobat, pturon ko nau erai buntung-erai buntung ko." ³³Tuing Petrus: "Tuhan, aku ronu nte lang pnjara ai mate sama-sama diang Iko!" ³⁴Tapi Yesus Ngulek: "Aku ngulek epo iko, Petrus, olo ndo piak belo anta kluat, ena iko belo pian sampe tolu derang belo ngaku se iko kenal se Aku." ³⁵Ngket ne Io ngulek epo dero: "Des Aku ngirim ikam ulak belo moit panan epok, nguyu ai trumpak, keo be ikam kiso kanam kurang kambit?" ³⁶Tuing dero: " belo nempia." Ulek-Io epo dero: "Tapi tempo endo, ise yo keo epok, moko yo noit oli, ktine lou yo keo nguyu, ai ise yo belo nan ise-ise, diris laung yo jnual nte moli mndau." ³⁷Koe Aku ngulek epo ikam, se tulisan lang Kitab Susi endo arus pinognap mbo Aku: Io ene nindo taro itung mbo ekang ulun paro nglawan. Koe ise yo sundok tnulis soal Aku ene desung pinognap." ³⁸Ulek dero: "Tuhan, ndo duo mndau." Tuing-Io: "puli ka ene aut." ³⁹Ngket ne Yesus bju epo baling se kota kati jati Io epo tadah Tunden Zaitun. Murit-murit-Io nyendikui Io low ⁴⁰Desampe mbo mne Io ngulek epo dero: "Bdoa ikam apa ikam belo toyak epo lang pngkono pngkna." ⁴¹Ngket ene Io bseing se dero bangsa koro batu tnurak koro yo, bayu Io blutut ai bdoa, Ulek-Io: ⁴²"Ya Bapa-Ku, Ena Iko kakan, alek ka ktowong endo ngket Aku; tapi makse ptua-Ku, tapi Ptua-Ko se yo jadi." ⁴³jadi erai kongo mlekat ngket langit mmkelak kompu epo-Io nte ngawat mronu pngnanam- Io. ⁴⁴Io kiso kanam takut beta ai tambah bdoa beta-beta. Panas-Io jadi kati daya ngrjonjon epo tana. ⁴⁵Ngket ene Io akat ngket bdoa laju mulik ngompoh murit-murit-Io, tapi Io ruku dero desung turui koe kanam nyoru. ⁴⁶Ulek-Io epo dero: "Ise moko ikam turui? Ruko ai bdoa ikam, apa ikam nang toyak epo lang pngkono pngkna. ⁴⁷Des Yesus desung bunyal, sulet ulun erai rombongan, murit-Iyo yo karan se Yudas, erai ngket lang duo blas kongo murit ene, malan ela onon dero. Yodas ngompoh Yesus nte ngarok-Iyo. ⁴⁸Ulek Yesus epo iyo: " O Yudas, iko nyrah Pea Ulun diang arok olam?" ⁴⁹Des dero yo kerai diang Yesus kito nau ene, dero ngulek: "Tuhan, Ktimbe ena kain nglawan dero diang mndau?" ⁵⁰Laju keo erai kongo ngket ekang dero naris anak bua Pngutok Imam ene sampe bekat tlingo sanan iyo. ⁵¹Tapi Yesus ngulek: "Sdang ene." laju Io ngop tlingo ulun ene nte mkale iyo. ⁵²Yesus ngulek epo pngutok-pngutok imam diang pngutok-pngutok pnjaga Bait Allah ai bang tuo-tuo yo lumpat kakan nangop Io ene,

Ulek-Iyo: "Otus kam Aku endo ulun akal triau be, moko ikam ulet diang panan mndau ai glgada?"⁵³Moko tongku olo Aku keo mbo ekang ikam mbo lang Bait Allah, belo ikam di nangop Aku. Tapi endo memang des iyo ngkam, ai endo memang jman nte kuasa setan ene.⁵⁴Dero nangop Yesus laju moit-Iyo ngket mne. Io noit epo lou Pngutok Imam. Petrus nyendikui ngket oroh.⁵⁵Mbo tenga natar lou ene ulun ngimun api, tunge nglekum api ene. Petrus mne low tunge mbo ekang dero⁵⁶Keo ulun batak bawe kito se io tunge dmpet api; io nympti, laju ngulek: " Ulun endo jati lumpat diang Io low." ⁵⁷Tapi Petrus belo di ngangkan, Ulek iyo: "Makse, aku belo tau se Io ene!" ⁵⁸Tapi belo ola ngket ene ulun yo mak kito low se io laju ngulek: "Iko low ulun ngket dero ene!" Tapi Petrus Ngulek: "Mak, makse aku ene!"⁵⁹Bangsa erai jam ngket ene erai kongo ulun yo mak ngulek diang tgas: "beta io memang, ulun endo io kerai diang Io, koe io ene low ulun Galilea." ⁶⁰Tapi Petrus ngulek: " Mak, aku belo tau ise yo kesah ko ene." Des desung io ngulek ktine, piak kluat.⁶¹Montuk diang ene Yesus skuleng meti Petrus. Bayu Petrus Knop se Tuhan sundok ngulek epo iyo: "Onon se piak kluat olo ndo, iko sundok tolu derang belo ngangkan tau se Aku." ⁶²Ngket ne io epo baling se natar, laju nangis diang kanam nyoru beta.⁶³Ulun-ulun yo nahan Yesus, ngeko Io ai mupuk ngatang-Iyo. ⁶⁴Dero nokom wae-Iyo laju ngunti: "Soba ontus ko ise llu kain yo nyagur Iko?" ⁶⁵Ai deo ka aso uja yo ulek dero epo-Iyo.⁶⁶Des olo molo tuo-tuo sidang bangsa Yahudi bkumpul diang pngutok-pngutok imam ai ahli-ahli torat, bayu dero mkadap Iyo epo Mahkamah Agama dero, ⁶⁷Ulek iyo: "Ena Iko ene memang Mesias, ulek-Ko ka epo kain." Tuing Yesus: "Tontan di nulek koe-Ku, ikam belo anta di prsaya; ⁶⁸ai tontan Aku ngunti ise-ise epo ikam, ikam belo anta di keo tuing.⁶⁹Ngket tempo ndo Pea Ulun sundok tunge ela tadah sanan Allah yo Paling Bkuasa." ⁷⁰Ulek dero eka-eka: "Ena ktine, Iko endo Pea Allah?" Tuing Yesus: "Ikam se yo ngulek aut, se Aku ene Pea Allah." ⁷¹Ulek ke dero nua: "Ise nte taka inte aso? Taka sundok kringo otang ene ngket lang bowa-Iyo se."

Chapter 23

¹Laju akat eka-ekaulun bgumpul ene ai Yesus noit ngadap Pilatus.² Mbo mne dero mulai nundruh Io, ulek dero: "Sundok dapet kain, se ulun endo mktang bangsa kain, ai ngusan mayar pajak epo Kaisar, diang Io ngulek, se Io se ene Kristus, yo doko raja."³ Pilatus ngunti epo-Iyo: "Iko be raja ulun Yahudi?" Tuing Yesus: "Iko se doko ngulek ene aut."⁴ Ulek Pilatus epo imam-imam pngutok diang eka-eka ulun deo ene: "Aku ndok belo ise-ise keo kuli yo sala mbo Song endo."⁵ Tapi dero tambah kois maksa ptua dero, ulek dero: "Io nampa belo tenang rayat ene diang tutui batuk-Iyo mbo pupus Yudea, Io mulai mbo Galilea ai sundok sampe mndo."⁶ Des Pilatus kringo ene io ngunti, ulun Galilea be Song ene.⁷ Jadi des io tau se Yesus ulun ngket awa yo sumba lang awa aturan ukum Herodes, io ngirim Yesus ngadap Herodes, yo des ene keo low mbo Yerusalem.⁸ Des Herodes kito Yesus, io ego beta. Koe ola aut io kakan kito Yesus, koe io jono kringo soal Io, aso nua io klawo beta kito ktimbe nau Yesus nampa tanda ajaib.⁹ Deo unti io epo Yesus, tapi Yesus ndok belo nuing ise-ise.¹⁰ Des ene imam-imam pngutok diang ahli-ahli Taurat malan epo ono ai mkitek tundruh-tundruh yo boyat epo Io.¹¹ Des ene mulai doko Herodes diang pasukan io nyruna ai ngreko Io, io nyua pakaian ulun keo pangkat epo Io trus nmpuli Io nua epo Pilatus.¹² Des olo ene low Herodes diang Pilatus btman; onon se ene dero bako tulun.¹³ Trus Pilatus ngumpul imam-imam pngutok diang pngntuo-pngntuo ai rayat,¹⁴ ulak ngulek epo dero: "Ikam sundok moit Song endo epo aku sama kati ulun yo beta-beta ngayak rayat epo yo sala. Ikam se kito se aku sundok mresa-Iyo, ai ngket sala-sala yo tundruh kam epo-Iyo mba keo aku kuli mbo-Iyo."¹⁵ Ai Herodes belo low, koe ene io nmpuli Io epo kain. Jadi beta-beta belo di keo gawi gata-Iyo yo sngkono diang ukuman pnate.¹⁶ Koe ene aku anta ngrempuk Io, trus ngutis-Iyo.¹⁷ [Koe Pilatus belo kate belo ngutis erai kongo ulun nte dero des olo raya ene.]¹⁸ Tapi dero sama-sama ngulek diang oyon ries: "Pate ka Io, utis ka Barabas nte kain!"¹⁹ Barabas endo pinosumba lang pnjara koe keo soal nglawan pmrenta lang kota ai koe ngmpate.²⁰ Sindai nua Pilatus bsara diang oyon ries epo dero koe io kakan ngutis Yesus.²¹ Tapi dero males io diang oyo ries, ai ngulek: "Snalib ka Io, snalib ka Io!"²² Endo mmtolu derang yo Pilatus ngulek epo dero: "Ise yo beta-beta dat sundok gawi gata ulun endo? Mba keo aku ruku yo sala mbo Io, yo sngkono diang ukuman pate. Koe ene aku anta ngrempuk Io, trus ngutis-Iyo."²³ Tapi diang oyon ries dero maksa ai tindu belo kate belo, apa Io snalib, jadi pnyundok-iyoli dero kuret diang oyon ries dero ene.²⁴ Jadi Pilatus mie ukuman gaya kati ptua dero ene.²⁵ Trus io nmbaling ulun yo pinosumba lang pnjara koe nglawan pmrenta diang koe ngmpate ene kati yo ptua dero, tapi Yesus srah io epo dero nte gawi kati mbo ptua-ptua dero ka oli.²⁶ Des dero moit Yesus, dero nahan erai kongo ulun yo keo karan se Simon ngket Kirene, yo bayu sumba kota, laju mayak salib ene ban pluko io, apa io moson salib ene ulak nyarak Yesus.²⁷ Deo jut ulun nyarak Io; keo low mne deo bang bawe yo nangis nungul nte Io.²⁸ Yesus skuleng epo dero ai ngulek: "O bawe-bawe Yerusalem, nang kam tangis Aku, tapi alo ikam nangis nte kompu tonga kam se diang pea-pea kam!"²⁹ Soba eti ka, anta sampe des-iyoli ulun ngulek: "Buen beta san bawe yo aloi ai yo blai pea io belo pini mekus, diang tete-iyoli yo belo pini nete."³⁰ Des ene ulun anta mulai ngulek epo tunden-tunden: "Rurun ta nyngkinan kain! ai epo tngglung-tngglung: Taur ta kain!"³¹ Koe ena ulun ktine gawi epo kayu bolum, ise yo anta tkono diang kayu pate?"³² Ai keo low noit duo kongo ulun yo mak, yo doko duo kongo yo tuju gawi triaw nte ukum pate sama-sama diang Io.³³ Des dero sampe mbo awa yo nan karan se Tulang Utok Koreng, dero nyalib Yesus mbo mne ai low duo kongo ulun yo tuju gawi triaw ene, yo erai kongo mbo tadah sanan-Iyo diang yo mak mbo tadah sei-Iyo.³⁴ Des ene Yesus ngulek: "Bapa, nampun ka dero ene, koe dero mba di tau ise yo gawi dero ene." Ai dero motak undi nte smbago pakaian-Iyo.³⁵ Ulun deo akat mbo mne ai kito ba eka-eka nau ene. Tapi pngutok-pngutok ngebek Io ai ngulek: "Ulun mak awat Io, koe ka tempo ndo Io ngawat kompu tonga Io se, ena beta Io ene Mesias, ulun yo pili Allah."³⁶ Prajurit- prajurit ene ngreko-ngreko Io low; dero mie Io anggur mosom epo-Iyo,³⁷ ulak ngulek: "Ena Iko endo raja ulun Yahudi, nawat kompu tonga-Ko se!"³⁸ Keo low tulisan ombon utok-Iyo: "Endo doko raja ulun Yahudi."³⁹ Erai kongo ngket ulun yo triaw gawi yo gneweng ene nyruna Io, ulek-iyoli: "Mak be Iko endo Kristus? Awat ta kompu tonga-Ko se ai kain!"⁴⁰ Tapi yo erai kongo ngae io, ai ngulek: "Belo be iko takut, belo low epo Allah, ulak iko kono ukuman yo sama?"⁴¹ Taka memang arus nukum, koe taka kono bales yo sngkono diang gawi taka, tapi ulun endo belo di keo nggawi yo sala."⁴² Laju io ngulek: "Yesus, knop-knop se aku deh, ena Iko ulet jadi Raja."⁴³ Ulek Yesus epo-iyoli: "Aku ngulek epo iko, beta-beta yo se olo ndo peles iko jadi diang Aku mbo lang Firdaus."⁴⁴ Des ene olo sundok kira-kira jam duo blas, laju jadi seom mupus dnia mne sampe jam tolu,⁴⁵ koe mato olo belo keo pa. Ai dinding pngakang Bait Suci woka sindai.⁴⁶ Trus Yesus bsara diang oyon ries: "O Bapa, epo lang kayang-Ko Aku nyrah kesong-Ku." Sunduk bsara ktine Io nyrah kesong-Iyo.⁴⁷ Des pngutok pasukan ene kito ise nau umbang ene, io ngmulia Allah, ulek io: "Beta-beta, ulun endo ulun buen yo mba di keo sala."⁴⁸ Ai sundok eka-eka ulun deo, yo ulet ngrpudu mne nte meti nau ene, kito ise nau umbang ene, uli ka dero oli ulak nopap-nopap kompu dero se.⁴⁹ Eka ulun yo tau ngket dmpet se Yesus, ktine low bang bawe yo nyarak Io ngket Galilea, akat oro-oro ai kito eka-eka nau ene.⁵⁰ Keo erai kongo ulun nan karan se

Yusuf. Io anggota Majelis Besar, ai ulun yo buen ulak jujur.⁵¹ Io belo di sngkono pngnanam diang putusan ai gawi Majelis ene. Io ngket Arimatea, kota Yahudi ai io minte-minte Krajaan Allah.⁵² Io malan ngadap Pilatus diang tindu antu Yesus.⁵³ Des sundok io mdiwa antu ene, io ngmbungkus antu ene diang diris lenan, laju mlumbi antu ene mbo lang kubur yo knali mbo lang tunden batu, yo langne belo pian pini pinolumbi antu.⁵⁴ Olo ene olo nngkakas koe Sabat duni mulai.⁵⁵ Ai bang bawe yo ulet sama-sama diang Yesus ngket Galilea, lumpat low ai dero kito kubur ene diang ktimbe nau antu Yesus pinolumbi.⁵⁶ Des sundok uli dero nydia rmpa-rmpa diang lnga mur. Ai des olo Sabat dero smole kati aturan Taurat.

Chapter 24

¹Tapi ma ma beta olo Minggu tla ene dero malan epo kubur moit rempa-rempa yo sundok senedia dero.²Dero ngeruku batu yo sundok selungkang ngket kubur ene,³Des sundok sumba dero belo di ruku antu Tuhan Yesus.⁴Desung dero akat rngngao koe nau ene, kolan-kolan keo duo ulun akat dmpet dero makai diris ngrensilau.⁵Dero takut beta ai nyeluot utok, tapi duo kongo ulun ene ngulek epo dero: "ise moko ikam meto Iyo yo bolum, mbo ekang ulun mate?"⁶Io belo keo mbo mendo, Io sundok nyuli. knop ta ise yo ulek-Iyo epo ikam, des Io aso mbo Galilea,⁷yo ene se Pea Ulun arus senerah epo kayang ulun-ulun bedosa ai senalib, ai anta nyuli mbo olo yo ketolu.⁸Jadi knop doko dero oli se pemesara Yesus ene.⁹Ai sundok dero uli ngket kubur, dero ngesah eka soal ene epo sebelas murid ai epo eka erai buntung yo mak.¹⁰Bawe-bawe ene yo doko Maria ngket Magdala, ai Yohana, ai Maria ine Yakobus. Ai bawe-bawe yo mak lou yo sama-sama diang dero nyampe nau ene epo rasul-rasul.¹¹tapi mbo dero pengesah-pengesah ene kati nau pemesara opaw ai dero belo persaya epo bawe-bawe ene.¹²Beta ko ktine Petrus uat, trus resi-resi malan epo kubur ene. Des io ngelenget epo dalom, io kito diris bura tingen. Trus io malan uli, ai io ngunti lang kesongiyo se ise moko tau ktine.¹³Des olo ene lou duo kongo ngket murid-murid Yesus malan epo kampong nan karan se Emaus, yo bangsa sebelas kilu korohiyo ngket Yerusalem,¹⁴ai dero bekesah-kesa eka nau umbang yo sundok terjadi ene.¹⁵Des dero desung bekesah-kesah ai berondeng, ulet doko Yesus se ngompoh dero, trus malan sama-sama diang dero.¹⁶Tapi keo nau yo nyelingu mato dero, moko dero belo kuli tau se Io.¹⁷Yesus ngulek epo dero: "ise kesah kam ulak malan ene?" Nongos ile doko dero diang wae nyoru.¹⁸Erai kongo ngket dero, karaniyo Kleopas, nuing-Iyo: "Iko bute be ulun penyumba mbo Yerusalem, yo belo tau ise yo terjadi la mne mbo olo bayu-bayu endo?"¹⁹Ulek-Iyo epo dero: "Ise ene?" Tuing dero: "Ise yo terjadi diang Yesus ulun Nazaret. Io ene nabi, yo keo kuasa lang gawi gata ai pemesara ela onon Allah ai ela onon eka bangsa kain.²⁰Tapi imam-imam pengutok ai pengentuo-pengentuo kain sundok miye Io nte ukum pate ai dero sundok nyalib-Iyo.Moko kain onon se ene klawo, se Io doko yo ulet nte ngelepas bangsa Israel. Tapi olo ndo sundok lalo tolu olo aut, ngket eka-eka ene terjadi.²²Tapi tenu-tenu bang bawe ngket kain sundok nekojet kain: manin ma beta dero sundok malan epo kubur,²³ai belo ruku antu-Iyo. Trus dero ulet diang pengesah, se sundok melak epo dero mlekat-mlekat, yo ngulek, se Io bolum.²⁴Ai tenu-tenu kongo teman kain sundok malan epo kubur ene ai ngeruku, se beta memang yo kesah bang bawe ene, tapi Io belo dero kito."²⁵Trus Io ngulek epo dero: "O ikam ulun bungang, moko poyoh beta kesong kam, moko ikam belo persaya nau eka ene, yo sundok nulek koe nabi-nabi.²⁶Belo be Mesias arus kiso kanam sesa, eka-eka ene nte sumba lang kemuliaan-Iyo?"²⁷Trus Io ngenjelas epo dero ise yo tenulis nau Io lang pupus Kitab Suci, mulai ngket kitab-kitab Musa ai eka kitab nabi-nabi.²⁸Dero duni ampe aut se kampong yo pengitek dero, trus Io ungka-ungka nau kakan nerus dalan-Iyo.²⁹Tapi dero maksa-Iyo beta, ulek dero: "nongos ka diang kain, koe olo sundok nayap ai mato olo duni tonop." Trus sumba ka Io nte nongos sama-sama diang dero.³⁰Des Io tunge kuman diang dero, Io ngalek roti, ngulek berkat, trus ngerinsi-rinsi ai miye epo dero.³¹Des ene lou wingkang mato dero ai dero oli tau se Io tapi Io mapos ngket ekang dero.³²Ulek dero epo sama dero: "belo be kesong taka ngregudu, des Io bunyal diang taka ela tenga boyan ai des Io ngenjelas Kitab Suci epo taka?"³³Trus dero beraduh ai trus uli nua epo Yerusalem. La mne dero ngeruku sebelas murid ene. Dero desung bekumpul sama-sama diang teman-teman dero.³⁴Ulek dero ene: "Sebetaiyo Tuhan sundok nyuli ai sundok mekelak kompu Iyo se epo Simon."³⁵Trus kedua ulun ene lou ngesah ise yo terjadi mbo tenga boyan ai ktimbe dero tau se Io mbo des Io ngerinsi-rinsi roti.³⁶Ai desung dero bekesah surah nau umbang ene, Yesus kolan-kolan akat ela ekang dero ai ngulek epo dero: "Damai sejahtera nte ngkam!"³⁷Dero tekojet ai takut ai ngomoy se dero kito uwok.³⁸Tapi Io ngulek epo dero: "Ise moko ikam tekojet ai koe ise moko ulet kerong-kerong lang kesong kam?"³⁹Eti ta kayang-Ku ai botis-Ku: Aku se endo; bulem ka Aku ai eti ka, koe uwok belo keo isi ai tulangiyo, kati yo itan kam keo mbo Aku.⁴⁰Ulak ngulek ktine, Io mekelak kayang ai botis-Iyo epo dero.⁴¹Ai des dero belo pian persaya koe kanam ego ai nokon eran, ngulek doko Io epo dero: "Keo be ela ikam nte okan singkap mbo mendo?"⁴²Trus dero miye epo-Iyo erai totok sanga esa.⁴³Io ngalekiyo ai kumaniyo mbo onon wae dero.Io ngulek epo dero: "endo doko pemesara-Ku, yo sundok ulek-Ku epo ikam des Aku aso sama-sama diang ikam, yo ene arus tinonggenap yo eka keo tenulis nau Aku lang kitab Taurat Musa ai kitab nabi-nabi ai kitab Mazmur."⁴⁵Trus Io ngingkang akal dero, apa dero tau Kitab Suci.⁴⁶Ulek-Iyo epo dero: "Keo tenulis ketindo: Mesias arus beta-beta sesa ai nyuli ngket ekang ulun mate mbo des olo ketolu,⁴⁷ai nua: lang karan-Iyo knabar nau tobat ai ampunan dosa arus snampe epo eka bangsa, mulai ngket Yerusalem.⁴⁸Ikam doko saksi nte nau eka-eka endo.⁴⁹Ai Aku anta ngirim epo ikam ise yo jenanji koe Bapa-Ku. Tapi ikam arus nongos mbo lang kota endo ampe ikam pinolengkap diang kuasa ngket ombo."⁵⁰Trus Yesus moit dero epo baling kota ampe dmpet Betania. Mbo mne Io nente kayang-Iyo epo ombo ai miye berkat epo dero.⁵¹Ai des Io desung miye berkat epo dero, Io bepisah ngket dero ai rengkat epo sorga.⁵²Dero

sujud nyembah epo-Iyo, trus dero uli epo Yerusalem diang ego beta.⁵³Dero dor keo ela mbo lang Bait Allah ai ngemulia Allah.

John

Chapter 1

¹Engket tela yo ene Firman, Firman ene kerai diang Allah ai Firman ene doko Allah ene se. ²Firman ene sundok kerai diang Allah ngket tela. ³Eka ise masam ene tenampa tete Io. Ena belo Io, ise masam yo keo endo belo anta keo. ⁴Mbo lang Io keo bolum eka ai bolum ene doko wala ulun. ⁵Wala eke doko pa lang seom, ai seom ene belo anta kuret ngket Wala ene. ⁶Keo erai kongo ulum suyu Allah, karan io Yohanes. ⁷Io ene yo kito mato nte nyampe pengkito pentau io nau umbang Wala ene, epo tete io aka ulun jadi percaya. ⁸Yohanes se makse Wala ene, tapi io ulet nte nyampe kesaksian nau umbang Wala ene. ⁹Yo beta Wala ene, yo ngulawa eka ulun, desung ulet opo lang denia. ¹⁰Wala ene sundok keo mbo lang denia ai denia endo tampa Io, tapi denia belo nitan se Io. ¹¹Io ngompoh mpun Io, tapi mpun Io ene mba di nrima Io. ¹²Tapi, dero yo nrima Io die Io kuasa nte jadi pea-pea Allah, yo doko dero yo percaya epo karan Io. ¹³Dero lahir makse ngket daya, makse lou ngket isiupak, makse lou ngket pengkakan bang song, tapi ngket ALLAH. ¹⁴Firman ene sundok jadi isi upak ai nongos la ekang taka. Taka sundok kito kmulia Io, yo doko kmulia Pea Tunggel Allah ponu diang pndie Allah ai yo sengkono ba. ¹⁵Yohanes miye kesaksian nau umbang Io diang oyon ries "Endo doko Io yo maksudku des aku ngulek, "Sundok aku, anta ulek Io yo ono se aku koe Io keo onon se aku". ¹⁶Ngket keponu Io, eka-eka taka nrima die sokoi. ¹⁷Koe, Hukum Taurat denie tete Musa, tapi die sokoi ai yo sengkono ba ulet tete Yesus Kristus. ¹⁸Ndok erai kongo ulum belo dipini kito Allah, tapi Pea Tunggel Allah, yo keo mbo asi ado Bapa, mkelak Io. ¹⁹Endo doko kesaksian Yohanes des ulun-ulun Yahudi ngirim imam-imam diang ulun-ulun Lewi ngket Yerusalem nte ngunti epo Yohanes "Ise si eko ene?" ²⁰Yohanes ngaku, ai io mba di ngereng, io ngaku, " Aku makse Kristus ene". ²¹Dero ngunti epo io "Ena ktine, ise iko ene? iko be Elie? Tuing io "Aku makse Elia". "Iko be Nabi ene?" Tuing io "makse"²²Sundok ene, ulek dero ep io "Ise iko ene, koe kain arus nuing dero yo nyemunyu kain? Ise ulek ko nau mbang iko se?" ²³Yohanes nuing diang pemensara nabi Yesaya "aku doko oyon yo ulek nabi Yesaya besara diang ries mbo padang gurun: Pinolonus ta boyan nte Tuhan!"²⁴Ulun-ulun Yahudi yo snuyu ene ulun-ulun Farisi. ²⁵Laju dero ngulek epo Yohanes "Ena iko makse Mesias, makse Elia, ai makse Nabi ene, ise moko iko ngmbaptis?"²⁶Tuing Yohanes epo dero " Aku ngmbaptis diang danum, tapi la eka ikam akat erai kongo Ulun yo ikam mba di tau. ²⁷Io doko yo anta ulet sundok aku. Ndok ngoke tali sandal Io, aku mba dipantas." ²⁸Hal ene terjadi mbo Betania, la mpai atang Yordan, awa Yohanes ngembaptis. ²⁹Manin yo, Yohanes kita Yesus ulet ngompoh io, ai Yohanes ngulet "Eti ta, Anak Domba Allah yo ngapus dosa denia! ³⁰Io doko maksudku dis aku ngulek : Sundok aku anta ulet erai kongo Ulun yo pawak olai se aku koe Io sundok keo onon aku." ³¹Bune, aku mba ditau se Io, tapi apa Io pinokelak epo ulun-ulun Israel, moko aku ulet ngmbaptis diang danum". ³²Ai Yohanes besaksi, ulek io : Aku kito Roh diwa engket langit kati nau mpun dara ai Roh ene nongos ombon Io. ³³Aku se mba ditau se Io, tapi Io yo ngemuyu aku ulet nte ngmbaptis diang danum ngulek epo aku : Io yo itan ko ombon Io Roh diwa ai nongos, Io ka doko yo anta ngmbaptis diang Roh Kudus. ³⁴aka se sundok kito ai bersaksi se Io endo doko Allah. ³⁵Manin yo, Yohanes akat nua diang duo murid io ³⁶ai io kito Yesus lalo Yohanes ngokok : " Eti ta, Anak Domba Allah." ³⁷Duo murid io kringo pemensara io ene laju ngarak Yesus. ³⁸Yesus skuleng epo sori io des Io kito dero desung nyarak Io, Io ngulek epo dero "Ise yo eto kam?" ulek dero epo Io "Rabi (ena nensut dosa, arti io : Guru), la mombe Iko nongos?" ³⁹Io ngulek epo dero "Dido ko apa ikam kito" sundok ene dero ngompoh ai kito ruwa Io nongos ai dero nongos diang Io alo ene koe des ene kira-kira jam opat. ⁴⁰Erai ngket duo murid yo kringo pemensara Yohanes laju lumpat Yesus yo doko Andreas, erai buntung Petrus. ⁴¹Sundok ene, Andreas nyruku Simon, erai buntung io, ai ngembere "Kain sundok ruku Mesias (arti io Kristus)."

⁴³Olo manin yo, Yesus kakam brangkat epo Galilea, Io ruku diang Filipus ai ngulek epo io "lumpat aku ko".

⁴⁴Filipus ngket Betsaida, kota awa nongos Andreas diang Petrus. ⁴⁵Filipus ruku diang Natanael ai ngulek epo io " Kain sundok ruku Io yo tnulis koe Musa lang Hukum Tuarat ai keo nabi-nabi, yo doko Yesus ngket Nazaret pea Yusuf. ⁴⁶Natanael ngulek epo io : "bahe ka be yo buen ulet ngket Nazaret?" Filipus ngulet epo io "Ulet ka ai eti".

⁴⁷Yesus kito Natanael ngompoh Io ai bsara nau umbang Natanael, "Eti ta, ulun Israel tolen, mba di keo sampur lang io endo." ⁴⁸Natanael ngunti "Ketimbe iko tau se aku?" Yesus nuing "Onon Filipus momba iko, Aku sundok kito iko, des iko la iwat tonga ara"⁴⁹Tuing Natanael "Rabi, Iko pala Pea Allah. Iko ene Raja ulun Israel" ⁵⁰Yesus nuing ai ngulek epo io "Koe aku ngulik epo iko , ' Aku sundok kito iko la iwat tonga ara', moko iko persaya. Iko

Chapter 1

anta kito mau umbang yo oro pawak olai se endo. ⁵¹Laju, Io nglanjut " Sbeta yo, Aku ngulek epo iko, iko anta kito langit wingkang ai malaekat Allah diwa dombonrima Pea Ulun."

Chapter 2

¹Des olo ke tolu, keo pesta kawen, embo Kana, Galilea des ene mena Yesus keo mbolane. ²Yesus ai murid-murid yo low nundang epo pesta nika ene. ³des danum anggur eka, ine Yesus ngulik ep yo dero ene eka danum anggur," ⁴Yesus nuwing "bawe, ise se urusan io epo Aku/" belo pian ampe des io nte okin ngulek. ⁵Ine Yesus ngulek epo dero okan mbo pesta ene "ise-ise io ulek yo epo ikam, gawi kam ka"⁶mbo mne, keo onom tepayan batu, jodo io ente ulun Yahudi-pakai des adat sebui. Tongku-tongku tepayan ene duo tolu gusi atok io. ⁷Ulek Yeus doko epo dero tukang ngalek okan ene, matok ndok-ponu tepayan-tepayan ene danum" des ene dero ngatok tepayan-tepayan ene ponu diang danum. ⁸sundok ene Yesus ngulik epo dero "des ene se tnaku idik-idik moit epo io mpun peta" laju dero mie epo io pengentuo pesta. ⁹Des pengentuo pesta ngulek se danum wensut jadi anggur ene, ai io belo tau engket ena dero tukang ngulek akan ene ai tukang ngalek danum ene tau , des ene se pengentuo pesta ene momba penganten song, ¹⁰ai ngulek epo yo "tongku ulun mne danum anggur io buen ono, des ene ulun puas ngisop, biasa io bayu anggur kurang buen io denie, tapi ikam ngona anggur io buen ndok des endo.Tanda ajaip pertama ene pekelak Yesus des mbo kana, Galilea, diang mekelak kemuliaan yo, ai murid-murid yo.¹²sundok ene, Yesus diwa epo Kapernaum diang ine erai buntung erai buntung, ai murid-murid yo dero nongos duo tolu olos. ¹³Hari raya paska ulun Yahudi sundok dompet, ai Yesus lou domb epo Yerusalem. ¹⁴Mbo Bait Allah, io kito ulun boli silih lembu, domba ai, mpulu dara, pengganti uang uang tunge mbo mne. ¹⁵Yesus nampa tali nte ngmpes ai ngusa dero ndok eka-baling engket lang Bait Allah, ketine laou domba ai-lembu dero. ¹⁶Epo dero penjual mpulu dara, ulek Yesus "nait bling ndok eka ngket mendo! nang nampa lou Bapa-ku nte awa bejual!"¹⁷murid-murid yo knop se keo tnulis " gawal nte lou ku" ¹⁸Des ebe ulun-ulun Yahudi nuwing ai ngulek epo kain tanda ajaip ise io iko pekelak epo kain moko kate nggawi hal -hal ene? ¹⁹Tuwing koe Yesus " ptmme ka lou Allah ene lang tolu olo Aku anta nengkuat io nua"²⁰Tuwing dero "kala 46 taun nampa Bait Allah ene, ai iko ante nampa nua lang des tolu olo?" ²¹Uyan Yesus ene blai Allah ene io doko kompu io see. ²²Keo ene des Yesus bangkit engket ekang pengineate ulun, murid-murid yo bayu knop se pemesara ene; bayu dero-persaya epo kitab suci ai nua se Yesus kono ngulek ketine²³ Desung Yesus keo la Yerusalem kola ngeraya Paskah,deo ulun persaya lang karan Io ke meti tanda-tanda ajaib gawi Io ene ²⁴ Tapi , Yesus se belo mempersayakan kompu tonga Io epo dero koe Io tau bah se dero ²⁵ ai belo dikoyoh yo mak nte mie kesaksian nau umbang ulun koe Io tau ise yo keo lang kesong ulun.

Chapter 3

NAU TINOMBAYU NIKODEMUS NUA ¹Keo erti kongo ulun nan karan se Nikodemus io ene pengutok ulun Yahudi. ²Des malam , io ulet epo nyeruku Yesus ai ngulek, "Guru aku tau se iko turang nutui matuk Io ulet ngket Allah. Koe belo keo ulun yo tau nggawi tanda-tanda yo ajaib, yo gawi keuali Allah yo diang Io." ³Tuing Yesus epo io, "Sebeta beta yo Aku ngulek epo iko, ema ulun bela di Nikodemus nua. io belo kuli meti krajaan Allah." ⁴Nikodemus ngunti , ktimbe nua ena yo sundok tuo? Kuli be yo sumba nua epo lang butu buntung ma io laju nua? ⁵Tuing Yesus epo io, "Sebetayo Aku ngulek epo iko ena ulun yo belo di ngicet danum ai Roh, io belo kuli sumba epo lang krajaan Allah. ⁶Ise yo Nikodemus ngket, ulun ene ulun, ai ise yo Nikodemus ngket Roh ene roh. ⁷Nangka bengong koe Aku ngulek epo iko, "Iko arus nua." ⁸Riut besiup epo mone-mone io kakan ai iko kringo oyon yo tapi iko belo tau ngket mone pengulet yo, ai epo mone tadan yo ktine lou tongku ulun yo ngket Allah. ⁹Nikodemus ngunti, "belo anta eka nau ene keo?" ¹⁰Yesus sluing, "Mba be iko ene guru ulun Israel, tapi iko belo tau eka umbang ene?" ¹¹Sebeta-beta yo, Aku ngulek epo iko se kain nyuran nau umbang ise yo kain lau ai nyampe kesaksian nau umbang ise yo itan kain tapi iko belo nyanda kesaksian kain. ¹²Ena Aku mmetau iko nau umbang denia tingen iko belo percaya, belo anta iko percaya ena Aku mmetau nau umbang surgawi? ¹³Nok belo erai kongo ulun yo pini dombo pa sorga, yo doko pea ulun. ¹⁴Sama kati Musa mmekombo no nipo tembaga mo padang belantara, ketine lou pea ulun arus pinokombo. ¹⁵Apa tengku ulun yo percaya epo Io keo balumyo kden. ¹⁶Koe Allah kosang beta po denia endo, Io mie pea Io, io tunggu apa tongku ulun yo percaya epo Io. Belo bnasa, tapi keo bolum yo kden. ¹⁷Koe Allah nyemuyu Pea Io epo lang denia mba di nte ngakim denim, tapi apa demia slamat tete pea-Io. ¹⁸Ulun io percaya epo -Io, belo anta nuong, tapi ulun yo belo percaya sundok nuang aut koe belo percaya epo karan pea tunggu Allah. ¹⁹Ndo doko hukum ene: wala sundok ulet epo lang denia tapi ulun aso gawal lang seom, se wala koe ise yo gawi depo bang triau. ²⁰Koe tongku ulun yo nggawi triau kekei se wala ai belo di ngopoh epo wale ene apa gawi gata ene belo di knesah. ²¹Tapi ulun yo nggawi kono ene ulet ngompon wala ene apa pinokelak buen, gawi gata io ene, gawi io lang Allah." Yohanes bersaksi nau umbang Yesus. ²²Sundok ene Yesus diang mukid Io makan epo Yudea. la lane, Io mekeka waktu diang dero ai ngembaptis. ²³Yohanes ngembaptis lou mo Ainon dempet Salim koe mne roa danum. Ulun-ulun ulet nte baptis. ²⁴Des ene, Yohanes belo pian pinosumba lang sper. ²⁵Ai timbul salontuing mo murid Yahanes ai ulun Yahudi umbang pembrese. ²⁶Dero nyuruku Yahanes ai ngulek, "Guru, ulun io diang iko mpai atang Yordan, io nau umbang Io ikko sundok beber saksi, eti ta Io lou ngembaptis, eka ulun nyuruku Io. ²⁷Yohanes nuung, "Ulun belo kuli nrima ise-ise pulun nau ene yo dne epo io ngket sorga. ²⁸Iko se kate nyampek kesaksian se aku pini ngulek se aku makse Mesia. Tapi aku snuyu nte ono se Io. ²⁹Ulun yo ngempu mempela bawe yo doko mempela song tapi teman mempela song yo akat ai nempaning yo, ego beta kringo oyon mempela song jadi pengego ene jadi mroa. ³⁰Io arus btambah olai, aku btambah alus. ³¹Io yo ulet ngket ombo ene doko omboh se yo mak, Io yo ulet ngket denia ai nyurah nau umbang yo keo lang denia Io yo uley ngket sorga eng doko la ombon eka-eka se yo mak. ³²Io nyampe kesaksian nau umbang ise yo itan- Io ai yo dingo- Io, tapi ulun-ulun belo di nrima kesaksian Io. ³³Ulun yo nrima kesaksian Io, ngaku diang beta se Allah ene beta. ³⁴Koe ulun yo suyu Allah anta nyamoe pemesara Allah koe Allah mie Roh yo belo di trini. ³⁵Bapa nengkosan anak io sundok nyerah eka-eka ene epo lang kayang- Io. ³⁶Ulun io persaya epo anak keo bolum io kden, tapi ulun io beta patoh epo anak belo anya kito penyembolum, tapi murka Allah dor keo lang bolum io.

Chapter 4

¹des Tuhan tau ulun-ulun parisi yo kuli ai ngembabtis deo se murid murid Yohanes, ²(walau Yesus se belo ngembabtis, suma murid murid Yo), ³Yo ngendikah Yudea mulik nua epo Galilea. ⁴tapi, Io arus la lo kampung Samaria. ⁵sampe Yesus ela Samaria, mbo kota io nan se karan Sikhar, yo awa yo mbo dempet tana yo ono yo diye Yakub epo pe yo, Yusuf. ⁶Tinan Yakub keo mbo mene, sundok ene, Yesus yo mole koe malan, tunge mbo isan tinan ene, des ene kira-kira jam ke onom. ⁷ulet eri kongo ulun bawe Samaria epo makui danum. Yesus ngulek epo Yo, "die ko oki isop". ⁸koe murid-murid yo sundok malan epo kota epo moli nte okan. ⁹ulun bawe Samaria ene ngulek epo Yesus "ketimbe se nau iko, ulun Yahudi, tindu danum nte isop epo aku yo ulun bawe Samaria?" koe ulun Yahudi belo bako ko diang ulun Samaria. ¹⁰Yesus nuing ai ngulek epo yo "ena iko tau nau umbang karunia Allah ai tau ise yo bunyal diang iko, "die aku nte isop, iko pasti anta tindu epo-yo, yo miye iko danum nte bolum. ¹¹ulun bawe ene ngulek epo yo " Tuan, iko belo keo gayong ai tinan endo lomtop beta, ngket ise iko kuli danum bolum ene? ¹²beta be iko olai se itak kakah kain, Yakub, yo miyeh tinan endo epo kain ai yo sundok ngisop ngket tinan endo diang pan penyekamu kain?" ¹³Yesus nuwing ai ngulek epo yo "tongku ulun yo ngisop ngket danum endo anta krengan nua, ¹⁴tapi ulun yo ngisop ngket danum yo die la epo yo ene anta jadi mato danum mbo lang kompu tonga yo yo anta nanggoi semalir sampe epo balum yo keden. ¹⁵ulun bawe ene ngulek epo Yesus " Tuan, die epo aku danum ene apa aku belo anta krengan nua ai aku belo koyoh ulet epo ndo nte makui danum. ¹⁶Yesus mere epo yo, " malan ka, bomba song ko ai mulik epo ndo nua" ¹⁷bawe ene nuing " aku belo keo song" ulek Yesus "epo yo, iko beta des iko ngulek, aku belo keo pian song". ¹⁸koe iko sundok keo limo song, ai ulun song yo nongos diang iko tempo ndo makse song ko, lang hal endo, iko ngulek yo beta. ¹⁹ngulek bawe ene epo yo, ' Tuan, tempo ndo aku tau se iko yo ene ulun Nabi. ²⁰itak kakah kain nymebah mbo tunden endo, tapi bangsa ko, ngulek se Yerusalem tingen awa ulun kate nyembah. ²¹Yesus ngulek epo yo "percaya ka epo Aku, o Bawe! Anta ulet jeman yo des belo mbo tunden endo belo lou mbo Yerusalem ulun nyembah Bapa. ²²iko nymebah yo iko belo tau, tapi kain nyembah yo kain tau koe keselamatan ulet ngket ulun Yahudi. ²³tapi, anta ulet jeman yo, yo ene tempo ndo, yo nyembah yo kono anta nyembah Bapa ai Roh ai beta koe Bapa tindu yo kati nau ene nyembah yo. ²⁴Allah ene yo Roh ai dero yo nyembah yo arus nyembah yo lang ai yo beta-beta" ²⁵bawe ene ngulek epo-yo "Aku tau se Mesias anta ulet (yo yo nulek se Kristus) des yo ulet, yo anta mere ise ise yo perlu epo kain. ²⁶Yesus epo yo, " Aku, yo desung bunyal diang iko endo yo ene Mesias" ²⁷des ene ulet murid-murid yo ai dero eran kito Yesus desung bekesah diang erai kongo bawe. Tapi ndok belo keo erai kongo ngunti epo-yo, " ise yo eto ko " ena belo-ketindo " ise moko iko bekesah diang yo?" ²⁸sundok ene bawe ene ngendikah gusih danum yu malan epo kota laju mere epo ulun-ulun mbo lane. ²⁹"malan taka, meti keo erai kongo ulun yo ngulek epo aku ise-iese yo genawi ke ku, beta yo be yo Mesias ene" ³⁰dero laju malan epo baling kota nte nyeruku Yesus ³¹des ene, murid-murid yo ngedesak Yesus diang ngulek, "Rabi, kuman ka" ³²Tapi, Yesus mere epo dero, " Aku keo nte o kan yo belo ikam tau." ³³laju murid-murid bako unti epo sama dero, " mba be belo keo ulun yo moit yo mak epo-yo. nte o kan?" ³⁴Yesus mereh "Penyekokan ku yo ene ngelaku petua yo iyo semuyu aku ai nte nyundok gawi gata-yo" ³⁵mba be iko ngulek "opat bulan nua des nte ngani ngawang sampe? eti ka, aku mere epo iko, kolat mato ko ai neti pare mbo umo lemit lai ani awang. ³⁶tempo ndo lou ngani ngawang nrima upa yo ai ninduk bua nte bolum kden sampe ngani diang nasok kuli ego eka-eka. ³⁷lang hal endo kesah sura endo beta, " yo mak nias nasok ai yo mak lou ngani ngawang" ³⁸Aku semuyu iko nte ngani ngawang ise-ise yo belo di gawi ko; ulun yo mak sundok nggawi yo ai iko sundok sumba epo lang gawi gata dero" ³⁹deo ulun Samaria ngket kota ene jadi persaya epo Yesus koe kesah surah bawe ene. Yo miye kesaksian, " yo mere diang aku eka-eka nau umbang yo sundok genawi ke ku" ⁴⁰Sundok ene, des ulun-ulun Samaria ene sampe epo Yesus, dero tindu-yo nte nongos sama-sama diang dero ai Yesus nongos mbo mneh duo olo kola yo. ⁴¹ai, keo nua tambah dero yo persaya koe kesah surah Yesus se. ⁴²Dero ngulek epo bawe ene "maksa koe kesah surah ko kain jadi persaya, tapi koe kain se sundok keringo, ai kain tau se yo endo beta-beta Juru Selamat Denia" ⁴³Abis duo olo, Yesus ngendikah awa menneh ene laju malan tadah Galilea. ⁴⁴Ono se ene, Yesus se sundok miye kesaksian se ulun nabi belo dipinoduli koe mbo kampung se. ⁴⁵Des sundok sampe mbo Galilea, ulun-ulun Galilea nerima-yo koe dero kito kadeo Gawi gata Yesus lang ungan paskah mbo Yerusalem koe dero lou ngompoh ungan ene. ⁴⁶koe ene, Yesus ulet nua epo kana, Galilea, awa yo kono nampa danum jadi danum anggur. Mbo Kapernaum keo erai kongo pegawai istana yo pea song desung mekom. ⁴⁷Des pegawai ene kringo se Yesus "sundok ulet ngket Yudea mbo Galilea, yo malan nyeruku ai tindu epo Yesus apa ulet epo mekale pea yo koe pea yo sundok kakan mate" ⁴⁸laju, Yesus mereh epo yo "ena iko belo kito tanda-tanda ai nau umbang ajaib, iko belo kakan percaya" ⁴⁹pegawai istana ene ngulek "Tuan, ulet ka onon se pea ku mate." ⁵⁰Yesus ngulek epo yo "uli ka, pea ko bolum! "ulun ene persaya epo kesah surah yo nulek ke Yesus epo yo ai malan ulun ene. ⁵¹Des pegawai istana ene aso la boyan, batak-batak yo ruku diang yo ai mere se pea yo song ene bolum. ⁵²pegawai istana ene ngunti epo dero des

jam tenu roton pea yo mulai ale, trus, dero nuing "pre kira-kira jam ke turu" mekom yo ale.⁵³ uma pea ene tau, des ene lou Yesus mereh epo yo, "pea ko bolum" jadi, pegawai istana ene ai eka-eka keluarga yo jadi persaya epo Yesus.⁵⁴ ene yo tanda ajaib ke duo yo genawi ke Yesus abis uli ngket Yudea epo Galilea.

Chapter 5

¹ Sundok ene keo olo rayaulun Yahudi; ai Yesus epo Yerusalem. ² Mo Yerusalem dmpet jawong Gerbang domba keo erai gntung, basaulun Ibrani karan iyo Betesda; keo limo srapo. ³ Ai mo srapo srapo ene deo lumbiulunulun iyo kroton; ulunulun iyo posaulunulun tempangulunulun pokung iyo skebok danum gntung ene. ⁴ Ena keo des diwa Mlekat Tuhan epo gntung ene ai ngebuk danum ene; ise iyo ono sumba lang ne sundok skebok danum ene, jadi ale ise jnis roton io. ⁵ Mo mne keo erai kongo ulun iyo sundok tolu pulu walu taun kola io kroton. ⁶ Des Yesus kito ulun ene lumbi mbo mne koe Io tau, koeio sundok ola nau io ene aut ngunti Yesus epo io: kakan be iko ale ?"Tuwing ulun iyo kroton ene epo-Io : "Tuhan belo keo ulun iyo mdiwa aku epo lang gntung ene, ena danum iyo mulai skebok ai des aku malan epo gntung ene, ulun iyo mak diwa nyelempono aku. ⁸ Ulek Yesus epo io: uwat, engkat ai malan ka. ⁹ Ai des ene lou, ale ulun ene laju io ngengkat tilam io ai malan, tapi olo ene olo sabat. ¹⁰ koe ene ulun-ulun Yahudi ngulek epo ulun iyo bayu ale ene: olo ndo olo sabat belo di kate iko moson tilam ko. ¹¹ Tapi io nuing daro: ulun iyo sundok mkale aku, io iyo ngulek epo aku: engkat tilam ko malan ka. ¹² Dero ngunti epo io: ise ulun iyo, iyo ngulek epo iko engkat tilam ko ai malan ka. ¹³ Tapi ulun iyo bayu ale ene, belo tau ise ulun iyo, koe Yesus sundok mapos ngket ekang ulun deo ene mo awa mne. ¹⁴ Nua Yesus mangkoruku diang io lang Bait Allah laju ngulek epo io, iko sundok ale; nang nampa Dosa nua, apa mo iko nang keo tambah triyau. ¹⁵ Ulun ene baling, laju ngesah epo ulun-ulun Yahudi, se Yesus iyo memekale io. ¹⁶ Ai koe ene ulun-ulun Yahudi bekomer kakan ngurou Yesus, koe Io nggawi nau umbang ene mo olo Sabat. ¹⁷ Tapi Io ngulek epo dero: "BapaKu nggawi iyo sampe tempo ndo, ene moko Aku nggawi lou. ¹⁸ Koe ene ulun-ulun Yahudi aso bekomer nua nte ngempate Io, mba koe Io ngmapos olo Sabat tingen, tapi koe Io ngulek se Allah ene Bapa IO se, ai diang IO memesama Io ding Allah. ¹⁹ Ene moko Yesus nuing dero, ulek Io: "Aku ngulek epo ikam, sebata iyo, Anak belo di kuli nggawi ise-ise ngket Io se, ena Io belo di kito Bapa nggawi iyo; ise iyo gawi Bapa, ene lou io gawi Anak. ²⁰ Koe Bapa kosang Anak, ai IO memetau epo Io, eka-eka nau iyo gawi Io se, ai Io memetau epo aio gawi iyo aso olai nua se gawi ene apa ikam tambah bengong. ²¹ Koe, sama kati Bapa memesuli ulun mate ai mie dero penyembolum, ktine lou Anak mie penyembolum epo ise iyo petua Io. ²² Bapa belo di ngakim ise-ise, tapi sundok dnne eka ngakim ene epo Anak. ²³ Apa eka ulun anta ngormat Anak sama kati dero ngormat Bapa, ulun iyo belo di ngormat Anak belo di ngormat Bapa iyo nyemuyu Io. ²⁴ AKU ngulek epo iko: sebata iyo ise iyo kringo pemesara KU ai percaya epo Io iyo nyemuyu AKU io keo bolum iyo kden ai belo lumpat nukum koe io sundok wensu engket lang maut epo la bolum. ²⁵ AKU ngulek epo iko; sebata iyo des iyo anta keo ai sundok keo, se ulun-ulun mate anta kringo oyon Anak Allah ai dero iyo kringo iyo, anta bolum. ²⁶ Koe sama kati Bapa keo bolum lang kompu Io se, ketine lou Anak die Io bolum lang kompu Io se. ²⁷ Ai IO sundok miye kuasa epo Io ente ngakim, koe Io ene Anak Manusia. ²⁸ Nang ikam eran anta nau ene, koe keo des iyo, se eka ulun iyo lang kubur anta kringo oyon IO, ²⁹ Ai dero iyo sundok nggawi buen anta baling ai nyuli nte bolum iyo kden, tapi dero iyo nggawi iyo triau anta nyuli nte ukum. ³⁰ AKU belo dikuli nggawi ise-ise ngket Aku se; Aku ngakim sama kati iyo dingo KU, akim Ku ene adil, koe Aku belo ngaya pengenanam KU se, tapi pengenanam IO iyo nyemuyu Aku. ³¹ Ena Aku ngesah nau umbang Ku se, nau pengesah Ku ene belo di beta. ³² Keo iyo mak iyo ngesah nau umbang AKU ai AKU tau, se kesah iyo die IO nau umbang KU ene beta. ³³ Ikam sundok nyemuyu ulun epo Yohanes ai io sundok ngesah nau umbang iyo kono; ³⁴ tapi Aku belo di kakan penyurah ngket ulun, tapi Aku ngulek nau endo, apa ikam slamat. ³⁵ IO ene plita iyo dolan ai keo wala ai ikam kakan ngiso ile-ile tingen wala ene. ³⁶ Tapi Aku keo aso kesah iyo perlu beta se kesah Yohanes, yodoko gawi gata iyo die Bapa epo Aku, apa Aku nggawi iyo. gawi gata ene lou iyo gawi-Ku tempo ndo, ai ene lou iyo miye pengesah nau umbang-Ku, se Bapa iyo nyemuyu Aku. ³⁷ Bapa iyo nyemuyu Aku, iyo doko iyo ngesah nau umbang-Ku, ikam belo pini kringo oyon-IO, nau IO lou ikam belo pini kito. ³⁸ Ai Firman-IO belo di montong kompu kam, koe ikam belo percaya epo-IO iyo nyemuyu Aku. ³⁹ Ikam beguru Kitab-kitab suci, koe ikam ngomoi kou-IO ikam kuli bolum iyo kden, tapi nyonggoh Kitab-kitab suci ene miye pengesah nau umbang-Ku, ⁴⁰ Tapi ikam belo dikakan ulet epo-Aku nte nrima bolum ene. ⁴¹ Aku belo perlu hormat ngket ulun. ⁴² Tapi nau umbang kam, Aku sundok tau se lang kesong kam se belo dikeo kasih epo Allah. ⁴³ Aku ulet makai karan Bapa-KU ikam belo di nrima Aku; tapi ena ulun io mak ulet makai maran io se, ikam nrima io. ⁴⁴ Ketimbe nau ikam percaya, ikam iyo nrima hohmat ngket ulun iyo mak ai iyo belo meto hormat iyo ulet ngket Allah iyo Esa ? ⁴⁵ Nang ikam ngomoi, se Aku anta ngakim ikam la onon Bapa; iyo ngakim ikam ene Musa, yodoko Musa, iyo epo io ikam percaya. ⁴⁶ Koe ena ikam percaya epo Musa, pasti ikam percaya lou epo Aku, koe io sundok nulis nau umbang-Ku. ⁴⁷ Tapi ena ikam belo percaya epo ise iyo tulis-io, ketimbe nau ikam percaya ise iyo ulek-Ku?"

Chapter 6

¹ sundok ene yesus kentas gentung Galilea,yo ene gentung Teberias ²Deo ulun nyarak Io koe dero kito nau umbang ajaib yo Io genawi epo ulun-ulun krotan.³ Sundok ene,Jesus dombo epo tunden ai tunge mbo mne diang murid-murid-Io.⁴ Dees ene ungan Paskah ulu Yahudi sundok dempet.⁵ Ulak meti epo kiling Io ai kito ulun deo ulet epo Io,Jesus ngulek epo,"Ela mbe taka kuli moli roti apa ulun-ulun ene kuli kuman?"⁶ Yesus ngulek nau umbang ene nte nyoba Filipus koe sebata yo Io se tau ise yo anta Io gnawi.⁷ Filipus nuing,"Roti diang uman 200 dinar belo anta puli nte dero,tontan eka-eka dero kuli erai yo bute yo paling idi."⁸keo erai kongo -Io,yo ene Andreas erai buntung Simon Petrus,ngulek epo-Io:

¹⁰ Yesus ngulek,"suyuh ka eka-eka ulun apa tunge."Mbo awa yo deo dikut,jadi ulun-ulun ene tunge kira-kira limo ribu bang song kdeo yo.¹¹ Laju,Jesus ngalek roti ene ai sundok ngucap syukur,Io ngembagi roti-roti ene epo dero yo tunge;ketine lou gawi Io diang esa-esa ene tenu-tenu yo dero kakan.¹²Des eka-eka ulun sundok boting,Jesus ngulek epo murid-murid-Io,"Kenumpul yo sisa okan apa belokeo yo noding."¹³Koe ene, eka murid ngumpul yo ai ngatok duo belas kepit diang sisa ngket limo roti jelai yo denikah koe dero yo sundok kuman. ¹⁴Des ulun-ulun ene kito tanda ajaib yo genawi koe Yesus,dero ngulek,"Io endo pasti Nabi yo jenanji anta ulet epo denia." ¹⁵Ke tau se ulun deo ene kakan ulet ai maksa Io jadi Raja nte dero,Jesus nyingkir nua epo tunden Io Sederai.Yesus malan ban danum.¹⁶Des olo sundok mulai nayap, muri-murid diwa epo gentung, ¹⁷likas dombo epo perau, dero mulai ngentas danaul epo Kapernaum. olo sundok mulai seom, tapi Yesus mba pian ulet ngompoh dero. ¹⁸Gentung mulai ngombak koe siup riut ries.¹⁹Yesus tau se murid-murid-Iyo kakan ngunti epo-Iyo,laju Iyo ngulek epo dero,"Beta be ikam bako unti epo sama ikam se nau umbang yo Aku maksud des Aku ngulek,belo diola aut ai ikam belo anta kito aku nua;ai nua,belo diola nua,ai ikam anta kito Aku?" ²⁰Diang beta-beta yo,Aku ngulek epo ikam,ikam anta nangis ai nyoru,tapi denia anta ego;ikam anta berduka,tapi dukacita kam anta wensut jadi sukacita. ²¹Des ulun bawe ngemekus,io kiso siet koe des yo nte ngemekus sundok ulet;tapi sundok pea yo kino mekus,io belo kiso se siet balo oli koe sukacita koe erai kongo ulun sundok kino mekus mbo denia endo.²²Ketine lou ikam kiso kanam penderitaan tempondo, tapi Aku anta nyeruku ikam nua ai kesong kam anta bersukacita,ai ndok belo erai kongo yo anta kate ngalek sukacita kam ngket ikam. ²³Des olo ene,ikam belo anta ngunti ise-ise epo Aku.Diang beta-beta yo,Aku ngulek epo ikam,ise-ise yo penindu kam epo Uma-Ku lang karan-Ku,Io anta miye yo epo ikam.²⁴Sampe tempondo,ikam belo pinih tindu ise-ise lang karan-Ku.Tindu ka,ai ikam anta nerima yo apa sukacita kam jadi ponuh."Penguret ombon denia"²⁴Des ulun deo kito, se Yesus belo keo mo mne ai murid-murid-Io belo keo lou, dero dombo perau-perau ene laju malan epo Kapernaum epo meto Yesus. ²⁵Des ulun deo ruku Yesus la mpai tesik ene, dero ngulek epo-Io:"Rabi ketimbe nau Ko tau ulet mo mendo?"²⁶Yesus nuing dero; "Aku ngulek epo ikam, sebata iyo ikam meto Aku, belo dikoe ikam kito tanda-tanda, tapi koe ikam sundok kuman roti ene ai ikam boting.²⁷Begawi; mba di nte okan iyo anta nte nampa benasa, tapi nte okan iyo betahan sampe bolum iyo kden,iyo anta die Pea Ulun epo ikam: koe Io doko iyo ptua Bapa,Allah, diang tanda-Io."²⁸"Laju ulek dero epo-Io:"ise arus gawi kain, apa kain nggawi gawi iyo petua Allah?" ²⁹Tuing Yesus epo dero:"ndo doko gawi iyo petua Allah apa ikam percaya epo Io iyo sundok suyu Allah."³⁰Ulek dero epo -Io:"Tanda ise iyo gawi-Ko, apa kain kuli meti iyo apa percaya epo- Iko? gawi ise iyo gawi-Ko? ³¹Itak kakah kain sundok kuman mana mo padang gurun, kati iyo sundok tenulis: Dero die -Io kuman roti ngket sorga."³²Ulek Yesus epo dero : "Aku ngulek epo ikam, sebata iyo mba di Musa iyo mie ikam roti ngket sorga, tapi Bapa-Ku iyo mye ikam roti iyo beta ngket sorga, ³³Koe roti iyo ngket Allah iyo doko roti iyo diwa ngket sorga ai iyo miye penyembolum nte denia." ³⁴Ulek dero epo -Io: "Tuhan, die Ko kain roti ene dor-doran."³⁵Ulek Yesus epo dero: "Aku doko roti bolum; ise iyo ulet epo Aku, io anta belo dislau nua, ai ise iyo percaya epo Aku, io belo di anta krengan nua. ³⁶Tapi Aku ngulek epo ikam; walau ikam sundok kito Aku, ikam belo percaya. ³⁷Eka iyo die Bapa epo Aku anta ulet ngompoh Aku, ai ise iyo ulet epo Aku, io belo anta dioding-Ku. ³⁸Koe Aku sundok diwa ngket Sorga mba di nte nggawi iyo petua-Ku, tapi nte nggawi ise iyo petua IO iyo sundok nyemuyu-Aku. ³⁹Endo doko petua IO iyo sundok nyemuyu Aku, yodoko apa eka iyo sundok die IO epo Aku nang keo iyo tinolengo, tapi sampe pengenyuli-Ku mo penundok denia. ⁴⁰Koe ndo doko iyo petua Bapa-Ku, yodoko apa tongku ulun, iyo kito Anak ai iyo percaya epo-Io keo bolum Iyo kden, ai apa Aku memesuli io mo penyudok denia. ⁴¹Ngriten beta ulun Yahudi nau umbang-Io, koe Io ngulek: "Aku doko roti iyo diwa ngket sorga." ⁴²Ulek dero: mba be IO endo Yesus, pea Yusuf ai ine uma Io taka tau? ise moko IO ngulek: Aku diwa ngket sorga?"⁴³Tuing Yesus epo dero: "nang ikam ngriten. ⁴⁴Nok belo erai kongo ulun iyo kuli ulet epo Aku, ena io belo dnurut koe Bapa iyo nyemuyu Aku, ai io anta pesuli-Ku mo pengeka denia. ⁴⁵Keo tenulis lang Bebal nabi-nabi: ai dero anta eka benatuk koe Allh. ai tongku kongo ulun, iyo sundok kringo ai nrima tutui batuk ngket Bapa, ulet epo Aku. ⁴⁶Nau umbang ene belo di nte eran se keo ulun iyo sudok kito Bapa. Io tingan iyo ulet ngket Allah, Io doko iyo sundok kito Bapa. ⁴⁷Aku ngulek epo ikam: sebata iyo ise iyo percaya, io keo penyembolum iyo kden. ⁴⁸Aku doko

roti iyo bolum. ⁴⁹Itak kakah kam sundok kuman manna mo padang gurun tapi dero mate. ⁵⁰Ndo doko roti iyo diwa ngket sorga: ise io kuman iyo, io belo anta mate.. ⁵¹Aku doko roti bolum iyo diwa ngket sorga. ena keo ulun kuman roti ene, io anta bolum sekola-kola iyo, ai roti iyo die -Ku ene yodoko isi-Ku se, iyo anta die-Ku nte penyembolum lang denia. ⁵²Ulun-ulun Yahudi ruok diang dero sama dero ai ngulek: ketimbe nau Io kuli miye isi Io epo taka nte okan. " ⁵³Ulek Yesus epo dero: "Aku ngulek epo iko,sebeta iyo ena ikam belo dikuman isi Anak Manusia ai ngisop Daya-Io, mba di keo iyo bolum lang kopu kam. ⁵⁴Ise iyo kuman isi-Ku ai ngisop Daya-Ku,io keo bolum iyo kden,ai Aku anta memesuli io des penyundok denia. ⁵⁵Koe isi-Ku ene beta-beta pengokan ai Daya-Ku ene beta-beta nte isop. ⁵⁶Ise iyo kuman isi-Ku ai isop Daya-Ku, io nongos lang Aku ai Aku lang io. ⁵⁷Sama kati Bapa iyo bolum nyemuyu Aku ai Aku bolum koe Bapa, ketine lou ise iyo kuman Aku, io bolum koe Aku. ⁵⁸Endo doko roti iyo diwa ngket sorga, mba dikati roti iyo okan itak kakah kam ai dero mate. ise kuman roti endo, io anta bolum sekola-kola iyo." ⁵⁹Eka-eka endo ulek Yesus mo Kapernaum des Io nutui matuk lang lou awa ibadah. ⁶⁰Sundok dero kringo eka-eka ene deo murid-murid Yesus iyo ngulek: "pemesara endo ries, ise iyo klian nempaning iyo?" ⁶¹Yesus mo lang kesong-Io tau, se murid-murid-Io ngriten diang nau umbang ene, ngulek epo dero: "keo be pemesara ene nte ngrusak iman kam?" ⁶²Ai ketimbe nau iyo, ena ikam kito Anak Manusia dombo epo awa Io keo onon ene? ⁶³Roh doko iyo nampa bolum, isi belo beta di keo jodo. pemesara-pemesara iyo ulek-Ku epo ikam ene roh ai penyembolum. ⁶⁴Tapi keo lelu ikam iyo belo percaya."koe Yesus tau ngket tla, ise iyo belo percaya, ai ise iyo anta nyerah Io. ⁶⁵Laju Io ngulek ke ene Aku ngulek epo ikam: nok belo keo erai kongo ulun iyo kuli ulet epo Aku, ena Bapa belo miye iyo epo io. ⁶⁶Ngket ene deo murid-murid-Io iyo belo nyanda ai belo ganggu diang Io. ⁶⁷Ulek Yesus epo duo blas kongo murid-Io; "mba be ikam belo kakan malan lou?" ⁶⁸Tuing Simon Petrus epo-Io; "Tuhan, epo mone kain malan? pemesara-KO ene doko iyo bolum nte kden; ⁶⁹Kain percaya ai tau, se IKO doko iyo brse ngket Allah." ⁷⁰Tuing Yesus epo dero: "Mba di Aku se iyo nyeing ikam iyo duo blas endo? tapi erai kongo ikam iyo jadi iblis." ⁷¹Iyo kno Yesus ene yodoko Yudas pea simon Iskariot; koe io doko iyo anta nyerah Yesus, iyo doko io ene iyo keduo blas murid ene.

Chapter 7

¹sundok ene Yesus malan ngeliling Galilea Io belo kakan malan mbo Yudea ke ulun-ilun Yahudi la lane kan ngempat Io. ²Des ene olo raya ulun Yahudi yodoko olo raya Pondok Daun duni aut³moko ene erai buntung erau buntung Yesus ngulek epo Io "Berangkat ngket mendo po Yudea, apa murid-murid ko lau anta meti gawi gata iyo Aku. ⁴Keo belo keo ulun ngelaku ise masam suni-suni ena Io kaka kenal ulun deo na iko ngawika pekelak ko diri ko epo umum"⁵koe erai buntung eari buntung Yesus se mba lou epo Io ⁶Yesus ngulek oep dero. Des nte oki belo pian sampe tapi nte ngkam keo aso. ⁷Denia belo kuli kekoi se ikam tapi denia kekoi se Aku koe Aku mie kesaksian nau umbang denia se gawi gata dero triaw⁸malan ka ikam po perayaan ene Aku belo pian po perayaan ene koe des nte oki belo pian ampe". ⁹lipa bekesah ketine Yesus netap nongos la Galilea. ¹⁰Tapi lipas erai buntung erai buntung Yesus malan po perayaan lane, Yesus malam lau epo lane belo di trang-terangan tapi suni-suni. ¹¹Ulun ullun Yahudi meto Io lang perayaan ene ¹²keo deo konis-konis ekang ulun nau umbang Io keo iyo nglek iyo ulun buen? Keo lou iyo ngulek "Belo, Ioyo ngetang rayat" ¹³tapi ndok belo erai kango ronu besara trus trang nau umbang Io koe takut se ulun-ulun Yahudi. ¹⁴Des desung ungan ene Yesus sumba po Bait Allah ai mulai ngajar. ¹⁵Ulun-ulun Yahudi jadi enan ai ngulek "ktimbe ulun ndo keo pentau iyo ketine pdahal belo di blajar?" ¹⁶Yesus nuing dero ai ngulek "batuk tutui ku ene mba di keet Aku se? tapi ngket Io iyo ngemuyu Aku. ¹⁷ena keo ulun yo kakan ngelaku pengkakan Allah? Io anta se bantuk tutuiKu? ene ket Allah be atau ngket Aku se. ¹⁸ulun Iyo besara ngket didi se kakan meto mekolai diri iyo se tapi ulun iyo meto mekolai nte Io. Iyo yemuyu iyo? Io kono ai belo keo yo belo kano lang diri yo. ¹⁹Belo be Musa mie hukum taurat epo ikam tapi ndok belo erai kongo ikam patah epo Hukum ise moko iko ngomer nte ngempete Aku? ²⁰ulun deo ene nuing iko senumba roh jahat ise iyo ngomer ngempat iko. ²¹Yesus ngulek epo dero "Aku bayu ngelaku erai bute gawi ai ikam eka heran, ka ngawi gawi lak iko bengong. ²²Musa mie ikam katep sebata iyo ene makse Musa ket itak kakan ai iko ngatep ulun pada olo sabat. ²³Naa ulun senunat des olo sabat apa Hukum Musa belo di nelongar ise moko iko mara epo Aku koe Aku meng kale ulun des olo Sabat. ²⁴Nang ngenderesok iyo melak dresok diang iyo buen. ²⁵Sundok ene ulun-ulun iyo nongos mbo Yerusalem ngule mak bek Io ene ulun iyo kakan Io kakan pate dero ene. ²⁶tapi eti kam Io besara terang-terangan ai dero belo ngulek! ise-ise epo bahe pemimpin-pemimpin ene beta-beta sundok tau se iya doko Kristus. ²⁷tapi taka tau ket mbe ulun ndo ulett ndo belo erai kong ulun tau ngekt mbe iyo ulet koe ene? desung Yesus matuk nutui mbo Bait Allah? Io bisara²⁸Diang oyon ries ikam kenal se Aku ai tau ket mone Aku ulet ? tapi Aku belo di ulet ngket diriKu se tapi Io Iyo nyunyu Aku ene, konoba ikam badi kenal se Io. ²⁹tapi Aku tau se Io koe Aku ulet ke Io ai iyo doko iyo sundok nyunyu Aku³⁰Laju dero ngomer nangop Io tapi ndok belo erai kongo nengkil Yesus koe des te iyo belo pian sampe. ³¹tapi deo ngket ulun-ulun ene persaya epo Yesus dero ngulek! ena Kristus ene ulet mungki n be Iyo ngelaku lengkat kdeo tanda ajaib se iyo sundok gawi ulunndo. ³²ulun-ulun Farisi kringo ise iyo kesa surah ulun deo ene nau umbang Yesus moko Imam-Imam pengutok ai ulun-ulun Farisi nynyu penjaga jaga Bait Allah nte nangop Io. ³³Koe ene Yesus ngulek des nte oki nongos diang toro ile-ile bute asa ai sundok ene Aku anta brangkay epo Io iyo nynyu Aku. ³⁴Ikam meto Aku, tapi Belo kan ruku Ku diyang la mone Aku keo ikam belo di kuli ulet epo lane. ³⁵ulun-ulun Yahudi ene bisara epo sama dero se epo ulun ndo anta brangkat epo ulun Yahudi iyo nongos la ekang ulun-ulun Yunani ai matuk nutui ulun Yunani. ³⁶Ise maksud pemensara Io yo ngulek "Ikam anta meto Aku, tapi belo anta ruku, ai mbo mone Aku keo, ikam belo di kuli ulet epo lane?"³⁷Des olo pngabis, mbo ujung ungan ene, Yesus akat ai bsara diang oyon ries, ulek Io " Ena keo yo krengan buen doko io ngompoh Aku ai isop. ³⁸Ulun yo persaya epo Aku, kati yo ulek Kitab Suci, ngket lang diri io anta smalir pnyemalir danum bolum". ³⁹Maksud Yesus ene yo doko Roh, to anta trima ulun yo persaya epo Ip, Koe Roh ene belo pian dnje koe Yesus belo pian kinomulia. ⁴⁰Des dero nmpering pmnsara ene deo ngket dero ngulek " Ulun endo beta-beta Nabi, ⁴¹ulun yo mak nglek "Io endo doko Kristus" Ulun yo mua ngulek "Mungking be Kristus ulet ngket Galilea? ⁴²Belo be Kitab Suci ngulek se Kristus uket ngket upus Daud ai ngket Betlehem, desa awa Daud bai nongas?"⁴³Laju , terjadi doko belo besengkono epo sama dero koe Yesus. ⁴⁴Tenu-tenu kong engket dero keo yo kakan nangop Yesus, tapi ndok belo erai kongo nengket Io. ⁴⁵Koe ene, pnjaga-pnjaga Bait Allah ene mulik epo imam-imam pngutok ai ulun-ulun Farisi, yo ngunti epo dero "Iese moko ikam belo moit Yesus?" ⁴⁶Pnjaga pnjaga Bait Allah ene nuing, "Ndok belo erai kongo ulun pini bsara kati ulun endo"⁴⁷ulun-ulun Farisi ene nuing dero, "Sundok kona ponotang lou be ikam?" ⁴⁸Bahe keo di erai kongo ngket pemimpin atau ulun farisi yo sundok persaya epo Io? ⁴⁹Tapi, ulun deo yo belo tau Hukum Taurat endo ene terkutuk"⁵⁰Tapi Nikodemus erai kong ngket dero, yo prne nyuruku Yesus, ngulek epo dero. ⁵¹"Ngukum ulun be Hukum Taurat taka ena ulun belo pian kringo hal ene ai ise yo kaku io?" ⁵²Dero muing "Ulun Galilea be iko slidik ai eti ka se belo keo nabi ulet ngket Galilea". ⁵³Sundeok ene, dero eka uli epo low masing-masing

Chapter 8

¹ Yesus malan epo Bukit Zaitun. ² Ma manin Yesus ulet epo Bukit Allah,ulun eka ulet Yesus. Io tungge matuk dero. ³ Semana ulet ahli ahli Torat diang ulun ulun Farisi moit bawe iyo kono slet dero diang ulun song,dero mayak iyo la tenga-tenga. ⁴ Ulek dero epo Yesus " Guru,bawe endo kono slet kain diang song. ⁵ Hukum Torat Musa mrenta taka te nurak bawe masam endo diang batu.ise entang ko, ⁶ Bayu dero ngunti pendapat Yesus padahal tujuan dero kakan nyoba Yesus,apa kuli mesala IO⁷ Dor dero ngunti epo Yesus,akhir iyo Yesus nyuyu,ise iyo belo keo dosa ene iyo nurak ono bawe ene diang batu. ⁸ Bayu Yesus seluot nua ia nulis epo tana. ⁹ Ngeringgo ene,dero ngendikah IO ba-ba diang bawe ene. ¹⁰ Bayu Yesus akat ai bunyal epo bawe ene,o ulun bawe epo mbe dero,belo keo be iyo ngukum iko ?" ¹¹Tuing bawe ene, "belo keo, Tuhan." Ulek Yesus, "Akupun belo kakan ngukum iko, malan ka, ket tempondo nang nampa dosa nua. Yesus Wala Denia¹². Yesus Ngulek diang ulun deo ene," ulek Io "tongku kongo yo nyarak Aku, belo anta malan lang seom, masa gena empun wala bolum. ¹³ Nua ulun Farisi ngulek epo Yesus, " Iko ngesah, ngentang Iko se be, moko kesah ko ene belo beta¹⁴Yesus nuing te dero, bisa iyo "walau ngesah Aku se, kesahku ene beta, koe aku tau ngket mone tapi ikam belo tau ngket mone aku ulet ai epo mone Aku malan. ¹⁵iko ngukum kati sara denia sedang aku belo ngukum. ¹⁶ena Aku ngukum, hukuman-Ku ene beta. Koe Aku belo ngukum sederai, tapi diang Bapa Io ngirim Aku. ¹⁷Malah lang Kitab Taurat kam, ye nulis se kesah duo ulun ene beta. ¹⁸Aku ngesah Aku se, diang Bapa iyo ngirim Aku te bekesah nau Ku¹⁹Moko dero ngunti epo iyo, mone Bapa ko, tuing Yesus, iko belo kenal Aku ai Bapa Ku, ena iko kenal Aku, iko kenal lou sebapa Ku. ²⁰Kesah surah endo Yesus ngulek iyo dempet awa persembahan pas iyo matuk la Bait Allah, tapi belo keo iyo nanggap iyo, ke belo memang pian des iyo. ²¹Yesus ngulek nua epo dero, Aku bukan ngendikah ikam diang ikam meto AKU, tapi ikam anta mate lang dosa epo mone Aku kakan malan, ikam belo kuli ulet. ²²Nua ulun-ulun Yahudi ene bunyal " bahe iyo kakan mentiu, epo mone aku malan, ikam belo kuli ulet. ²³Doko nua, Yesus bunyal epo dero "ikam ket iwa tapi Aku ket ombo, ikam ket denia, tapi Aku mak se ket denia endo. ²⁴Koe ene, Aku ngulek nua epo iko, se iko mate lang dosa dosa ko ena iko belo percaya epo Aku, iko tau mate lang dosa dosa ko. ²⁵Dero ngunti nua epo Yesus "ise iko" sa nuing dero" Aku sundok ngulek epo ikam ket tela aut. ²⁶ Deo iyo kakan ulek Ku nau kam ene diang nyempeti, tapi iyo ngirim Aku, ene beta iyo tempaning Ku ket Io ene. Ene lah yo senampe epo denia. ²⁷Dero belo paham, pas Yesus bunyal soal Bapa. ²⁸Ke ene, Yesus ngulek, pas ikam mekkombo Yesus, waktu enelah ikam tau se Aku ene Tuhan. Jadi belo keo gawi gata ku ene, iyo enelah Aku bunyal sesuai diang iyo batuk Bapa epo Aku. ²⁹Diang yo ngirim Aku keo sama-sama diang Aku, iyo belo pini ngendikah aku ba ba , koe aku gawi iyo sengkono diang petua iyo. ³⁰Des Yesus nyampe ene, deo ulun persaya epo Tuhan. ³¹Nua, Yesus ngulek epo ulun ulun Yahudi, iyo persaya epo Iyo, ena ikam tetap lang FirmanKu, ikam beta-beta muridKu. ³²Diang ikam kakan tau Kebenaran diang Kebenaran ene te ngemberse ikam. ³³Dero nuwing, kain endo keturunan Abraham, belo bini ente batak ise macam moko iko ngulek ikam kakan bebas? ³⁴Yesus muwing te dero ene, belo sala aku banyak epo ikam tiap ulun iyo nampa dosa ene te batak dosa ³⁵ulun iyo te batak ene, belo di nongos matan lang keluarga balo, tapi ena pea matan nongos lang keluarga ³⁶Jadi ena pea ngembrese ikam, ikan beta-beta brese. ³⁷Aku tau, se ikam ene keturunan Abraham, tapi ikam ene kakan ngempate Aku, koe ikam belo nerima iyo batuk Ku ene. ³⁸Aku ngesah pengitanKu, kola diang Bapaku, ketine lou ikam, genawi iyo ise ise iyo dingo kam ket Bapa kam. ³⁹dero nuing diang bunyal epo Tuhan, Abraham ene, bapa kain "tuing Yesus" ene ikam keturunan Abraham, arus ngawi ise, gawi Abraham. ⁴⁰Tapi ikam kakan ngempate aku ulun iyo nyampe Kebenaran, Iyo aku kringo ket Tuhan. ⁴¹Ikam ene cuma nggawi ise gawi Bapa kam. Dero bunyal epo Tuhan, kain belodi kinomekus ket perzinahan, kain empun erai Bapa, Io ene Allah. ⁴²Yesus bunyal epo dero "ene memang Allah ene Bapa kam, ikam kosang se Aku, koe Aku ulet ket Tuhan diang Aku ulet belo di petuaKu se, Tuhan iyo ngirim Aku. ⁴³moko Ikam belo ngerti, iyo bunyal ku ene. Ene ke ikam belo kuli nemparin Firman Ku. ⁴⁴ikam ulet kem Bapa kam, iyo ene setan diang iko kakan ngawi iyo pengkakan-pengkakan Bapa kam. iyo pengempate ket ono-ono diang belo nggop epo kebenaran, belo keo kebenaran lang diri iyo, ena memang iyo bunyal eta, io ngulek ket watak iyo se ke iyo penampa eta diang bapa penampa eta. ⁴⁵Keo ene Aku, ngesah Kebenaran epo ikam, ikam belo persaya epo Aku. ⁴⁶Ise lelu ikam kuli ngentang se Aku berdosa? ena memang aku ngulek kebenaran, ise moka ikam belo persaya epo Aku? ⁴⁷ise iyo ulet ket Bapa, ia nemparing firman Allah. Ene lah moko ikam belo, kuli nemparing, ke ikam belo ket Allah. ⁴⁸ulun-ulun Yahudi nuing Yesus diang bunyal epo iyo beta be ena kain ngulek se iko ene ulun Samaria ai ⁴⁹Yesus nuing "Aku belo di senumban, koe Aku mekolai Bapaku tapu iko belo mekolai aku. ⁵⁰Tapi Aku belo meto kemuliaan te oki se keo erai iyo meto iyo nyempeti ⁵¹diang Beta beta iyo, Aku ngulek epo iko, tiap ulun iyo nyaya FirmanKu, io belo anta kito mate. ⁵²ulun ulun Yahudi ene bunyal epo Yesus "tempo endo kain tau se Io memang senumbar roh alus, keo Abraham diang nabi-nabi ene sundok mate. tapi iko bunyal, tongku ulun io nyata firmanKu io belo anta kakan kiso mate. ⁵³Olai se Abraham be iko? bapa kain iyo sundok mate nabi-nabi lou sundok mate, diang ise Iko

nyamakan diri Ko.⁵⁴ Yesus nuing "ena Aku mekolai Aku se, KemuliaanKu ene belo kea arti, Bapaku iyo lah iyo mekolai Aku, iyo nau umbang Io ikan ngulek.⁵⁵ Tapi ikam belo kenal Io tapi Aku kenal Dia ena belo kenal, Aku penampa eta kati ikam tapi Aku kenal Io, ai ngaya Firman.⁵⁶ Bapako Abraham ego ke kakan meti olo Ku, Io sundok kito iyo ai ego.⁵⁷ Laju ulun ulun Yahudi ene ngulek epo Io umurko belo pian limo pulu taon. tapi iko sundok kito Abraham.⁵⁸ Ulek Yesus epo dero, beta-beta aku ngulek epo ikan onom Abraham keo, Aku sundok keo.⁵⁹ ke ene dero ngalek batu, te nurak Io, tapi Yesus nyona, ai ngendikah Bait Allah.

Chapter 9Ulun Posa Ngket Nekus Ale

¹ Montuk Yesu malan, Io kito ulun posa ngket kino mekus. ² Murid-murid Yesus ngunti epo Io, "Yesus ise ulun yo berdosa, ulun ene atau ulun tuo io, moko io kino mekus posa?"³ Tuing Yesus, "Makse di io atau ulun tuo io yo berdosa, melainkan apa gawi gata Allah pino kelak lang io. ⁴ Taka harus nggawi gawi-gata Io yo ngutus Aku tebulu olo aso molo; ena malom ulet, belo keo ulun kuli begawi. ⁵ Tebulu Aku aso lang denia, Akulah wala denia."⁶ Sundok bunyal ketina, Yesus nepus epo tana bayu mobo iwoy Io diang tana, laju mese epo mato ulun ene, ⁷ ai ngulek epo io, "Malan, bui kompu tonga ko la kolam Siloam." Siloam arti yo "nutus". Laju, ulun ene malan, mui kompu tonga io, ai io mulik diang meti. ⁸ ulun-ulun dempet lou io ai dero pini kito io des aso posa ngulek, "Makse beh ulun endo yo biasa tunge ai ngemis ene?"⁹ keo tenga yo ngulek, "O'o, io memang pengemis ene." Yo mak ngulek, "Makse, io kerai nau tingen diang pengemis ene." Tapi, ulun yo posa ene nde ngulek, "Akulah pengemis ene."¹⁰ Bayu, ulun-ulun ene ngunti epo io, "Ketimbe mato ko kuli meti?"¹¹ Tuing ulun ene, "Ulun yo nan karan Yesus ene mobo tana ai mese epo matoku. Laju, Io ngulek epo aku, 'Malan epo siloam ai bui kompu tonga ko', jadi aku malan ai mui kompu tonga, bayu aku kuli meti."¹² Dero mere epo iyo, "La mone Ulun ene?" Tuing io, "Aku belo tau."¹³ Laju dero moit ulun yo posa ene ro ,epo ulun Farisi ¹⁴ Montuk olo Yesus mobo tana aingembuka ulun ene mbo olo Sabat ¹⁵ Ulun Farisi ene ungunti nua po ulun ene ketimbe nau io moko kuli meti . Io ungulek epo dero " Io mese tana benobo ene po matoku, ai aku mui kompu tongaku bayu aku kuli meti" ¹⁶ Koe ene, tenu-tenu ulun Farisi ene ngulek, "Ulun ene belo di ket Allah koe iyo belo patuh epo olo sabat." Yo mak ngulek, "tapi, mungkin beh ulun berdosa kuli nampa tanda ajaib kati endo?" mulai ngket ene dero salo tangki oli. ¹⁷ Jadi dero ngunti nua apo ulun posa ene, "Ise san ko nau Io ene koe Ie sundok mekolat mato ko?" Ulun ene nuing, "Io ene Nabi"¹⁸ Ulun-ulun Yahudi ene nokon belo persaya epo io, se ulun ene beta posa nde tapi tempo ndo kate meti, ampe dero momba ulun tuo ngket ulun yo tempo ndo kate meti ene, ¹⁹ ai ngunti epo dero, "pea ko beh endo, yo ulek ko posa ngket kino mekus? Ena ketine, ketimbe nau io tempo ndo kate meti?"²⁰ Ulun tuo io nuing dero ai ngulek, "Kain tau se io pea kain, ai io posa ngket kino mekus, ²¹ tapi ketimbe nau io tempo ndo kate meti, kain belo tau; atau ise ulun yo sundok mekolat mato io, kain belo tau. Unti ko ka epo io, io sundok tuo aut; io kuli bunyal nte io se."²² Ulun tuo io ngulek kati ene koe dero takut epo ulun-ulun Yahudi. Koe, ulun-ulun Yahudi ene sundok sepakat, se ise ka ulun yo nganket Yesus ene Kristus, kakan tinom baling ngket sinagoge. ²³ Enelah yo nampa ulun tuo io ngulek, "Io sundok tuo aut, unti ka epo io."²⁴ Jadi, nte keduo derang yo ulun-ulun Yahudi momba ulun yo posa ene nde, ai ngulek epo io, "Die ko kemuliaan nte Allah, kain tau se Ulun ene bedosa"²⁵ Io nuing, "Beta be Ulun ene ulun bedosa atau belo, aku belo di tau; erai bute pentau ku, des ene aku posa, tapi tempo ndo aku kate meti."²⁶ Dero ngulek epo io, "Ise gawi Io epo iko? Ketimbe nau Io mekolat mato ko?"²⁷ Io nuing dero, "Aku sundok ngulek epo ikam, tapi ikam belo kakan keringo yo; ise moko ikam kakan ngeringo yo nua? Ikam kakan jadi murid-Io lou beh?"²⁸ Laju, dero ngina io ai ngulek, "Iko ene murid Ulun ene, tapi kain endo murid-murid Musa. ²⁹ Kain tau se Allah sundok bunyal epo Musa, tapi nau umbang Ulun ene, kain belo di tau ngket mone pengulet Io!"³⁰ Ulun ene nuing ai ngulek epo dero, "Aneh beta ena iko belo tau ngket mone pengulet Io, padahal Io sundok mekolat mato ku. ³¹ Taka tau se Allah belo nempaning ulun bedosa, tapi ise ka ulun yo takut epo Allah ai nggawi petua-Io, Allah nempaning io. ³² Ngket bai sampe tempo ndo, belo pini keringo keo ulun mekolat mato ulun yo posa ngket kino mekus. ³³ Ena pengulet Ulun ene makse ngket Allah, Io belo anta kuli nggawi ise-ise."³⁴ Ulun-ulun Yahudi ene nuing ai ngulek epo io, "Iko kino mekus ponu diang dosa, tapi iko kakan nutui matuk kain?" Laju, dero ngusa ulun ene. ³⁵ Yesus keringo se ulun-ulun Yahudi ene sundok ngusa ulun posa ene; des Yesus ruku diang io, Yesus ngulek, "Beta beh iko percaya epo Pea Ulun?"³⁶ Ulun ene nuing, "Ise si Io ene, Tuhan, apa Aku Persaya epo-Io?"³⁷ Yesus ngulek epo io, "Iko sundok kito Io. Io ene yo desung bunyal diang iko."³⁸ Ulun ene nuing, "Tuhan, aku persaya!" Laju, io nyongkok mbo onon-Io. ³⁹ Yesus ngulek, "Nte penghakiman Aku ulet epo denia endo apa dero yo belo kito, kate kito ai dero yo kate kito, jadi posa."⁴⁰ Tenu-tenu ulun Farisi yo keo mbo dempet-Io keringo nau umbang ene, ai ngulek epo-Io, "Bele beh kain posa lou?"⁴¹ Yesus ngulek epo dero, "Ena ikam posa, ikam belo keo dosa; tapi koe ikam ngulek, 'kain kate kito', dosa kam nokon keo."

Chapter 10

¹Yesus ngulek, "Diang beta-beta yo, Aku mere epo iko, ulun yo sumba epo reban domba belo tete jawong, tapi mengket tete boyan yo mak, ulun ene pengako ai perampok. ²Tapi, ulun yo sumba tete jawong, io adalah empu domba. ³Nte io, pendurung jawong ngengaw jawong, laju domba-domba keringo oyon io, laju io momba domba-domba mpun io se diang karan dero, ai ngayak dero epo baling. ⁴Sundok ene io nembaling ndok eka domba yo ene, io malan la onon dero ai domba-domba yo ene nyarak io koe dero tau oyon io. ⁵Ulun yo mak belo anta sarak dero, tapi dero malah makat ngket io koe dero belo tau oyon ulun yo mak. ⁶Pemerawet enelah yo ulek Yesus epo dero, tapi dero belo paham ise yo bayu surah Yesus epo dero ene. ⁷Koe ene, Yesus ngulek nua epo dero, "Beta-beta yo, Aku mere epo iko, Akulah jawong epo domba-domba ene. ⁸Ise ka ulun yo ulet onon Aku ene pengako ai perampok, tapi domba-domba belo ngeringo dero. ⁹Akulah jawong. Ena keo ulun sumba tete Aku, io sinolamat, ai baling sumba ka io, ai ruku diang jaba dikut. ¹⁰Pengako ulet pulun nte ngako, ngempate, ai mentomo; Aku ulet apa dero empu bolom, ai ngempu yo diang ruwak ruwaw. ¹¹Akulah gembala yo buen; gembala yo buen mie bolum yo nte domba-domba. ¹²Ulun yo nupa, makse di gembala, makse empu domba-domba ene, semana kito sengkalau ulet, io ngedikah domba-domba ene ai monsit; sengkalau ene nerkam ai nyetuar domba-domba ene. ¹³Io monsit koe io nupa io belo di nyanda diang domba-domba ene. ¹⁴Akulah gembala yo buen. Aku tau se domba-domba-Ku ai domba-domba-Ku tau se aku ¹⁵sama kati Uma tau se Aku ai Aku tau se Uma; ai Aku mie bolum-Ku nte domba-domba ene. ¹⁶Aku keo lou domba-domba yo mak* yo makse ngket reban endo; Aku harus moit dero lou, ai dero laju ngeringo oyon-Ku; ai dero kerai diang erai gembala. ¹⁷Koe ene Bapa kosang se Aku, koe Aku mie bolum-Ku apa aku kuli ngalek yo nua. ¹⁸Ndok belo keo erai kongo sundok ngalek yo ngket Aku, semakse Aku se yo mie mone yo sengkono diang pengkakan-Ku se. Aku keo hak nte mie bolum-Ku, ai aku keo lou hak nte ngalek yo nua. Endolah perenta yo Aku kuli ngket Uma-Ku." ¹⁹Sindai nua, keo perpecahan mbo ekang ulun-ulun Yahudi koe penyurah Yesus ene. ²⁰Deo ngket dero yo ngulek, "Io ene kono gawi uwok, ai kuto. konombe ikam ngeringo se Io?" ²¹yo mak ngulek, "Ine makse di penyurah ulun yo kono gawi uok. Kuli beh uok ngebuka mato ulun posa?" Yesus ai Uma ene Erai. ²²Des ene, desung olo raya Penahbisan mbo Yerusalem. Des ene desung musim rongin, ²³ai Yesus desung malan lang Bait Allah, mbo Serambi Salomo. ²⁴Laju, ulun-ulun Yahudi bekumpul mbo geliling Io ai mere apo-Io, "Ampe kola Iko belo nyanda bolum kain yo bengong endo? Ena Iko Kristus, ulek diang terus terang epo kain." ²⁵Tuing Yesus epo dero, "Aku sundok mere epo ikam, tapi ikam belo persaya. Gawi gata yo tanpa Ku lang Uma-Ku, ene yo mie kesaksian nau umbang Aku. ²⁶Tapi, ikam belo di persaya koe ikam makse di domba-domba-Ku. ²⁷Domba-domba-Ku, Aku tau se dero ai dero nyarak Aku. ²⁸Aku mie bolum yo kekal epo dero, ai dero beo di anta tomo; ai ndok belo erai kongo yo kuli ngerebut dero ngket kayang-Ku. ²⁹Uma-Ku, yo sundok mie dero epo Aku, olai se yo mak, ai ndok belo erai kongo kuli ngerebut dero ngket kayang Uma. ³⁰Aku ai Uma ene erai." ³¹erai derang nua, ulun-ulun yahudi ngalek batu nte nurak Yesus. ³²Tapi, Yesus ngulek epo dero, "Aku sundok nutui epo iko deo gawi gata buen ngket Uma, gawi gata yo mone ngket ene yo nampa iko kaka nurak Aku diang batu?" ³³Ulun-ulun Yahudi ene nuing Io, "Makse di koe gawi gata buen moko yo kain kakan nurak Iko diang batu, tapi koe hujat; ai koe Iko, yo pulun yo ulun biasa, nampa diri-Ko jadi Allah." ³⁴Yesus Nuing dero, "Belo beh sundok keo lang Bebal Taurat, 'Aku sundo berfirman, Iko ene allah?' ³⁵Ena Allah mere se dero yo ngangkit firman ene 'allah', padahal Bebal Berse belo kuli benatal, ³⁶ene beh yo ulek ko tentang Io yo sundok Uma temberse ai utus epo lang denia, 'Iko ngehujat', koe Aku ngulek epo iko, 'Aku Pea Allah?' ³⁷Ena Aku belo ngeaku gawi gata Uma-Ku, nang persaya epo Aku. ³⁸Tapi, ena Aku ngelaku gawi gata ene, walau iko belo persaya epo Aku, persaya ka epo gawi gata ene apa iko tau ai paham se Uma lang Aku, ai Aku lang Uma." ³⁹Erai derang nuda, dero nyoba nangop Yesus, tapi Io lolos ngket dero. ⁴⁰Laju, Yesus malan nua kentas lowak Yordan epo awa Yohanes desene tela ngebaptis ai Yesus nongos la lane. ⁴¹Deo ulun ulet epo Io ai ngulek, "Walau Yohane belo ngelaku budah sindai tanda ajaib, tapi ise yo ulek Yohanes nau umab Ulun endo beta." ⁴²Ai, deo ulun yo jadi persaya diang Io mbo lane.

Chapter 11

¹ Keo ulun song yo desung keroton, karan yo Lazarus ngket Betania, kampong Maria diang erai buntung io, Marta. ² Maria endolah ulun bawe yo pini ngelenga botis Yesus diang lenga buen kewo laju mulai musas botis-Io makai balo io se, yo mone erai buntung yo song, Lazarus, des ene keroton. ³ Moko ene, kedua bawe yo erai buntung ene ngirim kabar epo-Io, yo surah yo, "Tuhan, ulun yo kosang Ko ene desung keroton" ⁴ Berbaya, des Yesus keringo kabar ene, entang Io, "Roton ene belo di anta ngempate, tapi nte menyatakan kemuliaan Allah apa Pea Allah dimuliakan tete yo." ⁵ Yesus kosang memang diang Marta ai erai buntung yo bawe, ai Lazarus. ⁶ Jadi, desa Yesus keringo Lazarus keroton, Io sengaja nongos 2 olo montuk awa Io tela. ⁷ Sundok ene, Yesus mere epo murid-murid-Io, "Man taka epo Yudea nua." ⁸ Entang murid epo-Io, "Guru, ulun-ulun Yahudi belo olah endo berusaha nurak Io diang batu, aso kakan beh iko epo lane?" ⁹ Tuing Yesus, "Kan keo 12 jam lang erai olo? ena ulun malam mbo tenga dotu, io belo anta tutur koe io kito wala denia endo." ¹⁰ Tapi, ena ulun malan mbo olo malom, io pasti tutur koe wala ene belo keo mbo io." ¹¹ Sundok Yesus besurah ketine, Io ngulek epo dero, "Teman taka, Lazarus, sundok turui, tapi Aku kakan epo daroh nte ngeduko io." ¹² Murid-murid ngulek epo-Io, "Tuhan, ena io sundok turui, io kakan ale." ¹³ Yesus sebenar yo besurah terntang pengenate Lazarus, tapi otus murid-murid Io besara soal turui lang arti semole. ¹⁴ Koe ene, Yesus nguleh terus terang epo dero, "Lazarus sundok mate," ¹⁵ ai Aku gawal ka nte kepentingan ikam, Aku belo keo la lane apa ikam persaya. Jadi, man taka malan epo io." ¹⁶ Likas ene, Tomas, yo nulek se Didimus, ngulek epo murid-murid yo mak, "Man taka malan lou apa ta kuli mate diang-Io." ¹⁷ Des Yesus sampe, Io kito Lazarus sundok 4 olo aut lang kubur. ¹⁸ Betania ene tolu kilu koroh yo ngket Yerusalem. ¹⁹ Deo ulun Yahudi ngeruku Maria diang Marta, nte nengkuen pengenanam dero koe nau erai buntung dero ene. ²⁰ Des keringo se Yesus sundok ulet, Marta malan ngeruku Io, tapi Maria nongos la belai. ²¹ Marta mere epo Yesus, "Tuhan, soba ena des ene lko keo la mendo, erai buntungku belo anta mate." ²² Tapi aku tau tempondoise ise ka' yo tindu ko engket Allah, Allah kakan mie iyo nte engko." ²³ Ulek Yesus epo io, "Erai buntung ko pasti uat yo se." ²⁴ Tuing Marta epo Io. "Aku tau io pasti bangkit des olo kebangkitan mbo penyundok zaman. ²⁵ ulek Yesus epo iyo, "Iso yo persaya epo Aku, iyo akan bolum tontan iyo sundok mate. ²⁶ setiap ulun yo bolum diang persaya epo aku, belo anta pini mate. persaya be ikam diang hal endo?" ²⁷ ulek Marta epo-Io, "ya Tuhan, aku persaya se Ikolah Kristus Pea Allah yo ulet epo denia." Yesus Nangis ²⁸ Sundok ngulek ketine marta malan epo momba maria, eraibuntung io, bunyal dero bah-bah, "Guru keo la mendo, Io momba iko." ²⁹ Kringo ene Maria nerebe akat nyeruku Yesus. ³⁰ Des ene, Yesus belo pian ampe la kampong ene, tapi aso mbo awa marta nyeruku-Io. ³¹ Ulun-ulun Yahudi yo Njangan Maria mbo belai ene, desung ngibur io, kito se Maria nerebe akat malan po baling; dero nyarak io koe otus dero io kakan epo kubur ente ngendarin la lane. ³² Reda ampe ka mbo awa Yesus, kito se Yesus, nyongkop ka io ono botis-Io, Peles bunyal epo-Io, "Tuhan soba iko la mendo, erai buntungku pasti belo dianta mate." ³³ Des Yesus kito Maria nangis diang ulun-ulun Yahudi yo diang io nangis lou, Nyaro kesong-Io. ³⁴ Unti Yesus, la mone pelumbi kam se Lazarus?" Tuing dero: "Tuhan, dido, eti ko tah!" ³⁵ Nangis doko Yesus. ³⁶ Ulek ulun-ulun Yahudi "eti kam teh, kosang se Io epo Lazarus!" ³⁷ Tapi keo tenu kongo ket dero mgulek "belo kuli be Io yo sundok ngingkang mato ulun posa ene nampa lasarus badi mate?" Lazarus pino nyuli ngket mate. Lazarus Pino Nyuli Ngket Mate ³⁸ Yesus, nyoru nua lang kesong Io, malan epo kubur. Kubur ene lang liang, yo bowa liang ene tenokom makai batu. ³⁹ Ulek Yesus, "Loli batu ene!" Marta, erai buntung ulun yo mate ene, ngulek epo Io, "Tuhan, tempo ndo pasti sundok dat kewo yo koe sundok 4 olo io mate." ⁴⁰ Yesus nuing io, "Kan sundok bere Ku epo iko se ena iko persaya, iko kate meti kemuliaan Allah?" ⁴¹ Jadi, dero ngangkat batu ene. Likas ene, Yesus donga ai bunyal, "Uma, Aku Bersyukur epo Iko, koe Iko nempaning Aku. ⁴² Aku tau se Iko selalu nempaning Aku, tapi koe ulun-ulun yo akat mbo geliling-Ku endo, Aku nyurah hal ene apa dero persaya se Ikolah yo sundok ngutus Aku." ⁴³ Sundok ngulek ene, Yesus momba diang oyon ries, "Lazarus, baling!" ⁴⁴ Ulun yo sundok mate ene baling, kayang ai botis yo aso bebolit diris kafan, ai wae io aso betokom diris kafan. Yesus ngulek epo dero, "Osu diris ene ngket kompu yo ai koe ka io malam." Petua Nte Ngempate Yesus ⁴⁵ Ulun-ulun Yahudi yo ulet epo nuntun Maria, kito ise yo sundok Yesus tanpa, jadi persaya epo Io. ⁴⁶ Tapi, tenga io ngket dero ngompoh ulun-ulun Farisi peles mere apo dero ise yo sundok tanpa Yesus. ⁴⁷ Jadi, imam-imam pengutok ai ulun-ulun Farisi nampa bepekat Sanhedrin ai ngulek, "Ise yo anta nte taka gawi? Koe, Ulun endo deo nampa tanda ajaib. ⁴⁸ Ena taka belo nyanda epo Io terus kati endo, eka ulun kakan persaya epo-Io ai ulun-ulun Roma nindo ulet nte ngerebut awa endo ai bangsa taka." ⁴⁹ Tapi, erai kongo ngket dero yo nan karan Kayafas, yo jadi imam olai lang taun ene, bunyal epo dero, "Ikam belo tau ise-ise, ⁵⁰ atau nimbang-nimbang se alo erai kongo mate nte erai bangsa, dari pada erai bangsa tomo." ⁵¹ Io ba di bunya ngket io se, tapi sebagai Imam Olai taun ene, io bernubuat se Yesus anta mate nte bangsa ene. ⁵² Ai, makse di pulun nte bangsa Yahudi tingin, tapi nte mekera i pea-pea Allah yo mupus munal. ⁵³ Moko ene, ngket elo ene, dero sepakat nte ngempate Yesus. ⁵⁴ Koe ene, Yesus belo malan melak balo oli la ekang ulun Yahudi, tapi Io

malan ngket lane epo wilayah dempet jaba padang epo kota nan karan Efraim; ai Io nongos la lane diang murid-murid-Io.⁵⁵ Des ene, Paskah ulun Yahudi sundok dempet, ai deo ulun ngket wilayah ene malan epo Yerusalem onon Paskah nte ngeberse kesong dero.⁵⁶ Laju, dero meto Yesus ai bunyal epo yo mak ulak akat mbo dalom bait Allah, dero bako unti, "Ketimbe san ko? mba di anta ulet beh Io epo ungan endo?"⁵⁷ Keo Se imam-imam pengutok ai ulun-ulun Farisi sundok nembaling perenta se ena keo ulun yo tau la mone Io nongos, ulun ene harus ngelapor apa dero kuli nangop Io.

Chapter 12

¹Onom olo onon paskah, Yesus ulet epo betania, awa penongos Lazarus, yo pesuli Yesus ket mate. ²La mene, tenampa jamuan nte Yesus, ai Marta nte ngelayan, keo mne erai kongoulun io lumpat kuman diang Yesus karan io Lasarus. ³ai Maria ngalek tenga jbul lnga narwastu brse io rarang uman io, laju ngoser io po botis Yesus ai ngisu io diang balo io; ai kewe lnga ene nglengengai erai lou. ⁴Tapi Yudas Iskariot, erai murid Yesus yo anta ngianat Iyo, ngulek, ⁵"Ise moko lenga buen kewe ene blo jenual tolu jatus dinar apa sen iyo benagi epoulun kao?" ⁶Ene ulek iyo belo ke iyo perhatian epo nasibulun belo, tapi koe io ene pengako; io jono ngalek sen lang kas yo gop io se. ⁷ulek Yesus; koe ka io nggawi ktine, io mkenop olo pengnate-Ku. ⁸koeulun-ulun kao dor diang ikam, tapi Aku mba dikeo dor diang ikam⁹Deoulun Yahudi keringo, se Yesus keo la lane ai dero ulet belo ke Yesus tingan, tapi kakan meti Lazarus io pino suliket mate. ¹⁰ai imam imam be pekat kakan ngempate Lazarus lou. ¹¹Koe Lazarus ene, deo nampaulun Yahudi ngendikah dero, ai persaya epo Yesus. ¹²olo da ne, pasulun deo ulet epo ngerayaungan keringo, se Yesus aso la tenga boyan epo tadah Yerusalem. ¹³Dero ngalek daon palem, ai malan nyambut IO, diang oyon riyes. "Hosana. Di berkatilah IO, iyo ulet lang karan Tuhan. "Raja Israel". ¹⁴Yesus ruku erai kukuy keledai burok, ai IO dombo epo keledai ene. kati keo tenulis. ¹⁵"Nang takut, hai putri Sion. eti ka, Raja kam ulet, tungge ban anak keledai, v16 Tela yo, murid-murid io belo paham hal ene, tapi likas Yesus kinomulia, kenoplah dero, se nas ene tentang io, diang ise yo sundok genawi ke dero ene nte io lou¹⁷Jadiulun deo yo diang Yesus des io momba Lazarus baling ket kubur nembolum iyo ket pegenate, nyerita tentang io. ¹⁸Koe ene, deoulun ulet nyambut Yesus koe dero keringo Iolahyo nampa Mujizat ene. ¹⁹entangulunulun farisi bekesah po sama dero, "Eti kam se belo berhasil petua taka ene. melak memang se eka denia nyarak io. Yesus mere pegenate io²⁰des Marta, kringo se Yesus ulet, io malan nyuku io, tapi Maria nongos la blai. ²¹Jadi Marta epo Yesus; Tuhan ena iko keo mo mndo erai buntung ku ene masagena belo di mate. ²²tapi ndo aku tau, se Allah ene mie epo iko eka-eka ene io penindu Ko epo-io. ²³Yesus nuing te dero, ulek IO, ampe des aut. Anak Manusia pinokomba. ²⁴Aku ngulek epo ikam, sebeta iyo ena bigi gandong ena belo nulo ai mate, iyo tetap erai bigi tingan, tapi ena iyo mate, iyo anta deo bua. ²⁵tuang Yesus; Aku doko pengenyuli ai bolum; ise io percaya epo Aku, io anta bolum tontan io sundok mate, ²⁶enaulun nglayan, io arus lumpat Aku; mne Aku keo, mne lou playan-Ku keo; enaulun nglayan Aku, Bapa anta ngenun io." Yesus ngesah nau pegenate-io. ²⁷Tempondo nyoru pengananam kesong-Ku. Ise okin ulek? 'Bapa awat Aku ket tempondo?' belo, nte ene memang Aku ulet tempondo ene. ²⁸Bapa, kinomulia karan Ko!" terdingo oyon ket Sorga: "Aku sundok memulikan karan-Ku tapi aku kakan memulyakan yo nua. ²⁹Ulun deo yo akat la mene yo kringo ngulek se ene oyon nayu, yo mak ngulek se "keo malaekat bunyal diang io!" ³⁰Yesus nuing diang ngulek. suara ene belo di nte oki, tapi ente kam. ³¹Tempo endo desung ngadili denia. ³²ai ena AKU pinokombo, aku narekulun eka eka epo ulet epo AKU". ³³Endo ulek IO, te mekelak timbe nau IO ena mate³⁴Ulun deo ene nuing epo IO. "kain sundok keringo ket ukum Taurat se Kristus keden bolum, ise nau iyo, IO ngulek'Anak Manusia ene belo kate belo pinokombo, 'ise sih Anak Manusia ene. ³⁵Ulek Yesus epo dero toro idik idik pa ene keo diang taka. persaya epo IO apa seom ene belo ngendali taka. 'keulun iyo malan lang seom, belo tau epo mone iyo malan. ³⁶Persaya ka epo pa ene, apa ikam jadi pea terang. "sundok bunyal ene, Yesus malan nyona ekang dero. ³⁷Walau Yesus ngelaku dao tanda ajaib la onon dero, dero nokon belo percaya epo - io, ³⁸apa sengkono pemesara yo sampe Nabi Yesaya, "Tuhan, ise io percaya epo penyampe kain ? ai, epo ise kayang Tuhan io pinokelak?" ³⁹ise moko dero belo persaya ke Yesaya ngulek lou, ⁴⁰"IO nempasa mato dero diang mekoro kesong dero, apa dero nang kito diang mato dero ai paham diang kesong dero, apa mulik, ai IO mekale dero. ⁴¹Yesaya ngulek eka nau ene io sundok kito kmulia Yesus ai io ngesah nau umbang io. ⁴²walau ktine deo lou pengutok-pengutok io percaya epo Yesus, ai koe takut epoulunulun farisi, dero belo di ngulek yo beta-beta koe takut tinombaling ngket sinagoge. ⁴³koe dero gawal kono puji samaulun se kono puji ngket Allah. tutui batuk Yesus anta nyempeti nauulun⁴⁴Yesus bunyal ries epo dero, "ise iyo persaya epo AKU, iyo belo persaya epo Aku. tapi epo IO, iyo ngirim AKU ⁴⁵ise iyo kito AKU, iyo kito IO, iyo ngirim Aku⁴⁶Aku sundok ulet epo lang denia jadi wala. apa tongkuulun yo persaya epo Aku, belo dinongos lang seom. ⁴⁷Ena ikam nempaning pemesara -Ku, tapi belo digenawi ke iyo, Aku belo jadi hakim iyo. koe Aku ulet badi te ngakim denia, tapi nte nyelamat denia. ⁴⁸Ise yo nolak Aku diang belo nerima pemensara-Ku, anta firman yo ulek-Ku ene yo ngukum io des olo kiamat⁴⁹koe Aku besara belo ngket petua Ku se, tapi ngket Bapa yo nyemuyu Aku, Iyo lah yo merenta Aku nte ngulek ise yo oki kesah diang ise yo Oki sampe. ⁵⁰ai Aku tau se perenta Iyo se enelah bolum yo keden. ene doko ise yo sundok ulek-Ku, sama kati ise yo sundok difirmankan Bapa epo Aku

Chapter 13

¹Onon olo raya Paskah, Yesus tau se des-Io sundok sampe se Io anta ngendikah denia endo diang Bapa, sundok nengkosangmpun Io Se la denia, Io nengkosang dero sampe sundok. ²kola-kola kuman malom, setan sumba lang kesong Yudas Iskariot pea Simon, nte ngempate Yesus. ³Yesus, tau se Bapa sundok nyerah nau umbang ene epo-Io, se Io ulet ngket Allah, ai uli epo Allah, ⁴Io akat ngket jamuan kuman malom ai ngloli jubah-Io laju ngalek diris linen ai molit yo mo towing-Io. ⁵Nua, Io ngatok danum epo lang tebe ai mulai mui botis murid-murid-Io laju ngisu botis dero diang diris yo bnolit mo towing-Io. ⁶laju, Io sampe mo Simon io ngulek epo Yesus, "Tuhan, Iko mui botis ku?" ⁷Yesus nuing ai ngulek epo io, "ise yo gawi-Ku, iko belo ditau tempo ndo, tapi anta iko pasti tau." ⁸Petrus ngulek, "Iko belo pini mui botis ku," Yesus nuing, "Ena Aku belo di mui botis ko, iko belo di kuli bagian ngket Aku." ⁹Simon Petrus ngulek epo - Io," ena ktine Tuhan, nang cuma botis, tapi kayang ai utok ku lou." ¹⁰Yesus ngulek epo-io, "Ulun yo sudok undus belo dikoyoh mui botis io, koe io sundok brse bah. iko sundok brse, tapi ikam belo di eka brse," ¹¹Koe Yesus tau keo yo kakan ngempate IO, ene moko Io ngulek," belo di eka ikam brse, "¹²jadi, des Yesus sundok mui botis murid-murid-Io ai betulik epo awa-Io, Io ngulek epo dero, "Tau be ikam ise yo gawi Ku epo ikam? ¹³Ikam ngulek Aku Guru ai Tuhan lou. ene beta koe Aku memang Guru ai Tuhan. ¹⁴Ena Aku, yo ene Tuhan ai Guru kam, sundok mui botis kam, ikam lou arus bako bui botis. ¹⁵Koe, Aku sundok nampa otang epo ikam apa ikam lou nggawi kati yo gawi Ku epo ikam. ¹⁶Diang sebeta yo, Aku ngesah epo ikam, se batak belo di kate ngombo pengutok io, ktine lou ulun snuyu belo di kate ngombo ulun yo nymuyu io. ¹⁷Ena ikam sundok tau eka ene, ikam diberkati ena ikam nggawi yo. ¹⁸Aku belo di nyurah umbang kam eka. Aku tau ise yo sundok pili-Ku tapi nas endo arus snundok, 'Ulun io kuman roti-Ku sundok ngangkat gantir io. ¹⁹Aku mtau ikam tempo ndo, onon nau ene keo, apa des nau ene keo, ikam anta percaya se Aku doko Io. ²⁰Diang sebeta yo, Aku ngesah epo ikam, tongku ulun yo nrima ulun yo suyu-Ku, nrima Aku; ai ulun yo nrima Aku, nrima Io yo nymuyu Aku." Yesus mmetau ise yo anta ngempate Io. ²¹Des Yesus ngulek ktine, Io nyoru lang Roh ai ngesah, "sebeta-beta yo Aku ngulek epo ikam, keo llu ngket ikam yo kakan ngempate Aku." ²²murid-murid bako eti epo dero sama dero ai bengong nau ise yo kesah Io ²³keo llu murid-murid -Io tunge sondung mo dada Yesus. Io doko murid yo paling genawal ke Yesus. ²⁴Nua, Simon Petrus nampa kode epo io nte ngunti epo Yesus nau umbang ise Io petua io. ²⁵Jadi, murid yo sondung mo dada Yesus ngunti epo-Io, "ise lelu ulun io" ²⁶Yesus nuing " ene doko ulun io yo epo io Aku mie totok roti ene sundok Aku nyoso yo." lalu sondok nyoso totok roti ene, Yesus mie epo yo Yudas, pea Simon Iskariot. ²⁷Ai sundok Yudas nerima totok roti ene, setan ngerasuk io. koe ene, Yesus ngulek epo io, "ise yo kakan gawi ko, gawi aut!" ²⁸ndok belo erai kongo ngket dero yo kuman ene tau ise moko Yesus ngulek ktine epo Yudas. ²⁹Tenu-tenu ngket dero ngotus seYudas ngop sen ene Yesus ngulek benoli yo taka perlu nte perayaan, "apa io mie yo perlu epo ulun bnasa. ³⁰Des sundok nerima totok roti, Yudas malan epo oro des ene lou; ai des ene sundok malom. Yesus ngulek nau umbang pengnate-Io. ³¹Sundok Yudas malan, Yesus ngulek, "Tempo ndo doko des yo Pea Ulun kino mulia ai Allah kino mulia tete Io. ³²Ena Allah kino mulia lang Io, Allah lou ngmulia Io lang- Io, ai anta laju ngmulia Io. ³³Pea-pea-Ku, Aku keo diang ikam mba di ola aut. ikam anta meto Aku, kati yo sundok ulek-Ku epo ulun-ulun Yahudi, tempo ndo Aku ngulek lou, 'epo mone Aku malan, ikam belo tau rndong. ³⁴Erai ptua bayu die Ku epo ikam, yodoko apa ikam bako tengkosang, sama kati Aku nengkosang ikam, ktine lou ikam bako tng kosang. ³⁵diang ktine, eka ulun tau se ikam ene murid-murid-Ku, ene doko ena ikam bako tengkosang." pnape Yesus epo Petrus. ³⁶Simon Petrus ngunti epo Yesus, "Tuhan, po mone Iko malan?" Yesus nuing Io, "Po mone Aku malan, ikam belo di kuli lumpat Aku tempo ndo, tapi anta ikam ding Aku." ³⁷Petrus nguti epo-Io, "ise moko aku belo di kuli lumpat Iko tempo ndo? aku nyerah kompu tonga ku koe Iko!" ³⁸Yesus nuing, "iko nyerah kompu tonga ko epo- Aku? Diang sebeta yo Aku ngulek epo iko, piak belo di sluat onon iko nolak Aku 3 derang."

Chapter 14

¹"Nang ampe pengenanam ko gelisah; persaya epo Allah, persaya lou epo Aku. ²Mbo belai Uma-Ku deo nte awa nongos; ena belo ketine, pasti Aku sundok mere epo ikam. Koe Aku ulet epo mene nte nyedia awa nte ngkam. ³Ai, ena aku sundok ampe mene ai nyedia awa nte ikam, Aku anta ulet nua ai moit ikam epo awa-Ku apa mbo mombe aku keo, ikam keo mbo mene lou. ⁴Ai epo mombe Aku malan, iko tau buyan epo mene." ⁵Ulek Tomas epo io: "Tuhan, kain belo di tau epo mone Iko malan; jadi ketimbe kain tau boya empo mene?" ⁶Ulek Yesus epo io: "Aku doko boyan ai kebenaran ai bolum. Ndok belo keo erai kongo ulun yo ulet epo Uma, ena belo tete Aku. ⁷Ena iko sundok tau se Aku, pasti iko tau lou se Uma-Ku; tempo ndo iko sundok tau se Io ai iko sundook kito se Io." ⁸Ulek Filipus epo io: "Tuhan, tutui ko tah Uma ene epo kain, ene sundok sukup nte kain." ⁹Ulek Yesus epo io: "Sundok olah Aku diang iko, Filipus, tapi iko belo tau se Aku? Ise yo sundok kito se Aku, io sundok kito Uma, ketimbe iko kate ngulek, 'tutui ko tah Uma ene epo kain?' ¹⁰Belo persaya beh iko, se Aku lang Uma, ai Uma lang Aku? Ise yo ulek Ku epo iko, makse di pemesara ngket Aku se, tapi Uma yo keo lang Aku, Io ene yo ngelaku gawi-gata Io. ¹¹Persaya epo Aku, se Aku lang Uma, ai Uma lang Aku; atau paling belo, persaya koe gawi-gata ene se. ¹²Aku ngelek epo iko; Se beta yo ise ka yo persaya se Aku, io anta ngelaku gawi-gata yo laku Ku; ai gawi-gata yo pawak olai se yo ene. Koe aku ulet epo Uma; ¹³ai ise ka penindu ko lang karan-Ku, Aku anta nggawi yo, apa Uma kino mulia lang Pea. ¹⁴Ena iko tindu ise-ise epo Aku lang Karan-ku, Aku anta nggawi yo." ¹⁵"Ena iko kosang se aku, iko anta ngaya ise-ise petua-Ku. ¹⁶Aku anta tindu epo Uma, ai Io anta mie epo iko erai kongo Pengawat yo mak, apa Io diang iko sekola-kola yo, ¹⁷yo ene Roh Kebenaran. Denia belo kuli nerima Io, koe denia belo kita se Io ai belo tau se Io. Tapi iko tau se Io, koe Io diang iko ai nongos lang ko. ¹⁸Aku belo anta ngedikah iko kati pelulo. Aku ulet nua epo iko. ¹⁹Mba di ola aut, denia belo anta kito se Aku oli, tapi iko kito se Aku, koe Aku bolum, ai iko anta bolum lou. ²⁰Des ene doko iko anta tau, se Aku lang Uma-Ku ai iko mbo lang Aku ai Aku mbo lang iko. ²¹Ise ka yo nggop prenta-Ku ai nggawi yo, io ene yo ngisang Aku. Ai ise ka yo ngosang Aku, io anta kenosang koe Uma-Ku ai Aku lou anta ngosang io ai anta mekelak kompu-Ku epo io." ²²Yudas, yo makse di Iskariot, ngulek epo-Io: "Tuhan, koe ise moko Iko kakan mekelak kompu-Ko epo kain, ai belo epo denia?" ²³Tuing Yesus: "Ena erai kongo ngosang Aku, io anta ngaya firman-Ku ai Uma-Ku anta ngosa io ai Kain anta ulet epo io ai nongos kerai diang io. ²⁴Tapi, ise yo belo kosang se Aku, io belo ngaya firman-Ku; ai firman yo dingo ko ene makse ngket Aku, tapi ngket Uma yo nyuyu Aku. ²⁵Eka-eka yo ene ulek-Ku epo iko, tebulu Aku aso keo diang iko; ²⁶tapi Penyempae, yo doko Roh Kudus, yo anta senuyu koe Uma lang karan-Ku, Io ene anta nutui matuk eka-eka yo ene epo iko ai anta mekenop iko epo ise ka yo sundok pini ulek-Ku epo iko. ²⁷Damai sejahtera tampe-Ku nte ngko. Damai sejahtera-Ku die Ku epo iko, ai ise yo die ku epo iko belo di kerai umbang kati yo denia die epo iko. Nang ka takut ai belo buen pengenanam. ²⁸Iko sundok keringo, se aku sundok ngulek epo iko: Aku malan, tapi Aku ulet nua epo iko. Ena beta-beta iko kosang se Aku, iko pasti anta ego koe Aku malan epo Uma-Ku, koe Uma-Ku pawak olai se Aku. ²⁹Ai tempo ndo lou Aku ngulek epo iko onon nau umbang ene terjadi, apa iko persaya, ena nau umbang ene terjadi. ³⁰Belo di deo nua Aku ungulek diang ikam, koe penguasa denia endo ulet. Io belo keo kuasa yo kate ngombo se Aku. ³¹Tapi apa denia tau, se Aku ngosang Uma ai se Aku nggawi eka eka kati yo petua Uma epo Aku, akat, alo taka berangkat engket ndo.

Chapter 15

¹Basa Yesus , "Aku doko tonga anggur yo beta yo ai Bapa-Ku doko empun usaha ²tongku gergei la Aku yo belo kebua, tute-Yo ai tongku gergei yo kebua , binorese-keYo , apa tambah deo bua yo.³Iko memang sundok binerese ke firman yo sundok ulek-Ku epo iko.⁴Nongos ka lang Aku ai Aku lang iko. sama kati nau gergei belo kate keo bua ket gergei ene se, ene io belo genget epo tonga anggur , ketine lou iko belo kate kebua , ena belo gengget diang Aku kecuali yo nongos la pokok anggur, ketine lou iko belo kuli kebua, kecuali iko gengget diang Aku.⁵ Aku tondal anggur ai iko ene gergei-gergi yo. ise yo nongos lang Aku, Aku lang yo, io kebua meroa koe belo begengget diang Aku belo kuli ise-ise. ⁶Ise-ise yo belo gengget diang Aku , io noding epo baling kati gergei yo pate ; sundok ene kenumpul ke ulun ai noding po lang api , ai tenuna . ⁷Ena iko gengget diang Aku ai firman Ko lang aku tindu ka ise lelu pengkakan ko iko anta nerima yo⁸Lang umbang ene doko Uma ku kino mulia, yo ene ena iko kebua deo ai diang ketine iko ,diang ketine ikolah murid-muritKu' ⁹kati Uma ngosang Aku , ketine lou aku ngosang iko, nongoska lang kosang ku ene¹⁰Ena iko ngaya petua KU iko anta nongos lang kosangKU kati aku ngaya petua Uma Ku ai nongos lang kosang -Io ¹¹Eka-eka yo ene ulek Ku epo iko apa sukacitaKu keo bolang iko ai sukacita ko jadi ponu.¹²Endo doko petuaKu apa ikam bako tengkosang, kati Aku sundok mengkosang ikam. ¹³belo keo kosang yo pawak ola se kosang erai kongo yo mie kesong yo ente sahabat-sahabat yo.¹⁴ Iko ene sahabat-sahabatku ena iko nggawi ise yo petuaKu epo iko . ¹⁵Aku belo dingulek nua iko batak ke batak belo tau ise yo genawi ke pengentuo yo. Tapi Aku ngulek iko sahabat,koe Aku sundok mere epo iko ise-ise yo sundok dingoKu ket Uma -Ku.¹⁶Makse di iko mili Aku , tapi Aku se yo mili iko ai Aku sundok nunjuk iko apa iko malan ai apa iko kate kebua ai bua ko ene tetap, ise ka yo tindu ko epo Uma lang karan Ku die Io epo iko. ¹⁷Yo doko endo petua-KU epo iko: Ikam bako kosang diang ulun yo mak!¹⁸ Ena denia kekei se iko , iko tau se denia sundok uno ngekei Aku pawak se iko. ¹⁹Ena beta-beta iko ket denia, pasti denia ngosang iko ente empun io; koe iko makse ket denia , tapi Aku mili iko ket denia, koe ene doko denia kekei iko.²⁰Kenop ka ise yo sundok ulek Ku epo iko: 'erai kong batak belo kate nombo se tuan yo'. Ena dero sundok ngurow Aku , dero lou anta ngurow iko . Ena dero sundok ngaya firman-KU , dero lou anta ngaya pemesara yo. ²¹Tapi eka-eka yo ene anta gawi dero epo ikam koe karan -Ku. Koe dero belo tau se Io yo sundok nyemuyu Aku. ²²Ena Aku belo ulet ai belo ngulek epo dero , belo bedosa. Tetapi tempondo dero belo keo alasa te nokom dosa dero. ²³Ise-ise yo kekei Aku io kekei lou Uma-Ku. ²⁴Ena Aku belo keo gawi bo ekang dero kati nau yo sundok genawi ke ulun yo mak , dero belo anta bedosa. Tapi tempondo wala pun dero sundok kito eka-eka yo ene tapi dero kekei epo Aku ketine lou epo Uma-Ku. ²⁵Tapi, firman yo keo tenulis lang kitab Taurat dero harus genenap: 'Dero kekei se Aku belo keo alasan '. ²⁶Ena penyempae ene ulet ket Uma-Ku, yo doko ene Roh kebenaran yo ulet ket Uma, yo anta ngesa umbang Aku.²⁷tapi iko lou harus bekesah, koe iko ngket ono sama-sama diang Aku.'

Chapter 16

¹"Eka-eka endo sundok Aku sudok ngulek epo iko apa iko belo di sekukui. ²Dero anta nembuyo iko ngket Sinagoge. Bahkan,jeman yo anta ulet tongku ulun yo ngempate iko anta mikir se dero desung nyembah epo Allah. ³Ai,nau umbang yo ene anta dero nggawi koe dero belo tau se Uma diang Aku. ⁴Tapi yo ene sundok Aku ngulek epo iko apa ena jeman youlet,iko kenop se Aku sundok ngulek yo epo iko.Ai,nau umbang endo belo aku ngulek epo iko onon se ene koe Aku aso diang iko.Gawi gata Roh Kudus. ⁵Tapi,tempondo Aku kakan malan epo Iyo yo nyemuyu Aku,ai ndok belo erai kongo ngket ikam ngunti Aku, 'epo mbe Iyo anta malan ?' ⁶Tapi koe Aku sundok ngulek eka-eka endo epo ikam,nyoru nemponuh kesong kam. ⁷Tapi,Aku mereh epo yo beta epo ikam:buen ube ena Aku brangkat koe ena Aku belo brangkat,Pengawat ene belo anta ulet epo ikam;tapi ena Aku brangkat,Aku anta nyemuyuh Iyo epo ikam. ⁸Ai,des Pengawat ene ulet,Iyo anta mekenop denia anta dosa,yo beta,ai penghakiman; ⁹nau umbang dosa,koe dero belo persaya epo Aku; ¹⁰nau umbang yo beta, koe Aku brangkat epo Uma ai ikam belo anta kito Aku nua, ¹¹ai nau umbang penghakiman,koe penguasa denia endo sundok dihakimi. ¹²Aso deo hal yo kakan ulek Ku epo iam,tapi ikam belo klian nantai yo tempondo. ¹³Tapi,des Iyo,Roh yo beta ene ulet,Iyo anta ngawat ikam epo lang eka-eka yo beta.Koe,Iyo belo bekesah petua-Iyo se,tapi eka-eka nau umbang yo Iyo keringo ene doko yo anta ulek Iyo;ai Iyo anta mereh ikam nau umbang yo anta terjadi. ¹⁴Iyo anta ngemuliakan Aku koe Iyo anta kuli yo pengkuli Ku,ai anta mereh yo epo ikam. ¹⁵Eka-eka yo pengkeo Uma ene lou pengkeo Ku.Koe ene,Aku ngulek se Roh Yo beta anta mereh epo ikam ise yo pengkuli-Iyo ngket Aku."Dukacita wensut epo Sukacita. ¹⁶Belo di ola aut,ai ikam belo anta kito Aku nua;ai sindai nua,belo diola,ai ikam anta kito Aku." ¹⁷Deo murid Yesus kako unti sama dero se,"Ise maksud-Iyo Io ngulek epo taka,belo diola aut,ai ikam belo anta kito Aku nua,belo diola aut,ai ikam anta kito Aku?"ai'koe Aku anta brangkat epo Uma ?" ¹⁸Jadi dero ngunti,"Ise yo Io maksud diang,belo diola aut?"Taka belo tau ise yo Io knesah." ¹⁹Yesus tau se murid-murid-Iyo kakan ngunti epo-Iyo,laju Iyo ngulek epo dero,"Beta be ikam bako unti epo sama ikam se nau umbang yo Aku maksud des Aku ngulek,belo diola aut ai ikam belo anta kito aku nua;ai nua,belo diola nua,ai ikam anta kito Aku?" ²⁰Diang beta-beta yo,Aku ngulek epo ikam,ikam anta nangis ai nyoru,tapi denia anta ego;ikam anta berduka,tapi dukacita kam anta wensut jadi sukacita. ²¹Des ulun bawe ngemekus,io kiso siet koe des yo nte ngemekus sundok ulet;tapi sundok pea yo kino mekus,io belo kiso se siet balo oli koe sukacita koe erai kongo ulun sundok kino mekus mbo denia endo. ²²Ketine lou ikam kiso kanam penderitaan tempondo, tapi Aku anta nyeruku ikam nua ai kesong kam anta bersukacita,ai ndok belo erai kongo yo anta kate ngalek sukacita kam ngket ikam. ²³Des olo ene,ikam belo anta ngunti ise-ise epo Aku.Diang beta-beta yo,Aku ngulek epo ikam,ise-ise yo penindu kam epo Uma-Ku lang karan-Ku,Io anta miye yo epo ikam. ²⁴Sampe tempondo,ikam belo pinih tindu ise-ise lang karan-Ku.Tindu ka,ai ikam anta nerima yo apa sukacita kam jadi ponuh."Penguret ombon denia" ²⁵"Aku sundok ngulek nau umbang endo epo ikam diang pemerawet;jeman yo anta ulet des Aku belo nua mereh epo ikam diang pemerawet,tapi anta mereh epo ikam diang terus terang nau umbang Uma. ²⁶Des olo ene,ikam anta tindu lang karan -Ku,ai Aku belo ngulek epo ikam se Aku ngendoa yo epo Uma nte ngkam. ²⁷Koe,Uma se ngosang ikam koe ikam sundok ngosang Aku ai persaya se Aku ulet epo denia;tempondo,Aku anta ngendikah denia ai mulik epo Uma." ²⁸Aku ngket Uma ai sundok ulet epo lang denia; tempo nde, Aku kakan ngedikah denia ai mulik epo Uma." ²⁹Murid-murid-Iyo ngulek,"Neh,tempondo Iyo mereh terus terang ai belo dimakai pemerawet nua. ³⁰Tempondo,kain tau se Iyo tau ba ise-ise ai belo di koyoh nte erai kongoh ulun ngunti epo-Iyo.Koe ene,kain persaya se Iyo ulet ngket Allah, " ³¹Yesus nuing epo dero,"Persaya be ikam tempondo?" ³²Eti ka! Jeman yo nta ulet,bahkan sundok ulet nte ngkam nte bako dikah,masing-masing uli epo awa yo se ai anta ngendikah Aku sederai.Tapi anta,Aku belo sederai koe Uma diang-Aku. ³³Eka-eka endo Aku ngulek epo ikam apa mbo lang Aku,ikam keo damai sejahtera.Mbo denia,ikam anta kiso kanam sengsara,tapi pinogalak kesong kam!Aku sundok kuret ngket se denia!

Chapter 17

¹Ene doko pemesurah Yesus, laju Io donga epo langit ai ngulek: "Uma, sundok des yo endo; Pea-Ko kino mulia, apa Iko kino mulia se Pea-Ko. ²Kati nau Iko sundok mie epo-Io kuasa ombon yo bolum, Io ene lou yo anta mie bolum yo kekal epo ise ka yo sundok die Ko apo Io. ³Ndo doko bolum yo kekal ene, yo ene dero tau se Iko, erai-erai yo Allah yo beta, ai tau se Yesus Kristus yo sundok utus-Ko. ⁴Iko sundok kino mulia se Aku lang bumi diang sara mesundok gawi-gata yo die Ko epo Aku nte genawi. ⁵Koe ene, o Uma, kemulia ko Aku nte Iko se diang kemuliaan yo mpun Ku la hadirat-Ko onon denia keo. ⁶Aku sundok mekelak karan-Ko epoulun eka, yo die Ko epo aku ngket denia. Dero ene mpun-Ko ai Iko sundok mie dero epo Aku ai dero sundok ngaya firman-Ko. ⁷tempo ndo dero tau, se ise ka yo die-Ko epo Aku ene asal usul yo ngket Iko. ⁸Koe ise ka firman yo bere-Ko apo Aku sundok surah Ku epo dero ai dero sundok nerima yo. Dero tau beta-beta, se Aku ulet ngket Iko, ai dero persaya, se Iko ene yo sundok nyuyu Aku. ⁹Aku berdoa nte dero, Aku belo berdoa nte denia, tapi nte dero yo sudok die Ko epo Aku; koe, dero ene mpun-Ko. ¹⁰Eka-eka yo mpun-Ku ene mpun-Ko lou, ai eka-eka yo mpun-Ko ene mpun-Ku lou; ai Aku sundok kino mulia lang ene. ¹¹Aku mba di la denia nua, tapi dero aso la denia endo, ai Aku ulet epo Iko. Uma yo Kudus, jaga Ko dero lang karan-Ko, karan yo sundok die-Ko epo Aku, sehingga dero bekerai kati nau Taka. ¹²Kolakola Aku diang iko, Aku sundok ngamu dero lang karan-Ko yo sundok die Ko epo Aku. Aku sundok ngenjaga dero ai belo ndok erai ngket dero yo tomo semakse nte io yo sundok tenetap nte tomo, apa genap iso yo tenulis lang Bebal Suci. ¹³Tapi tempo ndo, Aku ulet epo Iko ai aku ngulek eka-eka yo ene desung Aku aso lang denia, apa ponu sukacita-Ku lang bolum dero. ¹⁴Aku sundok mie firman-Ko epo dero ai denia belo gawal deang dero, koe dero makse ngket denia, sama kati Aku makse ngket denia. ¹⁵Aku belo tindu Iko nte ngalek dero ngket denia, tapi apa Iko ngenjaga dero ngket yo jahat. ¹⁶Dero makse ngket denia, sama kati Aku makse ngket denia. ¹⁷Kenudus dero lang kebenaran; firman-Ko ene kebenaran. ¹⁸Kati Iko yo sundok nyuyu Aku epo lang denia, kati ene lou Aku nyuyu dero apo lang denia; ¹⁹ai Aku neng kudus bolum-Ku nte dero, apa dero kenudus lou lang kebenaran. ²⁰Ai makse nte dero endo tingrn Aku bedoa, tapi nte ulun-ulun lou, yo persaya diang-Aku koe pemesurah dero, ²¹apa dero jadi erai, sama kati Iko, o Uma, lang Aku ai Aku lang Iko, apa dero lang Taka lou, apa dunia persaya, se Iko ene yo sundok nyuyu Aku. ²²Ai Aku sundok mie epo dero kemuliaan, yo die-Ko epo Aku, apa dero jadi erai, sma kati Taka enen erai: ²³Aku lang dero ai Iko lang Aku apa dero sempurna jadi erai, apa denia tau, se Iko yo sundok nyuyu Aku ai Iko kosang se Dero, sama kati Iko kosang se Aku. ²⁴O Uma, Aku kakan apa, la mone ka aku keo, dero ke lou sma-sama diang Aku, dero uo sundok die-Ko epo aku, apa dero meti kemuliaan-Ku yo sundok die Ko epo Aku, koe Iko sundok nengkosang Aku onon denia tenampa. ²⁵O Uma yo adil, denia endo memang belo tau se Iko, tapi Aku tau se Iko, ai dero endo tau, se Iko ene yo sundok nyuyu Aku; ²⁶ai Aku sundok mere karan-Ko epo dero ai Aku anta mere yo, apa Kasih yo die Ko epo Aku keo lang dero ai Aku lang dero."

Chapter 18

¹sundok abis pemesara Yesus ene Io baling ngket mne' sama sama diang murid murid Io terus dero' malan epo' mpai atang Kidora. Mbo mne keo taman ai Io sumba' epo' taman ene sama sama diang murid murid Io. ²Yudas, yo ngingat Yesus, tau low awa' ene', koe' Yesus jono bkumpul mne' diang murid murid Io'. ³Moko' ulet ka' doko Yudas low epo' mne diang erai pasukan tentara diang penjaga penjaga Bait Allah yo' sayu' imam iman pengutok ai ulun ulun Farisi genap diang lentera, dmtai dapo'. ⁴Jadi Yesus yo'tau'ba ise ise anta pengkono Io', nyempeder epo' ono' ngulek epo' dero' : Ise yo'eto kam?" ⁵Tuing dero' : Yeus ngket Nazaret " Ulek Io' epo' dero' : Akulah Io' Yudas yo ngianat Yesus akat low mbo ramai ramai diang dero' ⁶Des Io' ngulek epo' dero' : "Aku doko Io'," dero' mundur ai pukan epo' tan. ⁷Moko Io' ngunti' nua : " Ise yo' eto kam?" Ulek dero' " Yesus ngket Nazaret" ⁸Tung Yesus : "Sundok ulek Ku' epo' Ikam, Aku' doko Io'. Ena' Aku' yo' et kam koe'ka' dero' endo' malan. ⁹Ketine' ka' doko nau' yo ene' apa' besengkono diang firman yo' sundok ulek Io' : "Ngek dero' Yo srak-Ko' epo' Aku, belo keo yo' belo di sauda Ku' nte' mate" ¹⁰Laju Simon Petrus, yo' moit pedang, nyintak pedang ene' ngket lau sarung io, naris batak Imam Besar senga bekat telingo sauwa io' karan batak ene' Malkhus. ¹¹Ulek Yesus epo' Petrus : "Pino sumba lang sarung pedang ko' ene' belo be Aku' arus ngisop ketoweng yo' die' Bapa' epo' Aku?" Yesus la onom Hanas ¹²Moko' pasukan tentara diang perwira io' diang penjaga penjaga ko' suyu' ulun Yahudi ene' nangoyo Yesus ai nyiret Io'. ¹³laju' dero' moit Io' la epo' hanas, Koe' Hanas ene' ampu' kayafas, yo tau ene' jadi' Imam Besar. ¹⁴ai kayafas ene' doko yo sundok ngnasehat ulun ulun Yahudi : Keo buen yo ube aso ena erai kongo' mate nte pupus bangsa. Petrus nyangkal Yesus ¹⁵Simon petrus ai erai kongo murid yo mak nyarak yesus. Murid ene' kenal se Imam Besar ene' ai io sumba sama sama diang Yesus epo' natara istana Imam Besar ene. ¹⁶tapi Petrus nongos la baling dmpet jawong jadi murid yo mak ro yo' kenal se Imam Besar ene mulik epo' baling po sera sera diang bawe yo' ngnjaga jawong laju' moit petrus sumba. ¹⁷Moko' ulek bawe batak yo' ngnjaga jawong epo Petrus : "Makse be iko' low murid ulun ene?" tuing Petrus : "Makse". ¹⁸Desung ene' batak batak ai pnjaga pnjaga Bait Allah sundok ngimun api asong koe dnia rongin deo ene, ai dero' alek minday mbo mne' Petrus akat low minday sama sama diang dero'. ¹⁹Jadi mulai ka' doko Imam Besar ngunti epo' Yesus mau' mnbang murid murid Io' ai' nau' umbang batuk tetai Io'. ²⁰Tuing Yesus epo' io' : "Aku bsara terus terang epo' dnia : Aku ' terus matuk metai mbo les smbayang ai mbo' Bait Allah, awa ulun ulun yahudi ngumpul : Aku belo pini bsara melim melim". ²¹"Ise moko' iko' ngunti epo' Aku? unti ka' epo' dero', yo sundok nmpaning ise' yo' ulek-Ku' epo' dero' : pasti dero' tau ise yo sundok ulek-Ku" ²²Des Io ngulek ktine, erai kongo pnjaga' yo' akat mbo' mne', nampa wae-Io' ulak ngulek : "ktine' be tuing. Ko' epo' Imam Besar?". ²³Tuing Yesus epo' io : "Ena' pmensara'-Ku' ene' sala', tutui ko'ta ya sala tapi' ena' pmensara'-Ku' ene kono, ise moko' iko' nmapar Aku?". ²⁴Moko Hanas njirima Io bsirat epo' Kayafas, Imam Besar ene ²⁵Simon Petrus aso akat mindang. Ulek ulunulun mne io : "makse be iko' low kongo' murid Io?". ²⁶Sangkal ke; Io, ulek io' : "Makse" ulek erai kongo batak Imam Besar, ulun ene keluarga ngekaat batak Imam Besar yo telingo io totok Petrus : "makse be iko itanku, mbo taman ene' sama sama diang Io?". ²⁷Jadi sangkal koe' Petrus nua' ai des ene' skuat ka' dokas piak.Yesus la Onon Pilatus ²⁸Jadi dero' moit yesus ngket Kayafas epo' awa' pengadila. Des ene' olo aso ma' dero' se mba' di sumba' Pengadilan apa' belo ngloreto tenampa toyo' kre dero' awa' kakan kuman Paskah. ²⁹Koe' ene' Pilatus baling nyuruku dero' ai nguleh : 'iese yo' tundruh kam epo' ulun endo?". ³⁰Tuing dero' epo' io' : " Ena Io makse ulun trjano, kain mba' di nyerah Io' epo' oko". ³¹Ulek Pilatus epo' dero' : "Alek kam ka' Io' ai putus kam se ka' urusan Io' kati Hukum Taurat kam ene'. "Ulak ulun ulum Yahudi ene " Kain belo dikate nympate ulun". ³²Ktine ka'doko nau ene' apa' pino enap ka' doko' Firman Yesus yo' ulek Io' nte mkelak ketimbe' sara' ante mate. ³³Jdi Pilatus mulik epo' lang awa' pengadilan, laju' momba' Yesus ai ngunti epo Io : "Iko' endo' be raja' ulun Yahudi?". ³⁴Tuing Yesus : "Angket kesong ko se be pmnsara' ko' ene' ena' belo keo be ulun mak yo' ngulek epo' iko' nau umbang Ako'. ³⁵Ulek Pilatus : "Ulun Yahudi be aku? Bangsa-Ko' se ai imam imam pngutok yo' sundok nyerah iko' epo' aku' : ise' yo' sundok gawi geta' Ko?". ³⁶Tuing Yesus : " Kerajaan-Ku makse ngket dnia' endo'; ena' KerajaanKu ngket dnia endo, pasti batak batak Ku' sundok ngelawan apa' Aku' nang snerah epo ulun Yahudi, tapi Kerajaan-Ku' makse ngket mndo'. ³⁷Moka' ene' ulek Pilatus epo' Io' : "Jadi iko' endo' raja' ?" Tuing Yesus "Iko' ngulek, se Aku' endo' raja'. Nte ene' ka' doko Aku' kinomekus ai nte ene'ka'doko Aku' ulet epo' lang dnia' endo', apa ' Aku' mie kesaksian nau numbang yo' konoi; tongko' ulun yo'ngket yo'kono nmping oyon-Ku" ³⁸Ulek Pilatus epo' Io : "Ise yo'kono ene?" Sundok ngulek ktine', Pilatus baling nua' nyuruku ulun ulun Yahudi ai ngulak epo' dero : " Aku endo mba' beta di keo kuli ise2 sala mbo' Io. ³⁹Tapi keo penuju kam jati', se des Paska. Jadi, kakan beh iko aku ngelosu 'Tuon Ulun Yahudi' endo? ⁴⁰Dero nuing diang nyoyar, " Nang nelosu ulun ene, semakse Barnabas!" Barnabas ene pengako.

Chapter 19

¹Pilatus ngalek Yesus ai nyuyu ulun ngurou iyo. ²Tentara-tentara ene ngendalin mahkota diang bako kedui ai mayak iyo ban utok Yesus ai nyua jubah ungu epo Iyo. ³Dero ngompoh Yesus ai ngulek " salam o raja ulun Yahudi!" laju dero nampar wae Io. ⁴Pilatus baling nua ai ngulek epo dero, " Etikam ! Aku moit Yesus baling epo ikam apa ikam tau se aku belo dikuli ise ise sala mbo' Iyo." ⁵Sondok ene, Yesus baling makai mahkota dui ai jubah ungu. Ulek Pilatus epo dero, "eti kam Ulun ene!" ⁶Des imam-imam pengutok diang perwira-perwira kito se Yesus dero besara ries , " senalib ka Io, senalib ka Io!" Tapi ulek Pilatus epo dero, " oit kam ka Io ai salib kam se, koe aku belo diruku ise ise sala mbo' Io." ⁷Tuing ulun-ulun Yahudi ene epo Pilatus, "Kain keo Hukum, diang menurut hukum ene, Io harus mate, koe Io nganggap se Io ene Pea Allah." ⁸Des Pilatus keringo pemensara ene, io tambah takut ⁹ sumba nua epo lang awa pengadilan, laju ngunti epo Yesus, " Ngket mombe se Iko?" Tapi Yesus mba di nuing. ¹⁰ Ulek Pilatus epo Io, " belo kakan besara be Iko diang aku? Belo be Iko tau se aku ke kuasa nte ngembebas Iko ai keo lou kuasa nte nyalib Iko kosio?" ¹¹Tuing Yesus, " Iko belo dikeo kuasa ise ise ombon Aku, ena belo di denie kuasa ene epo iko ngket ombo. Koe ene doko, ulun yo nyerah Aku epo iko, aso pawak dosa iyo." ¹² Sundok keringo ene, Pilatus bekomer nte ngembebas Yesus, tapi ulun-ulun Yahudi besara diang oyon ries, "Ena iko ngembebas Ulun endo, iko makse sahabat Kaisar; tongku ulun yo nganggap diri io raja arti yo ngelawan Kaisar." ¹³Des Pilatus keringo pemensara ene, io mait Yesus epo baling, ai tunge ban kadera pengadilan, mbo awa nan karan se Litostrotos, ena lang basa Ibrani nulek Gabata. ¹⁴Olo ene olo persiapan Paskah, kira-kira jam duo belas. Ulek Pilatus epo ulun-ulun Yahudi ene, "Endo doko Raja kam!" ¹⁵Moko dero besara diang oyon ries, "Oding ka Io! Oding ka Io! "Senalib ka Io!" Ulek Pilatus po dero, "Arus be aku nyalib Raja kam?" Tuing Imam-Imam pengutok ene, " Kain badi keo raja makse Kaisar!" ¹⁶Penyundok iyo, Pilatus nyerah Yesus epo dero apa senalib. Dero nerima Yesus nte salib Yesus Senalib Yesus baling moson salib Io se epo awa yo nan karan se "awa kerangap", lang basa Ibrani yo nentang se " Golgota". ¹⁸ Mbo lane dero nyalib Yesus sama-sama diang duo kongo ulun yo mak, yo senalip mbo tadah sei diang tadah sanan Yesus, Yesus la botuk ekang dero. ¹⁹Pilatus nampa tulisan ai nempel yo mbo kayu salib. Otang tulisan ene, "YESUS ULUN NAZARET, RAJA ULUN YAHUDI." ²⁰Deo ulun Yahudi yo ngembaca tulisan ene, koe awa Yesus senalib dempet se kota, ai pemensara ene tenulis lang basa Ibrani, Latin, ai Yunani. ²¹Jadi, ulek imam-imam pengutok Yahudi epo pilatus, "Nang tenuli raja ulun Yahudi, 'tapi Ulun endo ngulek se Aku Raja ulun Yahudi." ²²Tuing Pilatus, " ise yo sundok tulisku, tetap tenulis!" ²³Sundok tentara-tentara ene nyalib Yesus, dero ngalek pakaian Iyo ai magi iyo jadi opat bagian, erai bagian nte tongku tongku kongo prajurit. jubah ene belo dibekosot ket ombo ampe iwa erai lembar diris bute. ²⁴Prajurit ene bunyal epo sama dero , " nang taka minsit iyo tapi alo taka motak undi ente mutus ise yo kuli iyo." Nau endo ketindo apa genap kati yo sundok tenulis lang Kitab Suci:" Dero magi pakaian-Ku nte dero ai nte jubahku dero motak undian." ²⁵Desung ene, ma Yesus, erai buntung bawe ma Yesus, Maria bawe Klopas, diang Maria Magdalena, akat dempet salib Yesus. ²⁶Des Yesus kito ma Io ai murid pengawal Io akat mene, Io bunyal epo ine Io, " Ma, eti kotah, endo pea ko'!" ²⁷Laju Yesus ngulek epo murid senayang Io ene, " endo doko ine ko!" Ngket ne murid ene nerima ine' Yesus nongos mbo lou io. Pengenate Yesus. ²⁸Sundok ene, Yesus yo tau se eka-eka sundok bah aut, nte nggenap kitab suci, Io ngulek, " Aku Krengan!" ²⁹La mene keo belanga ponu diang anggur mosom. Koe ene, dero nontang bungo karang yo sundok snoso lang anggur mosom mbo batang hisop ai mie iyo epo bowa Yesus. ³⁰Sundok ngisop anggur mosom ene, Yesus ngulek "Sundok ba aut". Laju Io nyluot utok Io ai nyerah ruo Io. ³¹Koe olo enelah olo persiapan, apa mayat -mayat ene belo mbo kayu salib ene mbo olo Sabat, koe olo sabat ene olo raya, ulun-ulun Yahudi tindu epo Pilatus apa botis ulun-ulun yo senalib ene tenikol diang antu-antu ene pinodiwa ngket salib ene. ³²likas ene tentara ulet epo nikol botis ulun yo tela diang yo erai nua yo senalib rendu diang Yesus. ³³tapi des dero ape po Yesus, kito dero se Yesus sundok mate, dero badi metepok botis Io. ³⁴tapi, erai Kongo tentara ene nowok bujok io epo drukan Yesus, jadi des ene se baling daya diang danum. ³⁵Ulun yo kito mato peristiwa ene yo mid kesaksian endo, ai kesaksian yo beta ai io tau se pemensara yo ene beta, apa ikam persaya lowu. ³⁶Koe, eka-eka endo terjadi apa pinogenap yo sundok tenulis lang Alkitab Suci:" Ndok belo erai tulang Yo anta pino tepok." ³⁷Ai nua lang iyo mak Kitab Suci ngulek," Dero anta meti Io yo sundok dero towok." Yesus kenubur. ³⁸Likas nau ene, Yusuf ket Arimatea, yo suni suni sundok jadi murid Yesus koe takut epo ulun-ulun Yahudi, tindu epo Pilatus apa io kate ngalek mayat Yesus, dan senie ke' Pilatus. jadi, Yusuf ket Arimatea ulet po ngalek mayat Yesus. ³⁹Nikodemus, ulun yo pini nyeruku Yesus mbo seom malom, ulet lou diang moit lenga mur diangg lenga garu, yo koyat iyo sekitar limo pulu kati. ⁴⁰Jadi, zero ngalek mayat Yesus ai ngbungkus Io didn't diris bura ai nerempah rempah, kati adat nglowong ulun Yehudi. ⁴¹Dempet awa Yesus snalib, keo erai taman ai mbo lang taman ene keo erai kubur yo bayu yo belo pini pnayak mayat mne. Koe olo ene olo persiapan Yahudi, ai awa kubur ene belo di

oro, dero mayak mayat Yesus mne. ⁴²koe olo ene olo persiapan acara ulun Yahudi, diang awa kubur belo dioroh,
dero mayak mayat Yesus la lane

Chapter 20

¹des olo tela minggu ene ket ma'beta lak olo aso seom malan daro maria magdalena epo kubur ai io kito lak sene batu moko yonalek ket kubur².io mosit nyerapet simon petrus ai murid iyo mak iyo kenosang keyesus ai kenesa epo dero Tuhan alek ulun ket kubur io ai diris belo tau la mone io tenape³Ene moko malan petrus ai murid iyo mak epo kubur⁴Dero duo monsit sama-sama,tapi murid yo mak ene monsit lebih laju ket Petrus ene moko ono sampe la kubur .⁵Ia ngeloeng epo dalom , ai kito diris kapan pembungkus mayat Yesus mulanau la tana , tapi iyo belo sumba epo dalom.⁶koe ene uletlah Simon Petrus nyarak iyo, ai sumba epo lang kubur ai iyo kito diris kapan begaleng la lane. ⁷Sedang diris peluh iyo ro' keo la utok Yesus belo keo ketape dempet diris kapan ene tapi la isan la awa iyo mak diris sundok begulung.

¹¹.Tapi maria akat dempet kubur ene ai nangis sambil nangis io ngeloeng epo lang kubur. ¹².Ai nitan koe iyo keo duo ulun malaikat makai baju bura iyo ulun mak tunge la bika utok io iyo mak la bika botis la awa mayat Yesus pinolumbi. ¹³.ulek malaikat ene epo io ma' koe mbe iko nangis tuing maria epo dero,Tuhanku alek ulun ai aku belo tau la mone io tape dero.¹⁶.ulek yesus epo maria'sekuleng ai bunyal epo io makai basa ibrani Rabuni arti io guru ¹⁷.ulek yesus epo iobadi kotohka iko mulem aku ke' Aku pian malan epo bapa tapi malan kaepo erai buntung erai buntungku aiulek lou epo dero kan ket tempondo Aku kan malan epo Bapa-ku ai Bapako epo Allahku ai Allahko; ¹⁸maria magdalena malan ai bunyal epo murid murid aku odir kito Tuhan ia lou io yo ngesah hal-hal ene epo io¹⁹des olo sundok malom olo tela minggu ene ngumpul murid murid yesus la awa diang jawong iyo kenunci koe dero takut epo ulun-ulun yahudi.des jaman ene ulet lou yesus ai akat la tengga- tenga dero ai bekesah;damai sejahtera ngko lou. ²⁰ai sundok bekesah io mekelak tangan io ai bowa kesong io epo dero murid-murid ene nyawo des dero kito Tuhan. ²⁴Tapi tomas ulun ngket duo belas murid ene iyo nulek didimus belo keo diang dero des Yesus ulet epo mene. ²⁵Moko ulek murid iyo mak ene epo io kain lou kito Tuhan tapi tapi tomas bunyal epo dero onon se aku kiti bekas paku la tangan io diang onon se aku ngenjolok temburuku epo dalom bekas paku ene diang ngenjolok tanganku epo lang bowa kesong iyo belo puas aku kakan se nyembeta iyo.²⁶walu olo lipas murid yesus keo ulet lang lou ene ai tomas sama diang dero sengkuang jawong jawong kenunci Yesus ulek akat la tenga dero langsung bunyal damai sejahtera nte ngkam ²⁷lipas iyo bekesah epo tomas payak ko temburuko la mne diang etika tanganku sokoika tanganko ai tunjuk epo lang bowa kesongku apa' nang sampe iko belo percaya nua. tomas njawap iyo ya Tuhanku ai Allahku. ²⁸Tomas nuing Yesus, "Ya, Tuhan ai Allahku" ²⁹Yesus ngulek epo io moko ikam kito aku ene ikam percaya bahagia ikam iyo belo kito tapi percaya. Pengkakan Yohane Nulis Bebal Endo³⁰Aso deo tanda ajaib yo mak yo nelaku Yesus la onon murid-murid-Io, yo betulis lang bebal endo. ³¹Tapi, eka eka yo endo tenulis apa iko persaya se Yesu ene Kristus, Pea Allah, diang apo ngket kepersayaan kam ene, iko kuli bolu lang karan-Io.

Chapter 21

¹yesus menampilkan diri kepada murid- murid-Nya di pantai dan tiberias. ²simon petrus, Tomas yo nulek Didimus, Natanael engket kana yo mo Galilea ,pea- pea Zebedeus diang duo ulun murid io yo mak. ³ulek simon Petrus epo dero: Aku beju epo nangop esa. ulek dero epo yo: kain malan lou diang Iko. dero beju lou dombo po perau, tapi malom ene dero belo di kuli se esa. ⁴waktu olo mulai ombo, Yesus akat mo pantai ; tapi murid- murid ene belo tau , sene yesus. ⁵ulek yesus epo dero ; he pea- pea, keo be iko ulak - lekon? jawab dero : belo keo. ⁶Moko ulek Yesus epo dero : " bebarka jala ko ene po imbang sanan perau , moko iko kuli lalu dero mebar jala dero belo kuli dero ngendurut yo nuwa koe deo esa. ⁷moko murid yo kenosang yesus ene besara epo petrus; ne Tuhan." waktu petrus keringo, bahwa ene Tuhan, moko yo nyengkono pakaian yo, koe yo belo bepakaian, ulek yo sentuyun po lang gentung. ⁸murid- murid, io, yo mak ulet diang perau koe dero badi oro engket tana ombo, haya kira- kira duo jatus hasta tingen ulak dero muka jala yo ponu esa ene. ⁹Des dero ampe tana ombo, dero kito arong bolum ai keo esa mbo ombon yo diang jaja. ¹⁰ulek Yesus epo dero "oit ko tenu-tenu esa yo bayu tangop kam ene." ¹¹Simon Petrus dombo epo lang peraw laju matak jala ene epo tana ombo ponu atok esa-esa olai, jatus limo pulu tolu kukui kedeco io. tontan kedeco ne jala ene belo di rensen. ¹²ulek Yesus epo dero " Dido taka kuman, belo keo engket murid-murid ene yo ronun gunti epo Io, : " Ise iko ene"? se iyo ene doko Tuhan. ¹³Yesus malan epo ono', ulak ngalek roti ai mie ene epo dero, ketine lou esa ene'. ¹⁴Ene ka' doko mentolu derang Yesus mekelak kompu tonga epo murid-murid Iyo des sundok Io bolum ket ekang ulun mate. Yesus tindu epo petrus nte ngamu domba domba Io ¹⁵Des sundok ngodor Yesus ngulek epo simon petrus: Simon Pea Yohanes, kosang be iko se aku lengkat se dero endo?"Tuing Petrus epo Io: "beta Tuhan, Iko tau se aku sayang iko' " Ulek Yesus Epo iyo': Namu bino nuen biri-biri Ku' ". ¹⁶Ulek Yesus nte meduo derang epo io, : " Simon pea' Yohanes, sayang be iko se Aku,"? Tuing petrus epo Io : " Beta Tuhan, Iko tau aku sayang se Iko." ulek Yesus epo iyo' : Nasi namu biri-biri-Ku!" ¹⁷Ulek Yesus epo iyo memetolu derang " Simon, Anak Yohanes, sayang be iko' epo Aku"?Moko sedih kesong petrus koe Yesus ngulek epo Io : "Sayang be iko, se aku"? "ai io ngulek epo Io: "Tuhan, Iko tau eka ise masam, Iko' tau se aku sayang se Iko." Ulek Yesus epo Io' : Nasi Namu biri Biriku,"! ¹⁸"Aku ngulek epo iko',se beta-beta io des iko burok iko molit towing ko' ai malan epo moneka pengkakan ko, tapi ena iko sundok tuo, iko anta ngekar tanganko' ai ulun mak anta molit iko ai moit epo awa yo belo dipengkakan ko. ¹⁹Jadi Hal endo ulek Io nte mkelak ketimbe Petrus anta meti ai ngemulia Allah. sundok besara ktine, ulek Io epo Petrus : " Lumpat aku" ²⁰Des Petrus sekuleng, io kito se murid kesayangan Yesus desung nyarak dero, io ene' murid yo pas dero, desung sama-sama kuman tunge dempet Yesus ai yo ngunti: " Tuhan, ise io' yo anta nyerah iko?" ²¹Des Petrus meti' murid ene', io nglek epo Yesus: Tuhan ise yo anta' terjadi diang io endo?" ²²Tuing Yesus: " ena aku bepetua ' apa io nokon bolum sampe aku ulet ene makse urusan ko, tapi iko' : "Lumpat Aku ka iko". ²³Moko, penyuruh Yesus ene nyebar mo ekang erau buntung ene se murid ene belo dianta mate, padahal Yesus belo di ngulek ketine se belo anta mate, Tapi ena aku bepetua apa io nokon bolum sampe aku ulet nua, ise urusanko?" ²⁴Io ka dioko murid yo mie kesaksian nau umbang eka-eka endo, ai yo sundok nulis ene ai taka tau', se kesaksian io ene beta. ²⁵Aso deo hal hal yo mak mulai genawi koe Yesus, tapi ene asa tenulis erai-erai, san sanku erai denia endo pun belo dianta puli ngemuat eka kitab yo arus tenulis ene'.

Romans

Chapter 1

¹Ngket Paulus, batak Kristus Yesus, yo bnomba nte jadi rasul ai pinokudus nte ngabar Injil Allah. ²Injil ene sundok jnanji koe-Iyo ngket ono-ono tete nabi-nabi-Iyo lang Alkitab. ³Yo ene umbang Pea Allah, lang nau ulun Io ene kinomekus ngket upus Daud. ⁴Mbo lang Roh yo kudus, pinokelak lang pngnyuli-Iyo ngket ekang ulun mate, Se-Io ene doko Pea Allah yo keo kuasa, Yesus Kristus Tuhan taka. ⁵Tete Io low Allah mie epo kain kasih karunia nte jadi Rasul, Apa aku ngayak ulun-ulun ngket eka suku bangsa apa dero prsaya ai patoh epo karan-Io. ⁶Ktine low ikam yo mbo Roma, ikam yo sundok bnomba nte jadi mpun Kristus. ⁷Epo eka-eka ikam yo nongos mbo roma, yo knosang koe Allah, yo bnomba ai pinojadi ulun-ulun kudus. Kasih karunia ai damai sjahtra ngket Allah, Bapa taka, ai ngket Tuhan Yesus Kristus diang ikam. ⁸Tla-tla aku trima kasi epo Allah koe Yesus Kristus ombon ikam eka-eka, koe sundok dningo kabar nau umbang iman kam mbo mupus dnia. ⁹Koe Allah, yo layan ku diang beta-beta mbo lang ngabar Injil Pea-Iyo, ene doko saksi ku, se lang doa ku aku dor knop se ikam. ¹⁰Aku bdoa, apa diang ptua Allah pnyundok yo aku kuli nte nuntun ikam. ¹¹Koe aku kakan kito ikam nte mie karunia rohani epo ikam nte mturon ikam. ¹²Yo ene apa aku keo mbo ekang ikam ai lumpat snang koe iman taka pes-pes, koe iman kam

ktine low iman ku.¹³Erai buntung-erai buntung aku kakan apa ikam tau, se aku sundok jono keo kno ulet epo ikam, tapi sampe tempondo keo dor nte oki walang, apa mbo ekan ikam gawi ku ene keo nte oki eti asil yo kati low umbang mbo bangsa-bangsa yo makse Yahudi yo mak.¹⁴ Aku keo utang epo ulun Yunani, ktine low epo ulun-ulun yo makse ulun Yunani, epo ulun-ulun yo keo pnykola, ktine low epo ulun-ulun yo belo keo pnykola.¹⁵Koe ene doko aku kakan nte ngabar Injil epo ikam low yo nongos mbo Roma.¹⁶'Koe' aku' keo persaya' yo' turon lang Injil, koe' Injil ene' pnggalak Allah nte' nylamat tongku' ulun yo' persaya, tla-tla ulun Yahudi diang ulun Yunani low.¹⁷'Koe' langne' melak yo' kono ngket Allah, yo' brangkat ngket iman ai nuntun epo' iman, kati' keo tnulis: "Ulun yo' kono anta' bolun koe' iman."¹⁸Ngket sorga Allah mmkelak kmara-Iyo epo eka ktriaw diang kdadal ulun, Keo akal triau ene mombong ulun nte tau ktimbe nau yo beta umbang Allah.¹⁹Dero beta-beta kuli tau nau umbang Allah ene koe sundok keo lang kesong dero, koe Allah se sundok mmkelak ene epo dero.²⁰Ngket Allah nampa dnia endo ulun sundok kuli tau se kuasa Allah ene kden diang Io ene beta-beta memang Allah. Otang nau ene memang belo melak tapi dapet eti. Ulun kuli tau otang nau Allah ene dapet eti mbo nau pnytampa-Iyo. Jadi dero belo keo alasan nte belo tau.²¹Dero tau se Allah tapi dero belo mkolai-Iyo diang belo bsukur epo-Iyo. Makse ko ube kno dero ene belo keo otang, diang kesong dero yo bungang jadi seom.²²Kanam san dero kati ungka ponu diang hikmat, padahal dero ene bungang.²³Dero mba di nokon nyembah Allah yo kden, makse ko ube nymbah smpatung-smpatung yo tnampa memenau korik kotok yo tau mate, yo ene memenau ulun, empulu, korik botis opat ai korik-kotok yo malan diang buntung.²⁴Koe ene Allah belo di nyanda pngkakan pngkakan kesong dero nte gawi triau. Koe ene dero nggawi ise-ise yo gramas epo sama dero se.²⁵Koe dero nganti umbang yo kono ngket Allah diang otang yo eta ai muji diang nymbah korik-kotok ulak nengkewot se ise yo Tukang Tampa ene ube yo arus pnuji ndok kden, amen.²⁶Koe ene Allah nyrah nte dero nadah epo iwoi ruang yo nte ngmai, bang bawe dero belo di kakan song kati nau umbang nte ulun, tapi kakan sama bawe ube.²⁷Bang song ktine low, dero belo keo kno oli epo tadah bawe dero, tapi nngkakan epo sama song ube. bang song nggawi gawi yo nte ngmai diang sama song, koe ene dero kono bales yo sngkono diang ktriaw gawi gata dero ene.²⁸Koe san dero belo pnting tau se Allah, koe ene Allah belo nyanda akal dero jadi rusak, koe ene dero nglaku gawi gata yo belo kate gnawi.²⁹ponu diang nau triaw, akal dat, bolum mrangghai ai bolum rusak, ponu diang kakan nyongah, kakan ngmpate, belo tau sngkono, akal blengkong ai botu dat.³⁰Dero ene tukang mdat ulun, tukang mtnah, ngekoi Allah, kurang ajar, san ombo ba se ulun mak, sombong, tukang gawi triaw, belo patoh epo ulun tuo,³¹galu, belo stia, belo sayang epo ulun, belo kosang epo ulun.³²Dero tau se pnindu aturan Allah, ulun yo nglaku eka gawi ktine ene arus kono ukum pate. Beta ko ktine nokon apo gawi dero umbang ene, ai ka ube sngkono low mbo dero diang ulun yo gawi ktine

Chapter 2

¹Koe ene, o ulun, ise lou po iko, io ngukum ulun yo mak, iko se belo di belo keo sala. Koe, lang ngukum ulun mak, iko ngukum iko se, koe iko yo ngukum ulun mak, nggawi nau umbang yo sama.²Tapi taka tau, se ukuman Allah pinokitek diang jujur epo dero yo nggawi ktine.³Ai iko, o ulun, iko yo ngukum dero io nggawi ktine, tapi iko se nggawi yo lou, bahe san ko, se iko anta belo kono ngket ukuman Allah?⁴Kakan be iko ngomoi kambit kroa kesawai-Iyo, ksabar-Iyo ai kbuen kesong-Iyo? Belo be iko tau, se ptua ksawai Allah ene moit ikam apa btobat?⁵Tapi koe kois koroi kesong kam yo belo kakan btobat, ikam yo nembun kmara roa ombon ikam se montuk des olo mone mara roa ai ukuman Allah yo adil anta pinokelak.⁶Io anta males epo tongku ulun kati gawi gata iyo,⁷io ene bolum kden epo dero yo diang buket gawi buen, meto kmulia, hormat ai yo belo di anta mate,⁸tapi mara roa diang ngriten epo dero yo meto kpentingan diri se, yo belo patoh epo io kono, tapi patoh epo yo triau.⁹Pmenasa ai ksesa anta kono tongku ulun yo bolum io gawi triau, paling ono ulun Yahudi ai lou ulun Yunani,¹⁰tapi kmulia, hormat diang damai sejahtera anta knuli eka ulun yo gawi buen, yo ono ulun Yahudi, ai lou ulun Yunani.¹¹Koe Allah belo meti nau ulun.¹²Koe eka-eka ulun yo bdosa belo diang aturan Taurat anta mate belo didiang aturan Taurat; ai eka-eka ulun yo bdosa mbo iwat aturan Taurat anta nukum koe aturan Taurat.¹³Koe makse ulun yo kringo aturan Taurat io kono mbo onon Allah, tapi ulun io nggawi aturan Taurat anta yo pinokono.¹⁴Ena bangsa-bangsa io mak yo belo keo mpun aturan Taurat koe pngkakan io se nggawi ise yo penindu aturan Taurat, jadi, beta ko dero belo keo aturan Taurat, dero jadi aturan Taurat nte dero se.¹⁵Koe diang ene dero mmekelak, se atok aturan Taurat keo tnulis mbo lang kesong dero ai oyon kesong dero lumpat bsaksi diang akal dero baku tundruh ena belo baku ngket.¹⁶Nau umbang ene anta melak montuk olo, des Allah, sngkono diang Injil yo sampe ku, anta ngukum eka-eka yo melim lang kesong ulun, koe Kristus Yesus.¹⁷Tapi, ena ikam ngulek ikam se ulun Yahudi ai skurut epo aturan Taurat, nondek lang Allah,¹⁸ai tau yo pengkakan-Iyo, ai koe bnatuk lang aturan Taurat, kuli tau mone yo buen ai mone yo dat,¹⁹ai persaya, se ikam ene doko pengayak ulun posa diang pa nte dero yo mbo lang seom,²⁰pmatuk ulun bungau, ai nuti matuk ulun pian tuo, koe lang aturan Taurat ikam keo genap eka kpintar ai io kono.²¹Jadi, ktimbe nau kam nutui matuk ulun yo mak, belo be ikam nutui matuk ikam se? Ikam nutui matuk: "Nang ngako," ise moko ikam se ngako?²²Ikam yo ngulek: "Nang bzinah," mko ikam se bzinah? Ikam yo kekoi diang eka-eka berhala, ise mko ikam se ngrampok lou berhala?²³Ikam nondek se keo aturan Taurat, ise mko ikam se nguja Allah diang nglanggar aturan Taurat ene?²⁴Kati keo tnulis: "Koe ikam ube doko karan Allah nuja mbo ekang bangsa-bangsa yo mak."²⁵Katep memang keo jodo yo, ena ikam patoh aturan Taurat; tapi ena ikam nglanggar aturan Taurat, jadi katep kam ene belo keo jodoiyo oli.²⁶Jadi ena ulun belo bkatep nglaku penindu-penindu aturan Taurat, belo be io sama kati diang ulun yo sundok knatep?²⁷Ena ktine, jadi ulun yo belo bkatep, tapi yo nglaku aturan Taurat, anta ngukum ikam yo keo aturan btulis ai katep, tapi yo nglanggar aturan Taurat.²⁸Koe yo nulek Yahudi makse ulun yo melak kati Yahudi, ai yo nulek katep, makse katep yo ela baling tingin.²⁹Tapi ulun yo beta-beta Yahudi yo doko io yo belo di melak nau Yahudiiyo ai katep ene doko katep mbo lang kesong, yo rohani, makse yo kati uruf tulisan. Jadi pujian nteiyo mba diulet ngket ulun, tapi ngket Allah.

Chapter 3

¹Ena ktine, ise nyisa lalo yo ulun Yahudi ai ise jodoiyo sunat? ²Deo beta, ai lang eka-eka umbang. Yo paling ono: Koe epo dero doko firman Allah ene tnetep. ³Jadi ktimbe, ena ngket dero keo yo belo setia, kuli be belo setia ene mkore ksetia Allah? ⁴Sama skali belo! sbalikiyo: Allah ene kono, ai eka ulun paru eta, kati keo tnulis: "Apa lko melak se kono lang eka firman-Ko, ai kuret, ena lko tnundruh." ⁵Tapi ena pensala taka nutuy yo kono ngket Allah, ise yo nte taka ulek? Belo adil be Allah - aku ngulek kati ulun biasa - Ena Iyo mkelak mara-Iyo? ⁶Sama skali belo! Ena ka ktine, ktimbe Allah kuli ngukum dnia? ⁷Tapi ena yo kono ngket Allah ene koe eta ku tambah roa nte kmuliaan-Iyo, ise moko aku aso tnundruh kati ulun bdosa? ⁸Belo be eta tundruh ulun yo ngulek, se taka ngulek: "Man taka nggawi yo triaw, apa yo buen nyoret ngket ene." Ulun yo ktine ene arus sundok kuli ukuman. ⁹Jadi ktimbe? Keo be taka nyisa lalo se ulun yo mak? sama skali belo. Koe ela ombo taka sundok nundruh epo ulun Yahudi ktine low epo ulun Yunani, se dero eka ela iwat kuasa dosa, ¹⁰Kati keo tnulis: "Belo keo yo kono, ndok belo erai kongo. ¹¹Ndok belo erai kongo yo keo akal buen, ndok belo erai kongo yo meto Allah. ¹²Eka ulun sundok nylemang ngket boyan yo kono, dero eka-eka belo keo jodo, belo keo yo nggawi yo buen, ndok belo erai kongo. ¹³Tlonan dero kati kubur yo bsoa, dola dero ngrayu-ngrayu, teber dero keo bisa. ¹⁴boya dero ponu diang pator sumpah, ¹⁵botis dero resi nte epo ngenjail ngempate. ¹⁶Ksesa ai kbenasa bewet dero ela boyan dero, ¹⁷ai boyan damai dero belo tau; ¹⁸kanam takut epo Allah belo keo mbo ulun ene. ¹⁹Tapi taka tau, se eka yo tnulis lang Kitab Taurat tnadah epo dero yo bolum iwat aturan Taurat, apa btendat tongku bowa ai pupus dnia toyak ela iwat ukuman Allah. ²⁰Koe ndok belo erai kongo yo kuli pinokono mbo onon Allah koe nglaku aturan Taurat, koe aturan Taurat ene ube ulun tau se dosa. ²¹Tapi tempo ndo, belo di diang aturan Taurat yo kono ngket Allah sundok pinokelak, kati yo knesah lang Kitab Taurat ai Kitab-kitab deo nabi, ²²yo ene yo kono ngket Allah koe iman lang Yesus Kristus nte eka ulun yo percaya. Koe belo keo yo beda. ²³Koe eka ulun sundok nggawi dosa ai eka ulun sundok mapos kmulia Allah, ²⁴ai koe kasih karunia sundok pinokono diang die tingen koe tnous lang Yesus Kristus. ²⁵Kristus Yesus sundok pinotoko koe Allah jadi boyan damai koe iman, lang daya-Iyo. Nau umbang endo gawi-Iyo nte memekelak keadilan-Iyo, koe Iyo sundok belo di nyanda dosa-dosa yo sundok lalo des Io aso sabar. ²⁶Ptua-Iyo yo ene nte mkelak keadilan-Iyo des jman endo, apa melak, se Io beta ai low nyembeta ulun yo percaya epo Yesus. ²⁷Ena ktine, ise alasan yo nte btondek? Belo keo! Alasan ise? Alasan gawi gata? Belo, tapi alasan yo iman! ²⁸Koe kain yakin, se ulun pinokono koe iman, ai makse koe yo nglaku aturan Taurat. ²⁹Ena belo, keo be Allah ene toko Allah ulun Yahudi tingen? Belo be Io ene low Allah bangsa-bangsa yo mak? O, beta. Io ene low Allah bangsa-bangsa yo mak! ³⁰Arti yo, ena keo erai Allah, yo anta nyengkono epo ulun-ulun katap koe iman, ktine low ulun-ulun belo katap koe iman. Ena ktine, keo be kain mkore aturan Taurat koe iman? Sama skali belo! Mokin ube, kain mturoniyo.

Chapter 4

¹Jadi ise anta ulek taka nau umbang Abraham, bapa itak kakah taka? ²Keo ena Abraham pinokono koe gawi-iyu, jadi io keo tondal nte btondek, tapi belo di mbo onon Allah. ³Sbab ise ulek tulisan lang Alkitab? "Laju persaya doko Abraham epo Tunan, ai Tuhan ngitung nau umbang ene epo-iyu se yo kono." ⁴Ena keo ulun bgawi, upa-iyu belo di nitung kati hadiah, tapi ene mpun-iyu memang. ⁵Jadi ena keo ulun yo belo di bgawi, tapi persaya epo Io yo sanggup mkono ulun gawi triaw, iman-iyu ene nitung jadi yo kono. ⁶Ktine low ulek Daud ke ego ulun yo pkono Allah mak se koe gawi-iyu: ⁷"Ego beta ulun yo nampun sala-sala-iyu, ai tnokom dosa-dosa-iyu; ⁸ego beta ulun yo sala-iyu belo di nitung koe Tuhan epo-iyu." ⁹Nte ulun bkatep tinggen be nulek ego ene, mba be nte ulun yo belo bkatep low? Koe sundok ulek kain, se epo Abraham iman nitung se yo kono. ¹⁰Des mone nau umbang ene nitung yo kono? Onon be ena belo sundok io bkatep? Belo di des sundok bkatep, tapi onon ene. ¹¹Jadi tanda katep ene trima io nte metrai yo kono ngket iman-iyu, onon io bkatep. Koe ktine ene doko io jadi bapa eka ulun persaya yo belo bkatep, apa yo kono nitung epo dero, ¹²ai low jadi bapa ulun-ulun bkatep, yo doko dero yo belo di bkatep tinggen, tapi nyarak low boyan iman Abraham, bapa itak kakah taka, des io belo pian bkatep. ¹³Koe makse di koe aturan Taurat sundok dnje janji epo Abraham diang upus-iyu, se io anta ngmpun dnja tapi koe yo kono, lang iman. ¹⁴Koe ena dero yo nngkakan ene ngket aturan Taurat, nrima bagian yo jnanji koe Allah, jadi belo keo jodo iman ai ore doko janji ene. ¹⁵Koe aturan Taurat ene ngati mara roa, tapi mbo mone belo keo aturan Taurat, mbo mne belo keo low yo nlanggar. ¹⁶Koe ene doko yo kono lang iman apa ktine jadi kasih karunia, sampe janji ene trus pnakai nte eka-eka upus Abraham, mba di nte dero yo bolum ngket aturan Taurat tinggen, tapi ene low nte dero yo bolum ngket iman Abraham. Koe Abraham ene bapa taka eka-eka, ¹⁷kati keo tnulis: "Iko sundok ptoko-Ku jadi bapa deo bangsa" - la onon Allah yo epo-Iyu io sundok persaya, yo ene Allah yo nmbolum ulun mate ai nampa jadi diang firman-Iyu ise yo belo keo jadi keo. ¹⁸Koe beta ko belo keo alasan nte nngkakan, tapi Abraham aso nngkakan ai persaya, se io anta jadi bapa deo bangsa, kati yo sundok keo firman: "Ktine doko anta kdeo upus-ko." ¹⁹Iman-iyu belo di jadi loma, beta ko io tau, se kompu tonga-iyu mba di klian aut, koe umur yo sundok kira-kira jatus taun, ai Sara sundok belo tau nganak aut. ²⁰Tapi epo janji Allah io belo di kerong-kerong koe belo di prsaya, mokin ube tambah turon lang iman-iyu ai io ngmulia Allah, ²¹diang bol-bol prsaya se Allah keo kuasa nte nglaku ise yo sundok janji Io. ²²Koe ene nau umbang endo nitung epo-iyu se yo kono. ²³Pnyurah-pnyurah endo yo ene "nau umbang endo nitung epo-iyu," belo di tnulis nte Abraham tinggen, ²⁴tapi tnulis nte taka low; koe epo taka low Allah ngitung ene, koe taka persaya epo Io yo sundok msuli Yesus, Tuhan taka, ngket ekang ulun mate, ²⁵yo ene Yesus, yo sundok snrah koe sala taka ai pinosuli koe mkono taka.

Chapter 5

¹Koe ene,taka yo sinombeta koe iman, taka bolum lang damai sejahtera diang Allah koe Tuhan taka, Yesus Kristus. ²Koe Io taka low kuli boyan sumba koe iman epo kasih karunia endo. Mbo lang kasih karunia endo taka akat ai taka keo nte tondek lang pengkakan anta nrima kemulia Allah. ³Ai mba di pulun ene bute. Taka ube keo nte tondek lang pemenasa taka, koe taka tau, se pmenasa taka ene nampa sipat kbuket, ⁴koe sipat buket ene nampa tahan nte soba ai tahan nte soba ene nampa pengkakan yo beta. ⁵Ai pengkakan yo beta ene belo di nte noli, koe kosang Allah sundok tnudak epo lang kesong taka koe Roh Kudus yo sundok dne epo taka. ⁶Koe des taka aso loma, Kristus sundok mate nte taka ulun-ulun gawi teriau des jeman yo tnetap koe Allah. ⁷Koe poyo ulun kakan mate nte ulun yo kono-tapi bahe nte ulun yo buen keo ulun yo ronu mate-. ⁸Tapi apo Allah mkelak kosang-Iyo epo taka, koe Kristus sundok mate nte taka, des taka aso keo dosa. ⁹Longon se ene,koe taka tempondo sundok sinombeta koe daya-Iyo, taka pasti anta sinolamat ngket mara roa Allah. ¹⁰Koe ena taka, des aso manko tulan, pino damai diang Allah koe pengenate Pea-Iyo, da-da taka, yo tempondo sundok pino damai, pasti anta sinolamat koe bolum-Iyo! ¹¹Ai mba di pulun ene bute! Taka ube keo nte tondek lang Allah koe Yesus Kristus, Tuhan taka, koe ngke Io taka sundok nerima damai ene. ¹²Koe ene, sama kati dosa sundok sumba epo lang dnia koe erai kongo ulun, ai koe dosa ene low maot, ketine doko maot ene sundok kjara epo eka ulun, koe eka ulun sundok nampa dosa. ¹³Koe onon se aturan Taurat keo, sundok keo dosa mbo dnia. Tapi dosa ene belo dinitung ena belo keo aturan Taurat. ¹⁴Beta ko ktine maot sundok keo kuasa ngket jman Adam sampe epo jman Musa low ban dero, yo belo nggawi dosa diang sara yo sama kati yo sundok gnawi koe Adam, yo ene doko umbang yo Io anta ulet. ¹⁵ Tapi karunia Allah belo ka di sama diang pensala Adam. Koe, ena koe pensala erai kongo ulun eka ulun sundok toyak mbo lang kuasa maot, oro doko olai aso kasih karunia Allah ai karunia-Iyo, yo tudak-Iyo ombon eka ulun koe ersi kongo ulun, yo ene Yesus Kristus. ¹⁶Ai kasih karunia belo di keo ise-ise se dosa erai kongo ulun. Koe ukuman ombon erai pensala ene sundok jadi ukuman, tapi die se karunia ombon deo pensala ene nampa jadi pinokono. ¹⁷Koe, ena koe dosa erai kongo ulun, maot sundok bkuasa koe erai kongo ulun ene, jadi pawak beta aso dero, yo sundok nerima ruak ruau kasih karunia ai anugerah yo beta, anta bolum ai bkuasa koe erai ulun ene, yo ene Yesus Kristus. ¹⁸Koe ene, sama kati koe erai pensala eka ulun kono ukuman, ketine low koe erai gawi gata yo kono eka ulun kuli pinokono nte bolum. ¹⁹Jadi sama kati koe belo taat erai kongo ulun eka ulun sundok jadi ulun keo dosa, ketine low koe taat erai kongo ulun eka ulun jadi ulun yo kono. ²⁰Tapi aturan Taurat tnambah, apa pensala jadi tambah deo; ai mbo mbe dosa btambah deo, ela lane kasih karunia jadi ruak ruau, ²¹apa, sama kati dosa bkuasa lang alam maot, ketine kasih karunia anta bkuasa koe yo beta nte bolum yo kden,koe Yesus Kristus, Tuhan taka.

Chapter 6

¹Ena ktine, ise io nte taka ulek? Kate be taka ngmundal bolum lang dosa, apa epo btambah kasih karunia ene? ² Sama skali belo! Belo be taka sundok mate nte dosa, ktimbe umbang taka aso kuli bolum mbo lang ne? ³Ktine low, belo be ikam tau, se taka eka io sundok bnabtis lang Kristus, sundok bnabtis lang pnganate-Iyo?⁴Diang ketine ene taka sundok knubur sama-sama diang Io koe bnaptis lang pngenate, apa, sama kati Kritus sundok pinosuli ngket ekang ulun mate koe kemulia Bapa ketine low taka anta bolum lang bolum yo bayu. ⁵Koe ena taka sundok jadi erai diang ise yo sama diang pngnate-Iyo, taka low jadi erai diang ise yo sama diang pngenyuli-Iyo.⁶Koe taka tau, se ulun usang taka sundok lumpat snalib, apa kompu dosa taka mapos kuasaiyo, apa taka nang ngembatak kompu tonga taka epo dosa nua. ⁷Jadi ise yo sundok mate, io sundok lopos ngket dosa.⁸Jadi ena taka sundok mate diang Kristus, taka persaya, se taka anta bolum low diang Io.⁹Koe taka tau, se Kristus, des sundok Io nyuli ngket ekang ulun mate, belo di mate oli: maot belo dikuasa oli ombon Io.¹⁰Koe pngenate-Iyo ene doko pngenate nte dosa, sindai bute ai nte turai-turaiyo, ai bolum-Iyo ene bolum nte Allah. ¹¹Ktine ka doko yo ikam meti ene: se ikam sundok mate nte dosa, tapi ikam bolum nte Allah lang Kristus Yesus.¹²Koe ene moko io dosa nang beta oli bkuasa lang kompu tonga kam yo tau mate, apa ikam nang oli ngaya pengkakaniyo. ¹³Ai nang beta ikam nyerah anggota-anggota kompu tonga kam epo dosa pnakai nte dapu gawi dat, tapi snrah ka kompu tonga kam epo Allah kati ulun-ulun yo bai mate tapi yo tempo ndo bolum. Ai srah anggota-anggota kompu tonga kam epo Allah nte jadi dapu-dapo yo kono. ¹⁴ Koe ikam belo di lang kuasa dosa oli, koe ikam belo di keo iwat aturan Taurat, tapi ela iwat kasih karunia.¹⁵Jadi ketimbe nau iyo? Nampa dosa be taka anta, koe taka belo di keo ela iwat aturan Taurat, tapi ela iwat kasih karunia? Sama skali belo! ¹⁶Mba tau be ikam, se ena ikam nyrah kompu tonga kam epo ulun jadi batak nte ngayaiyo, ikam ene doko batak ulun ene, yo arus aya kam, ktine lang dosa yo moit ikam epo pngenate, ktine low lang kpatoh yo moit ikam epo yo kono?¹⁷Tapi sukur ka epo Allah! Bai memang ikam batak dosa, tapi tempo ndo ikam diang bol kesong sundok ngaya tutui batuk yo sundok snampe epo ikam. ¹⁸Ikam sundok bnebas ngket dosa ai jadi batak yo beta.¹⁹Aku ngulek nau umbang endo diang sara ulun koe kegle kam. Koe sama kati ikam sundok nyrah anggota-anggota kompu tonga kam jadi batak yo rmis ai triaw yo moit ikam epo tuju nglawan, ktine low nau umbang ikam tempo ndo arus nyrah anggota-anggota kompu tonga kam jadi batak yo beta yo moit ikam apa jadi kudus. ²⁰Koe des ikam batak dosa, ikam lopos ngket yo kono. ²¹Jadi ise bua yo utik kam ngket mne? eka-eka ene nampa ikam kiso kanam mai tempo ndo, koe pyundok eka ene yo doko pngenate.²²Tapi tempo ndo, des sundok ikam bnebas ngket dosa ai des ikam jadi batak Allah, ikam kuli bua yo moit ikam epo jadi kudus ai nte pnyundokiyo yo doko bolum yo kden. ²³Koe upa dosa ene doko maot; tapi karunia Allah yo doko bolum yo kden lang Kristus Yesus, Tuhan taka.

Chapter 7

¹Belo be ikam tau, erai buntung-erai buntung, - koe aku bsara epo dero io tau- ukum - se ukum bkuasa ombon ulun kola ulun ene aso bolum?²Koe ulun bawe bbolit ukum epo song io des io aso bolum. Tapi ena song io ene mate, lopos ka doko io ngket ukum molit io epo song io ene. ³Jadi ena song io aso bolum io nokon bjinah, ena io bsong diang ulun io mak.⁴Koe ene, erai buntung-erai buntungku, ikam lou sundok mate nte aturan Taurat koe kompu tonga Kristus, apa ikam jadi mpun ulun yo mak, yo doko mpun Io, yo sundok pinosuli ngket ekang ulun mate, apa taka kebua nte Allah. ⁵Koe des taka aso bolum lang sipat ulun, pengkakan gnewok diang dosa, yo knati koe aturan Taurat, begawi lang kompu tonga taka, apa taka kebua nte maot.Tapi tmpo ndo taka sundok bnebas ngket aturan Taurat, koe taka sundok mate nte io, yo nguong taka, senga taka tmpo ndo ngelayan lang nau yo bayu gaya Roh ai makse lang yo nau ono gaya uruf aturan Taurat.⁷Ena ktine, ise yo nte kakan taka kesah ? Dosa be aturan Taurat ene ? Belo pus! Mokin ube, koe aturan Taurat aku sundok tau se dosa. Koe aku lou belo tau ise pengkakan ene, ena aturan Taurat belo ngulek : "Nang nengkakan!" ⁸Tapi lang perenta ene dosa kuli boyan nte ngati mbo lang kompu tonga ku bemasam pengkakan; koe belo keo aturan Taurat dosa ene mate.⁹Bai aku bolum belo diang aturan Taurat. Tapi sundok ulet prenta ene, dosa mulai bolum, ¹⁰mokin ube aku mate. Ai prenta yo arusiyo moit epo bolum, nte oki ube nte moit aku epo mate.¹¹Koe lang prenta ene, dosa kuli boyan nte nipu ngakal aku ai koe prenta ene io ngempate aku. ¹²Jadi aturan Taurat yo doko kudus, ai prenta ene lou yo doko kudus, kono ai buen.¹³Ena ktine, keo be yo buen ene jadi pengente nte oki ? Belo pus! Tapi apa melak, se io ene doko dosa, jadi dosa makai yo buen nte mekulet pengine nte oki, apa koe prenta ene dosa mokin melak aso nau umbangiyo se dosa. ¹⁴Koe taka tau, se aturan Taurat ene doko rohani, tapi aku lang sipat ulun, taro jual mbo iwat kuasa dosa.¹⁵Koe ise yo gawiku, aku belo di tau. Koe makse yo pengkakanku yo gawiku, tapi ise yo aku kekey ene ube yo gawiku. ¹⁶Jadi ena aku nggawik ise yo makse pengkakanku, sengkono ka mbo aku, se aturan Taurat ene buen.¹⁷Ena ktine makse aku oli yo nggawiiyo, tapi dosa yo keo lang aku.¹⁸ Koe aku tau, se mbo lang aku, yo ene mbo lang aku lang sipat ulun, belo keo ise-ise yo buen. Koe pengkakan memang keo mbo lang aku, tapi makse nggawi nau umbang ise yo buen.¹⁹Koe makse ise yo pengkakanku, yoene yo buen, yo gawiku, tapi ise yo makse pengkakanku, yo doko yo triaw, yo gawiku. ²⁰Jadi ena aku ngawi ise yo makse pengkakanku, jadi makse aku oli yo nggawiiyo, tapi dosa yo nongos mbo lang aku. ²¹Ktine doko aku ruku aturan endo: Ena aku kakan nggawi ise yo buen, yo triaw ene keo mbo aku.²²Koe lang kesongku aku gawal se aturan Allah, ²³tapi mbo lang kompu tongaku aku kito aturan yo mak yo nungka ngelawan akal buenku ai nampa aku jadi preket lang aturan dosa yo keo mbo lang kompu tongaku.²⁴Aku, ulun sesa beta! ise po yo anta ngelopos aku ngket kompu maot endo?²⁵ Syukur epo Allah! koe Kristus, Tuhan taka. (7-26) Jadi diang akal buenku aku ngelayan aturan Allah, tapi diang kampu tonga ulunku aku ngelayan aturan dosa.

Chapter 8

¹Ktine ka doko tempo ndo belo keo ukuman nte dero yo keo mbo lang Kristus Yesus. ²Roh, yo mie bolum sundok ngbebas ikam lang Kristus ngket aturan dosa ai aturan maot. ³Koe ise yo belo dapet gawi aturan Taurat koe belo keo kuat kualu koe isi, sundok gnawi koe Allah. Diang sara nyemuyu Pea-Iyo se lang isi, yo kerai nau diang isi yo lang kuasa dosa koe dosa, Io sundok mkitek ukuman epo dosa mbo lang isi, ⁴apa yo pnindu aturan Taurat pinognap mbo lang taka, yo belo di bolum ngaya isi, tapi ngaya Roh. ⁵Koe dero yo bolum ngaya isi, ngenanam nau umbang yo ngket isi; dero yo bolum ngaya Roh, ngenanam nau umbang yo ngket Roh. ⁶Koe pengkakan isi ene maot, tapi pengkakan Roh ene bolum ai damai sejahtera. ⁷Koe pengkakan isi ene nyongah diang Allah, koe io belo di patoh epo aturan Allah; nau umbang ene belo memang di dapet nteiyoy. ⁸Dero io bolum lang isi, belo anta bsengkono epo Allah. ⁹Tapi ikam belo di bolum lang isi, tapi lang Roh, ena memang Roh Allah nongos mbo lang ikam. Tapi ena ulun belo keo Roh Kristus, io makse mpun Kristus. ¹⁰Ena Kristus keo mbo lang ikam, jadi kompu memang mate koe dosa, tapi roh ene bolum koe yo kono. ¹¹Ai ena Roh Io, yo sundok msuli Yesus ngket ekang ulun mate, nongos mbo lang ikam, jadi Io, yo sundok msuli Kristus Yesus ngket ekang ulun mate, anta nembolum low kompu kam yo tau mate ene koe Roh-Iyo, yo nongos mbo lang ikam. ¹²Jadi eraibuntung-etaibuntung, taka ka doko ulun yo keo utang, tapi makse epo isi, apa bolum ngaya isi. ¹³Koe, ena ikam bolum ngaya isi, ikam anta mate; tapi ena koe Roh ikam ngempate gawi gata kompu kam, ikam anta bolum. ¹⁴Eka ulun, yo atur Roh Allah, yo doko pea Allah. ¹⁵Koe ikam belo di nrima roh jadi batak yo nampa ikam jadi aso takut, tapi ikam sundok nrima Roh yo nampa ikam jadi pea Allah. Koe Roh ene taka momba: "O Abba, o Bapa!" ¹⁶Roh ene ngulek sama-sama diang roh taka, se taka doko pea-pea Allah. ¹⁷Jadi ena taka doko pea, jadi taka low ka doko mpun pnape, artiyo ulun-ulun yo keo hak nte nrima janji-janji Allah, yo anta nrimaiyo sama-sama diang Kristus, yo ene ena taka bnasa sama-sama diang Io, apa taka low kinomulia sama-sama diang Io. ¹⁸Koe aku persaya, se ksesa des tempo ndo endo belo di dapet snama diang kmulia yo anta noret epo taka. ¹⁹Koe diang ngeno beta eka yo bolum minte des pea-pea Allah pinokelak. ²⁰Koe eka yo bolum sundok pinokalah epo yo belo keo otang, makse koe ptua yo se, tapi koe ptua Io, yo sundok mkalahiyo, ²¹tapi lang arapan, koe yo bolum ene se low anta bnebas ngket jadi batak yo anta mate ai sumba epo lang kbebas kmulia pea-pea Allah. ²²Koe taka tau, se sampe tempo ndo eka yo bolum sama-sama ngeluh ai sama-sama kiso kanam siet mekus. ²³Ai mba di pulun dero tingen, tapi taka yo sundok nrima karunia tuo tingen ngket Roh, taka low ngeluh lang kesong taka ulak minte nengkat kati pea, yo doko ngbebas kompu taka. ²⁴Koe taka sinolamat lang arapan. Tapi arapan yo melak, makse arapan oli; koe ktimbe nau-iyo ulun aso ngarap ise yo itan-iyo? ²⁵Tapi ena taka ngarap ise yo taka belo di kito, taka minte-iyo diang sabar. ²⁶Ktine low Roh ngawat taka lang kgele taka; koe taka belo di tau, ktimbe yo beta-iyo arus bdoa; tapi Roh se bdoa nte taka epo Allah diang pngenanam yo belo di dapet ulek. ²⁷Jadi Allah yo nyolidik kno kesong, tau ptua Roh ene, yo doko se Io, sngkono diang ptua Allah, bdoa nte ulun-ulun kudus. ²⁸Taka tau tempo ndo, se Allah lumpat bgawi lang eka nau umbang nte nampa yo buen nte dero yo nengkosang Io, yo doko nte dero yo bnomba sengkono diang ptua Allah. ²⁹Koe eka ulun yo pili-Iyo ngket tla, dero ene low yo ptoko-Iyo ngket tla nte jadi kerai nau diang nau Pea-Iyo, apa Io, Pea-Iyo ene, jadi yo tuo tingen ela ekang deo eraibuntung. ³⁰Ai dero yo ptoko-Iyo ngket tla, dero ene low bomba-Iyo. Ai dero yo bomba-Iyo, dero ene low yo pkono-Iyo. Ai dero yo pkono-Iyo, dero ene low yo kinomulia koe Io. ³¹Koe ene ise ko yo anta ulek taka nau umbang eka ene? Ena Allah ngengket taka, ise ka yo anta ngembali taka? ³²Io, yo belo di sayang Pea-Iyo se, tapi yo nyerah-Iyo nte taka eka-eka, ktimbe ka nau anta Io belo di mie eka ise-ise ka epo taka sama-sama diang Io? ³³Ise ka yo anta nuntut ulun-ulun yo sundok pili Allah? Allah, yo mkono dero? Ise po yo anta ngukum dero? ³⁴Kristus Yesus, yo sundok mate? Aso da nua: yo sundok nyuli, yo low tunge mbo tadah sanan Allah, yo ube jadi Pngawat nte taka? ³⁵Ise po yo anta mtenggang taka ngket kosang Kristus? Tnindas ena be pmenasa ena be kurow ksa, ena be siet lau ena be blaiblang, ena be bahaya, ena be mendaw? ³⁶Kati keo tnulis: "Koe Iko kain keo lang bahaya maot ngatok olo, kain sundok pinosama kati nau domba-domba nte semble." ³⁷Tapi lang eka ene taka lengkat se ulun-ulun yo kuret, koe Io yo sundok nengkosang taka. ³⁸Koe aku persaya, se tontan maot, ktine low bolum, tontan mlekat-mlekat, ktine low pmrenta-pmrenta, tontan yo keo tempo ndo, ktine low yo anta ulet, ³⁹ena be kuasa-kuasa, tontan yo la ombo, ktine low yo la iwa, ena be low eka-eka yo bolum yo mak, belo anta kuli mtenggang taka ngket kosang Allah, yo keo lang Kristus Yesus, Tuhan taka.

Chapter 9

¹Ise yo kakan ulek ku endo memang beta koe aku mpun Kristus, aku belo di nampa eta. Pngnanam lang kesong ku yo nayak koe Roh Allah, nambah yakin pngnanam ku lou se pngesah ku endo beta. ²Aku nyoru beta ai kesong ku dor kanam sesa³koe erai buntung - erai buntung ku yo erai bangsa diang aku. Koe nte dero aku se koe ka kono kutuk Allah ai pinotenggang& ngket Kristus. ⁴Dero ene ulun Israel yo sundok pnili ai Allah mjadi dero pea-pea-Iyo se, diang mmkelak kuasa-Iyo epo dero. Io nampa prjanjian diang dero ai mie epo dero aturan Torat. Allah memetau epo dero ktimbe umbang dero smbayang ai dero sundok kuli low janji-janji-Iyo. ⁵Dero ene upus ngket itak kakah taka. Kristus nton umbang ulun pngulet yo ngket bangsa dero. Io ombo tingan ngket eka-eka. Io ene Allah yo arus pnuji ndok turai! Amen. ⁶Aku belo di ngulek se janji Allah sundok belo dipnakai oli; tapi belo di eka ulun Israel ene umat yo kono pili koe Allah. ⁷Belo di eka upus Abraham ene pea-pea Allah. Koe Allah ngulek epo Abraham, "Pulun upus ngket Ishak tingan yo anta nulek upus ngket iko." ⁸Ene rti yo upus Abraham yo jadi pea-pea Allah ene pulun ka upus yo kinomekus ngket janji Allah; mba di eka eka dero ene upus iyo. ⁹Koe janji Allah ene ktindo, "Des jman ktindo anta Aku ulet, Sara anta keo pea song." ¹⁰Ai endo low: Tambah melak aso Ribka ngmekus duo kongo pea song ngket erai uma, yo ene Ishak itak kakah taka. ¹¹Onon se duo kongo pea ene kinomekus, Allah sundok nntong ise yo pili-Iyo nte epo sori iyo. Allah mili ene belo di koe leka umbang nau gawi gata ulun, tapi koe ktine memang nau ptua-Iyo. Koe des jman ene duo kongo pea song Ribka ene belo pian tau nggawi rti otang yo buen diang yo triau. ¹²Allah sundok ngulek epo Ribka, "Yo tuo anta nte jadi batac yo burok." ¹³Lang Alkitab tnulis se Allah ngulek ktindo, "Yakub Aku kosang, Tapi Esau Aku belo kosang." ¹⁴Ena ktine ise nte taka ulek? Se Allah ene belo adil be? Belo anta! ¹⁵Koe Io bpirman epo Musa, "Aku anta nngkosang epo ise Aku kakan nngkosang, ai Aku kakan sawai epo ise aku kakan sawai." ¹⁶Jadi umbang ene belo di leka koe pngkakan ulun ai komer ulun, tapi koe ksawai kesong Allah. ¹⁷Koe kitab suci ngulek epo piraun, "Aku mjadi iko raja nte erai jodo endo tingan, yo ene apa diang iko Aku mmkelak kuasa-Ku ai nampa karan-Ku pinokolai mbo lekum dnia". ¹⁸Jadi, Allah kosang ulun, ena Allah bptua ktine. Ai Allah nampa ulun jadi dadal ena Allah bptua ktine. ¹⁹Ikam anta ngulek epo aku, "ena ktine ise aso nte-Io psala? ise yo nglawan ptua-Iyo?" ²⁰Tapi ise ikam ene, ikam ene mba dikeo longon se umbang nau ulun tingan. Moko ikam kate ron selentuing diang Allah? Kuli be barang yo tnampa ene rkunti epo ulun yo tukang nampa iyo, "Ise moko iko nampa aku ktindo?" ²¹Tau be ikam se ulun yo tukang nampa tpayan ngket tana ene uyan-uyan iyo ka nampa nau tpayan ene ise ka nau ptua iyo? Nte nampa tpayan ngket tana yo sama ulun ene mbo uyan-uyan iyo se ka nampa nau ai ngnjodo, nte jodo yo mulia be nte jodo yo biasa tingan? ²²Ktine low umbang ise yo tnampa koe Allah. Io kakan nte mkitek kmara-Iyo ai mmkelak kuasa-Iyo. Tapi Io sabar epo dero yo arus nukum koe nampa Io mara. ²³Allah kakan low nte nutui epo taka kanam ego yo mroa, yo die-Iyo epo taka yo tngkosang-Iyo. Taka sundok ntong-Iyo nte kuli kanam ego ene. ²⁴Taka doko yo sundok bomba-Iyo, lgkat se ngket bangsa Yahudi tingan, tapi low ngket bangsa-bangsa yo mak. ²⁵Kati koe lang Kitab Nabi Hosea, Allah ngulek, "ulun-ulun yo makse umat-Ku, anta ulek-Ku 'umat-Ku'. Bangsa yo belo tngkosang-Ku, anta nulek 'Pngkosang-Ku'. ²⁶Ai mbo dnia mombe ka nulek epo ulun 'Ikam makse umat-Ku,' mbo mne ulun-ulun mne anta nulek pea-pea Allah yo bolum." ²⁷Nabi Yesaya ngulek umbang bangsa Israel, "Beta ko kroa bangsa Israel kati kroa krsik mbo tasik, pulun toro idik-idik tingan yo slamat; ²⁸Koe Tuhan mba di ola aut kakan mkitek hukuman-Iyo epo eka atok dnia." ²⁹Yesaya ngulek ktindo low, "Ena ka Allah yo Paling bkuasa belo nape nte taka upus, pasti taka eka sundok jadi kati Sodom ai Gomora." ³⁰Jadi ktindo umbang iyo: Bangsa-bangsa yo mak yo makse Yahudi belo di bkomer apa dero buen diang Allah, Tapi koe dero prcaya, moko ene Allah nampa dero buen oli diang Allah. ³¹Ulun-ulun Yahudi ube beta ko dero dor bkomer patoh epo aturan apa dero diang Allah, tapi dero ube belo kuli. ³²Ise moko dero belo kuli? Koe dero bkomer belo di diang prcaya epo Allah, makse ko ngket komer diang gawi gata tingan. Moko ene dero pukan tutur mbo "batu pnatur". ³³Umbang batu ene keo lang Alkitab tnulis ktindo, "Eti kam tah: Mbo Sion sundok payak-Ku batu yo tau nte nampa ulun tutur; yo ene erai batu olai yo tau nte nampa ulun pukan. Tapi ulun yo prcaya epo-Iyo belo anta kinomai."

Chapter 10

¹Eraibuntung-eraibuntung, pngkakan kesongku ai doaku epo Tuhan yo doko, apa dero sinolamat. ²Koe aku kuli mie pnyurah nau umbang dero, se dero beta-beta rajin nte Allah, tapi belo di diang kpaham yo kono. ³Akibat-iyoy, koe dero belo di tau yo beta mbo Allah ai koe dero bkomer nte nngkuat yo beta mbo dero se, jadi-iyoy dero belo di ngaya epo yo kono mbo Allah. ⁴Koe Kristus ene doko mgnap aturan Taurat, apa yo kono trima tongku ulun yo prsaya. ⁵Koe Musa nulis nau umbang yo kono koe aturan Taurat: "Ulun yo nggawi-iyoy, anta yo bolum koe-iyoy." ⁶Tapi yo kono koe iman ngulek ktindo: "Nang ngulek lang kesong kam: Ise ko anta dombo epo Sorga?", yo ene: nte moit Yesus diwa, ⁷ena be: "Ise yo anta diwa epo krbing maot?", yo ene: nte moit Yesus dombo ngket ekang ulun mate. ⁸Tapi ise ka ulek-iyoy? Endo: "Firman ene dmpet se ikam, yo doko mbo lang bowa kam ai mbo lang kesong kam." Ene ka doko firman iman, yo sampe kain. ⁹Koe ena ikam ngangkan lang kesong kam, se Yesus ene Tuhan, ai prsaya lang kesong kam, se Allah sundok msuli Io ngket ekang ulun mate, moko ikam anta sinolamat. ¹⁰Koe diang kesong ulun prsaya ai pinokono, ai diang bowa ulun ngangkan ai sinolamat. ¹¹Koe Kitab Suci ngulek: "Ise-ise ka ulun yo prsaya, belo anta kinomai." ¹²Koe mba di keo beda ulun Yahudi diang ulun Yunani. Koe, Allah yo erai ene doko Tuhan ngket eka ulun, kaya nte eka ulun yo beta-beta momba Io. ¹³Koe, ise-ise ulun yo beta-beta momba karan Tuhan, anta sinolamat. ¹⁴Tapi ktimbe nau dero beta-beta momba Io, ena dero belo di prsaya epo Io? Ktimbe nau dero kuli prsaya se Io, ena dero belo di kringo nau umbang Io? Ktimbe nau dero kringo nau umbang Io, ena belo keo yo nyampe-Iyoy? ¹⁵Ai ktimbe nau dero nyampe-Iyoy, ena dero belo di snuyu? Kati keo tnulis: "Buen beta pngulet dero yo moit kabar buen!" ¹⁶Tapi mba di eka ulun sundok nrima kabar buen ene. Yesaya se ngulek: "Tuhan, ise ka yo prsaya epo yo sampe kain?" ¹⁷Jadi, iman keo ngket pndingo, ai pndingo ene koe firman Kristus. ¹⁸Tapi aku ngunti: Mba di keo kringo-iyoy be dero? Beta dero sundok nmpaning-iyoy: "Oyon dero sampe epo mupus dnia, ai pmnsara dero sampe epo tompak dnia." ¹⁹Tapi aku ngunti: Keo be Israel kakan nmpaning-iyoy? Tla-tla Musa ngulek: "Aku nampa ikam woyu epo ulun-ulun yo makse umat ai ngati mara kam epo bangsa yo dadal." ²⁰Ai diang ronuy Yesaya ngulek: "Aku sundok sengkono kesong nte sruku dero yo meto Aku, Aku sundok mkelak kompu tonga epo dero yo belo di ngunti Aku." ²¹Tapi nau umbang Israel io ngulek: "Ngatok olo Aku sundok nyokoi kayang-Ku epo bangsa yo belo kakan ngaya ai tuju nglawan."

Chapter 11

¹Jadi aku ngunti: Keo be bahe Allah nolak umat-Iyo? Belo pus! Koe aku se low ulun Israel, ngket upus Abraham, ngket suku Benyamin. ²Allah belo di nolak umat-Iyo yo pili-Iyo. Bahe iko belo tahu, ise yo ulek Kitab Suci nau umbang Elia, des io ngadu Israel epo Allah: ³"Tuhan, nabi-nabi-Ko sundok pate dero, mezbah-mezbah-Ko sundok proros dero; toro aku ba yo aso bolum ai dero kakan kempate aku." ⁴Tapi ktimbe otang firman Allah epo-iyo? "Aku aso noro turu ribu kongo nte Oki, yo belo pini sujud nyembah Baal." ⁵Ktine low des endo aso keo toro, sengkono kati pili kasih karunia. ⁶tapi ena nau umbang ene terjadi koe kasih karunia, jadi makse koe gawi gata oli, koe ena belo ktine, kasih karunia ene makse kasih karunia oli. ⁷Jadi ktimbe? Israel belo di kuli ise yo srapet dero, tapi ulun-ulun yo pnili sundok kuliiyo. Ai ulun-ulun yo mak jadi dadal kesongiyo, ⁸kati keo tnulis: "Allah nampa dero turui ron, mie mato belo nte meti ai tlingo belo nte nempaning, nokon sampe olo ndo." ⁹Ai Daud ngulek: "Koe ka ungan dero jadi jipa ai tongkop, pktang ai ngembales nte dero. ¹⁰Ai koe ka mato dero belo kuli meti, koe ene dero belo keo pengkito, ai tampa ka klutuk dero dor sungkut." ¹¹Jadi aku ngunti: Keo be dero tutur ai pukan? Belo pus! Tapi koe sala dero, slamat sundok sampe bangsa-bangsa yo mak, apa nampa dero woyu. ¹²Koe ena pensala dero ene artiiyo pentataw nte dnia, ai pnyembelo dero pentataw nte bangsa-bangsa yo mak, da-da aso ksempurna dero. ¹³Aku ngulek epo ikam, o bangsa-bangsa makse Yahudi. Ube koe aku ene rasul nte bangsa-bangsa makse Yahudi, san ku nau umbang ene kmulia playananku, ¹⁴yo ene ena-ena aku kuli ngati kanam woyu lang kesong ulun-ulun bangsa ku se ai kuli nylamat tenu-tenu kongo ngket dero. ¹⁵Koe ena tolak dero ene artiiyo damai nte dnia, dapet be trima dero ene keo arti yo makse se bolum ngket ekang ulun mate? ¹⁶Ena roti yo tla ene kudus, jadi eka yo sundok snampur ene low kudus, ai ena wakat ene kudus, jadi paka-paka iyo kudus low. ¹⁷Koe ene ena tenu-tenu paka sundok snepek ai ikam ene suli ngket lang lati sundok jadi suli tnempel mbo ekang dero ai lumpat kuli bolum ngket wakat kayu zaitun yo roa pulut, ¹⁸nang beta ikam btondek epo paka-paka ene! ena ikam btondek, knop ka, se makse ikam yo mturon wakat ene, tapi wakat ene yo mturon ikam. ¹⁹Bahe ikam anta ngulek: keo paka-paka yo snepek, apa aku tnempel mbo ekang dero jadi suli. ²⁰Beta! Dero snepek koe dero belo percaya, ai ikam tetap tengkorong kojik koe iman. Nang ka ikam sombong, tapi takut ka! ²¹Koe ena Allah belo kosang epo paka-paka yo tolen, lo low belo dianta kosang epo se ikam. ²²Koe ene eti beta-beta ksawai Allah ai low kekois-Iyo, yo ene kekois epo ulun-ulun yo sundok toyak, tapi epo ikam ksawai-Iyo, yo doko ena ikam nokon lang ksawai-Iyo; ena belo, ikam low anta tnotok. ²³Tapi dero ene low anta tnempel nua, ena dero belo nokon lang belo percaya dero, koe Allah keo kuasa nte nempel dero nua. ²⁴Koe ena ikam sundok tnotok ngket paka tonga zaitun ngket lang lati, ai belo sengkono diang nau umbang kam ene ikam sundok tnempel epo tonga zaitun tolen, da-da aso dero endo, yo pangkan dero se anta tnempel mbo tonga zaitun dero se. ²⁵Koe, eraibuntung-eraibuntung, apa nang san kam se ikam se pintar, aku kakan apa ikam tau rahasia endo: Keo tenga ngket Israel sundok jadi dadal sampe bol-bol kdeyo yo ngket bangsa-bangsa mak yo sundok sumba. ²⁶Diang sara ktine eka Israel anta sinolamat, kati keo tnulis: "Ngket Sion anta ulet Pnous, lo anta ngoding eka ketriaw ngket Yakub. ²⁷Ai endo doko perjanjian-Ku diang dero, ena Aku ngisu ngloli dosa dero." ²⁸Mbo nau umbang Injil dero ene pngelawan Allah koe ikam, tapi koe dero pnili jadi knosang koe Allah leka koe itak kakah buyut bokut dero. ²⁹Koe Allah belo di noli diang kasih karunia ai pakot bomba-Iyo. ³⁰Koe sama kati ikam bai belo patoh epo Allah, tapi tempo ndo kuli ksawai koe dero belo di patoh, ³¹ktine low dero tempo ndo belo di patoh, apa koe ksawai yo sundok kuli kam, dero low anta kuli ksawai. ³²Koe Allah sundok nguong ulun lang belo patoh, apa lo kuli mkelak ksawai-Iyo epo eka dero. ³³O, bukan main klontopiyo ktataw, kpintar ai pentau Allah! Belo memang taro slidik aturan-aturan-Iyo ai belo dapet sursor boyan-boyan-Iyo! ³⁴Koe, ise yo tau kno Tuhan? ena belo ise yo pini jadi tukang nasehat-Iyo? ³⁵Ena belo ise yo pini mie ise-ise epo-Iyo, sampe lo arus nggantiiyo? ³⁶Koe eka-eka ene ngket lo, ai koe lo, ai epo lo: Nte lo doko kmulia ene sampe turai-turai!

Chapter 12

¹Koe ene, eraibuntung-eraibuntung, koe diang ksawai Allah aku nsehat ikam, apa ikam miye kompu tonga kam nte pendie yo bolum, yo kudus ai yo sengkono epo Allah: Ene doko ibadah kam yo beta-beta. ²Nang ka ikam kerai nau diang dnia endo, tapi wensut koe kesong kam yo sundok tinombayu, apa ikam kuli ngembada yo mone petua Allah: ise yo buen, yo sengkono epo Allah ai yo sempurna.³Ngaya kati kasih karunia yo dnies epo aku, aku ngulek epo tongku ulun mbo ekang ikam: Nang ka ikam mikir nau umbang yo ombo balo se jepen yo ngkam pikir, tapi apa ikam bpikir mbo nau, sampe ikam jaga-jaga kati kolai iman, yo die Allah epo tongku ikam.⁴Kati mbo erai kompu taka keo deo anggota, tapi belo di eka anggota keo tugas yo sama, ⁵Ketine low taka, beta ko deo, yo doko erai kompu lang Kristus; tapi tongku kompu taka ene doko anggota yo erai kongo epo yo mak.⁶Ketine doko taka keo karunia yo makse-makse kati kasih karunia yo dnies epo taka: Ena karunia ene nte bnubuat alo taka nggawi yo sengkono diang iman taka. ⁷Ena karunia nte ngelayan, alo taka ngelayan; ena karunia nte nutui matuk, alo taka nutui matuk; ⁸ena karunia nte ngnasehat, alo taka ngnasehat. Ise yo ngembagi-bagi ise-ise, moko yo io nggawi yo diang kesong yo brese; ise yo mimpin, moko yo io nggawiiyo diang moyoh; ise yo mkelak ksawai, apa io nggawiiyo diang ego.⁹Mokoiyo kosang ene nang tnampa-tnampa! Nidar ka yo dat ai gnawi ka yo buen. ¹⁰Alo ikam bako tenkosang kati erai buntung ai bako slempono miye hormat.¹¹Nang ka moko yo kmoyoh kam landu, alo ka roh kam bberu-beru ai nglayan Tuhan. ¹²Ego ka lang arapan, sabar ka lang kbenasa, ai slentuo lang doa! ¹³Nawat ka lang pnyembelo ulun-ulun kudus ai bkomer ka apa ikam dor mie awa nsan!¹⁴Berkati ka ise yo ngurow ngsa ikam, berkati ka ai nang mator nyumpah! ¹⁵Ego ka diang ulun yo ego, ai nangis ka diang ulun yo nangis! ¹⁶Moko yo ikam erai kesong erai penganam lang bolum kam sama-sama; nang ka ikam mikir nau umbang yo ombo, tapi tnadah kompu tonga kam epo nau umbang yo biasa. Nang ngontus se diri kam tukang!¹⁷Nang ngebales dat diang dat; gawi ka yo buen epo eka-eka ulun! ¹⁸Ena dapet, ena nau umbang ene skongkong epo ikam, bolum ka lang damai diang eka-eka ulun!¹⁹Eraibuntung-eraibuntung ku yo knosang, nang ka ikam se tindu bales, tapi diye ka awa epo pngemara Allah, koe keo tnulis: Ngembales ene hak -Ku. Aku yo anta ngembales, Firman Tuhan. ²⁰Tapi, ena bali kam siet lau, die ka io okan; ena io krengan, dniye io danum! Diang gawi gata ketine ikam nembun bayo api ela ombon utok iyo. ²¹Nang ikam kalah epo yo dad, pinokalah ka yo triaw diang yo buen!

Chapter 13

¹Tongku-tongku ulun arus patoh epo pmrenta yo ombon-iyu, koe belo keo pmrenta, yo belo di ulet ngket Allah; ai pmrenta-pmerenta yo keo, tnetap koe Allah. ²Koe ene ise-ise ulun yo nglawan pmrenta, io nglawan aturan Allah ai ise ulun yo nglaku-iyu, anta mkulet ukuman nte io se. ³Koe ena ulun nggawi yo buen, io mba di koyoh takut se pmrenta, pulun ena io nggawi yo triaw. Kakan be ikam bolum belo di diang takut se pmrenta? Gnawi ka yo buen ai ikam anta kuli pujian ngket-iyu. ⁴Koe pmrenta ene batak Allah nte kbuen kam. Tapi ena ikam nggawi yo triaw, takut ka se io, koe belo di belo keo jodo pmrenta nyombeng mendaw. Pmrenta ene batak Allah nte males kmara Allah epo dero yo gawi triaw. ⁵Koe ene prlu taka se patoh, mba di koe kmara Allah tinggen, tapi low koe pngenanam lang kesong taka. ⁶Koe ene ka doko low moko ikam mayar bea. Koe dero yo ngurus nau umbang ene yo doko playan-playan Allah. ⁷Bayar ka epo eka ulun ise yo arus bayar kam: bea epo yo keo hak nrima bea, sewa epo yo keo hak nrima sewa; kanam san takut epo ulun yo keo hak nrima kanam san takut, ormat epo ulun yo keo hak nrima ormat. ⁸Nang ka ikam utang ise-ise epo ulun ise ka low, tapi arus ikam bako tengkosang. Koe ise-ise ulun yo nengkosang sama ulun, yo sundok sengkono diang aturan Taurat. ⁹Koe firman: nang bjinah, nang ngempate, nang ngako, nang ngempu pengkakan ai firman mone ka low, sundok keo ba lang firman endo, yo ene: Tengkosang ka sama ulun kati epo kompu tonga ko se. ¹⁰Kosang belo di triaw gawi epo sama ulun, koe kosang ene doko mgenap aturan Taurat. ¹¹Nau umbang endo arus gawi kam, koe ikam tau nau des tempo ndo, yo doko se des iyo sundok sampe nte taka apa ruko ngket turui. Koe tempo ndo slamat sundok tambah dempet epo taka se des taka jadi persaya. ¹²Olo sundok malom beta, sundok duni molo. Koe ene alo taka ngendikah gawi gata yo seom ai makai gnep-gnep dapo trang! ¹³Alo taka bolum diang buen-buen, kati mbo molo, nang lang ungan ruak ruaw ai mauk, nang lang pokeng koreng ai ngaya pengkakan ngenakos, nang lang bolum belo tau nyung ai kesong sirik ba. ¹⁴Tapi pnakai Tuhan Yesus Kristus jadi gnep-gnep dapo pa ai nang pawak balo asi ela se kompu tonga nte ngaya pengkakan iyo.

Chapter 14

¹Tinorimaka ulun yo gele iman iyo ai nang ngemana pentau iyo.²Io erai persaya, se io kate kuman ise masam okan, tapi ulun yo gele iman iyo pulun kuman deli luen tingen.³Ise yo kuman, nangka ngina ulun yo belo kuman, ai ise yo belo kuman, nangka ngukum ulun yo kuman, koe Allah sundok nrima ulun ene.⁴Ise po ikam, sampe ikam ngukum batak ulun io mak? Akat be io pukat be io ene doko urusan tuan io se. Tapi io anta nokon akat, koe Tuhan bkuasa ngndurung io dor akat.⁵San yo erai kongo olo io erai pawak penting se olo yo mak, tapi san io mak eka olo ene sama ba. Moko yo tongku ulun beta-beta persaya lang kesong iyo se.⁶Ise io persaya epo lelu-lelu olo, io nggawi iyo nte Tuhan. Ai ise kuman, io nggawi iyo nte Tuhan, koe io ngulek sukur epo Allah. Ai ise belo kuman, io nggawi iyo nte Tuhan, ai io lou ngulek sukur epo Allah.⁷Koe ndok belo erai kongo ngket taka io bolum nte io se, ai ndok belo erai kongo ulun io mate nte io se.⁸Koe ena taka bolum, taka bolum nte Tuhan, ai ena taka mate, taka mate nte Tuhan. Jadi buen bolum be mate be, taka mpun Tuhan.⁹Koe nte ene doko Kristus sundok mate ai bolum nua, apa Io jadi Tuhan, nte ulun-ulun mate, ai lou nte ulun-ulu bolum.¹⁰Tapi ikam, Ise moko ikam ngukum erai buntung kam se? Ise moko ikam ngina erai buntung kam se? Koe taka eka-eka arus ngadap mbo pengadilan Allah.¹¹Koe keo tnulis: "Koe bolumku, ktine doko firman Tuhan, eka-eka ulun anta nyembah mbo onon-Ku ai eka-eka ulun anta ngmulia Allah."¹²Ktine ka doko tongku kongo ngket taka endo anta mie tanggung jawab nau umbang iyo se epo Allah.¹³Koe ene nangka taka baku ukum oli! Tapi aso buen ikam makai tutui batuk endo: Nang taka nampa erai buntung taka pukan ai swakur!¹⁴Aku tau ai persaya lang Tuhan Yesus, se belo keo lonsa n gket io se. pulun nte ulun io ngomoi, se ise-ise ene lonsa, nte ulun ene doko lonsa.¹⁵Koe ena ikam mesiet kesong erai buntung kam koe ise-ise okan kam, jadi ikam belo bolum gaya penindu kosang oli. Nangka ikam ngempate erai buntung kam koe okan kinan kam, koe Kristus sundok mate nte io.¹⁶Ise io buen, io mpun kam, nang die kam tptenah.¹⁷Koe Kerajaan Allah makse nau umbang okan kinan diang danum dawen, tapi nau umbang io kono, damai sejahtera ai kekego koe Roh Kudus.¹⁸Koe ise-ise nglayan Kristus diang sara endo, io sengkono epo Allah diang normat koe ulun.¹⁹Koe ene man taka nyerapet ise io memekulet damai sejahtera diang io keo jodo nte baku tengkuat.²⁰Nangka ikam ngerusak gawi gata Allah koe okan singkap! Eka-eka ene doko susi, tapi sesa ka beta doko ulun, Ena koe okan singkap iyo ulun io mak swakur!²¹Alo ka ikam nang kuman isi ai ngisop anggur, ai ise-ise ka io jadi batu nte tutur nte erai buntung kam.²²Skongkong ka epo persaya io mpun kam ene, nte ngkam se mbo onon Allah, Ego beta doko io, io belo ngukum iyo se lang ise io san io buen nte gawi.²³Tapi ise-ise io kerongkerong, ena io kuman, io sundok nukum, koe io belo nggawi iyo di diang iman. Ai eka-eka ise yo belo diang iman, ene doko dosa.

Chapter 15

¹Taka, yo galak, arus angwat kgele ulun yo belo keo kuatkalu ai nang taka meto pengego taka se.²Tongku ulun mbo sama taka endo arus meto pengego sama taka nte kbuen iyo nte nengkuat iyo.³Koe Kristus lou belo dimeto pengego-Io se, kati keo tnulis: " penyurah uja dero, yo nguja iko, sundok kono aku ." ⁴ Koe eka-eka yo sundok tnulis bai, sundok tnulis nte pmatuk te taka, apa taka sekongkong turon mbo arapan keo kesabar ai pengiburan ngket Kitab suci.⁵Mosung mbe Allah, yo doko pengulet kesabar ai pengiburan mie nyung akur epo iko, sengkono diang ptua Kristus Yesus, ⁶Koe diang kerai kesong diang kerai penyurah ikam ngemulia Allah ai Bapa Tuhan taka, Yesus Kristus. ⁷Koe ene tinorimaka doko erai-erai, sama kati Kristus lou sundok nrima taka te ngemulia Allah.⁸Yo petuaku yo doko, se koe penyembeta Allah Kristus sundok jadi playan ulun-ulun bekateb nte memeturon janji yo sundok die- Iyo epo itak kakah taka, ⁹ai nte nampa kuli bangsa-bangsa, apa dero ngemulia Allah ke rahmat-Iyo, kati keo tnulis: " Koe ene aku anta ngemulia Iko mbo bangsa-bangsa ai nyelegu mazmur nte karan Ko. "¹⁰ Ai setrus iyo: "Ego-ego ka o bangsa-bangsa, diang umat-Io. " ¹¹ Ai nua "Pujika Tuhan o ikam eka bangsa-bangsa, ai koeka eka-eka suku bangsa muji Io. "Ai nua ulek Yesaya: "Suli ket tondal Isai anta nyoret, ai iyo anta nyuli nte mrenta bangsa-bangsa, ai epo-Io ka doko bangsa-bangsa anta mayak harapan. "Mosung mbe ka Allah, pengulet harapan, nemponu iko diang eka-eka pngego ai damai sjahtra lang iman kam, apa koe penggalak Roh Kudus iko ruakruau lang harapan. Eraibuntung-eraibuntungku, aku se persaya nau umbang ikam, se ikam lou sundok ponu diang yo buen ai diang eka pentau ai klian nte bako nasehat. ¹⁵Tapi, koe kasih karunia yo sundok die Allah epo aku, aku lanah landu diang bsrnu sundok nulis epo iko nte memekenop iko, ¹⁶yo ene se aku kate jadi playan Kristus Yesus nte bangsa-bangsa yo makse Yahudi lang playan nyampe Injil Allah, apa bangsa-bangsa yo makse se Yahudi kuli tinorima koe Allah nte persembahan yo sengkono epo-Iyo, yo binorese ke Roh Kudus. ¹⁷Jadi lang Kristus aku kate kuli nondek nau otang playananku nte Allah. ¹⁸Ai aku belo anta ronu besurah nau otang ise-ise yo mak, yo mak se,se nau otang ise yo sundok gawi Kristus koe ku, yo ene nte moit bangsa-bangsa yo mak epo kpatoh, koe pengesah ai gawigata, ¹⁹Koe kuasa tanda-tanda ai mujizat-mujizat, ai koe kuasa Roh. Ktine ka doko lang dalam ngelekum ngket Yerusalem sampe po Ilirikum aku sundok nyape bol-bol yo Injil Kristus. ²⁰Ai lang penyampe ene sanku jadi hormat nte oki, se aku belo di ngelaku iyo ela awa-awa, la mone karan Kristus ulun sundok tau, apa aku nang nengkuat mbo ombon awa, yo sundok payak ulun mak, ²¹tapi sengkono diang yo keo tnulis : "Dero yo belo pini nrima kabar nau umbang Iyo, anta kito Iyo, ai dero yo belo pini krongo ene, anta tau ene. " ²²Koe ene ka doko aku dor keo walang nte nuntun ikam. ²³Tapi tempondo, koe aku belo keo oli awa begawi mbo ja endo ai koe aku sundok tenu-tenu taun kola iyo kakan nuntun ikam, ²⁴aku ngarap lang dalanku epo Spanyol aku kuli singgah mbo awa kam ai mangkoruku diang ikam, apa ikam kuli ngator aku epo lane, des sundok aku ile-ile kisokanam mangkoruku diang ikam. ²⁵Tapi tempo ndo aku desung la boyan epo Yerusalem nte ngator bantuan ente ulun-ulun kudus. ²⁶Koe Makedonia ai Akhaya sundok sudok ngalek pmkat nte ngawat ise-ise epo ulun-ulun kao ekang ulun-ulun kudus mbo Yerusalem. ²⁷Pmkat ene memang sundok alek dero, tapi ene memang arus nte dero. Koe ena bangsa-bangsa yo mak sundok kuli bagian lang pengkeo rohani ulun Yahudi, koe ene doko belokate belo lou bangsa-bangsa yo mak ene ngelayan ulun Yahudi diang pengkeo pengkenan dero. ²⁸Ena aku sundok nyudok gawigata ene ai sundok nyerah asil gawi bangsa-bangsa yo mak ene epo dero, aku anta bju epo Spanyol lalo tete kota kam. ²⁹Ai aku tau, se ena aku ulet nuntun ikam, aku anta nglaku iyo diang bol-bol pengkeo Kristus. ³⁰Tapi koe Kristus Tuhan taka, ai keo kasih Roh, aku nasehat ikam, eraibuntung-eraibuntung ente bdoa beta-beta sama-sama diang aku lang doa epo Allah ente oki, ³¹apa aku jnaga engket ulun-ulun yo belo patoh mbo Yudea, ai apa diesokoiku nte Yerusalem tinorima diang buen koe ulun-ulun kudus mbo lane, ³²apa aku yo diang ego ulet epo ikam koe ptua Allah, kuli slokoi sama-sama diang ikam. Allah, pengulet damai sejahtera, ngambi ikam eka-eka! Amin.

Chapter 16

¹Aku tindu sanda-sanda kam Febe, erai buntung taka yo bawe yo nglayan jmaat mbo Kengkrea, ²apa ikam nrima io lang Tuhan, kati nau umbangiyo yo arusiyo nte ulun-ulun kudus, ai nnawat io ena io perlu. Koe io se sundok ngawat deo ulun, ene low epo aku se.³Sampe ka salam epo Priskila ai Akwila, tman-tman kerai gawi diang aku lang Kristus Yesus. ⁴Dero sundok btruan kesong dero nte bolum ku. Epo dero mba di aku tingin yo betrima kasih, tapi low eka jmaat makse Yahudi. ⁵Salam low epo jmaat mbo lou dero. Salam low epo Epenetus, erai buntung yo kosangku, yo ene bua tla ngket ja Asia nte Kristus.⁶Salam epo Maria, yo sundok bgawi beta-beta nte ngkam. ⁷Salam epo Andronikus ai Yunias, eraibuntung-eraibuntungku erai bangsa, yo pini pinonjara sama-sama diang aku, yo ene ulun-ulun penting mbo ekang rasul-rasul ai yo sundok jadi Kristen ono se aku. ⁸Salam epo Ampliatius yo kosangku lang Tuhan. ⁹Salam epo Urbanus, tman kerai gawi kain lang Kristus, ai salam epo Stakhis, yo kosangku. ¹⁰Salam epo Apeles, yo tahan uji lang Kristus. Salam epo dero, yo kerai lou diang Aristobulus. ¹¹Salam epo Herodion, teman ku kerai bangsa. Salam epo dero yo kerai lou diang Narkisus, yo keo lang Tuhan. ¹²Salam epo Trifena ai Trifosa, yo bgawi poruk lang playanan Tuhan. Salam epo Persis, yo kosangku, yo sundok bgawi poruk lang playanan Tuhan. ¹³Salam epo Rufus, ulun pnili lang Tuhan, ai salam epo ineiyo, yo nte oki ene doko ine low. ¹⁴Salam epo Asinkritus, Flegon, Hermes, Patrobas, Hermas ai eraibuntung-eraibuntung yo sama-sama diang dero. ¹⁵Salam epo Filologus, ai Yulia, Nereus ai eraibuntungiyo yo bawe, ai Olimpasi, ai low epo eka-eka ulun kudus yo sama-sama diang dero. ¹⁶Bako salam-salam ka ikam diang arok olam yo kudus. Salam epo ikam ngket eka jmaat Kristus. ¹⁷Tapi aku ngnasehat ikam, eraibuntung-eraibuntung, apa ikam jaga-jaga se dero, yo belo di bsengkono diang tutui batuk yo sundok trima kam, nampa belo tau nyung ai nampa pngaruh triaw. Koe ene kinoliki ka dero ene! ¹⁸Koe ulun-ulun ktine belo di nglayan Kristus Tuhan taka, tapi nglayan buntung dero se. Ai diang pmensara dero yo ngatok ngandal ai basa dero yo manis lmak dero ngakal ulun-ulun yo buen kesongiyo. ¹⁹Kabar nau umbang kpatoh kam sundok dningo koe eka-eka ulun. Koe ene aku ego diang nau umbang kam. Tapi aku kakan apa ikam pintar epo ise yo buen, ai brese ngket ise yo triaw. ²⁰Mudah-mudahan Allah, pngulet damai sjahtra, peles anta mteme iblis iwat botis kam. Kasih karunia Yesus, Tuhan taka, diang ikam! ²¹Salam epo ikam ngket Timotius, tmanku erai gawi, ai ngket Lukius, Yason ai Sosipater, tman-tman ku erai bangsa. ²²Salam lang Tuhan epo ikam ngket Tertius, yo ene aku, yo nulis surat endo. ²³Salam epo ikam ngket Gayus, yo mie awa nsan epo aku, ai epo eka jmaat. Salam epo ikam ngket Erastus, pngona sen negri, ai ngket Kwartus, eraibuntung taka. ²⁴[Kasih karunia Yesus Kristus, Tuhan taka, diang ikam eka-eka! Amin.] ²⁵Nte Io, yo keo kuasa nte mturon ikam, - kati Injil yo tutui batukku ai yo sampeku nau umbang Yesus Kristus, sengkono diang pnyurah yo melim, yo snuni bjatus-jatus taun kolaiyo, ²⁶tapi yo tempo ndo sundok pinokelak ai yo kati prenta Allah yo kden, sundok knabar koe kitab-kitab nabi-nabi epo eka-eka bangsa nte moit dero epo kpatoh iman --²⁷nte Io, pulun-puluniyo Allah yo bol-bol kpintar, koe Yesus Kristus: eka-eka kmuliaampe turai-turaiyoi! Amin.

2 Corinthians

Chapter 1

¹Ngket Paulus, yo koe ptua Allah jadi Rasul Kristus Yesus, ai ngket Timotius erai buntung taka, epo jmaat Allah mbo Korintus diang eka-eka ulun kudus mbo mupus Akhaya. ²Kasih karunia ai damai sjahtra ngket Allah, Bapa taka, ai ngket Tuhan Yesus Kristus diang ikam. ³Eka puji nte Allah, Bapa Tuhan taka Yesus Kristus, Bapa yo buen kesong ai Allah pngulet eka pnyempae, ⁴yo nyempae kain lang eka-eka kbenasa kain,ampe kain klian nyempae dero, yo keo lang bemasam kbenasa diang pnyempae yo trima kain se ngket Allah. ⁵Koe sama kati kain kuli bagian roa ogot lang kesesa Kristus, ktine lou koe Kristus kain nerima penyempae yo meroa ogot. ⁶Ena kain benasa, nau umbang ene jadi penyempae ai selamat nte ngkam; ena kain sinompae jadi nau umbang ene doko nte penyempae nte ngkam, apa ikam kuli kegalak nte doloh nantai kanam kesesa yo sama kati yo kono kain low. ⁷Ai arapan kain se ikam ene turon, koe kain tau, se sama kati ikam lumpat ngalek bagian lang kebenasa kain, ikam lou lumpat ngalek bagian lang penyempae kain. ⁸Koe pengkakan kain, erai buntung-erai buntung, apa ikam tau ksesa yo kono kain mbo Asia Kecil. Pmenasa kanam bolum yo kono kain ene olay beta ai boyat beta,ampe kain sundok eka akal low diang bolum kain. Kain kiso, ungka-ungka kain sundok ukum pate. ⁹Tapi nau umbang ene ktine, apa kain nang persaya epo kain se, tapi pulun epo Allah yo nembolum ulun-ulun mate. ¹⁰Ngket pngenate yo ngeri beta Io sundok ai anta nylamat kain: Epo-Iyo kain mayak arapan kain, se Io anta nylamat kain

nua,¹¹Koe ikam low lumpat ngawat ngendoa kain, apa deo ulun ngulek sukur nte karunia yo kuli kain koe deo doa dero nte kain.¹²Endo doko yo tondek kain, yo ene se oyon lang kesong kain mie pmensara epo kain, se bolum kain mbo dnia endo, toko-iyoyang ubungan kain diang ikam, kono atur kesong buen ai brese ngket Allah makse koe kpintar ngket dnia, tapi diang pngelian kasih karunia Allah.¹³Koe kain pulun nulis epo ikam yo dapet baca ai paham kam. Ai aku arap, mudah-mudahan ikam anta paham beta,¹⁴kati yo sundok ikam paham tenga ngket kain, yo doko se montuk olo Tuhan Yesus ikam keo nte tondek koe kain tapi kain low keo nte tondek koe ikam.¹⁵Diang Kyakinan endo aku pini ngrencana nte nuntun ikam bune, apa ikam kate kuli kasih karunia nte kduo derang iyo.¹⁶Sundok ene aku kakan nrus ju lang ku epo Makedonia, laju ngket Makedonia mulik nua epo ikam, apa ikam ngawat aku lang ju lang ku epo Yudea.¹⁷Jadi, keo be aku nglaku yo asal dio lang ngrensana nau umbang endo? Ktine low keo be aku nampa rencana ku ene kati pengkakan ku se, sampe mbo aku rendu keo "Oo" ai "Belo"?¹⁸Koe Allah yo stia, janji kain epo ikam belo di rendu "Oo" ai "Belo".¹⁹Koe Yesus Kristus, Pea Allah, yo sundok sampe kain mbo ekang ikam, yo ene koe ku ai koe Silwanus ai Timotius, makse ka 'Oo' ai 'Belo', Tapi mokin ube mbo lang Io pulun keo "Oo".²⁰Koe Kristus ene "Oo" nte eka janji Allah. Koe ene ka doko koe Io taka ngulek "Amin" nte ngemulia Allah.²¹Koe Io yo sundok mturon kain sama-sama diang ikam mbo lang Kristus, ene doko Allah yo sundok mngurapi,²²ngemetrai tanda mpun-Iyo nte taka ai yo mie Roh Kudus mbo lang kesong taka nte persekot ngket eka-eka yo sundok sinodia nte taka.²³Tapi aku momba Allah nte saksiku - Io tau se aku -, se koe ene aku belo di ulet epo Korintus yo doko nte nyayang ikam.²⁴Makse koe kain kakan mrenta ise yo arus percaya kam, koe ikam akat turon lang iman kam. Mokin ube, kain kakan lumpat bgawi nte pngego kam.

Chapter 2

¹Aku sundok mutus mbo lang kesongku, se aku belo anta ulet nua epo ikam diang susah. ²Koe, ena aku nyusah kesong kam, ise oli yo kuli nampa aku jadi ego ena makse io yo susah koe aku. ³Ai koe ene doko jodo surat ku endo, yoene apa ena aku ulet, nang aku susah koe dero, yo arus nampa aku jadi ego. Koe aku persaya nau umbang ikam eka-eka, se pengego ku ene doko low pengego kam. ⁴Aku nulis epo ikam diang pengenanam yo belo kturoh ai solot ai diang nyorak deo olu mato, belo di apa ikam kesong nyoru, tapi apa ikam tau bol olai yo kosang ku epo ikam eka-eka. ⁵Tapi ena keo ulun yo nampa otang nte mesiet kesong, jadi makse kesong ku yo psietiyi, tapi kesong kam eka-eka, ena belo se belo-belo iyo - apa nang aku mekolai balo -, kesong tenu-tenu kongo ulun ngket ikam. ⁶Nte ulun yo ketine sundok ka puli kae ko deo bes ngket ikam, ⁷sampe ikam mokin ube yo arus ngampun ai nyempae io, apa io nang mate koe siet kesong balo. ⁸Koe ene aku nasehat ikam, apa ikam beta-beta nengkosang io. ⁹Koe ene ube doko jodo yo aku nulis surat epo ikam, yoene nte nguji ikam, patoh be ikam lang ise masam. ¹⁰Koe ise-ise ulun yo ampun kam pensalaiyo, aku ngampuniyo low. Koe ena aku ngampun, -ena ka keo yo arus ampun ku -, jadi nau umbang ene gawi ku koe ikam la onon Kristus, ¹¹apa Iblis nang kuli kuret ngket taka, koe taka tau ise petuaiyo. ¹²Des aku sampe mbo Troas nte nyampe Injil Kristus, aku ruku, se Tuhan sundok ngengau boyan nte gawi gata mbo lane. ¹³Tapi kesongku belo keturoh, koe aku belo mangko ruku erai buntungku Titus. Koe ene aku sabi ai bju epo Makedonia. ¹⁴Tapi syukur nte Allah, yo lang Kristus dor moit kain mbo boyan pengkuret-Iyo. Diang tete' kain Io mewet kewo buen pentau se Io mbo mone-mone. ¹⁵Koe nte Allah kain ene kewo yo buen ngket Kristus mbo ekang dero yo snelamat ai ekang dero yo belo slamat. ¹⁶Nte yo sori tingin kain ene kewo pengenate yo ngempate ai nte yo tla kewo penyembolum yo nembolum. Tapi ise yo kelian nggawi tugas yo ketine? ¹⁷Koe kain belo sama diang deo ulun yo mak yo meto asil ngket Firman Allah. Mokin ube lang Kristus kain besara kati mbo nuiyo diang petua-petua lio ngket prenta Allah ai mbo onon-Iyo.

Chapter 3

¹Keo be kain nyemula nua nondek kain se? Perlu be kain kati ulun-ulun yo mak mkelak surat pujian epo ikam ai ngket ikam?²Ikam ene doko surat pujian kain yo btulis lang kesong kain ai yo tnoan ai dapet baca eka ulun. ³Koe sundok melak, se ikam ene doko surat Kristus, yo tnulis koe pelayanan kain, tnulis belo di diang tinta, tapi diang Roh ngket Allah yo bolum, mba di mbo kpeng batu, tapi mbo lang kesong ulun. ⁴Ktine ka doko kekolai persaya kain epo Allah koe Kristus. ⁵Diang bolum kain se kain belo di keo penjapa nte bsekaku ise-ise, ungka-ungka ene gawi kain se; belo, pngelian kain ene doko gawi gata Allah. ⁶To ka doko yo nampa kain low klian jadi playan-playan ngket perjanjian yo bayu, yo belo di ngket aturan yo btulis, tapi ngket Roh, koe aturan yo btulis ene moit mate, tapi Roh mie bolum. ⁷Playanan yo moit nte mate tnulis sinoruring mbo kpeng-kpeng batu. Beta ko ktine kmulia Allah diangiyo des io dne. Koe beta ko ludo oli, pa wae Musa trang beta, sampe mato ulun-ulun Israel belo klian meti iyo. Ena playanan ene ulet diang kmulia ktine⁸aso da-da oli kolai iyo kmulia yo diang playanan Roh! ⁹Koe, ena playanan yo moit nte nukum ene mulia, da-da aso pawak mulia oli playanan yo moit yo sala jadi kono. ¹⁰Sebeta iyo ise yo bai bareh san taka mulia, ena pinorawet diang kmulia yo ngombo se eka ise masam endo, ndok belo omur keo arti. ¹¹Koe, ena yo tau ludo ene nlumpat diang kmulia, nyait da aso oli yo belo di tau ludo ene nlumpat diang kmulia. ¹²Koe kain keo arapan yo ktine, ene moko kain nggawi iyo diang bol pngeronu, ¹³belo di kati Musa, yo nokom wae iyo, apa mato ulun-ulun Israel nang kito pngemapos pa yo erai desung tingene. ¹⁴Tapi akal dero sundok jadi batal, koe sampe ndok olo ndo pnokom ene aso nokon nokom dero, ena dero ngembaca perjanjian ono ene belo di bebelak, koe pulun Kristus bute yo kuli mkelak iyo. ¹⁵Turai beta ndok olo ndo, tongku des dero ngembaca kitab Musa, keo pnokom yo nokom kesong dero. ¹⁶Tapi ena kesong ulun ene mulik epo tadah Tuhan, pnokom ene nalek ngket iyo. ¹⁷Koe Tuhan ene Roh; ai mbo mone keo Roh Allah, mbo mne keo kbebasan. ¹⁸Ai eka taka jadi mkelak nau kmulia Tuhan diang wae belo di btokom. Ai koe kmulia ene pngulet iyo ngket Tuhan yo ene doko Roh, ene moko taka nensut jadi kerai nau diang gambar-Iyo, lang kmulia yo olai se olai.

Chapter 4

¹Koe ksawai Allah kain sundok nrima tugas endo. Koe ene kain belo di tawai ruang.²Tapi kain ngidar eka gawi lang melim yo ngmai; kain mba di bgawi diang dat kno ai belo nampa-nampa firman Allah. Mokin ube kain mkelak yo kono ai diang ktine kain nyrah kompu tonga kain nte timbang knanam koe eka ulun ela onon Allah.³Ena Injil yo sampe kain ene aso btokom low, ene io btokom nte dero, yo anta mate,⁴yo doko ulun-ulun yo belo persaya, yo akal-iyu sundok tinomposa koe ilah jaman endo, sampe dero belo kito pa Injil nau umbang kmulia Kristus, yo ene doko gambar Allah.⁵Koe makse kompu tonga kain yo sampe kain, tapi Yesus Kristus ene Tuhan, ai kain endo jadi batak kam koe ptua Yesus.⁶Koe Allah yo sundok ngulek : "Ngket lang seom anta nyoret pa!", Io low yo nampa pa-Iyo keo wala mbo lang kesong taka, apa taka kuli pa ngket pntau nau umbang kmulia Allah yo melak mbo wae Kristus.⁷Tapi pngkeo endo mpun kain lang tpayan tana pulut, apa melak, se kuasa yo ruakruaw ene ulet ngket Allah, belo di ngket kain se.⁸Lang eka ise masam kain pinotunjol, tapi belo di sengkatel; kain eka akal, tapi aso keo arapan; ⁹kain kono kurow ksa, tapi belo di dnika ba-ba, kain tnimpa, tapi dor uat nua. ¹⁰Kain majak moit pngemate Kristus lang kompu tonga kain, apa pnyembolum Yesus low jadi melak lang kompu tonga kain.¹¹Koe kain, yo aso bolum endo, trus snrah epo maot koe Yesus, apa bolum Yesus low jadi melak lang kompu kain yo tau mate endo.¹²Koe ktine doko maot bgawi mbo lang kompu tonga kain ai bolum bgawi mbo lang ikam.¹³Tapi koe kain keo roh iman yo sama, kati keo tnulis: "Aku persaya, koe ene aku bsara", jadi kain low persaya, ai koe ene kain bsara low.¹⁴Koe kain tau, se Io, yo sundok msuli Tuhan Yesus, anta msuli kain low sama-sama diang Yesus. Ai Io anta moit kain sama-sama diang ikam epo Io. ¹⁵Koe eka ene jadi koe ikam, apa kasih karunia, yo mokin olai se olai koe diang mokin deo se deo ulun yo jadi persaya, koe ene jadi mroa se mroa nulek sukur nte kmulia Allah.¹⁶Koe ene kain belo di wawai pngnanam, tapi beta ko ulun yo melak ngket baling kain susut se susut, tapi ulun lang kesong kain tinombayu dor tongku olo.¹⁷Koe kbnasa mean yo tempo ndo endo, nampa nte kain kmulia kden yo pawak lngkat se eka ise masam, pawak olai se kbnasa kain. ¹⁸Koe kain belo di meti yo melak, tapi yo belo di melak, koe yo melak ene ile-ile bute, tapi yo belo di melak ene yo kden.

Chapter 5

¹Koe kain tau, se ena kemah awa taka nongos mbo denia ene kenokas, Allah sundok nyedia awa nongos mbo sorga nte taka, awa nongos yo kden, yo belo tanpa ulun. ²Kola taka mbo lang kemah ene, taka ngeluh, koe taka ngeno beta nongos mbo awa lang sorga ombon awa taka tmpondo endo, ³koe diang ktine taka sepakai ai belo di denapet belai belanyang. ⁴Koe kola aso nongos mbo lang kemah endo, taka ngeluh koe kebonyatiyo beban bolum, koe taka kakan makai diris laung bayu tapi belo ngosu yo usang, apa yo tau mate ene betokom koe yo bolum. ⁵Tapi Allah doko ube yo ngeraduh taka nte nau umbang ene ai yo miye Roh, epo taka nte ngenjami eka ise masam yo sundok senedia nte taka. ⁶Jadi koe ene dor meturon kesong kain, walau kain kingat, se kola kain nongos lang kompu endo, kain aso oroh ngket Tuhan, ⁷-koe bolum kain endo ene bolum koe leka persaya belo di leka koe kito- ⁸tapi kesong kain turon, ai da kegawal kain wensut ngket kompu endo nte ngawa mbo Tuhan. ⁹Koe ene lou kain bkomer, mbo kain ngawa lang kompu endo, ktine lou kain ngawa balong se kompu endo, apa kain sengkono epo-Iyo. ¹⁰Koe kain eka arus ngadap takhta meja ijaw Kristus, apa tongku ulun kuli ise yo senaron trimaiyo, sengkono diang gawi gataiyo lang bolumiyo endo, buen be triaw be. ¹¹Kain tau ise rtiyo takut se Tuhan, koe ene kain bkomer nampa ulun jadi persaya. Mbo Allah kesong kain melak beta-beta ai aku arap kesong kain melak lou ktine nte ngkam timbang knanam. ¹²Diang endo kain belo bkomer muji-muji kain se nua epo ikam, tapi kain kakan miye boyan epo ikam nte nondek kain, apa ikam kuli ngadap ulun-ulun yo nondek koe nau umbang-umbang yo melak ai makse umbang ngket lang kesong. ¹³Ena ulun-ulun ngontus kain kuto, belo di moko mbe! koe kain ngelayan Allah. Tapi ena ikam ngontus kain belo di kuto, buen ube, koe kain dor bkomer nte ngawat ikam. ¹⁴Koe pengkosang Kristus yo ngemudi kain, koe kain sundok tau, se ena erai kongo ulun sundok mate nte eka ulun, jadi eka dero sundok mate diang-Iyo. ¹⁵Ai Kristus sundok mate nte eka ulun, apa dero yo bolum, belo di bolum oli nte io se tapi nte Io, yo sundok mate ai sundok pinosuli nte dero. ¹⁶Koe ene kain belo oli di nyukat ndok erai kongo ulun oli kati makai penyukat ulun. Ai ena kain pini nyukat Kristus kati makai penyukat ulun, tmpondo kain belo nyukat-Iyo oli ktine. ¹⁷Jadi ise yo keo mbo lang Kristus, io ene doko tenampa bayu: yo usang sundok kinolalo, sebeta-betaiyo yo bayu sundok ulet. ¹⁸Ai ekaiyo endo ngket Allah, koe Kristus sundok mdamai taka diang Io ai sundok nape pelayanan nte ngendamai ene epo kain. ¹⁹Koe Allah ngendamai denia diang Io koe Kristus diang belo ngitung pensala dero. Io sundok nape kabar damai ene epo kain. ²⁰Jadi kain endo doko wakel-wakel Kristus, kati ungka Allah ngenasehat ikam tete kain; lang karan Kristus kain tindu epo ikam: diye ka kompu tonga kam pinodamai diang Allah. ²¹Io yo belo di dosa sundok tanpa-Iyo jadi dosa koe taka, apa lang Io taka jadi kono mbo Allah.

Chapter 6

¹Koe taka kerai gawi, kain tindu epo ikam, apa ikam nang nampa jadi belo keo jodo kasih karunia Allah, yo sundok trima kam. ²Koe Allah bfirmam: "Montuk Aku sengkono kesong, Aku nempaning ikam, ai des olo Aku nylamat, Aku ngawat ikam." Sebeta-betaio, des endo doko des yo sengkono ene; sebeta-beta iyo, olo endo doko olo nte nylamat ene. ³Lang eka ise masam nau kain mba di nampa nte ulun tutur, apa playanan kain nang sampe pinosala. ⁴Mokin ube, lang eka ise masam kain mkelak, se kain doko playan Allah, yo ene: ulak nantai diang bol kdoloh lang bolum bnasa ba, ⁵lang nantai pupuk palu, lang sper ai ruok rame, lang poruk pgel, belo ron pngenanam ai belo keo okan kinan; ⁶diang kberese kesong, pentau pentuan, kdoloh, ksawai kesong; lang Roh Kudus ai pengkosang yo belo di eta-eta; ⁷mbo msampe yo kono ai kekuasaan Allah; diang makai adil nte dapu des nglawan ai low des nangkis⁸des kinonuon ai des nuja; des kono sumpah pator ai des kono pinokolai; des tunruh ulun tukang nipu ngakal, tapi pnakai low ka, ⁹kati ulun yo belo tnoan topan, tapi ulun tau ba; kati ulun yo duni mate, tapi bolum apo; kati ulun yo kono kurow, tapi belo mate; ¹⁰kati ulun luwai dikah mate, tapi dor ego; kati ulu kao, tapi mtataw deo ulun; kati ungka ulun belo nan ise-ise, beta ko kain keo nan ba. ¹¹O ulun Korintus! Kain sundok bsara trus trang epo ikam, kesong kain wingkang sae nte ngkam. ¹²Ai nte ngkam keo awa sae lang kesong kain, tapi nte kain keo awa yo sidet lang kesong kam. ¹³Moko ene tempo ndo, apa sama koyat sama kmean - aku bsurah kati epo pea-peaku -: Ingkang kesong kam sae-sae!¹⁴Nang ka ikam bkerai diang ulun-ulun yo belo percaya. Koe ise yo sama mbo yo kono diang mbo yo dat?Ai ktimbe nau pa kuli kerai diang seom? ¹⁵Ise ksama yo keo mbo Kristus ai Belial? Ise ksama ulun-ulun percaya diang ulun-ulun belo percaya? ¹⁶Keo bkait be bait Allah ene diang berhala? Koe taka ene bait ngket Allah yo bolum kati firman Allah endo: "Aku anta nongos sama-sama diang dero ai mbo ekang dero, ai Aku anta jadi Allah dero, ai dero anta jadi umat-Ku."¹⁷Koe ene: Baling ta ikam ngket ekang dero, ai pseing kam se ikam se ngket dero, firman Tuhan, ai nang beta mulem ise yo lonsa, jadi Aku nrima ikam. ¹⁸Ai Aku jadi Bapa kam, ai ikam jadi pea-pea-Ku song ai pea-pea-Ku bawe ktine ka doko firman Tuhan, Yo Paling kuasa."

Chapter 7Erai buntung-erai buntung ku yo knosang, koe taka tempo ndo ngempun janji-janji ene, alo taka memerse diri nyawa taka ngket eka kemrota lonsa kompu tonga ai roh, ai diang ktine nyempurna kekudus taka lang takut se Allah.

Chapter 7Erai buntung-erai buntung ku yo knosang, koe taka tempo ndo ngempun janji-janji ene, alo taka memerse diri nyawa taka ngket eka kemrota lonsa kompu tonga ai roh, ai diang ktine nyempurna kekudus taka lang takut se Allah.

²Die ta awa nte kain mbo lang kesong kam! Kain belo pini keo gawi yo sala epo ndok belo erai kongo ulun, ndok belo erai kongo ulun prugi kain, ai ndok belo ngket erai kongo ulun kain meto untung. ³Aku ngulek ktine, belo di nte mkitek ukuman epo ikam, koe ro sundok ulek ku, se ikam sundok kuli awa mbo lang kesong kain, sampe taka kerai bolum turay mate. ⁴Aku beta-beta trus trang epo ikam; tapi aku low beta-beta nondek ikam. Mbo lang eka pamunasa kain aku beta-beta bsempae ai pngego ku mroa beta. ⁵ampe ndok des kain ulet mbo Makedonia, kain belo kuli smole nte kompu tonga kain. Ela mone-mone kain kiso kanam kbenasa: ngket baling ruok bulo ai ngket dalom kanam takut. ⁶Tapi Allah, yo nyempae ulun yo belo sombong, sundok nyempae kain diang pngulet Titus. ⁷Mba di pulun koe pngulet iyo tingen, tapi low koe pnyempae yo kuliyo ngket ekang ikam. Koe io sundok memetau epo kain nau umbang pengkeno kam, tangis tungul kam, ai komer kam nte ngengket aku, sampe mokin ktambah pngego ku⁸Jadi beta ko aku sundok nyusah kesong kam diang surat ku ene, tapi aku belo di noli. Beta ko pini aku noli, koe itan ku, se surat ku ene nyusah kesong kam - beta ko nte ile-ile tingen kolaiyo -, ⁹tapi tempo ndo aku ego, mba di koe ikam sundok susah, tapi koe ksusah kam nampa ikam btobat. Koe ksusah kam ene yo doko ptua Allah, sampe ikam ndok belo idi-idi pinorugi koe kain. ¹⁰Koe ksusah kati ptua Allah ngasil nte btobat yo moit epo slamat ai yo anta belo di anta nte sesal, tapi ksusah yo ngket dnia endo ngasil nte mate. ¹¹Koe neti beta-beta bukan main ube ksusah kati ptua Allah ene nampa nte ngkam tambah msiken bkomer, sampe ngengket diri se, kanam ngriten, takut, ngeno, kmoyoh, ngukum! Ai lang eka-eka ene ikam sundok mkelak, se ikam belo di sala lang urusan ene. ¹²Koe ene, ena aku sundok nulis surat epo ikam, ene mba di koe ulun yo keo gawi sala ena belo koe ulun bnasa koe gawi gata sala, tapi apa krela kam epo kain jadi melak nte ngkam ela onon Allah. ¹³Koe ene ka doko kain jadi bsempae. Ai pyempae yo mak yo kuli kain ene, kain tambah ego aso koe pngego Titus, koe eka ikam mrongin kesong iyo. ¹⁴Aku nondek ikam epo iyo,ai ikam belo di ngmai aku. Kain dor ngulek ise yo beta epo ikam, ktine low pnondek kain ela onon Titus sundok melak se beta. ¹⁵Ai kosang iyo tambah ogot se ikam, ena io knop kpatoh kam eka-eka, ktimbe nau kam nrima pngulet iyo diang takut ai ngrekitik. ¹⁶Aku ego, koe aku kuli persaya se ikam lang ise masam.

Chapter 8

¹Eraibuntung-eraibuntung, kain kakan nyampe epo ikam nau umbang kasih karunia Allah yo dne epo jmaat-jmaat mbo Makedonia. ²Ulak aso kono soba yo boyat lang bmasam kbnasa, kego dero mroa ogot ai betako dero kao, tapi dero tatau lang ksawai. ³Aku se kito, se dero mie kati mbo pngkeo dero, langa lngkat ka ube se pngkeo dero. ⁴Diang krela dero se dero tindu ai mtua belo kate belo epo kain, apa dero low kuli kasih karunia nte lumpat lang pelayanan epo ulun-ulun kudus. ⁵Dero mie pawak mroa se yo kira kain. Dero mie kompu tonga dero, ngket tla epo Tuhan, sundok ene koe ptua Allah jadi epo kain low. ⁶Koe ene kain tindu belo kate belo epo Titus, apa io nuntun ikam ai nyundok pelayanan kasih ene kati yo sundok tindu' io se. ⁷Jadi tempo ndo sama kati ikam tataw ba, - lang iman, lang pnyurah, lang pntau, lang beta-beta bkomer nte ngawat kain, ai lang kosang kam epo kain - ktine low moko iyo ikam tataw lang pelayanan kasih endo. ⁸Aku ngulek nau umbang endo mba di nte nymuyu, tapi, diang nutui nau komer ulun-ulun mak nte ngawat, aku kakan tau kbeta kosang kam. ⁹Koe ikam sundok tau kasih karunia Tuhan taka Yesus Kristus, se Io, yo koe ikam jadi kao, betako Io tataw, apa ikam jadi tataw koe pngkao-Iyo. ¹⁰Ndo doko pmnsaraku nte nau umbang ene, yo bahe keo jodo nte ngkam. Betako sundok ngket erai taun yo lalo ikam nindu' nggawi iyo ai mutus nte nyundok iyo low. ¹¹Jadi tempo ndo, snundok low moko iyo gawi ene. Moko iyo gawigata ene gnawi sngkono diang krela kam, ai gnawi beta ka ene diang ise yo keo mbo ikam. ¹²Koe ena ikam rela nte mie, die sokoi kam ene jadi tinorima, ena die sokoi kam ene pngkeo yo keo mbo ikam, belo di pngkeo yo belo di keo mbo ikam. ¹³Koe ikam tinongkoyat belo di nte ngmean nte ulun-ulun mak, tapi apa sama koyat. ¹⁴Jadi moko iyo tempo ndo endo klngkat kam nmpuli ktuno dero, apa klngkat dero sori-sori nmpuli ktuno kam, apa sama koyat. ¹⁵Kati keo tnulis: "Ulun yo kuli deo, belo di lngkat ai ulun yo kuli idi, belo di tuno." ¹⁶Sukur epo Allah, yo koe ikam jadi mie pngnānam yo beta-beta ktine low lang kesong Titus nte ngawat ikam. ¹⁷Betako io nrima ptua kain, tapi lang pngnanam beta-beta roa ene io diang ptua io se ngompoh ikam. ¹⁸Sama-sama diang io kain nymuyu eraibuntung taka, yo paling pnuji mbo jemaat koe gawi io lang nyampe Injil. ¹⁹Ai mba di ene tingin! Io low sundok tnunjuk koe jemaat-jemaat nte diang kain lang tugas nngkosang endo, yo gawi kain nte kmulia Tuhan ai apa tnoan se kain rela. ²⁰Koe kain kakan ngidar nau umbang endo: se keo ulun yo kuli mdat kain lang nau umbang tugas nngkosang yo gawi kain ai yo asil yo kolai endo. ²¹Koe kain ngnanam yo buen, mba di mbo onon Tuhan tingin, tapi mbo onon ulun low. ²²Sama-sama diang dero kain nymuyu erai kongo yo mak nua, yo ene eraibuntung taka, yo sundok tenu-tenu derang uji kain ai tnoan se dor bkomer nte ngawat. Ai tempo ndo io tambah bkomer koe io beta-beta prsaya se ikam. ²³Titus ene tmanku yo bgawi sama-sama diang aku nte ngkam; eraibuntung-eraibuntung kain yo mak ene suyu jemaat-jemaat ai ene doko kmulia nte Kristus. ²⁴Koe ene pinokelak beta epo dero onon jemaat-jemaat kbeta kosang kam ai kbeta tondekku se ikam.

Chapter 9

¹Nau umbang playanan epo ulun-ulun kudus aku belo di koyoh nulis ene epo ikam. ²Aku sundok tau nau umbang krela kesong kam yo tondek ku epo ulun-ulun Makedonia. Ulekku: "Akhaya sundok siap sdia ngket taun prene." Ai kmoyoh kam sundok jadi pngenjelu kesong deo ulun. ³ku ngirim erai buntung-erai buntung ene, apa nau tondek kain lang nau umbang endo se ikam nang melak se jadi belo keo jodo, tapi apa ikam beta-beta siap sdia kati yo sundok ulek ku, ⁴apa, ena ulun-ulun Makedonia ulet sama-sama diang aku, nang dero ruku se ikam belo pian siap, sampe kain - nte belo di ngulek ikam - kiso mai diang kpersaya kain ene. ⁵Koe ene san ku perlu nyuyu erai buntung-erai buntung ene nte brangkat ono se aku, apa dero ngatur die sokoy yo sundok janji kam ono se ene, apa nindo sundok bsedia nte bukti ksawai kesong kam ai makse die sokoi yo pnaksa. ⁶Kinonanam beta endo: Ulun yo mewet idi, anta ngutik idi low, ai ulun yo mewet mroa, anta ngutik mroa low. ⁷Moko iyo masing-masing mie kati krela kesong iyo, nang diang kesong susah ai koe pnaksa, koe Allah kosang se ulun yo mie diang ego. ⁸Ai Allah klian mie eka-eka kasih karunia epo ikam, apa ikam dor puli ba lang ise masam ai mokin ube ruak ruai lang ise masam yo buen. ⁹Kati keo tnulis: "Io magi-magi, Io mie epo ulun kao, kbeta-Iyo nokon nte turai-turai." ¹⁰Io nyedia bini nte pmewet, ai roti nte okan, Io low yo anta nyedia bini nte ngkam ai mdeo iyo ai mraya bua kbeta kam; ¹¹ikam anta pinotataw lang eka ise masam ksawai kesong, yo nambah roa sukur epo Allah koe kain. ¹²Koe playanan kosang yo batok pendie endo mba di nte nempuli tingen kperluan-kperluan ulun-ulun kudus, tapi low nambah roa nulek sukur epo Allah. ¹³Ai koe ikam sundok tahan soba lang playanan ene, dero ngemulia Allah koe kpatoh kam lang pngangkan kam se Injil Kristus ai koe ksawai kesong kam lang magi ise masam diang dero ai diang eka-eka ulun, ¹⁴beta ko lang doa dero, dero low ngeno se ikam koe kasih karunia Allah yo mroa ogot epo ikam. ¹⁵Sukur epo Allah koe karunia-Iyo yo belo dapet surah ene!

Chapter 10

¹Aku,Paulus,ulun yo belo ronu ena sangko wae diang ikam,tapi ronu epo ikam ena sangko oro,aku mkenop ikam koe Kristus yo lami lamai ai sawai. ²Aku tindu epo ikam;nang ikam maksa aku nte ngoret pengeronuku mbo dempet,koe aku keo kno nte btindak kois epo ulun-ulun yo ngomoy,se kain bolum kati sara ulun dnia endo. ³Beta ko kain aso bolum mbo dnia,tapi kain belo prang kati nau sara ulun dnia endo, ⁴koe dapu kain mbo prang makse dapu dnia endo,makse ko dapu yo tnambah diang kuasa Allah,yo klian nte meroros bombong batu.⁵Kain notok tongku otang akal ulun ai mroros tongku alasan yo tinongkuat koe kesombong ulun nte nglawan pentau se Allah.Kain nyikup eka pngenanam ai moitiyo nte tunduk epo Kristus,⁶ai kain siap low nte ngukum tongku yo dadal,ena kpatoh kam sundok bol umbang.⁷Eti tah yo melak onon wae kam!Ena keo ulun beta-beta persaya,se io ene mpun Kristus,mokoiyo io bekenanam mbo lang kesong iyo,se kain low ene mpun Kristus sama kati io.

⁸Lengkat se ene,ena aku ungka nyisa lalo nondek kuasa, yo die Tuhan epo kain nte nengkuat, belo di nte nempukan ikam,jadi diang nau umbang ene aku belo anta kinomai.⁹Tapi aku belo kakan nitan ungka-ungka mtako ikam diang surat-surat ku.¹⁰ Koe, ulek ulun surat-surat iyo bol-bol pkotang ai ries itekiyo nte knanam,tapi ena sangko wae nau iyo lome ai kesah surah iyo belo keo otang.¹¹Tapi mokoiyo ulun-ulun yo bunyal ketine sadar,se gawi kain,ena sangko wae,sama kati pmensara kain lang surat-surat kain,ena belo di sangko wae. ¹²Beta ko kain belo ronu memesu kain se epo ulun-ulun, ngembanding kain se diang ulun-ulun yo tuju nondek io se.Dero nyukat dero se diang pnyukat dero se ai ngembanding dero se diang sama dero. Bungang beta dero ene!.

¹³Mokin ube kain mba di kakan nondek sisa se nau yo memang,makse ko nokon mbo jepen-jepen awa bgawi yo sundok jnepan koe Allah nte kain,yo wekar sampe se ikam low.¹⁴ Koe lang nyampe Injil Kristus kain sundok sampe epo ikam, jadi kain belo nglalo jepen awa bgawi kain, ungka-ungka kain belo sampe se ikam.¹⁵Kain belo di nondek gawi gata ulun mak mbo awa bgawi yo belo di jnepan nte kain.Tapi kain kundong,se ena iman kam mokin menduan,kain anta tambah kinonuon ekang ikam, ena bnanding diang awa begawi yo jnepan nte kain.

¹⁶Ktine ka jodo kain bolum,apa kain kuli nyampe Injil ela ja-ja yo longon se ja kam ai belo di nondek koe nau pengkuli ulun mak mbo awa begawi yo jnepan nte dero.¹⁷Tapi ise-ise yo keo nte tondek,mokoiyo nondek mbo lang Tuhan." ¹⁸Koe makse ulun yo nondek io se yo klian kono ikap,makse ko ulun yo kono tondek Tuhan.

Chapter 11

¹Buen beta ena ikam kate doloh diang kbungangku yo keo trini-trini endo. beta ka ikam doloh aut diang aku!

²Aku woyu epo ikam kati kwoyu Allah. Ikam ene kati bawe ngelok yo aso suci yo sundok lang janji ku nte knawen diang ulun song, yo ene Kristus.³Tapi aku woring bahe-bahe ikam tau jadi belo stia oli epo Kristus, sama kati Hawa bai bareh yo dapet pngaruh koe akal dat nipo.⁴Koe nyata yo ikam gawal ka nrima ulun yo ulet epo ikam ulak nutui matuk umbang Yesus yo mak, yo makse se Yesus yo ptau kain epo ikam. Ai ikam kakan low nrima roh ai injil yo oroh ka makse se nau roh ai Injil yo pini die kain epo ikam.⁵Tapi lang pngnanam ku belo low ka di baka bawo aku diang rasul-rasul yo bang nuon ene.⁶Ena ka aku belo di tukang bunyal, tapi ena umbang pntau, aku belo di uro. Ene sundok pkelak kain epo ikam lang deo nau umbang kola ndo jati.⁷Des aku ngabar Injil ngket Allah epo ikam, ndok belo idik-idik aku belo di tindu upa ngket ikam; ktine ene nampa aku se nte ela iwa. Aku nggawi ktine nte mkombo ikam. Sala be umbang oki ene mbo ikam? ⁸Des aku nglayan ikam, jmaat-jmaat yo mak yo ngongkos aku. Dapet ulek se aku ene ngrugi dero apa aku kuli ngawat ikam. ⁹Ena ka des jman ene aku keo kurang kambit, ndok belo erai kongo ikam keo pini kono krepot ku. Eka ise-ise yo kurang kambit mbo aku ene sinodia koe eraibuntung-eraibuntung yo ulet ngket Makedonia. Aku ngnjaga beta-beta apa aku belo ngrepot ikam mbo eka umbang urusan, ai aku ngnjaga trus apa dor kate ktine.¹⁰Kanam yo tondek ku endo belo di dapet loli mbo mombe ka mbo pupus Akhaya, Koe ptutui batuk Kristus yo beta ene keo mbo aku. ¹¹Ise moko aku ngulek ktine? bahe koe aku belo di nengkosang ikam? Allah ka tau se aku nengkosang ikam!¹²Ise ka yo gawi ku tempondo ene kakan dor gawi ku, apa "rasul-rasul" yo mak ene belo kuli boyan nte mkolai dero ulak ngeku se dero bgawi kati kain. ¹³Ulun-ulun kati dero ene rasul-rasul plsu. Dero ene bgawi nte ngakal ulun diang memenau kati ungka rasul-rasul Kristus.¹⁴Belo di nte eran moko dero gawi ktine, koe ndok iblis ktine low tau memenau kati mlekat yo keo pa! ¹⁵Jadi belo di sala umbang ena playan-playan iblis memenau kati playan-playan yo nggawi ptua Allah. Pnyundok yo dero kuli low kono bales yo sngkono diang nau gawi gata dero.¹⁶Aku ngulang sindai nua: Nang beta keo yo ngotus se aku bungang. Tapi ena ikam nokon ngotus se aku ktine, Lewa kam aku yo bungang endo budah nte keo kanam btondek idik-idik. ¹⁷Sori endo oli aku kakan ngontus se keo oki tondek, tapi makse Tuhan yo nyuyu aku ngulek endo. Otang endo aku beta-beta bunyal kati ungka ulun bungang. ¹⁸Memang deo ulun yo btondek diang hal-hal dnia, jadi aku kakan keo tondek ktine low.¹⁹Ikam diang kesong snang doloh epo ulun yo bungang, koe ikam kiso se pintar! ²⁰Ikam doloh ena ulun ngembatak ikam, ulun kuli asil ngket metunjol ikam, kiso se kanam nuon beta se ikam ulun ronu nmpeleng ikam. ²¹Aku mai beta ngangkan se kain belo keo pnjapa nte nglaku gawi ktine. Tapi ena ulun mak ronu nte nondek ise-ise, aku ronu low! (Ene umbang pnyurah ulun bungang.)²²Ulun Ibrani be dero? Aku low ulun Ibrani. Ulun Israel be dero? Aku low ulun Israel. Upus Abraham be dero? Aku ktine low! ²³Playan-playan Kristus be dero? Nte tempaning kati ungka oki ene ulun mapos akal, tapi aku memang playan yo buen se dero eka-eka! Aku bgawi bptungka tingen, jono tingen tningkos epo lang sper, jono tingen kono ksa ndok sampe kesong sori.Sundok limo derang aku kono ksa ulun Yahudi, tongku derang ene nrempuk tolupulu sie derang. ²⁵Tolu derang aku kono rempuk ulun-ulun roma; kono sindai aku kono turak diang batu. Tolu derang aku kono karom diang kpal, ai sindai aku erai olo erai malom skampung botuk tasik. ²⁶Lang dalan ku aku jono ngadap bahaya owa ai bahaya prampok, bahaya ngket tadah Yahudi ktine low yo kngket makse Yahudi, bahaya mbo lang kota, bahaya mbo oro ngket kota, bahaya mbo tasik, ai bahaya ngket ulun-ulun yo pura-pura jadi ulun Prcaya.²⁷Aku sundok jono nantai mole lokoi ai bgawi boyat, jono iyo aku sampe belo turui, nantai sietlau ai krengan, jono iyo aku puasa ka, nantai roni koe belo keo bida. ²⁸Lngkat se ene, tongku olo nte oki kno low nau umbang eka jemaat-jemaat. ²⁹Ena keo yo jadi loma aku lumpat kiso kanam loma-loma low. Ena keo yo nglaku dosa, belo keo kua kanam pngnanam lang kesong ku.³⁰Ena nte btondek, aku ene btondek diang nau pmbelo mana ku. ³¹Allah, Iyo ene Bapa Yesus, Tuhan taka yo pnuji kden ka tau se aku belo di nampa eta.Des aku mbo Damsyik, gubernur yo tunjuk raja Aretas nte keo kuasa mbo mne nymuyu tntara yo ngnjaga pnyumba epo kota nte nangop aku. ³³Tapi lang rantun aku nului ngket luang epo baling se dinding kota, diang ktine aku kate lopus ngket iyo.

Chapter 12

¹Aku arus nondek, betako nau umbang ene belo dikeo jodoiyo, tapi nau ene aku kakan nyampe pngkito-pngkito ai pesan- pesan yo kiliku ngket Tuhan. ²Aku tau nau umbang ulun Kristen; opat blas taun yo sundok lalo - baheko mbo lang kompu, aku belo ditau, baheko baling se kompu, aku belo ditau, Allah se yo tau ene - ulun ene kolan-kolan se nengkat epo tingkat tolu lang Sorga. ³Aku tau lou nau otang ulun ene,- baheko mbo lang kompu ai baheko baling se kompu, aku dibelo tau, Allah se yo tau ene - ⁴io kolan-kolan nengkat epo firdaus ai io kringo pemensara yo belo dapet ulek, yo belo kate knesah koe ulun. ⁵nau ulun ene aku kakan nondek, tapi nau ku se aku belo anta dinondek, makse nau kgle-kgle ku se. ⁶koe ena ka aku kakan nondek lou, aku makse ulun bungang oli, koe aku ngesah yo beta, tapi aku ngtep pngenanam ku, apa nang keo ulun ngreken lengkat se yo keo mbo aku yo itan dero ai dingo dero engket aku. ⁷ai apa aku nang sombon keo pesan-pesan yo belo taro kira , koe ene aku dnue dui lang kompuku, yo doko erai wakel iblis nte ngebuk aku, apa aku nang sombong. ⁸Nau umbang ene sundok tolu derang aku bdoa epo Tuhan, apa yo wakel iblis ene makat engket aku. ⁹Tapi tuing Tuhan, " puli ka kasih karunia-ku nte ngko, koe lang kegele ene ube kuasa-Ku jadi sempurna." koe ene aku gawal ube btondek kanam pemenasa ku, apa kuasa Kristus diwa ngugu aku. ¹⁰Jadi aku ego diang nau pembelomana ku. aku ego lou ena koe leka Kristus aku kono ptenah, aku kiso kanam bolum poyo, dor dnasu, ai kanam bsisong. koe ena aku belo keo kuat kalu mne ube aku galak. ¹¹Sebeta iyo aku sundok jadi bungang; tapi ikam yo maksa aku. Sebeta iyo aku harus ngkam puji. Koe tontanko aku ndok belo idi-idi keo jodo, tapi eka lang nau umbang aku belo dikalah engket rasul-rasul yo ebat ene. ¹²eka ise masam yo jadi bukti se aku ene rasul, sundok nelaku , mbo ekang ikam diang bol kdoloh, diang tanda-tanda, mujizat-mujizat ai kuasa-kuasa. ¹³Koe lang nau umbang ise po ikam pinosori se diang jemaat-jemaat yo mak, yo makse se lang nau umbang endo, yo doko se aku se belo di jadi nte nengkoyat epo iko? Ikam ka ngampun kbelo adil ku endo! ¹⁴Sebeta yo tempondo sundok nte ketolu derang iyo aku siap nte nuntun ikam, ai aku belo di anta nengkoyat ikam. Koe makse pengkeo kam yo eto ku, makse ko ikam se. Koe makse se bang pea yo harus naket pengkeo nte ulun tuo iyo, tapi ulun tuo ube nte pea-pea iyo. ¹⁵Koe ene aku gawal magi pengkeo ku, lengkat se ene aku mie komputonga ku nte engkam. jadi ena aku nengkosang ikam beta-beta, masa aku mokin kurang knosang? ¹⁶Buen ka, aku se belo di nte nengkoyat ikam, tapi- ulek kam - lang kepintar ngakal ku aku sundok ngakal ikam diang akal triaw. ¹⁷Koe ene pini be aku naket asil engket ikam koe erai kongo engket dero, yo suyuku epo ikam? ¹⁸Betako aku sundok tindu Titus nte daro ai sama-sama diang iyo aku nyuyu erai buntung yo mak ene. Keo be Titus ngalek asil ngket ikam? Belo be kain duo bolum patoh epo roh yo sama ai belo be kain bgawi bgata kati sara yo sama? ¹⁹Sundok ola ungka yo ikam nundruh, se kain kakan nyembeta se kaise onon ikam. Mbo onon Allah ai koe nte Kristus kain ngulek: eka-eka endo, erai buntung-erai buntungku yo knosang, terjadi nte mturon iman kam. ²⁰Koe aku kwater, se ena des aku ulet aku ruku ikam belo di kati nau yo pengkakan ku ia ikam ruku se aku belo di kati nau yo pngkakan kam. Aku kwater tau keo salotangki, iri isak, briel mara, ngenunon diri se, ptnah, komis-komos, mkolai diri se, ai ruok rame. ²¹Aku kwater, se ena des aku ulet nua, Allahku anta mekiwa aku onon ikam, ai se aku anta belo buen pngenanam epo deo ulun yo bune nampa dosa ai belo ganggu btobat engket triaw, ngket gawi gata pokeng, ai gawi gata dero yo belo keo adat.

Chapter 13

¹Endo doko nte ketolu derangiyo aku ulet epo ikam: Bayu diang pengesah duo ena belo toluulun saksi plikara ene sah.²Epo dero, des yo bune nampa dosa, ai epo ekaulun mak, sundok ulek ku ono ai aku anta ngulek sindai nua - tmpondo des aku oroh ngket ikam montuk kati jman penguletku keduo derangiyo- se aku belo anta sayang se dero des aku ulet oli.³Koe ikam kakan bukti, se Kristus besara tete aku, ai Io belo loma epo ikam, makse ko keo kuasa epo ikam.⁴Koe beta ko Io sundok senalib koe belo keo kuat kalu, tapi apo Io bolum koe kuasa Allah. Beta ko kain ene belo keo kuat kalu mbo lang Io, tapi kain anta bolum sama-sama diang Io nte ngkam koe kuasa Allah.⁵Soba ta ikam se, nokon be ikam kate tengkorong mbo lang iman. selidik ka ikam se! Persaya be ikam se ikam se, se Kristus Yesus keo mbo lang ikam? Koe ena belo ktine, ikam belo kelian nte soba.m⁶Tapi aku ngarap, se ikam tau, se makse kain yo belo kelian kono soba.⁷Kain bedoa epo Allah, apa ikam nang ngawi yo triaw belo di apa kain melak se kelian nte soba, tapi apa ikam endo kuli nggawi ise yo buen, beta ko kain se nte eti belo kelian kono soba.⁸Koe kain belo kuli ise-ise nte ngembali yo kono; yo dapet gawi kain yodoko nte yo kono.⁹Koe kain ego, ena kain belo keo kuat kalu ai ikam galak. Ai endo doko yo doa kain, yoene apa ikam jadi belo keo bila molon.¹⁰Koe ene doko sindai endo aku nulis epo ikam des aku oroh ngket ikam, apa des aku keo mbo ekang ikam, aku belo terpaksa jues kati kuasa yo diye Tuhan epo aku nte nengkuat ai belo di nte ngeroros.¹¹Penyundokiyo, erai buntung-erai buntungku, ego ta ikam, komer kam se ka apa ikam belo keo bila molon. Tinorima eka nasehatku! Kerai kesong kerai penganam ka ikam, ai bolum ka lang damai sejahtera; apa Allah, awa pembaling kasih ai damai sejahtera ene diang ikam!¹²Bako salam ka epo erai-erai diang arok yo kudus.¹³(13-12b) Salam ngket eka ulun kudus epo ikam.¹⁴(13-13) Kasih karunia Tuhan Yesus Kristus, ai pengkosang Allah, ai apa Roh Kudus jadi sama-sama diang eka ikam.

Galatians

Chapter 1

¹Ngket Paulus, jadi Rasul, mba di koe ulun, belo low di diang kuasa ulun, tapi koe Yesus Kristus ai Allah, Bapa, yo sundok msuli Io ngket ekang ulun mate,²ai ngket eka-eka ulun yo keo sama-sama diang aku, epo jmaat-jmaat mbo Galatia:³kasih karunia diang ikam ai damai sjahtra ngket Allah, Bapa taka, ai ngket Tuhan Yesus Kristus,⁴yo sundok nyrah kompu tonga-Iyo koe dosa-dosa taka, nte ngupey taka ngket dnia triaw yo tempo ndo endo, kati ptua Allah ai Bapa taka.⁵Nte-IYo ka doko kmulia turai-turai! Amin.⁶Aku heran, se ikam resi beta ngendikah Io, yo koe kasih karunia Kristus sundok momba ikam, ai nyarak injil yo mak,⁷yo sbeta iyo makse Injil. Keo ulun yo ngacau ikam tingen ai yo keo ptua nte nbalik Injil Kristus.⁸Tapi tontan ko kain ktine low mlekat ngket sorga yo nyampe epo ikam injil yo makse se Injil yo sundok sampe kain epo ikam, io kono kutuk.⁹Kati yo sundok ulek kain bune, tempo ndo aku ngulek sindai nua: ena keo ulun yo nyampe epo ikam injil, yo makse diang ise yo sundok trima kam, io kono kutuk.¹⁰Jadi ktimbe tempo ndo: keo be aku meto penggawal ulun ena belo penggawal Allah? Keo be aku nyoba yo sengkono epo ulun? Ena ka aku aso kakan nyoba yo sengkono epo ulun, jadi aku makse batak Kristus.¹¹Koe aku ngulek beta-beta epo ikam, erai buntung-erai buntungku, se Injil yo sampe ku ene makse injil ulun.¹²Koe aku nrimaiyo mba di ngket ulun, ai makse ulun yo nutuy matukiyo epo aku, tapi aku nrimaiyo koe psan Yesus Kristus.¹³Koe ikam sundok kringo nau umbang bolum ku bune lang agama Yahudi: belo keo jepen aku ngurow ngsa jmaat Allah ai bkomer ngempate dero¹⁴Ai mbo lang agama Yahudi aku pawak aso maju se deo tman yo nyongkar diang aku ngket bangsaku, jadi aku ene ulun yo moyoh beta nglaku adat istiadat itak kakahku.¹⁷¹⁵pi des Io, yo sundok mili aku aso ngket lang buntung ineku ai momba aku koe kasih karunia-Iyo,¹⁶yo sengkono nte mkelak Pea-Iyo mbo lang aku, apa aku ngabar Io mbo ekang bangsa-bangsa makse Yahudi, jadi ndok belo ile-ile aku tindu timbang pngenam epo ulun;¹⁷aku belo low di malan epo Yerusalem nte nyruku dero yo sundok jadi rasul yo ono se aku, tapi aku brangkat epo tana Arab ai ngket mne mulik nua epo Damsyik.¹⁸Trus, tolu taun sundok ene, aku malan epo Yerusalem nte nandang Kefas, ai aku nsan limo blas olo mbo louiyo.¹⁹Tapi ndok belo erai kongo aku kito rasul-rasul yo mak, pulun ka Yakobus, erai buntung Tuhan Yesus.²⁰Mbo onon Allah aku ngulek beta-beta: ise yo tulis ku epo ikam endo beta memang, aku mba di nampa eta.²¹Sundok ene aku bju epo ja-ja Siria ai Kilikia.²²Tapi jmaat-jmaat Kristus mbo Yudea nokon belo pian tau nauku.²³Dero kringo tingen, se io yo bune ngurow ngsa dero, tempo ndo ngabar iman, yo pini kakan pateiyo.²⁴Ai dero ngmulia Allah koe aku.

Chapter 2

¹Abis ene des sundok lalo opat blas taun, aku malan nua epo Yerusalem diang Barnabas ai ndok Titus oit ku low.

²Aku malan koe keo yo pinokelak. Jadi epo dero aku ngurai Injil yo sampeku mbo ekang bangsa-bangsa makse Yahudi - lang pmnsara pinoko epo dero yo deo pntau -, apa nang prsuma aku bkomer ktine low yo sundok komer ku.³Tapi betako Titus, yo sama-sama diang aku, ene ulun Yunani, tapi io belo di pnaksa nte bkatep.⁴Keo ka pnindu ngket dero yo ngaku-ngaku eraibuntung yo ngako-ngako sumba, yo doko dero yo ngako-ngako sumba epo dalom diang ptua nte mungka kbebas taka yo mpun taka lang Kristus Yesus, apa diang ktine dero kuli nampa taka jadi batak dero.⁵Tapi ndok belo ile-ile kain kakan mundur ai ngaya nte dero, apa kbeta Injil kate preket mbo ikam.⁶Ai nau umbang dero yo nte itan sundok deo pntau ene - ktimbe kombo pangkat dero bai, ene belo di jodo nte oki, koe Allah belo di meti wae - tontan ktimbe low, dero yo nte itan sundok deo pntau ene belo di maska ise-ise yo mak epo aku.⁷Tapi mokin ube, des sundok dero kito se epo aku sundok dne tugas nte pnyampe Injil nte ulun-ulun belo bkatep, sama kati epo Petrus nte ulun-ulun bkatep.⁸-koe Io yo sundok mie kuasa epo Petrus apa jadi rasul nte ulun-ulun bkatep, Io low yo sundok mie kuasa epo aku nte ulun-ulun yo belo bkatep.⁹Ai sundok kito kasih karunia yo sundok dne epo aku, koe ene Yakobus, Kefas diang Yohanes, yo tnoan se guru pmturon jemaat, sujud epo aku ai diang Barnabas nte tanda se kain kerai kowon, apa kain malan epo ulun-ulun yo belo bkatep ai dero epo ulun-ulun yo bkatep;¹⁰tingen ka yo kain arus dor knop ulun-ulun kao ai ene doko yo beta-beta komerku nglaku iyo.¹¹Tapi des Kefas ulet epo Antiokhia, aku sangko wae slengan iyo, koe io sala.¹²Koe onon tenu-tenu kongo ngket kowon Yakobus ulet, io kuman kerai diang eraibuntung-eraibuntung yo belo bkatep, tapi sundok dero ulet, io sdang kuman ai bsoro ngket dero koe takut se erainuntung-eraibuntung yo bkatep.¹³Ai ulun-ulun Yahudi yo mak jadi diang io lumpat low ungka-ungka belo di nggawi, sampe Barnabas se lumpat bkoit diang nau dero ene.¹⁴Tapi des itanku, se gawi dero ene belodi sngkono diang kbeta Injil, aku ngulek epo Kefas mbo onon eka-eka dero: "Ena iko, ulun Yahudi, bolum kati sara ulun kaper ai belo di kati sara Yahudi, ktimbe iko kuli mtua eraibuntung-eraibuntung yo belo bkatep nte bolum kati sara Yahudi?"¹⁵Ngket kinomekus kain endo ulun Yahudi ai makse ulun dosa ngket bangsa-bangsa yo mak.¹⁶Ikam tau, se ndok belo erai kongo ulun yo kuli jadi yo kono koe nglaku aturan Taurat, tapi koe iman lang Kristus Yesus bute. Koe ene kain doko sundok prsaya epo Kristus Yesus, apa kain jadi yo kono koe iman lang Kristus Yesus jadi belo di koe nglaku aturan Taurat. Koe: "Ndok belo erai kongo ulun jadi yo kono" koe leka nglaku aturan Taurat.¹⁷Tapi ena kain se, desung kain bkomer nte jadi yo kono lang Kristus nokon ka aso ulun-ulun dosa, belo be nau umbang ene rti yo se Kristus ene bgawi nte dosa? Makse di ktine!¹⁸Koe ena aku nngkuat nua ise yo sundok kokasku, aku mmkelak se aku se yo nglanggar aturan Taurat.¹⁹Koe aku sundok mate koe aturan Taurat nte aturan Taurat, apa aku bolum nte Allah. Aku sundok snalib diang Kristus;²⁰tapi aku bolum, tapi makse aku se oli yo bolum, tapi Kristus yo bolum lang aku. Ai bolumku yo aso keo tempo ndo lang isi upak endo, ene bolum koe iman lang Pea Allah yo sundok nngkosang aku ai nyrah kompu tonga-Iyo nte oki.²¹Aku belo di nolak kasih karunia Allah. Koe ena beta nte jadi yo kono koe aturan Taurat, jadi pngnate Kristus mba di keo jodo doko.

Chapter 3

¹O ulun-ulun Galatia yo bungang, ise yo sundok memeteri ikam? Belo be Yesus yo snalib ene sundok pinojelas epo ikam? ²Endo bute yo aku kakan tau ngket ikam: Keo be ikam sundok nrima Roh koe nglaku aturan Taurat ena belo koe percaya epo Injil yo snampe epo ikam? ³Sendongun ikam kbungang ene? Ikam sundok nindu diang Roh, kakan be ikam tempo ndo msundok yo diang sara dnia? ⁴Belo keo jodo be eka yo sundok deo ikam kiso buen kanam kola ndo? Sendongun belo keo jodo! ⁵Jadi ktimbe tempo ndo, Keo be Io mie Roh epo ikam diang ruak ruaw ai yo nampa musisat ela ekang ikam, Io nggawi ktine koe ikam nglaku aturan Taurat ena belo koe ikam percaya epo Injil yo sundok snampe epo ikam? ⁶Ktine ka doko low Abraham percaya epo Allah, moko ene Allah ngreken umbang ene epo io se ene nau umbang yo beta. ⁷Jadi ikam kito se dero yo bolum ngket iman, dero ene doko pea-pea Abraham. ⁸Ai Alkitab, yo onon se ene sundok tau, se Allah nyengkono ulun-ulun makse Yahudi koe leka iman, sundok ono se ene nyampe Injil epo Abraham: "Koe iko eka bangsa anta kuli berkat." ⁹Jadi dero yo bolum ngket iman, dero ene doko yo dneie berkat sama-sama diang Abraham yo keo iman ene. ¹⁰Koe eka ulun, yo bolum ngket nglaku aturan Taurat, dero bolum lang sumpah pator. Koe keo tnulis: "Kono sumpah pator ulun yo belo stia nglaku eka yo tnulis lang kitab aturan Taurat." ¹¹Ai se ndok belo keo ulun yo sinombeta onon Allah koe nglaku aturan Taurat ene jlas, koe: "Ulun yo bolum yo kono anta bolum koe iman." ¹²Tapi tondal aturan Taurat ene makse iman, makse ko ise yo nggawiiyo, anta bolum koeiyo. ¹³Kristus sundok nous taka ngket lang sumpah pator aturan Taurat diang sara jadi kono sumpah pator koe taka, koe keo tnulis: "Kono sumpah pator ulun yo gneweng mbo kayu salib!" ¹⁴Yesus Kristus sundok nglaku ene, apa mbo lang Io berkat Abraham sampe epo bangsa-bangsa yo mak, apa koe iman taka nrima Roh yo sundok jnanji ene. ¹⁵Erai buntung-erai buntung, buen ka ena aku makai nte sontoh ngket nau pnyembolum olo-olo. Pnape yo sundok pnekat, beta ko io ngket ulun, belo taro pkore ktine low tnambah koe ulun ise ka-iyoy. ¹⁶Ktine ka epo Abraham nontus eka janji ene diang epo upus-iyoy. Belo dinulek "epo upus-upus-iyoy" kati ungka nte ulun deo, tapi nte erai kongo bute: "ai epo upus ko", yo ene Kristus. ¹⁷Otang oki ene ktindo: Janji yo onon se ene sundok putus Allah, belo di taro pkore koe aturan Taurat, yo bayu nyoret opat jatus tolu pulu taun sundok ene, sampe janji ene mapos kturon-iyoy. ¹⁸Koe, ena ka ise yo putus Allah ulet ngket aturan Taurat, io mba di ulet ngket janji; tapi ube koe janji doko Allah sundok mie kasih karunia-Iyoy epo Abraham. ¹⁹Ena ktine, ise jodo aturan Taurat? Io tnambah koe gawi gata io nglanggar - sampe ulet upus yo jnanji ene - ai io snampe tete mlekat-mlekat epo lang kayang erai kongo ptete. ²⁰Erai kongo ptete mba di pulun nte ngwakel erai kongo bute, pdahal Allah ene erai. ²¹Ena ktine, belo bako sengkono be aturan Taurat diang janji Allah? Sama skali belo. Koe ena ka aturan Taurat dneie nte ise masam yo tau nembolum, jadi memang nau umbang yo beta ulet ngket aturan Taurat. ²²Tapi Alkitab sundok nguong eka ise masam ela iwat kuasa dosa, apa koe iman lang Yesus Kristus janji ene dneie epo dero yo percaya. ²³Onon iman ene ulet taka keo lang jaga aturan Taurat, ai nuong sampe iman ene pinokelak. ²⁴Jadi aturan Taurat ene nte ngayak taka sampe Kristus ulet, apa taka jadi umbang yo kono koe iman. ²⁵Tempo ndo iman ene sundok ulet, koe ene taka belo di keo oli lang jaga yo ngayak ene. ²⁶Koe ikam eka-eka ene pea-pea Allah koe iman mbo lang Yesus Kristus. ²⁷Koe ikam eka, yo bnaptis lang Kristus, sundok makai Kristus. ²⁸Lang nau umbang endo belo keo ulun Yahudi ktine low ulun Yunani, belo keo ulun batak ktine low ulun bebas, belo keo bang song ktine low bang bawe, koe ikam eka-eka ene erai lang Kristus Yesus. ²⁹Ai ena ikam ene mpun Kristus, jadi ikam low ene upus Abraham ai keo hak nte nrima janji Allah.

Chapter 4

¹Umbang yo ktindo: kola-kola ulun yo pngitek pnape ene belo pian sampe ktuo, kola ene io sama kati umbang nton ulun batak, beta ko sbeta iyo, io yo ngmpun eka pngkeo ene. ²Tapi io aso lang tentu ai asi ado ulun, sampe des ktuo yo montuk diang pnape uma iyo. ³Ktine low taka: kola-kola taka belo pian sampe ktuo, taka tunduk low epo roh-roh dnia. ⁴Tapi ena sundok sampe des iyo, Allah ngirim Pea-Iyo epo lang dnia, yo kinomekus ngket ulun bawe yo tunduk epo aturan torat. ⁵Io knirim nte nous dero, yo tunduk epo aturan torat, apa taka tinorima jadi pea-pea Allah. ⁶Koe ikam ene pea-pea Allah, Moko ene Allah sundok nymuyu Roh Pea-Iyo epo lang kesong taka, yo Roh yo ngulek, "o Abba, o Bapa!" ⁷Jadi ikam makse ulun batak oli, makse ko Pea, moko ene ikam low jadi kuli ngmpun pnape ngket Allah. ⁸Bai bareh, des ikam belo pian tau se Allah, diang ptua kam se ikam kakan nte jadi batak allah-allah yo sbeta iyo makse Allah. ⁹Tapi tempo ndo ikam sundok tau se Allah, tapi montuk ube aso Allah yo tau se ikam. Ktimbe ikam kate kakan mulik nua epo roh-roh yo belo keo pnjapa ai kao? laju nymula nua diang ptua kam se kakan nte jadi batak roh-roh ene nua. ¹⁰Ikam mtoko olo malom nte ngkam pkolai, mtoko bulan ai mtoko taun nte pkolai. ¹¹Aku woring bahe-bahe poruk pgel ku nte ngkam ene, nte oki pae tingen belo keo jodo yo. ¹²Eraibuntung-eraibuntung, Aku tindu beta-beta apa ikam kati aku. Koe aku endo low sama kati ikam. Ikam belo keo nglaku ise ka yo sala epo aku. ¹³Sndongun ena ikam kewot ise yo nampa aku tla-tla ngabar Injil ene epo ikam. Yo ene koe aku kroton. ¹⁴Des jman ene ikam belo di panan keko iyo epo aku, beta ko nau kompu tonga ku ene mroa nte ngkam knanam. Tapi ikam ube apo nrima aku kati nrima mlekat Allah, lngkat se ene sama kati nrima Kristus Yesus ene se. ¹⁵Ikam ego beta jman ene, tapi mombe pngego kam ene tempondo? Aku tau se ikam jman ene ena mbo dapet gawi kam belo di soro nyungkit bigi mato kam se nte die epo aku. ¹⁶Bahe ikam tempondo sundok ngotus se aku ene bali kam? Koe leka aku mkelak yo beta ai kono epo ikam? ¹⁷Ulun-ulun yo mak ene diang buket meto ikam, tapi dero ene keo ptua belo buen. Dero ene pulun gawi ngomer nte mtenggang ikam ngket kain, apa ikam buket nyarak dero. ¹⁸memang ka buen ena ulun ene buket ngayak nte lumpat ise len gawi yo buen, ena ka kate dor ktine nang pulun mbo montuk aku keo ekang ikam tingen. ¹⁹Ikam ene kati pea ku, aku tempondo kanam sesa nua koe ikam. Aku kanam sesa kati kanam ksesa ulun bawe des ngmekus pea. Aku dor kanam sesa, ena nau diran Kristus ene belo melak mbo lang epo ikam. ²⁰Aku ngno beta keo ekang ikam tempondo, koe aku kakan bsurah diang legot yo mak, koe aku belo keo akal aut ngadap ikam. ²¹Ulek kam tah epo aku, ise ikam yo bolum iwat aturan Torat, belo be ikam nempaning aturan Torat. ²²Belo be mbo mne keo tnulis se Abraham keo duo kongo pea, erai ngket bawe yo jadi batak iyo ai erai yo ngket bawe yo se memang, yo bebas? ²³Pea yo kinomekus ngket batak iyo ene kinomekus koe pngkakan ulun tingen. Tapi pea yo kinomekus ngket bawe iyo memang ene, kinomekus koe jnanji koe Allah. ²⁴Ene doko nau umbang pmrawet, Koe duo ulun bawe ene duo umbang yo sundok ptoko Allah. yo erai ngket tunden Sinai ngmekus pea-pea nte batak, yo ene Hagar. ²⁵Hagar ene tunden Sinai mbo tana Arab, ai io sama diang Yerusalem yo tempondo, koe io bolum lang nte batak diang pea-pea iyo. ²⁶Tapi Yerusalem yo mbo sorga yo ene bawe yo bebas, ai io ene ine taka. ²⁷Koe keo tnulis : "Ego beta iko o bawe yo aloi, yo belo pini ngmekus! Ego ai ngrnde ayo belo pini kiso kanam siet ngmekus! Koe yo dikah song iyo anta keo deo tingen pea se yo keo song." ²⁸Ai ikam eraibuntung-eraibuntung, ikam sama kati Ishak pea-pea yo jnanji. ²⁹Tapi kati bune, io yo tinompea koe pngkakan ulun, ngurow pea yo kinomekus koe pngkakan Roh Allah. Ktine low tempondo endo. ³⁰Tapi ktimbe ulek lang Alkitab? Mbo mne tnulis ktindo: "Usa ko bawe batak ene diang pea iyo, koe pea batak bawe ene belo anta di jadi ngmpun pnape sama-sama diang pea bawe bebas ene." ³¹Koe ene eraibuntung-eraibuntung, taka makse pea bawe batak, makse ko pea-pea bawe yo bebas.

Chapter 5

¹Apa taka beta-beta bebas, Kristus sundok ngemb bebas taka. Koe ene akatka turon ai nang kakan oli pnayak aturan iyo nengkoyat nte jadi bata²k. ²Se beta-beta iyo, aku, Paulus, ngulek epo ikam: ena ikam bkatep, Kristus belo beta keo jodo oli nte ngkam. ³Sindai nua aku ngulek epo tongkuulun yo ngatep iyo se, se iyo arus nglaku eka aturan Taurat. ⁴Ikam lopus ngket Kristus, ena ikam ngarap io kono mkoe aturan Taurat; ikam bolum la baling se kasih karunia. ⁵Koe Roh bute, ai koe iman, taka minte yo kono yo arap taka. ⁶Koe nte ulun-ulun yo keo mbo lang Kristus Yesus nau umbang bkatep ktine low belo bkatep belo keo artiiyo, pulun iman yo bgawi koe kasih. ⁷Bune ikam bkomer beta-beta diang buen. Ise yo mombong-mombong ikam, sampe ikam belo ngaya yo kono oli? ⁸Ptua nte belo ngayaiyo oli makse ulet ngket Io, yo momba ikam. ⁹Idi-idi ka ragi kate mkombong tlepong lang awa pnggaru. ¹⁰Lang Tuhan aku persaya nau umbang kam, se ikam belo keo pikiran yo mak se pikiran endo. Tapi ise-ise yo ngewewong ikam, io anta nanggung ukuman, ise ka io. ¹¹Ai aso aku endo, erai buntung-erai buntung, ena aku nokon ngabar katep, ise moko aku nokon knurow lou? Koe ena ktine, salib mba di nte batu tutur oli. ¹²Alo ka dero yo ngasut ikam ene nylatak io se! ¹³Erai buntung-erai buntung, betako ikam bnomba nte bebas. Tapi nang ka ikam kbebas ene jadi boyan nte bolum lang dosa, tapi kinon jeni erai-erai diang kasih. ¹⁴Koe eka aturan Taurat sumba ba lang erai firman endo, yo ene: Tengkosang ka sama-sama ulun kati kompu tonga kam se!" ¹⁵Tapi ena ikam salo kikit ai salo tolon, bjaga ta, apa nang ikam salo pate. ¹⁶Ptuaku io doko: bolum ka koe Roh, jadi ikam belo anta ngaya pngkakan kompu tonga endo. ¹⁷Koe pngkakan kompu tonga mangko bali diang pngkakan Roh ai pngkakan Roh mangkobali diang kompu tonga endo_koe duo-duo iyo belo nyung_sampe ikam tongku derang belo nglaku ise yo pngkakan kam. ¹⁸Tapi ena ikam mie kompu kam pnimpin koe Roh, jadi ikam belo di bolum iwat aturan Taurat. ¹⁹Gawi gata kompu tonga endo sundok melak, yo ene: tuju gawi pokeng, tuju gawi remis, pengkakan ngempu ba, ²⁰nyembah uwok owuk, lemu amal, ruok rame, bako tulan, kesong sirik, tuju mara, nte io bute, tuju ngati, roh metenggang, ²¹dat diang erai-erai, tuju mauk, ungan kuman nyingkap nyisa-nyisa ai iyo mak io. Nte eka ene aku mmkenop ikam_kati yo sundok gawi ku bune_se ise-ise ulun nglaku nau umbang yo ktine, io belo anta kuli awa lang Kerajaan Allah. ²²Tapi bua Roh io ene: kosang, ego, bolum damai, doloh, sawai, buen kesong, setia, ²³lami lamai, ngentep pngenanam. Belo keo aturan yo belo sengkono diang nau umbang ene. ²⁴Ise-ise ulun yo jadi mpun Kristus Yesus, io sundok nyalib kompu tonga io diang eka-eka pengkakan niras ai pengkakan io. ²⁵Ena taka bolum koe Roh, alo bolum taka pimpin Roh lou, ²⁶ai angka taka tiras kakan kinonuon, angka taka baku tantak ai datsan diang erai-erai.

Chapter 6

¹Erai buntung-erai buntung, ena ka keo ulun tinonoan nggawi yo sala, moko ikam yo rohani, arus mimpin ulun ene epo boyan yo kono lang roh lami lamai, ulak ngnjaga ikam se, apa ikam low nang kono snoba. ²Bako awat ka diang erai-erai! Ktine ka doko ikam megnap aturan Kristus. ³Koe ena san ulun se io keo jodo, padahal io sama skali belo keo jodo, io nipu io se. ⁴Alo ka tongku-tongku kongo ulun nguji gawi gataiyo se; jadi io kate nondek kito nauiyo se ai mba di meti nau ulun yo mak. ⁵Koe tongku-tongku ulun anta moson penyekoitiyo se. ⁶Ai buen ka io, yo nrima tutuy batuk lang Firman, magi eka ise masam yo keo mboiyo epo ulun yo nutuy matuk ene. ⁷Nang tang! Allah belo di miye Io se binokeko. Koe ise yo bewet ulun, ene lou yo anta utikiyo. ⁸Koe ise-ise ulun mewet lang kompu tongaiyo, io anta ngutik pegenate ngket kompu tongaiyo, tapi ise-ise ulun mewet lang Roh, io anta ngutik bolum yo kden ngket Roh ene. ⁹Nang ka taka delan-delan nggawi yo buen, koe ena sundok ulet desiyo, taka anta ngutik, ena taka belo jadi lome. ¹⁰Koe ene, kola aso keo des nte taka, alo taka nggawi yo buen epo eka-eka ulun, tapi yo ono tinggen epo kowon-kowon taka kerai iman. ¹¹Eti tah, ketimbe kolaiyo huruf-huruf yo tulis ku epo ikam diang kayangku se. ¹²Dero yo diang sara yo melak gawal nondek dero se, dero doko yo bkomer maksa ikam nte bkatep, pulun diang petua, apa dero belo kono kurow kesa koe salib Kristus. ¹³Koe dero yo ngatep dero se low, belo di nggawi aturan Taurat tapi dero nengjakan, apa ikam bkatep, apa dero kuli nondek ombon nau umbang kam yo melak. ¹⁴Tapi aku sama skali belo kakan nondek, ena makse ko lang salib Tuhan taka Yesus Kristus, koe io bute dnia sundok snalip nte oki ai aku nte dnia. ¹⁵Koe bkatep ktine low belo bkatep belo keo jodoiyo, tapi jadi tnampa bayu, ene doko yo keo jodoiyo. ¹⁶Ai eka ulun, yo miye kompuiyo nte pimpin makai patokan endo, diwa ka moko yo damai sejahtera ai rahmat ombon dero ai ombon Israel mpun Allah. ¹⁷Longon se ene nang ka keo ulin yo nyusah aku, koe mbo kompuku keo tanda-tanda mpun Kristus. ¹⁸Kasih karunia Tuhan taka Yesus Kristus diang roh kam, erai buntung-erai buntung! Amin.

Ephesians

Chapter 1

¹Ngket Paulus, rasul Kristus Yesus koe ptua Allah, mitek ulun-ulun kudus mbo Epesus, ulun-ulun prsaya lang Kristus Yesus. ²Kasih karunia ai damai sjahtra ngket Allah, Bapa taka ai ngket Tuhan Yesus Kristus diang ikam. ³Yo paling pnuji Allah ai Bapa Tuhan taka Yesus Kristus yo lang Kristus sundok mie epo taka eka-eka brkat rohani mbo lang sorga. ⁴Koe lang Io Allah sundok mili taka onon se dnia tnampa, apa taka kudus ai belo keo bila molon mbo onon-Io. ⁵Lang Kasih Io sundok mtoko taka ngket tla koe Yesus Kristus nte jadi anak-anak-Io, sengkono diang petua Io se memang. ⁶Koe ene taka mmuji tuhan, koe die sokoi-Io mulia nte taka, yo die-Io epo taka mbo lang-Io, yo knosang ke-Io. ⁷Koe lang Io ai koe daya-Io taka tnbus, yo ene dosa pinokampun, mnurut pngkeo die sokoi-Io, ⁸yo serah sindai koe-Io epo taka lang pngka hikmat ai pntau. ⁹Koe Io sundok mmkelak yo melim lang petua-Io epo taka, sengkono diang rensana yo ptua-Io se memang, yo ene rnsana yo ngket tla memang sundok pinotoko koe-Io lang Kristus. ¹⁰Nte nyiap sampe jman nte mkerai lang Kristus, nte pengutok eka-eka yo mbo sorga ktine low mbo dnia endo. ¹¹Aku ngulek "mbo lang Kristus", koe lang Io tinggen kain kuli bagian yo jnanji ene, kain yo ngket tla sundok pinotoko nte kuli bagian ene yo sengkono diang ptua Allah, yo ise pun ene memang mba dikeo ngelalo se ptua-Io. ¹²Apa kain, yo kola ndo sundok mayak harapan epo Kristus, kate jadi pujian nte kemuliaan-io. ¹³Mbo' lang Io ikam low - koe ikam sundok nmpaning firman yo beta, yo ene Injil Kselamatan kam - mbo' lang Io ikam low, des ikam persaya, kinometrai diang Roh Kudus, yo jnanji koe' Io' ene. ¹⁴Ai Roh Kudus ene ngnjamin nte taka sampe taka kuli eka-eka yo ene, yo doko pnous apa taka jadi mpun Allah, nte muji kmuliaan Iyo. ¹⁵Koe ene, sundok aku kringo nau iman kam lang Tuhan Yesus ai soal kasih kam epo eka-eka ulun kudus, ¹⁶aku se lou mbadi brenti bsukur koe ikam. Ai aku dor knop ikam lang doaku, ¹⁷Diang tindu epo Allah Tuhan taka Yesus Kristus, yo ene Bapa yo mulia ene, apa Io' se miye epo ikam Roh hikmat ai wahyu apa' tau beta se Iyo. ¹⁸Ai apa Io nampa mato kesong kam jadi trang: apa ikam tau arapan ise-ise atok lang bomba Iyo ene: bol ktatau kemuliaan yo ptoko Iyo nte ulun-ulun kudus, ¹⁹bol hebat kuasa Iyo nte taka yo prsaya, sngkono diang kturon kuasa Iyo, ²⁰yo gawi Iyo se lang Kristus diang mensuli yo ngket ekang ulun mate diang mentunge Iyo mbo tadah sanan Iyo lang sorga, ²¹pawak ombo se eka-eka pmrenta ai pnguasa ai kekuasaan ai krajaan ai tongku karan yo dapet ulek, belo di mbo dnia endo tinggen, tapi low mbo dnia yo anta ulet. ²²Eka-eka ene sundok payak Iyo iwat botis Kristus ai Io sundok die Iyo epo jmaat nte Pngutok ngket eka-eka yo keo. ²³Jmaat yo ene kompu Iyo, yo ponu koe' Iyo, yo nmponu eka-eka ene.

Chapter 2

¹Ikam bune sundok mate koe pnsala-pnsala diang dosa-dosa kam. ² ikam bolum lang ne, koe ikam lumpat nau umbang lang dnia ene, koe ikam gaya penguasa raja setan, yo ene roh tempo ndo sundok begawi mo ulun-ulun triau akal. ³ sebeta yo ba'i eka kain sumba itung diang dero, des kain bolum lang hawa nabsu daging ai ngaya pngkakan daging, diang pngenanam kain yo triau. sbeta yo kain ene ulun-ulun yo arus tnokai, ai sama kati dero yo mak.⁴Tapi Allah kaya diang sifat pngampun ke kosang Io mroa diang ruak ruawau, die Io epo taka. ⁵ Sundok nmbolum taka sama-sama diang Kristus, tontan taka sundok mate ke pnsala- pnsala taka -- ke kasih karunia ikam sinolamat - ⁶ ai Lang Kristus Yesus Io sundok mmesuli taka lou diang mie awa sama-sama diang io lang Sorga. ⁷ Apa di dilonatu Io nutui epo taka nau kekayaan kasih karunia Io yo ruak ruwau sengkono diang kbuen Io epo taka lang Kristus Yesus.⁸Ke kasih karunia ikam' sinolamat ke iman; ene makse asil usaha kam, tapi ene die Allah,⁹ene makse asil gawi gata kam: nang keo ulun yo nondek diri io se. ¹⁰ Ke taka endo tampa Allah, tnampa lang Kristus Yesus nte' nampa gawi buen, yo sinodia ke Allah des onon se ene, Io kakan, apa taka bolum lang ne. ¹¹Ene arus knop, des ba'i ikam'- kati ulun-ulun makse Yahudi ngaya nte daging, yo kati ulun-ulun belo katep koe dero' ngulek se diri yo "katep" yo ene katep yo gnawi makai kayang ulun, - ¹² Des jman ene ikam belo keo Kristus, belo sumba lang warga Israel diang belo kuli bagian lang ise-ise yo pnutus, belo keo nte kundong diang belo keo Allah lang dnia.¹³Tapi tempondo lang Tuhan Yesus ikam, yo bune " oro", tapi tempondo " dempet" keo daya kristus. ¹⁴koe Io ene damai sejahtera taka, yo sundok memekeraai duo pihak ai sundok ngeroros diding pnenggang, yo doko mangkotulan. ¹⁵koe diang mate-Io kati ulun Io sundok mkore hukum taurat diang eka prenta ai aturan Io, ente nampa keduoio jadi erai ulun bayu lang kompu-Io, ai diang ene memekeo damai sejahtera, ¹⁶ai nte ngendamai keduoio, lang erai kompu, diang Allah koe salib, diang ngmapos mangkotulan mbo salib ene.¹⁷Io ulet ai ngabar damai sejahtera epo ikam yo "oroh" ai damai sejahtera epo dero yo "dmpet" ¹⁸koe ngket Io taka duo pihak lang erai Roh kuli boyan sumba epo Bapa.¹⁹Koe ktine ikam makse oli ulun baling ai penyumba, tapi erai kumpulan ngket ulun-ulun kudus ai anggota-anggota keluarga Allah. ²⁰yo tinongkuat ombon dasar rasul-rasul ai nabi-nabi, diang Kristus Yesus nte batu penjuru. ²¹ai bangunan tumbu mbo lang Io, besusun buen, jadi bait Allah yo kudus, mbo lang Tuhan. ²²mbo lang Io ikam lou lumpat tinongkuat jadi awa penongos Allah, mbo lang Roh.

Chapter 3

¹Ene' doko tukun yo' aku' endo', Paulus,ulun yo' kono pinonjara' koe' karan Kristus Yesus nte' ngkam ulun-ulun yo' belo tau' se Allah²-beta ikam sundok kringo' nau' tugas ku' nte' ngnggawi kasih karunia Allah, yo' sundok dnie' epo' aku' koe' ikam,³yo' doko ktimbe' yo' melim ene' pinokelak epo' aku' diang wahyu', kati' yo' sundok tulis ku' la ombo diang idok.⁴Ena' ikam ngmbaca' yo', ikam kuli' tau' ngket ene', pntau' ku' se yo' melim mbo' Kristus ene',⁵ yo' des jman ulun-ulun bai bareh belo di pinotau' epo' pea'-pea' ulun, tapi' yo' tempo ndo' pinokelak mbo' lang Roh epo' rasul-rasul ai nabi'-nabi' yo' brse,⁶yo' doko ulun-ulun yo' makse Yahudi, koe' Kabar Injil, lumpat jadi nguwaris ai botis kayang kompu tonga' diang lumpat lang janji yo' dnie' lang Kristus Yesus.⁷ Ngket Injil ene' aku' sundok nte' jadi playan-iyo, kati yo' pndie' kasih karunia Allah, yo' dnie' epo' aku' sngkono diang pnggawi kuasa-Iyo'.⁸Epo' aku',yo' paling dikah mbo' ekang eka'-eka' ulun brese, sundok dnie' kasih karunia endo', nte' ngabar epo' ulun-ulun makse Yahudi pngkeo Kristus, yo' belo taro kira ene',⁹diang nte' mkelak ise' atok yo' tugas pnggawi yo' melim ene' yo' bjatus-jatus taun bkona' lang Allah, yo' nampa' eka'-ekax ene',¹⁰apa' tempo ndo' koe' jemaat pinotau' deo' jnnis hikmat Allah epo' pmerenta-pmerenta diang pnguasa-pnguasa mbo' sorga, sngkono diang ptua' kden,¹¹yo' sundok laku'-Iyo' lang Kristus Yesus, Tuhan taka'.¹²Lang Io taka kuli pngronu ai boyan sumba epo Alla diang bol persaya koe iman taka epo Io.¹³Koe ene aku tindu epo ikam, apa ikam nang tawai kito ke kito nau pmnasaku koe ikam, koe pmnasaku ene dko kmuliaan kam.¹⁴Ene dko aku nymbah epo Bapa,¹⁵Yo ngket Io eka-upus yo lang sorga ai ban dnia nrima karan yo.¹⁶Aku bdoa apa Io, kati pngkeo kmuliaan-Io, mmturon ai ntap ikam koe Roh-Io lang kesong kam,¹⁷Koe iman kam Kristus nongos lang kesong kam ai kwakat ai ktondal mbo lang kasih.¹⁸Aku bdoa, apa ikam sama-sama diang eka ulun brse ampa paham, bukan main ksae yo, kanjang yo, kombo yo ai klontop kasih Kristus,¹⁹ai kuli ngnal kasih ene, tontan io nglalo eka pngntau. Aku bdoa, apa ikam tinomponu diang Allah se.²⁰Nte Io se, io kuli nggawi yo pawak lngkat se kdeo doa diang kno taka, kati yo melak ngket kuasa yo bgawi lang taka,²¹nte Io se kmuliaan lang jmaat ai lang Kristus Yesus ampe upus umang dok dilo natu. Amin.

Chapter 4

¹Koe ene aku mie nasehat epo ikam, aku, ulun yo kono penjara koe leka Tuhan, apa penyembolum kam yo kati ulun-ulun yo sundok bnomba koe Tuhan, sengkono diang pmomba kam ene. ²Moko yo ikam ene bolum nang ngomb-ngombo belo kakan iwa se mak, sabar ai nang kois koroi. Pketi kam epo ulun kasih ene diang bako awat gawi erai-erai. ³Ai bkomer moko yo ikam apa nokon kerai Roh lang tungkus damai sjahtra :⁴erai kompu, erai Roh, kati umbang ikam sundok bnomba epo erai pngarapan yo batok lang pmomba kam ene, ⁵erai Tuhan, erai iman, erai baptisan, ⁶erai Allah ai Bapa ngket eka-eka, Allah yo belo keo ngombo se-Io, eka-eka ene lang kuasa-Io ba. ⁷Tapi epo taka masing-masing sundok dne kasih karunia' sngkono diang kroa die kristus. ⁸Ene moko kati yo keo sundok tnulis : "jman ene Io dombo epo ombo, Io moit tawanan-tawanan; Io mie die sokoi nte ulun-ulun-Io"⁹Belo be "Io sundok dombo" arti yo, se Io ene sundok diwa epo tadah dnia yo iwa tingen?. ¹⁰Io yo sundok diwa, Io low yo sundok dombo pawak ombo aso ngket eka-eka langit, nte nemponu eka-eka yo keo. ¹¹Io yo mie rasul-rasul ai nabi-nabi, ktine low pngabar-pngabar injil ai gmbala-gmbala diang guru-guru. ¹²nte nglngkap ulun-ulun kudus lang playanan, nte ngmbangun kompu Kristus, ¹³sampe taka eka-eka krapet kerai iman ai pntau yo kono soal Anak Allah. Bol ktuo, ai pnduan yo sngkono diang ksmputna kristus. ¹⁴Taka belo di pea alus oli, yo aya oyot belo otang lumpat nau umbang nte ulun, resi pngaruh nau nte ulun yo kakan nipu ngakal yo tau nte nampa sala tadah. ¹⁵Tapi diang miet skongkong epo yo beta lang kasih taka menduan lang eka-eka soal epo tadah Io, Kristus, yo nte Pengutok. ¹⁶Ngket-Io ene eka kompu, yo bsusun binonuen ai tnungkus jadi erai koe pelayanan, masing-masing bagian ene, sngkono diang nau umbang gawi gata tongku kongo, nerima penduan yo ai membangun diri-io lang kasih. ¹⁷Koe ene aku ngulek diang negas endo epo ikam lang Tuhan: Nang bolum oli sama kati ulun-ulun yo belo tau se Allah diang pngentau yo belo tadah¹⁸ Diang pngentau yo seom, oro ngket bolum bklompok diang Allah, koe kbungang yo keo mbo dero ai keo akal dadal yo keo mbo kesong dero. ¹⁹Pngenanam dero sundok ngalor, koe ene dero nyrah bolum dero epo pengkakan triaw ai mrangguh diang bemasam gawi gata remis.²⁰Tapi ikam belo di ktine. Ikam sundok blajar tau se Kritus. ²¹Koe ikam sundok kringo soal Io ai sundok nrima tutui batuk lang Io yo beta melak lang Yesus, ²²koe ene ikam, yo aso preket diang bolum kam aso ono, arus ngendikah nau bolum kam yo ono ene, yo tadah epo bnasa koe napsu yo ngrusak, ²³apa tinombayu lang roh ai pngenanam kam, ²⁴ai jadi ulun bayu, yo tnampa kati nau ptua Allah diang boyan yo sengkono ai kudus yo sbeta yo. ²⁵Koe ene noding eta, bsurah yo beta epo ulun mak, koe taka sama-sama anggota taka se. ²⁶Ena ikam mara, nang sampe nte nampa dosa: nang sampe lalo se olo tonop, pngmara kam ene ²⁷ai nang dne boyan nte iblis. ²⁸Ulun yo ngako, nang io ngako nua, alo yo bgawi diang moyoh diang nggawi yo buen diang kayang yo se, apa io kuli ngmbagi ise-ise nte ulun yo belo keo ise-ise. ²⁹Nang keo kesah triaw baling ngket bowa kam, tapi bsurah yo buen nte memeturon, ela mone perlu, apa dero yo kringo, kuli kasih karunia. ³⁰Ai nang ikam mnsiet kesong Roh Kudus Allah, yo sundok ngemetrai ikam nte nyambut olo kslamatan. ³¹Eka yo pait, briek, pngemara, ruok, ai ptenah ene arus noding ket ikam, ene low diang eka-eka hal yo dat. ³²Tapi ikam arus bako buen diang erai-erai, bako sayang ai bako ampun, kati Allah lang Kritus yo ngampun ikam.

Chapter 5

¹Koe' ene' arus jadi pnurut-pnurut Allah, kati' pea'-pea' snayang, ²diang arus bolum lang kasih, kati' Yesus low sundok sayang epo' ikam ai sundok nyrah kompu tonga'-Iyo' nte' taka' jadi pndie' diang korban yo' buen kewo nte' Allah. ³Tapi' pokeng koreng diang bmasam nau' rmis panan mrangguh ndok ngulek ikam belo kate, kati' yo' pantas nte' ulun-ulun kudus. ⁴Ktine' low pmnsara' triaw,yo' osaw diang smbarang - koe' yo' ktine' belo pantas - tapi' sbalik yo' bowa' ene' bsukur. ⁵Jadi endo' nang memang knewot : belo keo ulun pokeng koreng, ulun rmis panan mrangguh, arti yo' nymbah brhala yo' kuli bagian mbo' lang Krajaan Kristus diang Allah. ⁶Nang ikam ptang ulun diang pmnsara-pmnsara osau, koe' yo' ktine' ene' mkulet mara Allah epo' ulun-ulun yo' dikah koe' dadal. ⁷Koe' ene' nang ikam btman diang dero'. ⁸Beta ko bune' ikam endo' bolum lang seom, tapi' tempo ndo' ikam pa' lang Tuhan. Koe' ene' ikam arus bolum kati' pea'-pea' pa', ⁹koe' pa' ene' kbua' suma yo' buen diang adil diang yo' kono, ¹⁰diang arus nuji ise' yo' sngkono mbo' Tuhan. ¹¹Nang lumpat gawi gata' lang seom yo' belo kbua' ise'-ise', tapi alo' binolai gawi gata ktine' ene'. ¹²Koe' ngulek tingen ise' yo' gawi dero' mbo' awa' yo' melim nte' ngmai' aut. ¹³Tapi eka' yo' sundok binolai ke' pa' ene' jadi melak, koe' eka' yo' melak ene pa'. ¹⁴Ene' doko yo' nulek: "Ruko aut, o ikam yo' turui diang nyuli ngket ekang ulun mate diang Kristus anta' ktarang ombon ikam". ¹⁵Koe ene, neti diang beta-beta ktimbe nau ikam bolum, nang kati nau ulun galu tapi kati nau ulun pintar, ¹⁶ai pnakai jman yo keo, koe olo-olo endo triau. ¹⁷Koe ene nang ikam bungang, tapi bkomer apa ikam tau pngkakan Tuhan. ¹⁸Ai nang ikam mauk koe anggur, koe anggur nampa pngnanam triau tapi apa ikam ponu diang Roh. ¹⁹ai bkesah epo sama-sama ikam se lang mazmur, Kidung puji-pujian, ai legu rohani. Slegu ai bdoya doya nte Tuhan diang bol-bol kesong. ²⁰Trus ka ngulek sukur koe eka-eka soal lang karan Tuhan taka Yesus Kristus epo Allah, Uma taka. ²¹ai nang ngombo-ngombo se ulun yo mak diang takut epo Kristus. ²²O bawe, patoh epo song kam kati epo Tuhan, ²³Koe song utok bawe sama kati Kristus utok jmaat. koe Iyo ene nylamat kompu. ²⁴Koe ene kati jmaat patoh epo Kristus, ktine lou bawe epo song eka-eka soal. ²⁵O bang song, knosang bawe kam kati Kristus yo sundok nngkosang jmaat ai sundok nyrah kompu-Io nte- jmaat ²⁶nte mmrse yo, sundok Io mui yo ai ngundus yo diang danum ai Firman, ²⁷Apa diang ktine Io mayak jmaat la onon Io diang solo, mba di dapei, ai krurut, yo sama kati ene, Tapi apa jmaat brse ai belo keo bila molon ²⁸Ktine lou bang song arus kosang epo bawe io se sama kati epo kompu io se: Ise yo kosang epo bawe io se, nngkosang kompu io se. ²⁹Ke belo pini keo ulun yo kekei se kompu io se, tapi ngurus yo ai ngasi yo, sama kati Kristus epo jmaat. ³⁰Koe taka endo botis kayang kompu-Io. ³¹Koe ene ulun song btenggang ngket Uma io ai Ine io, ai bkerai diang bawe io, apa dero duo ene jadi erai isi,erai daya. ³²Pngmelim endo olai, tapi yo kno ku ene kaitan Kristus diang jmaat. ³³Ktine lou, sngkono nte ngkam masing-masing gawi: nngkosang bawe kam kati kompu kam se ai bawe apa patoh epo song io se.

Chapter 6

¹O pea-pea, aya kam nteulun tuo kam lang Tuhan, koe arus ketine. ²Hormat epo ine uma kam-endo ptua yo penting, kati yo melak ngket janji endo: ³apa ikam bolum snang ai anjang umur kam mbo dnia. ⁴Ai ikam, bapa-bapa, nang nampa ngati mara lang kesong pea-pea kam, tapi bnatuk dero diang batuk tutui diang nsehat Tuhan. ⁵O batak-batak, patoh epo tuan kam yo mbo dnia diang takut ai ngriketik, ai diang buen kesong, sama kati nau ikam patoh epo Kristus, ⁶nang onon dero tingen nte memesenang kesong ulun, tapi kati nau hamba-hamba Kristus yo diang bol-bol kesong nggawi yo petua Allah, ⁷ai yo diang rela nggawi pelayanan yo katinau ulun-ulun yo nglayan Tuhan makse ulun. ⁸Ikam tau, se tongku ulun, buen batak, ene low ulun bebas, ena io sundok keo gawi yo buen, io anta nerima bales yo ngket Tuhan. ⁹Ai ikam tuan-tuan, gnawi ketine low epo dero ai nang ptako. Knop, koe Tuhan dero ai Tuhan kam keo ela sorga ai Io belo meti wae. ¹⁰Pnyundok yo, koe ka ikam turon mbo lang Tuhan, mbo lang penggalak kuasa Iyo. ¹¹Pnakai eka klengkapan senjata Allah, apa ikam kuli btahan nglawan akal triaw Iblis; ¹²Koe perjuangan taka makse nglawan daya diang isi, tapi nglawan pmerinta-pmerinta, nglawan pnguasa-pnguasa, nglawan pngulu-pngulu denia yo seom endo, nglawan roh-roh dat ela ombo. ¹³Koe ene nalek eka klengkapan senjata Allah, apa ikam kuli nglawan des olo yo dat ene ai tetap akat, sundok ikam nyundok eka-eka yo ene. ¹⁴Jadi akat tngkorong, bnolit towing diang kono ai makai baju waja adil, ¹⁵botis pakai trumpak rela ente nyampe Injil damai sejahtera; ¹⁶lang eka nau umbang pnakai pnangkis iman, koe diang pnangkis ene ikam anta kuli marom brarau api engket setan, ¹⁷ai tinorima topi waja selamat diang mendau Roh, yo doko fiman Allah, ¹⁸lang eka-eka doa ai pnindu. bdoa trus lang Roh ai bjaga-bjaga lang doa kam ene diang pnindu belo brenti ente eka-eka ulun Kudus, ¹⁹ente oki lou, apa aku, ena aku ngingkang bowaku, dne pyurah yo beta, apa diang pngronu aku nyampe pngemelim Injil, ²⁰koe Injil ene aku jadi yo snuyu yo tempondo lang penjara, bdoa apa diang pngronu aku mekelak iyo, kati yo skono nte oki kesah. ²¹apa ikam lou tau nau umbang ku, jadi tikhikus, eraibuntung taka yo snayang ai playanan yo stia lang Tuhan, anta memetau eka-eka ene epo ikam, ²²diang ptua endo doko io suyu ku epo ikam, apa ikam tau nau umbang kain ai apa io nyempae kesong kam. ²³Damai sejahtera ai kasih diang iman ngket Allah, Bapa ai ngket Tuhan Yesus Kristus diang eka-eka eraibuntung. ²⁴Kasih karunia diang eka-eka ulun, yo nkosang Tuhan taka Yesus Kristus diang kasih yo belo anta brinti.

Philippians

Chapter 1

¹Ngket Paulus ai Timotius, batak-batak Kristus Yesus, epo eka ulun kudus lang Kristus Yesus mbo Filipi, diang pngutok-pngutok jmaat ai playan jmaat. ²Kasih karunia ai damai sejahtera ngket Allah, Bapa taka, ai ngket Tuhan Yesus Kristus diang ikam. ³Aku ngulek syukur epo Allahku tongku derang aku knop se ikam. ⁴Ai tongku derang aku bdoa nte ngkam eka-eka, aku dor bdoa diang ego. ⁵Aku ngulek syukur epo Allahku koe pmekat kam lang Kabar Injil mulai ngket olo tla sampe tempo ndo. ⁶Nte nau umbang endo aku percaya beta, yo ene Io, yo nyemula gawi yo buen mbo ekang ikam, anta nlaju yo sampe des penyundok yo des olo Kristus Yesus. ⁷Sundok sengkono memang aku bkenanam ketine se ikam eka-eka, koe ikam keo mbo lang kesong ku, koe ikam eka-eka lumpat kuli bagian lang kasih karunia yo dniye epo aku, ktine des jeman aku pinon jara, ktnie low des aku ngengket ai memeturon Kabar Injil. ⁸Koe Allah ene saksiku se aku beta-beta diang kasih mesra Kristus Yesus ngeno ikam eka-eka. ⁹Ai endo doko doa ku, mudahan kosang kam tambah roa lang pentau yo kono ai lang tau ba otang, ¹⁰diang ktine ikam kuli mili ise yo buen, apa ikam brse ai belo keo bila molon ndok sampe olo Kristus, ¹¹bolum kam bol-bol diang gawi gata yo buen beta yo gnawi koe Yesus Kristus se nte ngmulia ai nte muji Allah. ¹²Ptuaku, erai buntung-erai buntung, apa ikam tau, se ise yo tkono mitek aku ene mokin ube nte nampa kmajuan Injil, ¹³diang ktine sundok tnoan beta nte pupus istana ai eka-eka ulun yo mak, se aku pinon jara koe Kristus. ¹⁴Ai deo ube erai buntung-erai buntung lang Tuhan sundok jadi persaya koe aku pinon jara nte nambah ronu dero bekesah soal Firman Allah diang belo takut. ¹⁵Keo ulun yo ngabar Kristus koe kanam kuwo ai kakan ruok rame, tapi keo low yo ngabar-Iyo diang petua buen. ¹⁶Dero ene ngabar Kristus koe kosang Kristus, koe dero tau, se aku keo mbo mendo nte ngengket Injil, ¹⁷tapi yo mak koe ngnuon nte dero se ai diang akal dat, otus dero diang ketine dero mokin msesa kanamku lang penjara. ¹⁸Tapi belo moko mbe, koe tontan ko ktimbe ka nau yo, Kristus pinokabar, buen ko diang ptua plesu buen ko diang jujur. Nau umbang ene aku ego. Ai aku dor ego, ¹⁹koe aku tau, se penyundok eka yo endo yo ene keselamatku koe doa kam ai awat Roh Yesus Kristus. ²⁰Koe yo beta-beta kno ku ai kundongku yo ene se aku lang eka-eka nau umbang belo anta di kinomai, tapi katinau ngket temba, ktine low tempondo, Kristus tinonoan se kinomulia mbo lang kompuku, buen koe bolumku, ktine low koe mate ku. ²¹Koe nte oki bolum ene

doko Kristus ai mate ene yo doko keo untung nte oki.²²Tapi ena aku arus bolum mbo dnia endo, ene rti yo nte oki begawi nte miye asil. Jadi ise yo nte oki pili,aku belo tau.²³ Aku bjeleh ngket bika-bika:aku kakan brangkat ai nongos sama-sama diang Kristus-ene aso pawak buen;²⁴tapi aso pawak perlu nte nongos mbo dnia endo koe ikam.²⁵Lang kpersaya endo aku jadi tau: aku anta nongos ai anta sama-sama aso diang ikam eka-eka apa ikam tambah maju ai ego lang iman,²⁶ diang ktine pngego kam lang Kristus Yesus mokin ketambah koe aku, ena des aku ulet nua epo ikam.²⁷Suma, apa bolum kam baro umbang nau kati Injil Kristus, apa, ena aku ulet aku kito, ai ena aku belo di ulet aku kringo, se ikam turon akat lang erai roh, ai kerai pengenanam bekomer diang poruk pgel nte iman yo nyoret ngket Kabar Injil,²⁸Diang ndok belo idik-idik takut nte bali kam ptako.Nte dero eka-eka yo ene doko tanda nte moit mate,tapi nte ngkam tanda slamat,ai ene pengulet yo ngket Allah.²⁹Koe epo ikam dnie mba di persaya tingen epo Kristus, makse ko low nte kiso kanam bnasa nte-Iyo.³⁰Ksesa yo desung kono ikam sama kati pmenasa ku bune itan kam, ikam se kringo se aku sesa ndok tempo ndo.

Chapter 2

¹Jadi koe lang Kristus keo nasehat, keo penyempae diang kosang, keo pemekat lang Roh, keo bako kosang ai pengenanam kosang.²Koe ene tampa kam ndok bol-bol ta pengego diang endo : mokoioy ikam erai kasig erai akal, lang erai pengenanam, erai kesong, erai tadah,³diang belo nungka ngenun nte io se ena belo naket tondek ulun yo belo nan jodo. Mokin ube mokoioy diang pengenanam yo solo ngontus yo mak aso nuon se io se; ⁴ai nang ka tongku ulun pulun ngenun nte io se, tapi ngenun nte ulun yo mak low.⁵Mokoioy ikam lang bolumkam sama-sama, makai akal ai kno yo keo lou lang Kristus Yesus,⁶tontan ko diang kati nau Allah, belo di beseungka-ungka kesama-Iyo diang Allah ene jadi pekeo-Iyo yo arus dor tenenteng,⁷makse ko sundok mekosaw kompu-Iyo se, ai memenau kati ulun batak, ai jadi sama diang ulun.⁸Ai kati umbang nau ulun, Io sundok mekiwa Io se ai patoh sampe mate, lengkat se ene sampe mate mbo kayu salib.⁹Koe ene ka doko Allah mekombo Io beta-beta ai miye epo-Iyo pemomba yo ombo se eka pemomba,¹⁰apa lang karan Yesus jadi eka yo keo mbo langit ai yo keo mbo ombon denia ai yo keo mbo iwat denia nyembah-Iyo.¹¹ai eka bowa ngangkan: "Yesus Kristus yoene Tuhan," nte kemulia Allah, Bapa!¹²O erai buntung-erai buntungku yo kenosang, ikam dor patoh, koe ene nokon ta gnawi keselamat kam diang beta-beta takut, belo ka di leka des jman aku nokon keo, tapi mokin ube tmpo ndo montuk aku belo keo.¹³Koe Allah se yo nggawi mbo lang ikam diang pengkakan ai gawi gata montuk lang petua-Iyo se.¹⁴Gnawi ta eka ise masam diang belo ngerembnu ai belo bako tangki.¹⁵Apa ikam belo keo sala ai berse, kati pea-pea Allah yo belo bila molon mbo tenga-tenga pokaan yo belengkong kesongiyo ai yo tang endo, koe ene ikam kewala mbo ekang dero kati bintang-bintang mbo denia.¹⁶Ulak sekongkong mbo firman yo nembolum, apa aku keo nte tondek mbo olo Kristus, se aku belo di persuma belomba ai belo di persuma poruk pgl.¹⁷Tapi tontan ko dayaku tinorintin mbo korban ai ibadah imankam, aku ego beta ai aku ego beta diang ikam eka-eka.¹⁸ai ikam low arus ego beta ktine low ai ego beta ka diang aku.¹⁹Tapi lang Tuhan Yesus aku kakan resi nyemuyu Timotius epo awakam, apa ron low kesongku koe tau kabar nau umbang ikam.²⁰Koe belo keo ulun diang aku, yo juyang kesong ai juyang akal diang aku ai yo beta-beta meti meto yo perlu nte kam; ²¹koe eka dero meto yo perlu nte dero se, makse yo penting Kristus Yesus.²²Ikam tau se kesetiaioy sundok dapet soba ai se io sundok ngawat aku lang ngelayan Injil sama kati pea ngawat bapaiyo.²³Io doko yo kundong ku nte oki suyu resi, des sundok jelas mbo aku ktimbe tadah plikaraku ene; ²⁴tapi lang Tuhan aku persaya, se aku se low anta resi ulet.²⁵Juyang diang ene san ku perlu nyemuyu Epafroditus epo ikam, yoene erai buntungku ai teman erai gawi ai teman bejuangku, yo suyu kam nte ngelayan aku lang keperluanku.²⁶koe io ngeno beta se ikam eka-eka ai nyoru low kesongiyo, koe ikam kringo se io kroton²⁷ memang beta io kroton ai alang mate, tapi Allah nengkosang io, ai mbadi pulun io tingin, makse ko aku low, apa kanam dat mbo aku nang ketambah.²⁸Koe ene doko aku srek nyemuyu io, apa ena ikam kito io, ikam jadi ego low ai mapan kanam datku.²⁹jadi trima ka io lang Tuhan diang eka pengego ai kinonun ka ulun-ulun kati io³⁰Koe tukun gawi nte Kristus io alang mate ai io nyaung kesongiyo nte meti meto ise yo kurang lang pelayan kam epo aku.

Chapter 3

¹Pyundokiyo, erai buntung- erai buntung ku ego ka lang Tuhan. nulis nau umbang endo nua epo ikam belo di boyat nte oki ai mtau se ikam pasti slamat. ²ati-ati epo koko-koko, ati-ati epo pemenggawi-pemenggawi yo triaw, ati-ati lou epo pngatep-pngatep yo plsu. ³Koe taka doko ulun-ulun bkatep yo ibadah koe Roh Allah, ai nondek lang Kristus Yesus ai belo mayak persaya mbo nau umbang yo melak. ⁴Betako aku lou keo alasan nte mayak persaya epo nau umbang yo melak. ena keo san ulun yo mak kuli mayak persaya epo nau umbang yo melak, aso da-da aku: ⁵katep mbo olo ke walu, ngket bangsa israel, engket suku benyamin, ulun asli Ibrani, nau umbang pendirian epo aturan Taurat aku ulun farisi, ⁶nau umbang gawi gata aku pngurow pngesa jemaat, nau umbang peyembeta lang taat aturan Taurat aku belo di bila molon. ⁷Tapi ise yo bune keo asil nte oki, tempondo san ku rugi koe Kristus. ⁸Mokin ube eka ise masam san ku rugi, koe tau se Yesus Kristus, Tuhanku, mulia ube se eka-eka ene.koe Io doko aku sundok ngeloli eka-eka ene ai ene sanku juras, apa aku kuli Kristus, ⁹ ai keo lang Io makse ding kebata ku se koe patoh epo aturan Taurat, tapi diang peyembeta koe persaya epo Kristus, yo ene peyembeta yo die Allah koe persaya. ¹⁰Yo pengkakanku yodoko tau se Io ai kuasa pengeyuli Io ai kumpulan lang kebnasa Io, la mone aku jadi kerai nau diang Io mbo lang pengemate-Io, ¹¹apa aku pnyundokiyo kuli pengenyuli engket ekang ulun mate.¹²Mba di ungka-ungka aku sundok kuli nau umbang ene ai sundok sempurna, tapi aku ngendasuiyo, ai bahe-bahe aku kuli nangopiyo, koe aku lou sundok tangop Kristus Yesus. ¹³Erai buntung- erai buntung, aku se lou belo di ngomoi, se aku sundok nangopiyo, tapi endo yo gawiku: aku mba di nyanda ise yo sundok kinolalo ai nadah aku se epo ise yo la onon ku, ¹⁴ai tkroru epo tadah nte kuli adiah, iyo doko bomba sorga engket Allah lang Kristus Yesus. ¹⁵Koe ene dido ka taka, yo sempurna, bpikir ktine. ai ena mak se lang kno kam, nau di erai nau umbang, nau umbang ene anta pkelak Allah low epo ikam. ¹⁶Tapi buen ka kekombo pengentau yo sundok kuli taka ntrus ka taka aso kati boyan yo sundok dalan taka.¹⁷Erai buntung- erai buntung, sarak ka sontoh ku ai eti beta-beta dero, yo bolum sama kati kain yo jadi sontoh nte kam. ¹⁸Koe kati yo sundok jono ulek ku epo ikam, ai yo pkelak ku lou tempodo ulak nangis, deo ulun yo bolum jadi bali salib Kristus. ¹⁹Penyundok dero yo doko mate, Tuhan dero yo doko buntung dero, kemulia dero yo doko ketriaw dero, kno dero pulun epo urusan dnia endo . ²⁰Keo taka endo ulun sorga, ai ngket mne lou taka minte Tuhan Yesus Kristus nte juruslamat, ²¹yo anta ngensut kompu tonga taka yo gramas endo, ai ngensut kati nau kompu tonga-Iyo yo mulia, kati kuasa-Iyo yo kuli mkalah ise masam epo Io se.

Chapter 4

¹Koe ene, erai buntung-erai buntung yo tengkosang ku ai yo keno ku, pengego ku ai mahkota ku, akat ko lou diang turon lang Tuhan, o erai buntung-erai buntungku yo knosang! ²Euodia nasehatku ai Sintikhe nasehatku, apa kerai kesong kerai keno lang Tuhan. ³Lengkat se ene, tinduku epo iko lou, Sunsugos temanku yo setia: nawat ko dero. Koe dero sundok bejuang diang aku nte ngesah injil ngket Allah, sama-sama diang Klemens ai teman-temanku yo kerai gawi yo mak, yo karan-karan iyo sundok snatat lang kitab kehidupan. ⁴Ego ka dor lang Tuhan! Sindai nua aku ngulek: Ego ka! ⁵Moko io kebuen kesong kam tinonoan eka-eka ulun. Tuhan duni ulet. ⁶Nangka moko iyo ikam water nau umbang ise-ise lou, tapi pinokelakka lang eka-eka umbang pengkakan kam epo Allah lang doa ai penindu diang ngulek syukur. ⁷Damai sejahtera Allah, yo lengkat se eka akal, anta ngasi ngado ai pengenanam kam lang Kristus Yesus. ⁸Penyundok iyo, erai buntung-erai buntung, eka-eka yo kono, eka-eka yo mulia, eka-eka yo adil, eka-eka yo susi, eka-eka yo mamis, eka-eka yo buen nte tmpaning, eka-eka yo nulek gawi gata buen ai sngkono nte puji, kinonanamka eka-eka ene. ⁹Ai ise yo sundok guru kam ai ise yo sungok trima kam, ai ise yo sundok tmpaning kam ai ise yo sundok itan kam mbo aku, nlaku ka ktine. Jadi Allah pngulet damai sejahtera anta lumpat diang ikam. ¹⁰Aku ego beta lang Tuhan, se pnyundok iyo akal kam ai pngenanam kam mnduan nua nte oki. Memang dor keo penjni kam, tapi ikam belo keo pnyempat. ¹¹Pmensara ku endo belo di leka koe kurang kambit, koe aku sundok nyentepet nempuli bolum lang eka nau umbang. ¹²Aku tau ise ene ngamit-ngamit ai aku tau ise ene sempak saw. Lang eka-eka umbang ai lang eka-eka plikara yo belo keo ise masam yo melim ente oki; buen des boting, ktine lou des slau, buen mbo ruak ruaw ktine lou lang kurang kambit. ¹³Eka-eka urusan dapet tanggungku mbo lang Io yo mie pngelian nte oki. ¹⁴Tapi ikam sundok ngawat aku mbo lang kbenasaku, ai ise yo gawi kam ene buen. ¹⁵Ikam se tau lou, o ulun-ulun Filipi; des aku bayu nindu nyampe Injil, des aku berangkat ngket Makedonia, ndok belo erai jmaat yo ngreken utang anduk makse ko ikam bute. ¹⁶Koe mbo Tesalonika lou ikam sundok erai duo derang ngirim bantuan epo aku. ¹⁷Tapi yo pkolaiku makse ko bie sokoi ene, tapi bua iyo, yo tambah mmekolai asil nte kam. ¹⁸Tmpondo aku sundok nrima eka-eka yo pnerlu ngket ikam, mokin lengkat ube se ene. Aku ruak ruaw, koe aku sundok nrima kiriman kam ngket Epafroditus, ise masam persembahan yo buen kewo, ise masam persembahan yo gnawal ai yo sngkono epo Allah. ¹⁹Allah yo sembahku, yo ruak ruaw diang ktataw lang Kristus Yesus, anta mmekeo eka-eka keperlukanam. ²⁰Kinomuliaka Allah ai Bapa taka ndok turai-turai! Amin. ²¹Snampe ta salamku epo tongku-tongku ulun kudus lang Kristus Yesus. Salam epo ikam ngket erai buntung-erai buntung, yo sama-sama diang aku. ²²Salam epo ikam ngket eka-eka ulun kudus, toko iyo ngket dero yo mbo istana Kaisar. ²³Kasih karunia Tuhan Yesus Kristus sama-sama diang roh kam!

Colossians

Chapter 1

¹Ngket Paulus, rasul Kristus Yesus, koe ptua Allah, ai Timotius eraibuntung taka, ²epo eraibuntung-eraibuntung yo kudus ai yo persaya lang Kristus mbo Kolose. Kasih karunia ai damai sejahtera ngket Allah, Bapa taka, dor diang ikam. ³Kain dor ngmokas sukur epo Allah, Bapa Tuhan taka Yesus Kristus, tongku kain bdoa nte ngkam, ⁴koe kain sundok kringo nau iman kam lang Kristus Yesus ai nau pngkosang kam epo eka ulun kudus, ⁵koe keo yo knundong, yo sinodia nte ngkam mbo sorga. Nau umbang yo knundong ene sundok ngket tla ikam kringo lang firman yo kono, yo doko Injil, ⁶yo sundok sampe se ikam. Injil ene kbua ai mnduan mbo pupus dnia, ktine low mbo ikam mulai ngket des ikam kringo-iyu ai tau se kasih karunia Allah yo beta-beta-iyu. ⁷Eka ene sundok ikam tau ngket Epafra, tman playan yo tngkosang kain, yo nte ngkam io ene playan Kristus yo stia. ⁸Io low doko yo sundok ngurai nau kosang kam epo kain lang Roh. ⁹Koe ene ngket des kain kringo ene, belo keo sdang-sdang kain bdoa nte ngkam. Kain tindu, apa ikam nrima eka hikmat diang pngertian yo kono, nte tau ptua Tuhan diang smpurna, ¹⁰sampe bolum kam pantas onon-iyu ai sngkono epo-iyu lang eka nau umbang, ai ikam kbua lang eka gawi yo buen ai mnduan lang pntau yo kono nau umbang Allah, ¹¹ai pinoturon diang eka kturon koe kuasa yo mulia ngket-iyu nte nantai eka-eka ene diang tahan ai doloh, ¹²ai ngulek sukur diang pngnanam ego epo Bapa, yo mkate ikam nte kuli bagi lang ise yo pinotoko nte ulun-ulun kudus lang krajaan trang. ¹³Io sundok nglopos taka ngket kuasa seom ai ngensut taka epo lang Krajaan Pea-iyu yo knosang, ¹⁴mbo lang Io taka kuli pnous taka, apa nampun dosa. ¹⁵Io ene gambar Allah yo belo di melak, yo ono tingen, paling nuon ngket eka yo tnampa, ¹⁶koe mbo lang Io doko sundok tnampa eka-eka ene, yo keo mbo sorga ai yo keo mbo dnia endo, yo melak ai yo melim, kati awa raja, panan krajaan, kati pmrenta, panan yo keo kuasa; eka-eka ene tnampa koe Io ai nte Io. ¹⁷Io keo paling ono se eka-eka ene ai eka-eka ene keo mbo lang Io. ¹⁸Io ene utok ngket kompu, yo doko jemaat. Io doko yo ono

tingen, yo tla nyuli ngket ekang ulun mate, koe ene Io yo nuon tingen se eka ise masam.¹⁹Koe eka kponu Allah kate nongos lang Io,²⁰ ai koe Io ene doko Io mdamai eka-eka ene diang Io se, buen ko yo keo mbo dnia endo, ndok yo keo mbo sorga, sundok Io mkeo damai koe daya salib Kristus.²¹Ktine low ikam yo bai bolum oro ngket Allah ai yo ngmbali-Iyo lang kesong ai pngnanam kati yo melak ngket gawi gata kam yo triaw,²²tempo ndo pdamai-Iyo, lang kompu yo tau mate ngket Kristus koe pngmate-Iyo, nte mayak ikam kudus ai belo keo sala ai belo keo bila molon mbo onon-Iyo.²³Koe ene ikam arus moyoh beta lang iman, nokon turon ai belo di skukui, ai nang kakan knensor ngket yo knundong lang Injil, yo sundok dingo kam ai yo sundok snampe mbo mupus dnia mbo iwat langit, ai yo aku endo, Paulus, sundok jadi pelayan-iyu.²⁴Tempo ndo aku ego koe aku kate ssa nte ngkam, ai mgnap lang isi upak ku ise yo aso tuno se kssa Kristus, nte kompu-Iyo, yo doko jemaat.²⁵Aku sundok jadi pelayan jemaat ene sngkono diang tugas yo tape Allah epo aku nte nlaju firman-Iyo diang bol-bol mbo nau umbang-iyu epo ikam,²⁶yo doko nau umbang yo melim ngket bjatus taun epo bjatus taun ai ngket upus epo upus, tapi yo tempo ndo pinokelak epo ulun-ulun kudus-Iyo.²⁷Epo dero Allah kakan mmtau, bukan main ktatau ai kmulia-iyu yo melim ene mbo bangsa-bangsa yo mak, yo doko: Kristus keo ela ekang ikam, Kristus ene doko knundong nte jadi mulia.²⁸Io ene doko yo sampe kain, ena tongku-tongku ulun nasehat kain ai tongku-tongku ulun yo tutui batuk kain lang eka-eka hikmat, nte ngayak tongku-tongku kongo ulun epo yo smpurna lang Kristus.²⁹Ene ka doko yo komer-ku ai tungka-ku diang eka pnglian sngkono diang kuasa-Iyo, yo bgawi diang kois mbo lang aku.

Chapter 2

¹Koe aku kakan, apa ikam tau, msiken bgawi nte ngawat ikam, ai nte dero yo mbo Laodikia ai nte eka-eka dero, yo belo pian tau se aku, ²apa kesong dero bsampae ai dero kerai sama-sama lang kasih, sampe dero kuli eka ktataw ai kpersaya diang ngerti, ai tau se yo melim mbo Allah, yo ene Kristus, ³koe mbo lang Io doko bkona eka pengkeo hikmat ai pentau. ⁴Nau umbang endo ulek ku, apa nang keo yo ngakal ikam diang pmensara-pmensara yo buen otang. ⁵Koe beta ko aku se belo di keo mbo ekang ikam, tapi lang roh aku sama-sama diang ikam ai aku kito diang ego kteratur bolum kam ai kturon iman kam lang Kristus. ⁶Ikam sundok nrima Kristus Yesus, Tuhan taka. Koe ene mokoioyo bolum kam dor lang Io. ⁷Moko iyo ikam kwakat mbo lang Io ai tinongkuat mbo ombon Io, mokoioyo ikam tambah turon lang iman yo sundok bnatuk epo ikam, ai mokoioyo kesong kam mroa ogot ding sukur. ⁸Knop-knop beta, apa nang keo yo moit ikam diang tadah akal yo osaw ai plesu kati tutuy batuk tape koyang ngket bang tuo ai roh-roh dnia, tapi belo di ngaya nte Kristus. ⁹Koe lang Io doko nongos diang sara kompu dnia eka kponu Allah ene, ¹⁰ai ikam sundok tinomponu mbo lang Io. Io doko pngutok eka pmerenta ai yo keo kuasa. ¹¹Lang io ikam sundok knatep, mba di diang katep yo gnawi koe ulun, tapi diang katep Kristus, yo diang sara ngloas kompuiyo yo bdosa, ¹²koe diang Io ikam nlowong lang baptisan, ai mbo lang Io ikam lumpat pinosuli low koe kpersaya kam epo gawi kuasa Allah, yo sundok msuli Io ngket ulun mate. ¹⁴¹³Ikam low, tontan ko bune mate koe pensala kam ai koe belo di knatep diang sara dnia, sundok tinombolum koe Allah sama-sama diang Io, sundok Io ngampun eka pensala taka, ¹⁴diang mkore surat utang, aturan-aturan nundruh ai ngontam taka. Ai ene tembelo-Iyo diang netep maku ene mbo kayu salib: ¹⁵Io sundok mrebit ngket pmerenta-pmerenta ai yo keo kuasa ai nampa dero nte ulun eti lang kekuret-Iyo se dero. ¹⁶Koe ene nang ka ikam belo nyanda ena ulun ngukum ikam nau umbang okan singkap ai umbang olo raya, bulan bayu ktine low olo Sabat; ¹⁷eka endo amba yo tingen ngket yo arus ulet, pdahal nau yo beta yo doko Kristus. ¹⁸Nang ka ikam belo nyanda pengkuret kam pinokore koe ulun yo ungka-ungka kno buen ai sembayang epo mlekat, btondek diang pengkito ai mba di keo alasan nte mkolai yo se koe pngenanam yo aso sara dnia, ¹⁹pdahal io mba di turon skongkon epo Utok, ngket mone mupus kompu tonga, yo btokon ai bebolit jadi erai koe uyat-uyat ai bruku-bruku tulang, nrima pentuan sifat Allahiyo. ²⁰Ena des ikam mate sama-sama diang Kristus ai lopus ngket roh-roh dnia, ise moko ikam noko ngaya epo bmasam aturan, ungka-ungka ikam aso bolum mbo dnia: ²¹nang mulem endo, nang snoba endo, nang tnengkil endo; ²²eka-eka ene pulun nau kakas yo tau rusak nte pakai ai pulun kati ptua-ptua ai tutuy batuk ulun tingen. ²³Aturan-aturan endo, beta ko nau yo roa diang hikmat diang bsembayang tanpa yo se, kati ungka kesong buen, ngurow kompu tonga, mba di keo jodo iyo makse nte nempuas bolum dnia endo.

Chapter 3

¹Koe ene, ena iko pinosuli sama-sama diang Kristus, neto plikara yo ela ombo, ela mone Kristus keo, tunge ela bika sanan Allah. ²Pnikir plikara yo ela ombo, makse yo mbo dnia. ³Koe iko sundok mate ai bolum ko kinomelim sama-sama diang Kristus mbo lang Allah. ⁴Ena Kristus,yo doko bolum taka, mkelak kompu anta, iko low anta memekelak kompu sama-sama diang Io lang kmulia. ⁵Koe ene pnate lang kompu tonga kam ise masam yo belo buen, yo ene pokeng, lonsa, pengkakan triau, pengkakan yo dat ai low ugoh, yo sama diang kati soyong simong epo korik kotok, ⁶eka yo ene memekulet mara roa Allah (mitek ulun-ulun tuju nglawan). ⁷Des ono ikam low nggawi nau umbang ene des ikam bolum mbo lang iyo. ⁸Tapi tempondo, noding eka-eka yo endo, yo ene mara, rusi, briek, ptenah ai kesah-kesah rmis yo baling ngket bowa kam. ⁹Nang oli ikam bako nampa eta, koe ikam sundok ngendikah bolum yo ono diang gawi gataiyo, ¹⁰ai sundok makai bolum bayu yo dor tinombayu nte kuli pentau yo beta ngaya gambar Allah; ¹¹lang soal endo belo keo oli ulun Yunani ena belo ulun Yahudi, ulun knatep ena belo ulun belo di knatep, ulun Barbar ena belo ulun Skit, batak ena belo ulun bebas, tapi Kristus doko eka-eka mbo lang ise-ise yo ene. ¹²Koe ene,jadi ulun-ulun pnili koe Allah yo knudus ai tengkosang koe-Iyo, pnakai kanam kosang, ksawai, mba di ngombo-ngombo, lami lamai ai doloh. ¹³Doloh ka epo sama-sama ikam se, ai bako maaf epo sama-sama ikam se ena keo erai kongo mentulan epo erai-erai, sama kati Tuhan sundok ngemaap ikam, gawi kam ka ketine low. ¹⁴Ai ombon eka-eka ene:pnakai kosang, nte molit memekeraai ai nte ngulohiyo. ¹⁵Moko yo damai sejahtera Kristus mrenta lang kesong kam, koe nte ene ka doko ikam sundok benomba jadi erai kompu. Ai bsukur ka. ¹⁶Moko yo pemensara Kristus nongos diang eka-eka pengkeo iyo mbo ikam, sampe ikam diang eka-eka hikmat nutui matuk ai ngae epo sama-sama ikam se ai diang slegu mazmur,ai puji-pujian ai lagu rohani, ikam ngulek syukur epo Allah mbo lang kesong kam. ¹⁷Ai eka-eka yo ene yo tnampa ke kam diang kesah surah ena belo gawi gata, gnawi ka eka-eka yo ene lang karan Tuhan Yesus, ulak ngulek syukur koe Io epo Allah, Bapa taka. ¹⁸O bang bawe, patoh epo song kam, ketine moko lang Tuhan. ¹⁹O bang song, knosang bawe kam nang nglaku prenges epo io. ²⁰O bang pea patoh epo ulun tuo kam lang eka-eka ise masam, koe ene dokomyo buen mbo lang Tuhan. ²¹O bapa-bapa, nang mesiet kesong pea kam, apa nang tawai kesong iyo. ²²O'batak-batak, patoh ta epo tuan kam lang dnia endo lang eka-eka ise masam, nang pulun mbo onon dero bute nte mekego dero, tapi diang rela kesong koe takut epo Tuhan. ²³Ise ka lelu gawi kam, gawi ka diang bol kesong kam kati nte Tuhan ai makse nte ulun. ²⁴Ikam tau, se ngket Tuhan ikam anta kuli bagian yo tnetap nte kam jadi upa. Kristus ene tuan ai ikam batak-Iyo. ²⁵Ise-ise yo nampa salah, io anta nanggung pensala yo ene, koe Tuhan belo mili ulun.

Chapter 40 tuan-tuan, ngnjoun ka yo adel ai yo jujur epo batak kam; knop ka, ikam low keo tuan mbo sorga.

²Butal ka bdoa ai lang ne low bjaga-jaga ka ulak ngulek syukur. ³Bdoa low ka nte kain, apa Allah ngingkang jawong nte kain nyampe Injil, apa kain kuli brsara nau umbang kemelim Kristus, koeiyo ene aku nukum. ⁴Diang ktine aku kuli mekelak, se ktine memang nau umbangiyo. ⁵Bolum ka diang roa hikmat epo ulun-ulun belo persaya, pnakai beta-beta jman yo keo. ⁶Mokoiyo kesah surah kam dor keo kasih, nang tawai, jadi ikam tau, ktimbe ikam arus nuing pengunti-pengunti tongku ulun. ⁷Eka-eka nau umbangku anta pinotau epo ikam koe Tikhikus, erai buntung taka yo knosang, pelayan yo stia ai teman pelayan lang Tuhan. ⁸Io suyuku epo ikam diang petua, apa ikam tau nau umbang kain ai apa io nyempae kesong kam. ⁹Io yo suyuku sama-sama diang Onesimus, erai buntung taka yo stia ai yo knosang, yo erai kongo ngket ikam. Dero anta mmetau epo ikam ise masam yo tekono mbo mendo. ¹⁰Salam epo ikam ngket Aristarkus, temanku kerai sper ai ngket Markus, pengakon Barnabas - nau umbang io ikam sundok nrima kabar; trima ka io, ena io ulet epo ikam - ¹¹ai ngket Yesus, yo tinompapa Yustus. Pulun tolu kongo endo ngket dero yo bekatep yo jadi temanku kerai gawi nte Kerajaan Allah; dero ene sundok jadi pnyempae nte oki. ¹²Salam ngket Epafraas epo ikam; io ene erai kongo ngket ikam, pelayan Kristus Yesus, yo dor bkomer beta-beta lang doaiyo nte ngkam, apa ikam akat turon, kati ulun-ulun yo sundok tuo ai bol persaya diang eka ise masam nau umbang yo pengkakan Allah. ¹³Koe aku kuli nyampe pengesah nau umbang io, se io bol poruk pgel koe nte ngkam ai nte dero yo mbo Laodikia ai Hierapolis. ¹⁴Salam epo ikam ngket pengawat Lukas yo knosang ai ngket Demas. ¹⁵Senampe salam kain epo erai buntung - era buntung mbo Laodikia; ktine low epo Nimfa ai jmaat yo keo mbo louiyo. ¹⁶Ai ena surat endo sundok benaca epo ikam, knomer low ta apa benaca low mbo jmaat Laodikia ai apa surat yo nte Laodikia bnaca low epo ikam. ¹⁷Ai snampe ta epo Arkhipus: eti ta buen-buen, apa pelayanan yo trima kam lang Tuhan gawi kam diang beta-beta. Salam ngket aku, Paulus. Salam endo tulisku se. Knop-knop ikam se aku, awat doa kam aku endo aso lang sper. Kasih karunia dor diang ikam.

1 Thessalonians

Chapter 1

¹Ngket Paulus, Silwanus diang Timotius mitek jemaat ulun Tesalonika yo lang Alla Bapa ai lang Tuan Yesus Kristus. Damai sejahtera mitek ikam lane²Kain dor bsukur epo Alla koe ikam eka-eka, ai ngontus ikam lang doa' kain. ³Dor kain ngeno' se ikam guruganta nte iman epo tuhan taka Yesus Kristus la onon Alla ai Bapa' taka⁴Ikam eka-eka yo kenosang koe Alla, kain tau se Io sundok mili' ikam. ⁵Koe Injil yo snampe epo ikam belo di senampe lau'-lau' diang penyurah tinggen, tapi low diang kuasa ket roh kudus, yo ene nte meturon kain se penyampe kain epo ikam ene memang beta. ikam kito ka se kain ene bgawi lau-lau nte ngkam. ⁶Ikam sundok ngaya diang nte kain, ngaya diang nte Tuhan ; ulak diang lang ptikas ptunjol ulun ikam sundok kuli firman ene diang pengenanam ego, ene lau'-lau' koe ongat Roh Kudus. ⁷keo ene ikam sundok nte jadi tladan nte ulun deo yo prsaya ela Makedonia ai Akhaya. ⁸Koe ngket ekang ikam ulun kringo firman Tuhan lngkat se mbo Makedonia diang Akhaya tinggen, tapi mbo mone awa' sundok kringo kabar iman kam epo Alla, jadi kain belo koyoh bunyal aut soal ene. ⁹Koe dero se yo ngesah umbang nau kain, ktimbe kain kate trima kam, ktimbe ikam ngendikah berhala laju btadah epo Alla nte nglayan Alla yo kono. ¹⁰Nte minte pengulet Pea-Io ngket sorga, yo sundok pinosuli koe-Io ngket ekang ulun mate, yo ene Yesus, yo nylamat taka ngket itek pngmara ene anta.

Chapter 2

¹Ikam se low ka tau, ulun-ulun persaya, koe pngulet kain mbo ekang ikam belo di persuma.² Tapi tontan ise kain onon ene, kati ikam tau, sundok knurow ai nina ela Filipi, koe awat Allah taka, kain keo pngeronu nte ngesah Injil Allah nte ngkam diang usaha boyat.³ Ngke tutui batuk kain belo di ngket yo sala ai belo ngket yo triaw diang belo di nte ngakal. ⁴Sbeta yo, koe sengkono san Allah nte mayak Injil endo epo kain, koe ene kain bsurah, belo di nte nyenang ulun, tapi nte nyenang Allah yo nguji kesong taka.⁵ Koe kain belo pini nembuen kesah tinggen-ene ikam tau-ai ptua mranggha yo nelim-Allah se saksi-⁶kain belo pini meto pujian ket ulun, ketine ngket ikam, ktine low ket ulun-ulun yo mak, koe kain endo rasul-rasul Kristus low kain kuli low gawi ktine.⁷ Tapi kain ramah ekang ikam, kati ine ngasi ngado pea iyo. ⁸Ene lou kain, diang sayang beta epo ikam, belo di suma rela mie Injil Allah nte ngkam, tapi eka bolum diang kompu tonga kain nte ngkam, koe kain sayang diang ikam. ⁹Koe ikam aso knop, ulun-ulun persaya, nau usaha diang poruk kain. Des kain bkomer molo malom, nang sampe nte nengkoyat ikam, kain ngesah Injil Allah nte ngkam.¹⁰ Ikam ene saksi, ene lou Allah, beta-beta brese, adil ai belo keo pensala yo gawi gata kain ekang ikam yo persaya. ¹¹Ikam tau, sebeta yo kain endo, kati nau uma epo pea-pea iyo, yo nsehat ikam diang pturon kesong kam tongku-tongku kongo,¹² ai tindu beta-beta, apa bolum kam sengkono diang ptua Allah, yo momba ikam sumba lang krajaan ai kemuliaan Iyo.¹³ Ai koe ene doko kain belo bekat-bekat yo besukur low epo Allah, koe ikam sundok nrima Firman Allah yo kesah kain ene, mba di kati pemerasa ulun, tapi-yo doko beta-beta ketine-kati Firman Allah, yo begawi low mbo lang ikam yo persaya.¹⁴ Koe ikam, ulun persaya, sundok jadi gaya nau jemaat-jemaat Allah mbo Yudea, jemaat-jemaat mbo lang Kristus Yesus, koe ikam low sundok bolum benasa koe teman-teman bangsa kam se, eka-eka yo mmnasa dero ngket ulun-ulun Yahudi.¹⁵ lengkat se ene ulun-ulun Yahudi ene sundok ngempate Tuhan Yesus diang nabi-nabi ai yo sundok ngurou ngesa kain. Ise yo sengkono epo Allah belo dero nyanda ai eka ulun kemusuh dero, ¹⁶koe dero kakan mombong kain ngesah Firman epo bangsa-bangsa yo mak nte keselamatan dero. Ketine doko dero trus trusan nambah dosa dero sampe cukup kedeo yo ai tempo ndo mara roa sundok bol-bol nyengkinan dero. Tapi kain, ulun-ulun persaya, yo ile tenggang ngket ikam, oro mbo mato, tapi belo oro mbo kesong, beta-beta, diang ngno meroa, sundok brusaha nte ulet nuntun ikam. ¹⁸Koe kain sundok keo pengkakan nte ulet epo ikam- aku, Paulus, belo di sindai-, tapi iblis sundok mombong kain. ¹⁹ise yo nte arap kain diang sukacita kain ai mahkota kemegahan kain mbo onon Yesus, Tuhan taka, des jman pngulet- Io, ena makse ikam?²⁰ Beta-beta, ikam doko kemuliaan kain ai sukacita kain.

Chapter 3

¹Koe' kain belo tahan aut ngno' ikam, koe' ene' kain mutus nte' nongos sderai mbo' Atena. ²Trus kain ngirim Timotius, erai buntung yo' bgawi diang kain nte' Allah lang ngabar Injil Kristus, nte' mturon kesong kam diang ngnasehat ikam soal iman kam, ³apa' nang keo ulun yo' skukui iman yo' koe' kanam bnasa' endo'. Ikam se tau', se taka jnodo' nte' ktine'. ⁴Koe' ene', low des kain sama-sama diang ikam, sundok ulek kain epo' ikam, se taka anta' kiso' bolum bnasa'. Ai hal ene', kati' ikam tau', sundok trjadi. ⁵Koe' ene' doko, jadi aku', koe' belo tahan aut, sundok ngirim io', apa' aku' tau' nau' iman kam, koe' aku' ragu'-ragu', bahe' ikam sundok soba' yo' tukang nggoda' ai bahe' usaha' kain jadi belo keo jodo'. ⁶Tapi' tempo ndo', lipas Timotius ulet nua' ngket ikam ai moit kabar yo' buen nau' iman kam diang kasih kam, ai se ikam trus keo pngnanam buen soal kain ai kakan mangkoruku diang kain, kati kain low kakan nte' mangkoruku diang ikam, ⁷jadi kain low, erai buntung-erai buntung, lang serba poyo' diang kbnasa kain jadi bsmpae koe' ikam diang koe' iman kam ⁸Tempo ndo' kain bolum nua', asal ka' ikam akat turon mbo' lang Tuhan. ⁹Koe' sukur ise' nte' kain die' epo' Allah diang ego, yo' kuli' kain koe' ikam, mbo' onon Allah taka'? ¹⁰Molo malom kain bdoa beta-beta, apa' taka' mangkoruku sangko wae ai nambah ise' yo' aso kurang mbo' iman kam. ¹¹Apa' Io', Allah ai Bapa' taka', diang Yesus, Tuhan taka, ngingkang boyan nte' kain epo' ikam. ¹²Ai apa' Tuhan nampa' ikam deo' sedeo' ai ruak ruaw lang kasih epo' erai-erai ai epo eka' ulun, sama kati' kain low nngkosang ikam. ¹³Apa' Io' mturon kesong kam, apa' nang keo yo' dat ai kudus, mbo' onon Allah ai Bapa' taka' mbo' des pngulet Yesus, Tuhan taka', diang eka' ulun kudus Iyo'.

Chapter 4

¹Pnyundok yo' erai buntung-erai buntung, kain tindu ai nutui matuk ikam lang karan Tuhan Yesus: ikam sundok kringo' ngket kain ketimbe' nau' bolum kam apa' sngkono mbo' Alla. Nau' ene' sundok aya' kam, buen yo' gnawi diang beta-beta aso. ² Ikam sundok tau' low ptutui-ptutui mone yo' sundok die kain epo' ikam lang karan Tuhan Yesus. ³Koe' endo' doko ptua' Alla: nte' nyeing ikam, ⁴apa' ikam oro' ngket pokeng apa' ikam masing-masing ngalek erai kongo' bawe nte' kam se ai apa' ikam bolum kudus ai trhormat, ⁵nang lang pngkakan pokeng koreng, kati' gawi ulun -ulun yo' belo tau' Alla, ⁶ai apa' lang hal ene' nang keo ulun nriaw erai buntung iyo' diang ngakal iyo'. Koe' Tuhan tukang ngmbales kati' yo' sundok ulek kain ngket jati' epo' ikam. ⁷Alla momba' taka' mba' di nte' gawi ise' yo' dat, tapi' ise' yo' kudus. ⁸ Koe' ene' ise' yo' nolak endo' belo di nolak ulun, tapi' nolak Alla yo' sundok miye' low Roh Iyo' yo' Kudus epo' ikam. ⁹Hal kosang erai buntung belo kotoh tnulis epo' ikam, koe' iko sundok blajar kosang nngkosang ngket Alla. ¹⁰Hal ene' sundok gawi ko epo' erai buntung ko eka-eka ai mupus montuk wilayah Makedonia. Tapi kain nutui matuk iko, erai buntung, apa' ikam tambah beta-beta aso nggwi yo'. ¹¹Ai anggap ka ene' ksepantan buen nte' bolum tnang, nte' ngurus masalah-masalah yo' se ai bgawi diang kayang, kati' yo' sundok pesan kain epo' ikam. ¹²Apa' ikam bolum kati' ulun-ulun yo' sopan mbo' mato ulun baling ai belo sgeweng epo' dero. ¹³Strus yo' kain belo di kakan, erai buntung-erai buntung, se' ikam belo tau' soal dero yo' mate, apa' ikam nang sedih balo kati' nau' ulun-ulun mak yo' belo keo arapan. ¹⁴Koe' ena' taka' persaya, se' Yesus sundok mate ai sundok nyuli, jadi taka' persaya lou se' dero yo' sundok mate lang Yesus anta' kumpul Allah kerai diang Io. ¹⁵Ndo' kain ngulek epo' ikam diang firman Tuhan: tka' yo' balum, yo' aso nongos sampe' pngulet Tuhan, belo' anta' ono se' dero yo' sundok mate. ¹⁶Koe' des tanda ene' dne' yo' ene' des olo' pngutok malaikat nngou ai sangkakala Allah keo' oyon, jadi Tuhan anta' diwa ngket sorga ai dero yo' mate lang Kristus anta' ono' nyuli; ¹⁷Sundok ene', taka' yo' bolum, yo' aso nongos, anta' nengkat sama-sama diang dero lang jaun nyuku Tuhan mbo' ombon jaun. ktine dko' taka' kden sama-sama diang Tuhan. ¹⁸Koe' ene' baku sempaye' ikam diang pmnsara endo'.

Chapter 5

¹soal zaman ai waktu, eraibuntung-eraibuntung, belo di kotoh tnulisepo ikam. ²koe ikam se tau beta-beta, se olo tuhan ulet kati pengako des malom. ³ena dero ngulek : eka yo damai ai aman ba - kolan-kolan dero pngulet bnasa, kati san bawe untung pngulet siet des mekus dero belo anta belo kono. ⁴Koe ene, eraibuntung-eraibuntung, ikam belo di bolum lang seom, koe olo ene kolam-kolan ulet kati pengako, ⁵koe eka-eka ikam ene jadi pea-pea trang ai pea-pea molo. taka mak se ulun-ulun malom diang ulun-ulun seom. ⁶koe ene buen yo nang taka turui kati ulun yo mak, tapi kingat ai knop. ⁷koe dero io turui, turui des malom ai dero yo mauk, mauk des malom. ⁸Tapi taka, yo ulun-ulun molo, buen yo taka kingat, baju waja Iman ai kasih, diang makai topi waja harapan slamat. ⁹koe Allah belo di mtoko taka ente ukum, api nte kuli slamat koe yesus Kristus, tuhan taka. ¹⁰yo sundok mate nte taka, apa ena taka bjaga, ena taka turui, taka bolum sama-sama diang Io. ¹¹koe ene nasehat ka epo erai-erai ai ikam bako tngkuat ka kati yo desung gawi kam. ¹²kain tindu epo ikam, eraibuntung-eraibuntung, apa ikam ngormat epo dero yo bgawi beta-beta ekang ikam, yo mimpin ikam lang Tuhan ai yo nggur ikam. ¹³apa ikam beta-beta ngormat dero lang kasih koe gawi gata dero. bolum trus lang damai epo erai-erai. ¹⁴kain nasehat ikam lou, eraibuntung-eraibuntung, tnegur dero yo bolum keo kroan, sinompae dero yo kesong tawai, nngket dero yo belo keo bkaya, sabar epo eka-eka ulun. ¹⁵Tempaning, apa nang keo ulun males yo triau diang triau, tapi knomer trus yo buen, epo ikam eka-eka diang po eka-eka ulun. ¹⁶Ego trus. ¹⁷ttap sembayang. ¹⁸Mengusap sukur lang eka hal, ene yo tinong kakan ke Alla lang Kristus Yesus nte kam. ¹⁹Nang pnarom Roh, ²⁰Diang nang nganggap iwa nubuat-nubuat. ²¹Kinonanam ise yo keo nggop yo buen. ²²Oro-oro iko ngket eka macam yo triau. ²³Moga-moga Alla damai sejahtera mmerse ikam eka-eka diang moga-moga roh, kompu tonga ko terpelihara sempurna belo keo bila molon des Yesus Kristus ulet Tuhan taka. ²⁴Io yo momba ikam ene setia, Io lou kakan nyundok yo. ²⁵Erai buntung - erai buntung, do'a kam kain. ²⁶Snampe salam kain epo eka erai buntung diang arok olam yo kudus. ²⁷Koe karan Tuhan aku tindu beta-beta epo ikam, apa surat ene bnaca po dero eka-eka ulun persaya. ²⁸Kasih karunia Yesus Kristus, Tuhan taka, sama-sama diang ikam.

2 Thessalonians

Chapter 1

¹Ngket Paulus, Silwanus diang Timotius, mitek jemaat ulun-ulun Tesalonika lang Allah bapa taka ai lang Tuhan Yesus Kristus. ²kasih karunia ai damai sjahtra ngket Allah, Bapa taka, ai ngket Tuhan Yesus Kristus sama-sama diang ikam. ³Kain arus dor bsukur epo Allah koe ikam erai buntung-erai buntung. Kmemang po nau yo, koe iman kam makin btambah ai pengkosang kam diang erai-erai tambah turon mbo sama ikam. ⁴Koe ene Lang jmaat-jmaat Allah, kain se tau nondek nau kam, koe iman ai ksabar kam ngadap deo umbang pengkono yo nysa ikam. ⁵Ene pnanda se Allah ene adil, yo mmkelak se ikam ene sngkono jadi warga Krajaan Allah, ikam yo tempondo ssa koe krajaan ene. ⁶Koe memang adil mbo Allah nte males mitek dero yo nindas ikam. ⁷Nte ngelumu kanam pengenanam kam yo kono tindas, ai epo kain low, des jman Tuhan Yesus ngket lang sorga mmkelak kompu-Io diang mlekat-mlekat-Io, lang kuasa-Io, lang api yo dolan raya, ⁸Io ngmbales epo dero yo belo kakan tau se Allah ai belo kakan gaya epo Injil Yesus, Tuhan taka. ⁹Dero ene nindo kono ukum bnasa turai, pinokoro ngket hadirat Tuhan ai ngket kemuliaan kuasa-Io. ¹⁰Nindo des jman Io ulet nte kinomulia ekang ulun-ulun kudus-Io, ai apa nampa kagum ulun-ulun yo prsaya, koe kesaksian yo oit kain epo ikam endo sundok prsaya kam low. ¹¹Koe ene kain dor bdoa low nte ngkam, apa Allah taka nampa ikam kate sngkono nte Io bomba, ai diang kuasa-Io nte nypurna pngkakan kam nte gawi buen ai nypurna pkrjaan iman kam, ¹²Apa karan Yesus, Tuhan taka, kinomulia lang ikam ai ikam lang-Io, sengkono diang kasih karunia Allah taka ai Tuhan Yesus Kristus.

Chapter 2

¹Soal pngulet Tuhan taka Yesus Kristus ai bkumpul taka diang Iyo kain tindu epo ikam, ulun-ulun persaya,² apa ikam nang resi bengong ai belo kturoh, buen koe ilham roh, ene lou koe kabar diang surat yo nulek ngket kain, kati-kati nau olo Tuhan sundok ulet.³Nang sampe ikam mie bolum kam pinoktang koe ulun diang sara ise! Koe onon Olo ene arus ulet ile sipat ngendikah iman diang arus pinokelak ile ulun yo gawi triaw, yo arus mate,⁴ yo ene lawan yo ngombo-ngombo se yo mak yo nulek ndok iyo snmbah kati Allah. Malah Iyo tunge ela Bait Allah ai kakan mekelak kompu kati Allah.⁵Belo be ikam knop, se ene jono kesah ku diang ikam, des aku aso kerai diang ikam? ⁶Tempo ndo ikam tau ise yo nahan iyo, se iyo kakan mkelak kompu tonga iyo montuk jman yo sundok tnentu nte iyo. ⁷Koe diang sara melim gawi triaw ene sundok mulai gnawi, tapi tempo ndo aso keo yo nahan. Ena yo nahan ene sundok nloli,⁸Des ene doko yo keo gawi triaw ene bayu anta mkelak kompu tong iyo, tapi Tuhan Yesus ngmpate iyo diang riut kesong ngket bowa Iyo ai ngmapos iyo, ena Io ulet nua. ⁹Pngulet ulun gawi triaw ene gawian iblis, jnuyang diang bemasam hal yo ajaib, tanda-tanda diang musisat-musisat plesu,¹⁰ diang bemasam akal dat epo ulun-ulun yo arus mate koe dero belo nrima ai sayang diang yo beta yo kuli nte nylamat dero.¹¹Koe ene Allah mkulet mketang ombon dero,yo nampa dero persaya epo eta, ¹²apa nukum eka ulun yo belo persaya epo yo beta ai gawal yo triau.¹³Tapi kain arus trus-trusan bsyukur epo Allah koe ikam, ulun-ulun persaya,yo knosang koe Tuhan,koe Allah ngket tla yo sundok mili ikam nte sinolamat lang Roh yo membrese ikam ai lang yo kono yo ikam persaya.¹⁴ Nte ene doko Io sundok momba ikam koe injil yo knabar koe kain, apa ikam kate kuli kemuliaan Yesus Kristus,Tuhan taka.¹⁵ Koe ene, akat turon ai segop mbo batuk tutui yo ikam kuli ngket kain,buen diang sara langsung maupun diang sara tnulis.¹⁶Ai Io, Tuhan taka Yesus Kristus, ai Allah, Bapa taka,yo lang kasih karunia-Io sundok ngosang taka ai yo sundok miye pnyempaeyo kdej ai arapan buen epo taka,¹⁷ apa iyo nyempae ai mturon kesong kam lang gawi gata ai kesah surah yo buen.

Chapter 3

¹Strus io, erai buntung-erai buntung, bdoa nte kain, apa firman Tuhan kate maju ai kinonuon, sama kati yo sundok jadi mbo ekang ikam, ²apa kain lopos ngket pnganggu ai ulun-ulun akal triau, koe mbadi eka ulun kuli iman. ³Tapi Tuhan ene setia. Io anta mamuturon kesong kam ai ngenjaga ikam ngket yo dat. ⁴Ai kain prsaya lang Tuhan, se ise io psan kain epo ikam, nte ngkam joun ai anta ngkam gawi. ⁵Apa Tuhan ttp nadah kesong ko epo kasih Allah ai epo ksabar Kristus. ⁶Tapi kain msan epo ikam, erai buntung-erai buntung, lang karan Tuhan Yesus Kristus, apa ikam ngliki ngket ulun io belo nglaku gawi gata iyo ai io belo ngaya tutui batuk yo sundok trima kam ngket kain. ⁷Koe ikam se tau, timbe nau ikam arus lumpat nau umbang kain, koe kain mbadi ngemban bgawi diang ikam, ⁸Ai belo dikuman roti ulun tingen, tapi kain bkomer diang bnasa molo malom, apa belo nengkoyat ise-ise yo ngket ikam. ⁹Mbadi leka kain belo keo hak nte ene, tapi kain kakan jadi contoh nte ngkam, apa ikam nyarak. ¹⁰Koe, lou des kain keo ekang ikam, kain meknop endo epo ikam : Ena keo ulun belo kakan begawi, nang iyo kuman. ¹¹Kain ngulek ktine ene koe kain kringo, se keo ulun yo belo kroan bolum iyo ai belo begawi, malah pae diang hal-hal yo belo tadah. ¹²Ulun-ulun yo ktine ene kain meknop ai nasehat lang Tuhan Yesus Kristus, apa dero nokon tenang ngelaku gawi iyo ai diang ktine kuman okan singkap iyo se. ¹³Ai ikam, erai buntung, nang ayu-ayu nggawi ise yo buen. ¹⁴Ena keo ulun yo belo kakan nempaning ise yo ulek kain lang surat endo, tenanda iyo ene ai nang beteman diang iyo, apa iyo mai, ¹⁵Tapi nang ngomoi iyo kati musuh, tapi knae iyo kati erai buntung. ¹⁶Ai Io, Tuhan damai sejahtera, apa mie damai sejahtera-Io trus-trusan, lang eka-eka soal, epo ikam. Tuhan sama-sama diang ikam eka. ¹⁷Salam ngket aku, Paulus. Salam endo tulis ku diang kayang ku se. endo tanda lang tongku surat: ketindo nau tulisan ku. ¹⁸Kasih Karunia Yesus Kristus, Tuhan taka, sama-sama diang ikam eka!

1 Timothy

Chapter 1

¹Ngket Paulus, rasul Yesus Kristus ngaya ptua Allah, Pnyelamat taka, ai Kristus Yesus, jadi arapan taka, ²epo Timotius, peaku yo beta-beta mbo lang iman: kasih karunia, rahmat ai damai sejahtera ngket Allah Bapa ai Kristus Yesus, Tuhan taka, diang iko trus. ³Des aku kakan nglajut dalanku epo Makedonia, aku tindu iko apa iko nongos mbo Epesus ai nutui matuk ulun-ulun mne, apa dero nang matuk ajaran yo mak ⁴apa nang repot diang smpuri ai soal upus yo mbadi keo pnyundok yo, yo cuma nte nampa soal tingen, belo sengkono diang bolum slamat yo die Allah lang iman. ⁵Jodo tutui batuk ene yo kosang timbul ngket kesong brse, ai ngket lang kesong yo liyo ai ngket iman yo beta-beta. ⁶Tapi keo ulun yo belo sampe epo tadah ene ai tang lang pnyurah belo keo tadah. ⁷Dero ene kakan jadi guru hukum Taurat tapi dero belo paham pemensara dero se ai atok kesah yo beta, belo kate belo yo oret dero. Taka tau hukum Taurat ene buen ena sengkono pakai se iyo, ⁸Yo ene diang sadar se hukum Taurat ene mbadi nte ulun yo buen, tapi nte ulun dadal ai ulun rusi, ulun triaw ai ulun bdosa, nte ulun iden, yo ngmpate ine uma, nte ulun yo tuju ngempate, ¹⁰nte ulun pokeng koreng ai song gawal song, nte pnampat ulun, pnampa eta, nte ulun okan sumpah ai eka-eka yo belo sdngkono diang tutui batuk slomai ¹¹kati atok Injil ngket Allah yo mulia ai ego beta, kati yo tnape epo aku. ¹²Aku besyukur epo Io, yo meturon aku, yo ene Kristus Yesus, Tuhan taka, koe Io nganggap aku setia ai nyerah pelayanan ene epo aku. ¹³Aku yo des ene ulun penguja ai ulun penguroy ai ulun pernges, tapi aku sundok tengkosang-Io, koe eka ene sundok gawiku diang belo tau yo ene baling se iman. ¹⁴Malah kasih karunia Tuhan taka ene sundok deniye diang ruakruaw epo aku diang iman ai tengkosang lang Kristus Yesus. ¹⁵Pengesah endo beta ai arus tenerima eka-eka: "Kristus Yesus ulet epo denia nte nyelamat ulun bedosa," ai ekang dero ene aku doko yo paling bedosa. ¹⁶Tapi koe ene ube aku tinongkosang, apa lang kompuku endo, ulun yo paling bedosa, Yesus Kristus mekelak eka kesabar-Io. Diang ktine ene aku jadi sontoh nte dero yo anta persaya epo-Io ai kuli bolum yo kden. ¹⁷Hormat ai kemuliaan ampe turaiyo nte Raja eka-eka zaman. Allah yo kden, yo belo melak, yo erai bute! Amin. ¹⁸Tugas endo biyeku epo iko, Timotius peaku, sengkono diang ise yo sundok nontus anta soal iko, apa pinoturon koe pengontus ene iko ngomer usaha yo buen diang iman ai pengenanam yo liyo. ¹⁹Keo tenu ulun sundok nolak pengenanam yo liyo ene, ai koe ene gandas iman dero. ²⁰Yo doko kati Himeneus ai Aleksander, yo sundok serah ku epo iblis, apa dero delan nguja.

Chapter 2

¹Ngket tla aku ngnasehat: Pinodombo penindu, doa syafaat ai usapan syukur nte eka ulun,² nte raja-raja ai nte ulun yo keo kuasa ngatur, apa taka kuli bolum aman diang damai nte sembayang ai soal-soal yo sopan.³Ene yo buen ai yo sengkono epo Allah Juruselamat taka,⁴yo memetua apa eka ulun sinolamat ai kuli pentau se yo beta.⁵Koe Allah ene tunggu ai tunggu low Iyo yo jadi pengeang ekang Allah ai manusia, yo ene manusia Kristus Yesus,⁶ yo sundok nyerah kompu-Io jadi pnous nte eka-eka ulun: ene ksaksian des jman yo sundok tnetap.⁷Nte kesaksian ene doko aku sundok tnetap nte pngabar ai rasul-yo kesah ku endo beta, aku belo nampa eta-ai jadi guru ulun-ulun makse Yahudi, lang iman ai yo kono.⁸Koe ene aku kakan, apa mbo mombe-mombe ulun bangsong bdoa diang nelola palar yo susi, belo diang mara ai belo diang bako tangki.⁹Ketine lou bang bawe, apa io braji diang pantas, diang sopan ai nang deo balo umbang, balo yo nang bkepang-kepang, nang makai mas ai mutiara ene low diang diris laung yo larang-larang,¹⁰ tapi apa io braji diang gawi gata buen, katinau yo pantas nte bawe epo sembayang.¹¹Arus yo bang bawe ene suni-suni ai nerima tutui-batuk diang patoh.¹²Aku ngusan bang bawe nutui matuk ai ngusang mrenta bang song; io suni ka.¹³Koe Adam yo ono tnampa, bayu Hawa oli.¹⁴ Aso nua makse Adam yo kono goda, tapi bawe ene yo kono goda trus toyak epo lang dosa.¹⁵Tapi bawe anta sinolamat koe ngmekus pea, asal io tatel lang iman ai kasih ai bolum nte Tuhan diang bolum yo sdang-sdang ka.

Chapter 3

¹Beta pengesah endo: "ulun kakan tugas nte pngawas jemaat nengkakan gawi yo paling buen," ²koe ene pengawas jemaat arus yo ulun belokeo bila molon, song engket erai bawe, kuli nahan pngnanam, bijaksana, sopan, gawal nampung ulun, pintar matuk nutui ulun, ³mak se pemaauk, mbadi tuju mara tapi buen diang ulun, penengkuen, mbadi batak sen, ⁴pngutok kluarga yo buen, pea-peaiyo takut ai hormat epo io ⁵ena ulun belo tau ngurus kluarga yo se, ktimbe nau io kuli ngurus jemaat Allah?⁶Nang io ulun yo bayu btobat, apa nang io jadi sombong ai kono ukum iblis.⁷Arus io lou keo karan buen ela baling se jemaat, apa io belo tuntutan ulun ai belo toyak epo lang akal iblis.⁸Ketine lou pembela sidang arus ulun terhormat, nang duo dola, nang tuju balo se anggur, nang uguh, ⁹tapi ulun io tau ngenjaga atok Iman yo melim lang pngenanam yo brese. ¹⁰dero lou arus snoba ile, bayu pnili ente playanan ene des sudok melak se dero ene belo keo bilamolon.¹¹Ene lou bangbawe eru io ulun terhormat, tukang mtenah, nang jues balo ai jujur lang eka-eka soal.¹²pembela sidang arus song engket erai bawe ai kuli ngurus pea-peaiyo ai kluargaiyo diang buen.¹³Koe dero yo mlayan diang buen kuli awa yo buen apa lang iman epo Kristus Yesus dero kuli bsaksi diang bebas.¹⁴Eka-eka ene tnulis koe ku epo iko, walaupun aku mbadi ola kakan ngenyo epo awa ko lane. ¹⁵tapi ena aku sori ulet, sundok doko iko tau ketimbe nau ulun arus bolum lang kluarga Allah, io ene jemaat engket Allah yo bolum, ori botuk ai tondal yo beta. Ai sbetaiyo olai ombo atok sembayang taka yo melim: "Io, yo sundok mkelak kompu-Iyo lang nau umbang manusia, tinombeta lang Roh; yo mkelak kompu-Iyo epo mlekat-mlekat, knabar ela ekang bangsa-bangsa yo belo tau se Allah; yo lang dnia ente ulun persaya, nengkat lang kemuliaan."

Chapter 4

¹Tapi Roh diang tgas ngulek se anta-anta yo, keo ulun yo baling ngket iman nyarak roh-roh yo nte nampa tang ai lumpat tutui batuk setan-setan ²koe pngaruh pnampa eta yo kno kesong io makai tok ngket dero. ³Dero ene ngusan ulun kawen, ngusan ulun kuman okan yo pnytampa Allah apa diang ngulek sukur noka koe ulun prsaya yo sundok tau nau yo kono. ⁴Koe eka yo sundok tampa Allah ene buen, ndok belo erai yo dnion asal tinorima diang ngulek sukur, ⁵koe eka yo ene kudus koe firman Allah ai koe doa. ⁶Diang trus mknop nau umbang ene epo erai buntung-erai buntung taka, iko nindo jadi ulun playan Kristus Yesus yo buen, sundok bnatuk lang soal tondal iman taka ai lang turui batuk yo slomai yo sundok nelumpat koe ko kola ndo. ⁷Tapi nang ko tempaning pntau pntoan ai sempuri itak-itak tuo. ale iko ngnau smbayang. ⁸nglatih kompu tonga ene idok jodo yo, tapi ibadat ene nte deo jodo, koe keo janji, nte penyembolum tempo ndo ktine low nte penyembolum anta yo. ⁹pnyurah endo beta ai snaron yo tnorima ndok eka. ¹⁰Ene doko moko taka panas molus bkomer, koe taka mayak pngarap taka epo Allah yo bolum. juruslamat tongku ulun, yo ono nte dero yo prsaya. ¹¹Sampe Ko ai tutui batuk ko eka-eka ene. ¹²Ndok nang keo erai kongo ulun kate ngotus iko ene uro, koe leka iko aso burok. moko yo iko ene jadi sonto nte ulun-ulun prsaya, nau mbo bkesah surah, mbo gawi gata, mbo die sokoi, mbo kesetia ko, ai mbo kbrse ko. ¹³Ktine ka ene, sampe aku ulet iko arus tetap beta-beta ngmbasa kitab-kitab susi, lang nengkuat ai nte nutui matuk. ¹⁴Nang kewot makai karunia yo keo mbo iko ene, yo sundok dneie epo iko ngket nubuat ai diang tenumpang tangan koe pembela sidang. ¹⁵knop-knop iko nau ene nang keo liu, bolum ko lang ne apa pnduan iman ko melak epo eka ulun. ¹⁶Jaga nau ko se ai ktine low nau tutui batuk ko se ulun. tetap beta-beta lang eka-eka ene, koe diang ktine iko nylamat iko se diang eka-eka ulun yo nempaning ngko ene.

Chapter 5

¹Nang ikam koi koroi epo ulun yo tuo, tnegur io kati uma. Tnegur ulun-ulun yo burok kati erai buntung kam se, ²Bawe-bawe yo tuo kati ine, bawe-bawe yo burok kati okong diang pngnanam lio. ³Hormat epo balu-balu yo beta-beta balu. ⁴Tapi ena ene ulun balu keo pea, opo! dero ene ngket tla ngnau nggawi yo buen epo kluarga iyo se diang males buen ulun tuo diang itak dero, ene yo sngkono mo Allah. ⁵Ena io ulun yo balu, diang beta-beta balu, yo dnika ba'ba, mayak hapan io epo Allah ai btahan lang pnindu diang doa molo malom. ⁶ Tapi balu yo bolum keo diang ruak ruwau, io sundok mate ulak bolum. ⁷Pino kingat nau umbang endo lou epo balu-balu ene apa dero bolum belo di bila molon. ⁸Tapi ena keo ulun yo belo di ngasi ngado kluarga io se, apa lagi lang lou io se, ulun ene sundok ngndikah iman ai tambah dat se ulun yo belo keo iman. ⁹Yo dnaftar se balu, suma dero yo belo di kurang se onom pulu taun, yo sindai bute keo song. ¹⁰diang yo beta sundok keo bukti nglaku gawi yo buen, kati ngasi pea, mie awa, mui botis erai buntung erai buntung yo kerai iman, ngawat ulun yo bolum bnasa- idok kesah, dero sundok makai eka des nte gawi yo buen. ¹¹Koyoh ka dnaftar balu-balu yo aso burok, ena keo sindai keo pngnanam koe pngkakan yo nytuar dero ngket Kristus, dero ene kakan kawen ¹² diang ngndikah janji stia dero yo tla epo IO, dero nampa ukuman nte dero se. ¹³Diang baling dalam lang lou ulun, dero nyntepet bontul, belo di bontul tingen, tapi lou nampa kesah tuju lumpat urusan ulun yo mak, diang ngmokas pmsara yo belo buen. ¹⁴Ptuaku apa balu-balu burok kawen nua, keo pea, mimpin kluarga iyo ai nang nampa alasan epo musuh nte mdat karan taka. ¹⁵Koe keo tenu-tenu kongo balu yo tang koe nyarak iblis. ¹⁶Ena song-song bawe-bawe yo persaya keo kluarga yo balu, arus yo ngawat dero nang sampe nte nengkoyat jmaat. Diang ktine jmaat kuli ngawat dero yo beta-beta balu. ¹⁷Penatua-penatua yo buen mimpin yo sengkono nte die ormat epo dero duo kali lipat, apalagi nte dero yo bkomer beta-beta kotbah ai nutui batuk. ¹⁸Belo be Kitab Suci ngulek: "Nang iko nyimpeh bowa lembu yo aso ngraung dikut," ai nua "ulun bgawi arus kuli upa." ¹⁹Nang iko nrima pnundruh epo penatua kcuali ena keo duo ena belo tolu kongo saksi. ²⁰ Dero yo nampa dosa arus kae ko mbo onon eka-eka ulun apa yo mak ene takut low. ²¹Mbo onon Allah diang Kritus Yesus ai mlekat-mlekat pilihan-Iyo aku msan diang beta-beta epo ikam: knanam kam beta-beta pnutui endo belo di diang sriga ai nglaku eka-eka belo keo yo nengket. ²²Nang iko sangat balo nlep kayang ombon ulun ai nang bkoit lang dosa ulun mak. Jnaga kebrese kompuko. ²³Nang oli ngisop danum tingen, tapi tnambah diang anggur idik-idik, koe buntung ko keo masalah ai kompu tonga ko yo jono mole. ²⁴Dosa tenu kongo ulun melak beta, kati nau jlempono dero epo pngadilan, tapi dosa tenu kongo ulun bayu melak anta yo. ²⁵ Ene lou diang gawi gata yo buen ene resi melak ai ena belo ktine, io belo anta kuli pkona trus.

Chapter 6

¹Eka-eka ulun yo jadi anak bua moko yo dero nganggap tuan dero ene pantas kuli hormat ngket dero, apa karan Allah ai tutui batuk taka nang keko ulun. ²Ena tuan dero ulun persaya, nang sampe dero kurang bata epo iyo koe erai buntung lang Kristus, moko iyo dero nlayani diang tambah buen aso, koe tuan yo nrima berkat playanan dero yo doko erai buntung yo persaya ai yo snayang. (-2b) Bnatuk diang nsehat beta eka-eka endo. ³Ena ulun nutui matuk yo mak ai belo di sengkono-diang pemesara buen yo doko pemesara Tuhan taka Yesus Kristus-ai belo di kati tutui batuk yo sengkono diang ibadah taka, ⁴Io ene ulun yo ungka-ungka tau pdahal mba di keo pentau ise-ise. Roton io doko meto-meto soal ai mutar pemesara, nampa kekey diang erai-erai, pemesara ngoti ate, memetnah, sriga, ⁵ruok bulo ela ekang ulun-ulun yo akal rusak ai yo mapos yo kono, yo san dero ibadah ene apa kate nte awa kuli untung. ⁶Beta iyo ibadah ene ena diang san puli, mie untung olai. ⁷Koe taka belo moit ise-ise epo lang dnia ktine low taka belo moit ise-ise epo baling. ⁸Asal keo okan singkap ai diris laung, puli ka ene. ⁹Tapi dero yo kakan tataw toyak epo lang masalah, epo lang akal triaw ai epo lang bmasam pngenanam remis yo osau diang nte nylaka, yo mlotong ulun epo lang awa pngeroros ai bol kbenasa. ¹⁰Koe wakat eka-eka yo dat yo doko gawal pitis sen. Koe mtikas naket sen ene tenu-tenu kongo ulun sundok siat ngket iman ai nyesa kompu tonga yo se diang bmasam pengkono pengkena. ¹¹Tapi iko o ulun Allah, nidar eka-eka ene, knomer yo adil, ibadah, stia, mangku kosang, sabar diang belo di kois koroi. ¹²Bkomer beta-beta lang mangko bali iman yo kono diang nyrabut bolum yo kden. Nte ene doko iko sundok bnomba ai iko sundok ngulek janji janji yo kono ela onon deo saksi. ¹³Ela onon Allah yo mie bolum epo eka-eka ela onon Kristus Yesus yo sundok ngulek janji janji yo kono ene low mbo onon Pontius Pilatus, aku psan beta-beta epo iko: ¹⁴Naya prenta endo, mba di bila molon ai mba di keo sala, ndok sampe des Tuhan taka Yesus Kristus mkelak kompu Iyo, ¹⁵Yo doko des yo anta tnetap koe Pngusa yo erai bute diang bol pngego, Raja ombon se eka-eka raja ai Tuan ombon se eka-eka tuan-tuan. ¹⁶Iyo tingan yo belo ngaya epo maut, nongos lang trang yo belo dapet kompo. ndok belo erai kongo ulun pini kito Iyo ai mmang ulun belo klian meti Iyo. Nte yo doko hormat ai Kuasa yo kden! Amin. ¹⁷Pino knop epo ulun-ulun tataw lang dnia endo apa dero nang sombong ai nang ngarap ise-ise yo belo tinonoan kati pnyngkeo, tapi epo Allah yo lang pngkeo Iyo mie epo taka eka-eka nte taka pakai. ¹⁸Pinoknop apa dero ene nggawi yo buen, jadi tataw lang yo buen, tuju mie diang mbagi kinan. ¹⁹Ai diang ktine nimbun pngkeo nte tondal yo buen nte io se anta nte ngrapet bolum yo sebeta iyo. ²⁰O Timotius, nasi nado ise yo sundok tnape epo iko. Kinoliki bunyal yo osaw ai belo brese ai mangko lawan yo ulet ngket yo nulek pentau, ²¹Koe keo tenu-tenu kongo ulun yo nutui matuk ene ai diang ktine sundok siat ngket iman. Kasih Karunia diang iko!

2 Timothy

Chapter 1

¹Ngket Paulus, rasul Kristus Yesus koe ptua Allah nte nyampe janji umbang nau bolum lang Kristus Yesus, ²epo Timotius, peaku yo snayang: kasih karunia, rahmat diang damai sjahtra ngket Allah Bapa ai Kristus Yesus, Tuhan taka, sama-sama diang iko. ³Aku bsukur epo Allah, yo layanku diang pngnanam yo buen kati gawi itak kakahku. Ai aku trus knop se iko lang pninduku, molo malom. ⁴Ena aku knop se olu mato yo tmbalingko, aku kakan kito iko nua apa bol pngegoku. ⁵Koe aku knop se iman ko yo beta-beta, yo dko iman yo tla bolum lang itak ko Lois ai lang ine ko Eunike ai aku yakin bolum lou lang iko. ⁶Koe ene dko aku mknop iko nte mraya karunia Allah yo keo mbo iko koe kayangku sundok pnayak ombon iko. ⁷Koe Allah mie epo taka makse roh takut, tapi roh kuasa, kasih ai tratur. ⁸Jadi nang mai bsaksi soal Tuhan taka ai nang mai koe aku, ulun yo nukum koe Io, tapi lumpat ka ssa nte Injil-Iyo ngket kuasa Allah. ⁹Io doko yo nylamat taka ai momba taka diang bomba yo kudus, belo di koe gawi gata taka, tapi ngket ptua ai die sokoi-Iyo se, yo sundok dnine epo taka lang Kristus Yesus ono' se dnine keo ¹⁰ai yo tempo ndo pinokelak diang pngulet Tukang nylamat taka Yesus Kristus, ene koe Injil sundok mtepok kuasa yo nte moit mate ai mkulet bolum yo kden. ¹¹Nte Injil endo doko aku sundok tntap nte pnyampe, nte rasul ai guru. ¹²Koe ene doko tukun yo aku jadi ssa, tapi aku belo di mai; koe aku tau epo ise aku persaya ai aku persaya se Io keo kuasa ngnjaga ise yo sundok die Io epo aku ndok sampe olo Tuhan. ¹³Knurut ndok eka ise io sundok dingo ko ngket aku nte sonto tutui batuk yo buen ai ene nlaku diang iman ai kasih lang Kristus Yesus. ¹⁴Jnaga beta-beta pngkeo yo buen, yo sundok die Io epo taka, koe Roh Kudus yo sundok nongos lang taka. ¹⁵Iko tau se eka dero yo mbo Asia idi bpeoh ngket aku; ktine low Figelus ai Hermogenes. ¹⁶Tuhan moko yo mie rahmat-Iyo epo kluarga Onesiforus io sundok bjuli-juli mrongin pngnanam ku. Io belo di mai nyruku aku lang penjara. ¹⁷Des mbo Roma, io bkomer

meto aku sampe io ruku aku.¹⁸ Moko yo Tuhan mie rahmat-Iyo epo io des olo Tuhan. Deo beta playanan yo nlaku koe io mbo Efesus, iko deo tau ene se aku.

Chapter 2

¹Koe ene, o anakku, turon-turon ka koe kasih karunia lang Kristus Yesus. ²Ise yo dingo ko ngket aku mbo onon deo saksi, tape ko epo ulun yo dapet gop pmnsara io, diang yo snaron nte nutui matuk ulun yo mak. ³Lumpat ka ssa koe jadi ntara Kristus Yesus yo buen. ⁴Tntara yo desung lang prang belo repot diang kompu tonga io se diang soal-soal pnymbolum io, apa diang ktine ene io sngkono epo kmndan io. ⁵Tukang main pulun kate kuli adiah koe kuret, suma ena io blaga kati aturan-aturan mbo blaga. ⁶Ulun pngumo yo beta-beta bgawi moko yo paling ono kiso kanam asil gawi io. ⁷Tmpaning ise yo ulek ku: Tuhan anta mie iko pntau eka-eka nau lang bolum. ⁸Nang kewot endo: Yesus Kristus, yo sundok nyuli ngket ekang ulun mate, yo kinomekus ngket upus Daud, ene yo kesah surahku lang Injilku. ⁹Koe kesah surah ene doko aku ssa, aso bnolit kati ulun gawi triaw, tapi firman Allah belo dapet bolit. ¹⁰Koe ene aku sabar kiso kanam ssa ene nte ulun-ulun yo pili Allah, apa dero kuli low slamat lang Kristus Yesus diang kemuliaan yo kden. ¹¹Beta doko pmnsara endo: Ena taka mate diang Io, taka anta bolum low diang Io; ¹²ena taka tahan ssa, taka low anta lumpat mmrenta diang Io; ena taka nangkal Io, tangkal Io low taka; ¹³ena taka belo stia, Io ttap stia, koe Io belo kuli nangkal kompu tonga-Iyo se. ¹⁴Pknop ai tape kam nte oki ene nang keo liu diang beta-beta epo dero ela onon Allah, apa dero nang bako tangki kesah, koe ene belo di keo jodo, nte nampa nmbengong ulun yo nempaning yo ka ube. ¹⁵Iko bkomer apa iko sengkono ela onon Allah kati ulun yo bgawi belo koyoh mai-mai, yo bol-bol nyampe nau umbang pngesah yo kono ene. ¹⁶Tapi nidar-nidar pnyurah yo belo otang ai belo susi yo malah tau te nambah dadal ka ube. ¹⁷Penyurah dero ene makin sae kati roton ktikang. Mbo ekang sama dero, ktine low Himeneus ai Filetus, ¹⁸yo sundok nylemang ngket yo kono, diang nutuy matuk ulun se kbangkitan taka desung aut, ene moko tau nte ngrusak iman ulun deo. ¹⁹Tapi tondal yo sundok payak Allah ene turon, mtrai yo : "Tuhan tau llu ise yo mpun-Io" ai tongku ulun yo ngontus karan Tuhan ene arus ngendikah gawi gata yo triau". ²⁰Lang lou yo olai belo di atok kakas ngket mas ai pirak tinggen, tapi keo low yo ngket kayu ai tana ; yo ela nontus tla ene pnakai nte jodo yo nuon, yo nontus sori nte tujuan yo belo di nuon balo. ²¹Ena ulun ene ngidar ngket gawi gata yo triau, yo ene yo nulek kati kakas lang lou yo pnakai nte jodo yo nuon, yo kinomakse diang yo mak, yo pnotoko koe ulun yo mpun lou jnodo nte gawi gata yo nuon tinggen. ²²Koe ene nidar-nidar yo kati pngnanam bang burok, ale ngomer apa kate adil, setia, kasih diang damai epo eka-eka diang dero yo momba epo Tuhan diang kesong yo brse. ²³Nidar soal yo neto-neto, yo oal ai belo snaron. Iko tau se soal ene tau nte nampa ruok, ²⁴Yo karan yo hamba Tuhan ene belo kate ruok rame tapi arus nyasong diang sama ulun, yo harus tukang nte nutui matuk, ai sabar ²⁵ai diang jumot kuli nguloh ulun yo tuju nglawan, koe bahe Tuhan mie boyan nte dero apa btobat ai ngayak dero apa dero tau soal yo kono, ²⁶ai diang ktine dero kate jadi knop nua, koe kate losu ngket akal iblis yo sundok nyiret dero mbo pngkakan yo.

Chapter 3

¹Taka arus tau se olo-olo pnyundok anta ulet bolum sulit. ²Ulun-ulun nengkosang kompu tonga io se ai jadi batak pitisen. Dero tuju kesah opaw ai nondek io se, dero tuju mtenah, deri tuju nglawan ulun tuo ai belo tau trima kasih, belo nyanda agama, ³belo tau baku kosang, belo ganggu bdamai, tuju mdat ulun, belo tau ngentep pngenanam, rusi, belo ganggu yo buen, ⁴tuju kianat, mba dimikir anjang, baso ungka-ungka tau, tuju ngaya pngenanam se ngaya Allah. ⁵Nte eti dero nglaku sembayang, tapi sbeta yo dero nangkal kuasa sembayang ene. Oro-oro ngket dero ene! ⁶Koe ela ekang dero ene keo ulun io ngako sumba epo lou ulun yo mak ai moit bawe-bawe bungang yo ponu diang dosa ai atur pngenanam io se, ⁷beta ko trus kakan nte tutui batuk, tapi belo pini tau yo kono. ⁸Sama kati Yanes ai Yambres nglawan Musa, ene low dero nglawan yo kono. Akal dero rusak diang iman dero belo klian nuji. ⁹Tapi sundok pasti dero belo anta tambah maju, sama kati naw Yanes ai Yambres, kbungang dero anta melak epo eka ulun. ¹⁰Tapi iko sundok lumpat tutui batuk ku, nau pnyembolumku, pendirianku, imanku, ksabarku, kosangku diang pnyelentuoku. ¹¹Iko sundok lumpat kono knurow knasa ai sesa kati yo kono aku mbo Antiokia ai ela Ikonium ai diang ela Listra. Eka kurow ksa yo kono aku ai Tuhan sundok ngllpos aku ngket nne. ¹²Memang tongku ulun io kakan bolum sembayang lang Kristus Yesus anta kono kurow ksa, ¹³tapi ulun gramas ai tukang ngakal anta tambah dat, dero memeketang ai kono pinotang. ¹⁴Tapi koe ka iko ttap sgop epo yo kono yo sundok trima ko yo iko sundok persaya, diang knop se ulun io sundok nutui matuk epo iko. ¹⁵Arus knop low se ngket pea iko sundok tau se Kitab Suci yo kuli mie kpintar epo iko ai ngayak iko epo selamat koe iman epo Kristus Yesus. ¹⁶Eka tulisan iyo die Allah beta-beta keo jodo nte nutui matuk, nte memekelak io salah, nte nengkuen sipat ai nutui matuk ulun lang yo kono. ¹⁷Diang ktine tongku ulun mpun Allah nlengkap nte tongku gawi gata buen.

Chapter 4

¹Mbo onon Allah ai Kristus Yesus io anta njidang ulun io aso bolum ai io ulun sundok mate, aku keo psan diang beta-beta epo iko ente pngulet-Iyo ai nte Kerajaan-Iyo: ²knesah Firman ene, siap des buen ketine lou des yo belo buen, pinokelak yo sala ene tnegur ai masehat diang kesong sabar ai sesui diang tnutui bnatuk nulek binonuen. ³koe ene anta keo des io, ulun belo kuli oli nrima tutui batuk yo buen, tapi dero anta ngumpul guru-guru yo sngkono kati pngkakan dero ente nengkuen lang tlio dero. ⁴dero ene neng kuleng tlingo dero ngket yo kono,ai nempaning ente spuri. ⁵tapi ati-ati lang eka-eka soal, sabar diang bnasa, nlaku gawi gata nyampe Injil ai snudok tugas playanan ko!⁶Nau umbang ku, dayaku sundok tnudak nte persembahan ai pngenate ku sundok dempe. ⁷Aku yundok btanding yo buen, aku sundok sampe tompak gari ai aku sundok ngnjaga Iman. ⁸tempo ndo sundok sinodia nte oki mahkota yo beta anta dnies epo aku koe Tuhan, akim yo adel, des olo-Iyo; tapi belo di pulun epo aku, tapi lou epo eka-eka ulun yo ngno pngulet-Iyo.⁹Bkomer apa resi-resi ulet epo aku, ¹⁰koe Demas sundok gawal se dnies endo ai ngndikah aku. yo sundok malan epo Tesalonika. Kreskes sundok malan epo Galatia ai Titus epo Dalmatia.¹¹Pulun Lukas yo nongos diang aku.Nalek Markus ai noit io epo dido,koe pelayanan iyo penting nte oki. ¹²Tikhikus sundok kirim ku epo Efesus. ¹³Ena iko epo ndo noit lou jubah yo tnape koe ku mbo Troas ela blai Karpus ai lou kitab-kitabku,yo paling penting buyang upak ene. ¹⁴Aleksander,tukang tembaga ene,sundok deo nampa gawi gata triau epo aku.Tuhan anta ngembales kati gawi gata iyo. ¹⁵Apa iko lou jaga-jaga epo io,koe io beta-beta nglawan tutui batuk taka. ¹⁶Des jman aku nuing mbo pngadilan tla ndok belo erai yo ngengket aku,eka dero ngendikah aku-apa soal ene nang tnanggung epo dero-,¹⁷tapi Tuhan sundok diang aku ai memeturon aku,apa diang tete aku Injil snampe diang beta-beta yo ai eka ulan makse Yahudi ngeringo yo.Diang ktine aku lopos ngket bowa timang. ¹⁸Ai Tuhan pasti nglopos aku ngket tongku gawi yo dat.Io pasti nylamat aku, koe ene aku sumba epo lang Kerajaan-Iyo mbo sorga.Nte-Iyo doko kemuliaan yo kden!Amin¹⁹Salam epo Priska ai Akwila ai epo keluarga Onesiforus. ²⁰Erastus nongos ela Korintus ai Trofimius dikah ke ulak kroton mbo Miletus. ²¹Bkomer epo ndo onon musim roni.Salam ngket Ebulus ai Pudes ai Linus ai Klaudia diang ngket eka erai buntung. ²²Tuhan sama-sama diang roh ko. Kasih karunia-Iyo sama-sama diang iko.

Titus

Chapter 1

¹Ngket Paulus, amba Allah ai rasul Yesus Kritis nte ngasi iman ulun-ulun yo pili Allah diang pentau soal yo kono kati yo melak lang ibadah taka,² diang arapan nte bolum yo kden, yo des onon jman sundok jnanji koe Allah yo belo di nampa eta,³ ai des jman ptua-Iyo sundok memekelak firman-Iyo lang kabar Injil yo sundok tnape epo aku sengkono diang suyu Allah, Juruslamat taka.⁴Nte Titus, peaku yo sah sengkono diang iman taka sama-sama: kasih karunia diang damai sjahtra ngket Allah Bapa ai Kritis Yesus, Juruslamat taka, sama-sama diang iko.⁵ Aku sundok ngendikah iko mbo Kreta diang ptua endo, apa iko ngatur ise yo aso pnerlu natur ai apa iko nunjuk penatua-penatua ela tiap kota, kati yo sundok psan ku diang iko,⁶yo ene ulun-ulun yo belo keo bila molon, yo suma keo erai bawe, yo pea yo bolum briman ai belo dapet tnudruh koe bolum belo otang ai bolum belo tratur. ⁷Koe io btugas nte ngatur lou Allah, pendeta jmaat arus belo keo bila molon, belo sombong, mba di unges, mak se pngisop, belo pmara,belo mrangghah,⁸tapi gawal mie nte awa Ulun ensan, gawal diang yo buen, bijaksana, adil, rohani, kuli nahan pngenanam, ⁹ai sgop pemesara yo kono, yo sengkono diang tutui batuk yo buen, apa io kuli nsehat ulun kati tutui batuk ene ai kuli nampa percaya epo dero yo tuju nglawan iyo.¹⁰Koe deo ulun bolum belo tratur, paling melak tingan dero yo sgop epo ukum katep. Diang pemesara yo belo keo jodo dero mengetang pngenanam.¹¹ Ulun-ulun kati ene arus tnokom bowa iyo, koe dero ngacau deo kluarga diang tutui batuk belo otang nampa kuli untung yo ngemmai.¹²Erai kongo ngket klompok dero, nabi dero se, kono ngulek: "Memang ulun Kreta tukang nampa eta, korik paru popak, ulun galak kuman tapi bontul."¹³ Ksaksian ene beta. Koe ene dero nlengan diang tgas apa dero jadi buen lang iman,ai belo di gawal oli diang sempuri-sempuri Yahudi diang ukum-ukum yo tampa ulun yo nylemang ngket hal yo kono.¹⁵Nte ulun yo brese eka ene brese; tapi nte ulun yo mrota ai ulun yo belo keo iman ndok belo erai keo yo brese, koe kno ai kesong dero mrota.¹⁶ Dero ngaku tau se Allah, tapi diang gawi gata dero, dero nangkal Iyo. Dero mrota triaw ai tuju nglawan ai belo tau gawi gata yo buen.

Chapter 2

¹Tapi iko, sampe ko ise yo sengkono diang tutui batuk yo buen: ²Bangsang yo tuo mokoioy bolum nang nyisa lba, kinonai ulun, akal buen, buen lang Iman, lang kasih ai lang kslentuo. ³Ketine lou bangbawe yo tuo, mokoioy dero bolum kati ulun-ulun yo tuju sbyang, nang mtenah, nang ngisop anggur ndok nte mauk, tapi tukang nutui matuk soal-soal yo buen ⁴ai diang ktine matuk bangbawe yo burok kosang se songiyo ai pea-peaiyo, ⁵bolum diang buen akal ai brse, moyoh ngatur nau pngempananiyo, buen kesong ai patoh epo songiyo, apa Firman Allah nang nuja koe ulun. ⁶Ketine lou nau ulun-ulun burok tutui batuk ko dero apa dero kuli ngentep pngnanam burok ⁷iko se arus nte jadi sontoh diang gawi buen, mokoioy iko jujur ai beta-neta lang tutui batuk ko, ⁸buen ai belo sala lang penyampe ko apa bali ko jadi mai, koe dero mbo kulu ruku nau umbang taka yo dat nte dero kesah. ⁹Bayak-batak bueniyu patoh epo tuaniyo lang eka-eka soal ai sngkono epo dero, nang nglawan, ¹⁰nang tuju ngakal, mokoioy lau-lau ai stia, apa diang ktine ngenuon pntuibatuk engket Allah, tukang slamat taka. ¹¹Koe die sokoi engket pengkosang Allah yo nylamat eka ulun sundok melak. ¹²Iyo nutui matuk taka, apa taka ngedikah gawi triau ai pengkakan ela dnia ai apa taka bolum buen akal , bol-bol ai ibadat ombo lang dnia tempo endo ¹³diang minte pyundok arapan taka yo bol pengego ai mekelak knuon Allah yo paling olai ai tukang ylamat taka Yesus Kristus, ¹⁴yo sundok nyerah kompu tonga-Iyo ente taka, ente nglopos taka angket eka-eko gawi triau ai ente mtoko jadi umat nte-Iyo se , empun-Iyo se, yo moyoh gawi buen. ¹⁵Sampe ko eka-eka ene, batuk ko ai pnyakin ko ulun diang eka-eka pngaruhiyo buen. nang keo ulun nyapa iko.

Chapter 3

¹Pino knop epo dero apa dero tunduk epo pemerintah diang ulun-ulun yo keo kuasa, patoh diang slntuo nte nglaku tongku gawi yo buen. ²Nang dero mtnah, nang dero ruok, moko yo dero trus ramah diang nau belo di kois koroi epo eka ulun. ³Des bai taka lou bolum balo tau rti: balo di patoh, tang nte batak pngnanam, belo keo tadah, bolum triau, rmis akal, bako kekei se erai-erai. ⁴Tapi des keo ksawai Allah tukang nylamat taka ai kosang-Io epo eka ulun, ⁵des ene Io sundok nylamat taka, belo di koe gawi buen yo sundok gawi taka tapi koe rahmat-Io koe nundus diang kinomekus nua ai koe tinombayu koe gawi Roh Kudus. ⁶Yo sundok eka-eka die-Io epo taka koe Yesus Kristus, tukang nyelamat taka, ⁷Apa taka kati ulun yo sinongkono koe die sokoi-Io, keo hak kuli bolum yo kden, sngkono diang arapan taka. ⁸Penyurah endo beta, aku kakan apa iko diang yakin mmeturon yo, apa dero yo sundok persaya epo Allah beta-beta ngomer nglaku gawi yo buen. ene yo buen ai keo jodo nte ulun ⁹Tapi nidar, soal yo neto neto, ai yo bungang, urusan upus, gambok diang ruok koe nau ukum taurat, koe eka ene belo keo jodo ai belo keo otang bah. ¹⁰Ulun yo moit tutui batuk yo sala yo sundok sindai duo derang nasehat ko, kiliki ko ulun ktine. ¹¹Iko tau se ulun yo ktine ene beta-beta tang ia diang dosa iyo ngukum io se. ¹²Peles des sundok aku ngirim Artemas ena belo Tikhikus epo iko, bkomer ngruku aku mo Nikopolis, koe sundok pnutus ke ku nte nongos la lane, kola-kola des musim roni endo. ¹³Awat buen-buen deh Zenas, tukang taurat ene, diang Apolos, kola ju dero, apa nang keo yo kurang ise ise. ¹⁴Koe ka ulun-ulun taka lou bguru nglaku gawi yo buen apa kuli nyukup yo beta-beta prlu nte bolum, apa bolum dero nang belo kbua. ¹⁵Salam ngket eka ulun yo diang aku mo mndo ai snampe salam ku epo dero yo ngkosang kain lang iman. Kasih karunia lumpat ikam eka-eka.

Philemon

Chapter 1

¹Ngket Paulus, yo kono ukum koe Kristus Yesus ai ngket Timotius erai buntung taka, mitek Filemon yo knosang, teman kerai gawi kain ²ai mitek Apfia erai buntung taka yo bawe ai mitek Arkhipus, teman kerai bejuang taka ai mitek jemaat mbo lowu kam ³Kasih karunia ai damai sejahtera ngket Allah, Bapa taka ai ngket Tuhan Yesus Kristus diang ikam. ⁴Aku ngulek syukur epo Allahku, tongku derang aku knop se iko lang doaku, ⁵koe aku kringo nau umbang pengosangko epo eka ulun kudus ai nau umbang imanko epo Tuhan Yesus. ⁶Ai aku bedoa, apa kumpulan kam mbo lang iman lumpat nggawi pentau yo buen mbo ekang taka nte Kristus. ⁷Ngket kosang kam aku kuli kenyawo yo meroa ai penggelian, koe kesong ulun-ulun kudus sundok hiburan kam, erai buntungku. ⁸Koe ene, beta ko mbo lang Kristus aku bol keo kebebasan nte nyemuyu epo iko ise yo arus gawiko. ⁹Tapi koe knop se kosangko ene, buen ube aku tindu ngket iko. Aku, Paulus, yo sundok tuo, aso nua tmpo ndo pinonjara koe Kristus Yesus, ¹⁰nyorong penindu epo iko nau umbang peaku yo kuliku des aku aso lang penjara, yoene Onesimus ¹¹bune memang io belo keo jodo nte ngko, tapi tmpo ndo bol keo jodo beta nte ngko ai nte oki. ¹²Io suyuku uli epo iko - io yoene pea yo penggawal kesongku. ¹³Sebetaiyo aku kakan nahan io mbo mendo nte ngganti iko nte ngelayan aku kola-kola aku nukum koe Injil, ¹⁴tapi ena belo sengkono mbo iko, aku belo kakan ngawi ise-ise, apa yo buen ene nang gawiko kati ungka-ungka penaksa, tapi diang berela. ¹⁵Koe bahe koe ene doko io pinotenggang ile-ile ngket iko, apa iko kuli nrimaiyo nte turai-turai, ¹⁶Makse oli kati batak, tapi da aso se batak yoene kati erai buntung yo knosang, mbo aku sundok ktine, da aso mbo iko, buen mbo sara ulun ktine low mbo lang Tuhan. ¹⁷Ena sanko aku teman erai iman, trima ka io kati aku se. ¹⁸Ai ena io sundok ngerugi iko ktine low ena keo utang anduk epo iko, diyeko ka aku nte mayariyo, ¹⁹aku, Paulus, nanggungio diang tulis tekenku se: Aku anta mayariyo- apa nang ulekku: "Tanggung ka ekaiyo ene epo iko" - Koe iko keo utang epo aku, yoene kompu tongako se. ²⁰Oo, erai buntungku, budahan iko keo jodo nte oki mbo lang Tuhan: Hibur ta kesongku mbo lang Kristus! ²¹Diang persaya epo kepatohko, tulisku endo epo iko. Aku tau, lengkat se peninduku endo yo anta gawiko. ²²Lang nau umbang ene besedia ka low miye aku awa nongos, koe aku klawo koe doako aku anta tinompuli epo iko. ²³Salam epo iko ngket Epafras, temanku kerai penjara koe Kristus Yesus, ²⁴ai ngket Markus, Aristarkhus, Demas ai Lukas, teman-teman kerai gawiku. ²⁵Kasih karunia Tuhan Yesua Kristus diang rohko!

Hebrews

Chapter 1

¹Lpas jman bai Allah bjuli-juli ai diang bmasam nau sara bsurah epo itak kakah taka tete nabi-nabi, ²jadi des jman pngabis endo Io sundok bsara epo taka tete Pea-Iyo, yo sundok ptoko-Iyo nte Io keo hak nrima eka-eka yo keo. Koe Io Allah sundok nampa dnia endo. ³Io ene doko wala kmulia Allah ai gambar nau yo beta ngket Allah ai mentugur eka yo keo diang firman-Iyo yo ponu diang kuasa. Ai des Io sundok mui mrese ngket dosa, Io tunge ngket tadah sanan Yo Paling Olay, mbo awa yo ombo, ⁴pawak aso ombo se mlekat-mlekat, sama kati karan yo dnier epo-Iyo pawak buen se karan dero. ⁵Koe epo ise lelu ngket mlekat-mlekat ene yo pini ulek Io: "Iko Pea-Ku! Iko sundok tempeaKu montuk olo ndo?" ai "Aku jadi Bapa-Iyo, ai Io jadi Pea-Ku?" ⁶Ai des Io moit nua Pea-Iyo yo tuo tingen epo dnia, Io ngulek: "Eka mlekat Allah arus nyembah Io." ⁷Ai nau umbang mlekat-mlekat Io ngulek: "Yo nampa mlekat-mlekat-Iyo jadi brubu ai playan-playan-Iyo jadi dolan api." ⁸Tapi nau umbang Pea, Io ngulek: "Awa pnunge-Ko, o Allah, nokon nte dor ai turai-turai, ai goloy krajaan-Ko ene doko goloy yo beta. ⁹Iko gawal yo adil ai ngekey gawi triaw; koe ene Allah, Allah-Ko sundok nota Iko diang lnga nte tanda kgawal, nyisa lalo tman-tman lang kowon-Ko." ¹⁰Ai: "Des tla iyo, o Tuhan, Iko sundok mayak tondal awa nondok dnia ai langit ene pnyentampa kayang-Ko. ¹¹Eka ene anta mapos, tapi Iko dor keo, ai eka ene anta jadi usang kati diris laung; ¹²kati jubah anta dero gulung Ko, ai kati pngemekus dero anta nensut nau, tapi Iko nokon sama, ai taun-taun-Ko belo tau sundok." ¹³Ai epo ise po lelu mlekat ene pini ulek Io: "Tunge ka ela tadah sanan-Ku, sampe tampa Ku bali-bali Ko jadi awa pnoda botis Ko?" ¹⁴Belo be eka dero ene doko roh-roh yo mlayani, yo snuyu nte nglayani dero yo arus kuli slamat?

Chapter 2

¹Koe ene taka arus diang slntuo beta ngnanam ise umbang yo sundok taka kringo, apa nang taka trbabut aso nau epo sawa dayo.²Koe ena ka pirman yo snampe tete mlekat-mlekat ene nokon dor pnakai, ai tongku ise yo nglanggar ai dadal ene kuli itek bales yo bol-bol diang nau gawi gata ene. ³Ktimbe anta taka kate telos, ena taka belo keo aru biru diang nau boyan nte slamat yo kkolai ene, yo ngket tla snampe koe Tuhan ai koe dero yo sundok kringo otang ene, epo taka diang umbang yo dapet prcaya, Ulak aso ⁴Allah mturon pnyampe dero ene diang pleta-pleta ai mujizat-mujizat ai diang bmasam pkelak se kuasa diang karunia Roh Kudus, yo bnagi-bnagi koe-Iyo epo ise yo ptua-Iyo.⁵Mlekat-mlekat belo di kuli kuasa ngket Allah nte mrenta dnia bayu yo nte anta ene, yo ene umbang dnia yo kesah taka tempondo ene. ⁶Malah ka ube, keo rndong lang Alkitab tnulis ktindo, "O Allah, ise se ulun ene, moko Iko kakan knop se dero)? Ise yo nulek Pea ulun ene, moko nte-Ngko sanda balo?⁷Ile-ile tingen Iko nampa iyo iwa idik-idik se mlekat, Iko mie epo iyo awa yo bol kbuen ai kinonunon, ⁸eka ise masam sundok pkalah-Ko epo iwat botis Iyo. Tnoan se ktine koe mbo lang mmkalah eka ise masam epo-Iyo ene ndok belo erai keo yo liu jadi eka kalah ba epo-Iyo. Tapi tempondo belo pian taka kito, se eka ise masam ene sundok pinokalah epo-Iyo.⁹Tapi taka sundok kito se Yesus keo kuasa! Io nampa iwa se mlekat ile-ile tingen, apa koe leka kbuen kesong Allah Io mate nte eka ulun. Taka kito se-Io tempondo dnue awa yo bol kbuen ai pinokolai koe Io sundok sesa ndok nte mate. ¹⁰Koe ktine memang umbang nau iyo Allah, yo nampa ise masam ene nte keo jodo nte ptua-Io se, nampa Yesus nte tukang nylamat yo belo keo nglongon, pinotete diang pngkono ndok sesa. Koe Io ene doko yo nampa boyan nte dero apa kate slamat. ¹¹Yesus ngmbrse ulun ngket dosa-dosa dero; Io yo ngmbrse , diang dero yo binorse ene, sama-sama ngket erai Bapa. Ene doko ise moko Yesus ene belo di mai ngangkan se dero ene eraibuntung-eraibuntung-Iyo. ¹²Yesus ngulek epo Allah, "Aku kakan ngulek epo eraibuntung-eraibuntung-Ku otang nau umbang Iko. Aku kakan muji-muji Iko mbo ekang jmaat¹³13 Yesus ngulek low, "Aku kakan mayak kprcaya-Ku epo Allah. " Ai Io ngulek low,"Endo doko aku, sama-sama diang pea-pea yo sundok die Allah epo-Aku. ¹⁴Koe ulun-ulun yo ulek Io pea ene ulun yo tau mate, moko ene Yesus se low jadi sama berumbang kati ulun yo bolum. Io nampa otang ktine, apa diang pngnate-Iyo Io kuli mkalah iblis yo mpun kuasa mat. ¹⁵Apa diang ktine io nglopos ulun-ulun yo kola umur bolum kati ungka bata koe takut epo pngnate. ¹⁶Melak ka doko oli se makse mlekat yo tengkosang-Iyo, makse ko upus Abraham yo tengkosang-Iya ¹⁷Ene umbang yo moko Io arus jadi sama diang eraibuntung-eraibuntung-Iyo lang eka umbang ise masam. Apa diang ene Io kate jadi Imam Olai yo stia epo Allah ai keo pngkosang. Diang kono layan-Iyo ene dosa ulun dapet nampun. ¹⁸Ai koe Io se pini sesa ai kono ikap, Io kuli ngawat ulun-ulun yo kono ikap, koe io se pini kono ikap ai sesa.

Chapter 3

¹Koe ene, o eraibuntung-eraibuntung yo kudus, yo sama kuli bagi lang bomba sorga, neti beta epo Rasul ai Imam Olai yo angkan taka, yo ene Yesus,²yo stia epo Io yo sundok netap-Iyo, kati Musa low stia lang eka atok lou-Iyo.
³Koe Io nte eti se sengkono nte kuli kmulia pawak olai aso se Musa, sama kati tukang nampa lou aso pawak kinonuon se lou yo tampa-iyo. ⁴Koe tongku lou tnampa koe tukang nampa lou, tapi tukang nampa eka ise masam ene doko Allah.⁵Kati Musa memang stia lang eka atok lou Allah jadi playan nte mie pnyurah nau umbang ise yo anta snampe sundok ene,⁶tapi Kristus yo stia ene Pea yo jadi pngutok lou-Iyo; ai lou-Iyo ene doko taka, ena taka sampe pnyundok iyo turon sgop mbo persaya ai kundong yo tondek taka.⁷Koe ene, kati yo ulek Roh Kudus: "Montuk olo ndo, ena ikam ngringo oyon-Iyo, ⁸nang beta mkoroi kesong kam kati lang ngriten montuk snoba mbo padang gurun,⁹mbo mone itak kakah kam nyoba Aku diang sara nguji Aku, betako dero kito gawi gata-Ku, opat pulu taun kola iyo."¹⁰Koe ene ka doko Aku mara beta epo pokan ene, ai ngulek: Dor dero tang kno, ai dero belo tau boyan-Ku, ¹¹sampe Aku bsumpah lang kmara-Ku: Dero belo anta sumba epo awa Ku nongos".¹²Jaga beta-beta, o eraibuntung-eraibuntung, apa ngket ikam nang keo ulun yo triaw kno iyo ai yo belo prsaya koe yo bdempeling ngket Allah yo bolum.¹³Tapi bako nasehat ka diang erai-erai tongku olo, kola-kola aso dapet ulek "olo ndo", apa nang keo ngket ikam yo jadi dadal kesong iyo koe kono akal dosa.¹⁴Koe taka sundok kuli bagian mbo lang Kristus, yo paling penting taka turon skongkong sampe pnyundok iyo mbo kpersaya iman taka yo ngket tla.¹⁵Tapi ena pini nulek: "Montuk olo ndo, ena ikam ngringo oyon-Iyo, nang beta dadal kesong kam kati lang ngriten",¹⁶ise ka dero yo ngati mara Allah, beta ko dero kringo oyon-Iyo? Makse be eka dero yo baling ngket Mesir la iwat pimpinan Musa?¹⁷Ai ise ka yo kmara Io opat pulu taun kola iyo? Makse be dero yo nggawi dosa ai yo antu dero ngregaleng mbo padang gurun. ¹⁸Ai ise ulun yo sundok pator sumpah Io, se dero belo anta di sumba epo awa pnongos-Iyo? Makse be dero yo belo di patoh? ¹⁹Ktine ka doko itan taka, se dero belo di kuli sumba koe dero belo di persaya.

Chapter 4

¹Koe ene, buen ka taka bjaga, apa nang keo ulun mbo ekang ikam yo nontus totak, betako janji anta sumba epo lang penongos yo-Iyo aso engau. ²Koe epo taka knabar low kabar ego sama kati epo dero, tapi firman kabar ene belo keo jodo nte dero, koe belo moti sama-sama diang ke iman diang dero yo kringo iyo. ³Koe taka yo keo iman, anta sumba epo awa penongos kati yo Io nulek: "Sampe Aku bsumpah lang kmara -Ku: Dero belo anta sumba epo awa penongos-Ku, "betako gawi gata-Iyo sundok aut ngket des dnia tnampa. ⁴Koe nau umbang olo ke turu kono nulek mbo lang nas: "Ai Allah smole des olo ke turu ngke eka-eka gawi gata-Iyo." ⁵Ai lang nas ene taka ngbasa: "Dero belo anta sumba epo awa penongos-Ku." ⁶Jadi sundok melak beta, se keo deo jud ulun anta sumba epo awa penongos ene, padahal dero yo epo iyo ono ube snampe kabar buen ene, belo di sumba koe dero belo patoh. ⁷Koe ene Io metoko nua olo, yo ene "olo ndo", des Io sundok kola ndo jati nyampe firman diang tete' Daud kati nulek ela ombo: "Des olo ndo, ena ikam ngringo oyon-Iyo, nang mekoroi kesong kam!" ⁸Koe, ena ka yo Yosua sundok moit dero sumba epo awa penyemole, pasti Allah belo anta keo ulek sundok se ene nau umbang olo yo mak. ⁹Jadi aso keo sinodia erai olo penyemole, olo ke turu, nte umat Allah. ¹⁰Koe ise yo sundok sumba epo awa penyemole-Iyo, io se sundok sdang ngket eka-eka gawi gata iyo, sama kati Allah sdang ngket gawi gata-Iyo. ¹¹Koe ene alo ka taka bkomer nte sumba epo lang penyemole ene, apa nang keo ndok erai kongo ulun yo toyak koe nyarak nau yo belo patoh ene low. ¹²Koe firman Allah bolum ai turon ai pawak takei se mendau bdaro duo mone ka; io nowok dalam beta sampe memetenggang kesong ai roh, bruku tulang ai dalu lang tulang; koe ene io tau sampe dalam bata lang kno ai pngnanam taka. ¹³Ai mba di keo liu ise ka yo bolum yo melim ela onon-Iyo, koe eka ise masam ene melak ba ai wengau mbo onon mato Io, yo epo-Iyo taka arus miye tanggung jawab. ¹⁴Koe taka tempondo keo Imam Paling Olai, yo sundok nompe eka-eka langit, yo ene Yesus, Pea Allah, alo ka taka turon sgop epo iman yo mpun taka. ¹⁵Koe Imam Olai yo mpun taka, makse imam olai yo belo di lumpat kiso kanam pmbelomana taka, mokin ube Io sama diang taka, Io sundok nikap, suma Io belo di nampa dosa. ¹⁶Koe ene alo taka diang bol pengeronu ngompoh epo dmpet awa kasih karunia, apa taka nrima Rahmat ai ngruku kasih karunia nte ngawat taka montuk des jman yo.

Chapter 5

¹Koe tongku imam olai, yo pnili ngket ekang ulun, yo pinotoko nte ulun lang ubungan dero epo Allah, apa io mie nyokoi persembahan ai korban koe dosa. ²Io arus tau lou ulun-ulun yo gonsa ai ulun-ulun yo tang, koe io se bol belo keo bkaya koe dosa, ³yo belo kate belo nte mie nyokoi korban koe dosa, belo di nte umat tingen, tapi nte yo se lou. ⁴Ai ndok belo erai kongo ulun ngomer knuon ene nte yo se, tapi bnomba nte ene koe Allah, kati umbang io sundok terjadi epo Harun. ⁵Ketine lou Kristus belo di ngmulia Iyo se diang jadi Imam Olai, tapi kinomulia koe Io yo befirman epo-Iyo: "Pea-Ku Iko! Iko sundok tmpea Ku des olo ndo",kati firman-Iyo mbo lang nas yo mak: "Iko ene doko Imam nte turai-turai, ngayak aturan Melkisedek."⁷Lang bolum Iyo kati ulun, yo sundok mie doa ai pnindu diang tangis tungul ai ngeluh epo Iyo, yo klian nylamat Iyo ngket maot, ai koe kpatoh-Iyo Io sundok tinompaning. ⁸Ai betako Io ene Pea, Io sundok bguru jadi patoh ngket ise yo sundok nengkono-Iyo,⁹ai des Io sundok krapet smpurna-Iyo, Io jadi tondal slamat yo kden nte eka-eka ulun yo patoh epo-Iyo,¹⁰ai yo bnomba jadi Imam Olai koe Allah, ngaya aturan Melkisedek.¹¹Nau umbang ene deo yo arus kesah kain, tapi yo poyo nte pjelas, koe ikam sundok dodong nte ngringo.¹²Koe beta ko ikam, ena neti mbo kola, sundok arus jadi pnutui batuk, ikam nokon aso perlu tnutui bnatur tindu dondal firman Allah, ai ikam nokon perlu susu, makse okan yo koroi. ¹³Koe ise-ise nokon perlu susu io belo paham nau umbang tutui batuk yo kono, koe yo ene doko pea alus.¹⁴Tapi pngokan yo koroi ene nte ulun-ulun tuo, yo koe keo akal tepet yo tau ngmbada dat ai buen.

Chapter 6

¹Koe ene alo taka nape tondal-tondal tla tutuy batuk ngket tutuy batuk nau umbang Kristus ai wensut epo pmenduan yo bol-bol nau. Nang taka aso mayak tondal tobat ngket gawi gata yo belo keo jodo, ai tondal kpercaya epo Allah, ²yo ene nau umbang tutuy batuk bmasam baptisan, mayak kayang onbon ulun, pngenyuli ulun-ulun mate ai ukuman kden. ³Ai ene ka doko yo nte taka gawi, ena Allah ngijiniyo. ⁴Koe dero yo pini pinotrang kesongiyo, yo pini kiso kanam karunia ngket sorga, ai yo pini kuli bagi lang Roh Kudus, ⁵ai yo kiso kanam firman yo buen ngket Allah ai karunia-karunia dnia yo anta ulet, ⁶tapi yo ptempeling nua, belo anta di tinom bayu nua oli, sampe dero btobat, koe dero nyalib nua Pea Allah nte dero se ai nguja-Iyo mbo onon wae ulun deo. ⁸⁷Koe tana yo ngresap danum uran yo jono mitek mne, ai yo ngasil pnyekulo-pnyekulo yo keo jodo nte dero yo nggawiiyo, nrima berkat ngket Allah; tapi ena mbo tana ene moti dikut ruot ai kdui, io belo dikeo jodo ai sundok dempet nte oding, yo snundok diang tnuna. ⁹Tapi, o erai buntung-erai buntung yo tengkosangku, beta ko kain bsara ktine nau umbang ikam, kain percaya, se ikam keo ise-ise yo aso buen, yo batok slamat. ¹⁰Koe Allah mba di belo adil, sampe Io tlengo gawi gata kam ai kosang kam yo pkelak kam nte karan-Iyo koe playanan kam epo ulun-ulun kudus, yo aso gawi kam sampe tempo ndo. ¹¹Tapi kain kakan, apa tongku-tongku ikam mkelak se sama-sama beta bkomer nte nampa ise yo kundong kam ene jadi pengkeo yo pasti, ndok sampe pngabisiyo, ¹²apa ikam nang jadi menggoyor, tapi jadi yo ngaya dero yo koe iman ai kdoloh kuli bagi lang yo janji Allah. ¹³Koe des Allah mie janji-Iyo epo Abraham, Io bsumpah epo-Iyo se, koe mba di keo ulun yo ombo aso se-Iyo, ¹⁴ulek-Iyo: "Beta-beta yo Aku anta mie iko berkat ruak ruaw ai nampa iko jadi deo beta." ¹⁵Abraham minte diang doloh ai diang ktine io kuli ise yo jnanji epoiyo. ¹⁶Koe ulun bsumpah diang ulun yo pawak ombo, ai sumpah ene jadi pemeturon nte iyo, yo mkabis eka salotuing. ¹⁷Koe ene, nte nampa ktambah kpersaya dero yo keo hak nrima janji ene se kputusan Iyo ene pasti, Allah sundok nyiret Iyo se diang sumpah, ¹⁸apa koe duo nau umbang yo belo di wensut nau, nau umbang mone Allah belo di anta nampa eta, taka yo meto awa bselingu ngket bahaya, kuli pengkakan yo mroa nte nyrapet yo knundong yo bpayak mbo onon taka. ¹⁹Pngundong ene yo doko saoh yo turon ai belo di bahaya nte bolum taka, yo sundok pnotak sampe ela sorin tabir, ²⁰ela mone Yesus sundok sumba jadi Pnyentaris nte taka, des Io, kati aturan Melkisedek, jadi Imam Olay sampe turai-turaiiyo.

Chapter 7

¹Koe Melkisedek ene raja Salem ai imam Allah Yo Paling Ombo; io malan nyeruku Abraham des Abraham uli ngket mekalah raja-raja ai miye berkat epo io. ²Epoiyo doko Abraham miye perpuluhan ngket eka ene. Ngaya arti karaniyo Melkisedek ene tla-tla raja yo beta, ai low raja Salem, yoene raja damai sejahtera. ³Io belo keo ine uma, belo keo upus, oloiyo belo keo penindu ai bolumiyo belo keo penyundok, ai koe io tenampa sama diang Pea Allah, io nokon jadi imam sampe turai-turai. ⁴Kenanam beta-beta bukan main kolaiyo ulun ene, yo epoiyo Abraham, bapa buyut alow taka, miye perpuluhan ngket eka barang nerampas yo paling buen. ⁵Ai dero ngket pea-pea Lewi, yo nrima pangkat imam, kuli tugas, ngaya aturan Taurat, nte nentu perpuluhan ngket ulun Israel, yodoko ngket erai buntung-erai buntung dero, beta ko dero endo low upus Abraham. ⁶Tapi Melkisedek makse upus dero, nentu perpuluhan ngket Abraham ai miye berkat epo io, padahal io ene mpun janji. ⁷Memang belo dapet tengkilah, se yo paling iwa deniye berkat koe yo paling ombo. ⁸ai mbo mendo ulun-ulun tau mate nerima perpuluhan, ai mbo lane Io, yo nau umbang Io deniye penyurah, se Io bolum. ⁹Jadi dapet ulek, se tete Abraham tenentu low perpuluhan ngket Lewi, yo keo hak nerima perpuluhan, ¹⁰koe io aso keo lang kompu uma buyut alowiyo, des Melkisedek nyeruku uma buyut alowiyo ene. ¹¹Koe ene, ena ka koe imamat Lewi sundok kerapet yo sempurna - koe imamat ene ulun Israel sundok nerima Taurat - ise moko aso perlu ulun yo mak pinotoko nte jadi imam olai ngaya aturan Melkisedek ai yo nau umbang io mba di nulek ngaya aturan Harun? ¹²Koe, ena imamat wensut, wensut low aturan Taurat ene. ¹³Koe Io, yo pinotua mbo mndo, ngket suku yo mak; ngket suku endo ndok belo keo erai kongo yo pini ngelayan mbo mezbah. ¹⁴Koe eka ulun sundok tau, se Tuhan taka ulet ngket suku Yehuda ai nau umbang suku ene Musa belo pini ngulek ise-ise nau umbang imam-imam. ¹⁵Ai nau umbang ene mokin melak aso, ena pinotoko imam yo mak kati sara Melkisedek, ¹⁶yo jadi imam mbadi kati aturan-aturan ulun, tapi kati nau umbang bolum yo belo di tau mate. ¹⁷Koe nau umbang Io deniye penyurah: "Iko ene doko Imam nte turai-turai, ngaya aturan Melkisedek." ¹⁸Memang aturan yo tinombaling yo ono ene pinokore, ena aturan ene belo keo keturon ai koe ene belo di keo jodo, ¹⁹- koe aturan Taurat sama skali belo moit nte sempurna - tapi tmpondo noret nte kundong yo pawak buen, yo medmpet taka epo Allah. ²⁰Ai sama kati nau umbang endo belo di jadi na belo diang sumpah - memang dero sundok jadi imam belo makai sumpah, ²¹tapi Io diang sumpah, nulek koe Io yo befirman epoIo: "Tuhan sundok besumpah ai Io belo di anta noli: Iko ene doko Imam nte turai-turai" - ²²Ktine low Yesus ene doko nte jaminan ngket janji yo pawak turon. ²³Ai dero deo beta jadi imam aut koe dero nusan koe maut nte nokon ngjabat imam. ²⁴Tapi, koe Io nokon turai-turai, imamat-Iyo belo di dapet ensut epo ulun yo mak. ²⁵Koe ene Io kelian low nyelamat diang sempurna eka ulun yo koe Io ulet epo Allah. Koe Io bolum dor nte jadi Pengekang dero. ²⁶Koe Imam Olai yo ktine doko yo taka perlu: yodoko yo kudus, belo keo sala, belo lonsa, yo tenggang ngket ulun-ulun bedosa ai pawak ombo se sentah-sentah sorga, ²⁷yo belo di kati imam-imam olai yo mak, yo tongku olo arus miye korban nte dosaiyo se ai sundok ene bayu nte dosa umatiyo, koe nau umbang ene sundok gawi-Iyo sindai bute nte turai-turai, des Io miye kompu tonga-Iyo se nte korban ²⁸Koe aturan Taurat metoko ulun-ulun yo jut belo kuat kalu nte jadi Imam Olai, tapi sumpah, yo nulek sori se aturan Taurat, metoko Pea, yo sundok jadi sempurna sampe kden.

Chapter 8

¹Otang otang eka-eka yo kesah taka ene io doko: taka keo Imam Olai yo ktine, yo tunge mbo tadah sanan pnunge Yo Paling Olai mbo sorga,²ai yo nglayan ibadah mbo awa kudus, io ene mbo lang kemah yo beta-beta, yo tngkuat koe Tuhan ai makse koe ulun.³Koe tongku Imam Olai pinotoko nte mie korban ai persembahan ai koe ene Yesus perlu keo ise masam nte die.⁴Ena ka Io mbo dnia endo, Io sama skali belo anta jadi imam, koe mbo mndo sundok keo ulun-ulun yo mie persembahan ngaya aturan Taurat.⁵Pelayanan dero ene doko kedo ai amba ngket ise yo keo mbo sorga, sama kati yo nulek epo Musa, des io kakan nengkuat kemah: " Knenop ta, " ktine firman-Iyo, " se ikam nampa eka ene ngaya sontoh yo sundok pinokelak epo ikam mbo ombon tunten ene."⁶Tapi tmpondo Io sundok kuli ise masam pelayanan yo pawak aso buen beta, koe Io jadi Pngekang ngket janji yo pawak mulia, yo pnayak ombon janji yo pawak ombo.⁷Koe, ena perjanjian yo tela ene belo keo bila molon, belo anta dineto nua awa nte yo kduo.⁸Koe Io ngae dero des Io ngulek: "Se beta-beta iyo, anta ulet des iyo, " ktine ka doko firman Tuhan, "Aku anta mkeo janji bayu diang ulun Israel ai diang ulun Yehuda,⁹makse kati janji yo sundok pkeo Ku diang itak kakah dero, des aku ngop kayang dero nte moit dero baling ngket tana Mesir. Koe dero belo setia epo janji-Ku, ai Aku nolak dero, " ktine firman Tuhan."Jadi endo doko janji yo pekeo Ku diang ulun Israel sundok jman ene, "ktine doko firman Tuhan. "Aku anta mayak aturan-Ku lang akal keno dero ai nulis iyo lang kesong dero, jadi Aku anta jadi Allah dero ai dero anta jadi umat-Ku.¹¹Ai dero belo anta nutui matuk sama dero se, ktine lou sama erai buntung dero se diang ngulek: Tau ka se Tuhan! Koe dero eka-eka, burok tuo, anta tau se Aku.¹²Koe Aku anta kosang epo pnsala dero ai belo oli ngeno dosa-dosa dero."Koe Io bsara nau umbang janji yo bayu, Io ngulek se yo tela ene janji yo sundak jadi tuo. Ai ise yo sundok jadi tuo ai usang, sundok dmpet epo ktumar iyo.

Chapter 9

¹Beta ka janji yo tla lou keo aturan-aturan nte sembayang ai nte awa kudus tanpa ulun. ²Koe keo neraduh kemah, yoene yo awa la ono tingen ai mbo mne keo awa lowu pelita ai meja diang roti nte persembahan epo Allah. Awa endo nulek awa yo kudus. ³La sorin dinding diris keduo keo kemah nua yo nulek awaiyo paling kudus. ⁴Mbo mne keo perapen amas awa nuna jombu, ai peti awa janji, yo snalut knukup diang amas; mbo lang peti janji ene bekona jebul amas batok manna, goloy Harun yo pini kesuli ai bis-bis batu yo betulis janji, ⁵ai mbo ombon ene keo nukir duo mlekat penjaga yo nyelingu tokom pendamai. Tapi nau umbang endo belo dapet kesah taka tmpo ndo diang sara titip buntip. ⁶Ktine ka doko saraiyo awa kudus ene natur. Jadi imam-imam dor sumba epo lang kemah yo paling ono tingen ene nte ngelaku sembayang dero, ⁷tapi epo lang kemah yo keduo pulun Imam Olai tingen yo sumba sindai lang erai taon, ai arus diang daya yo pndiye io koe io se ai koe pensala-pensala yo gawi umatiyo diang koe belo di tau. ⁸Diang endo Roh Kudus mekelak, se boyan epo awa yo kudus ene belo pian wingkang, kola-kola kemah yo tla ene aso keo. ⁹Ene doko pemerawet des jman tmpo ndo. sengkono diang ene deniye korban ai pendiye yo belo kuli nyempurna dero yo miye korban ene ngaya pengenanam lang kesong dero, ¹⁰koe ekaiyo ene, kati okan singkap danum dawen ai bemasam bui bunjur, ene pulun nte aturan-aturan bolum mbo denia endo, yo pulun penakai sampe des ulet jman penembayu. ¹¹Tapi Kristus sundok ulet jadi Imam Olai nte nau umbang yo buen yo anta ulet: Io sundok ngelalo kemah yo pawak olai ai yo bol sempurna, yo makse di tanpa ulun, - retiiyo belo di sumba yo tenampa endo,- ¹²ai Io sundok sumba sindai nte turai-turai epo lang awa yo kudus makse diang moit daya domba yo song ai daya anak lembu, tapi diang moit daya-Iyo se. Ai diang ene Io sundok kuli losu lopos yo kden. ¹³Koe, ena daya domba yo song ai daya lembu yo song ai temprik abu lembu burok mekudus dero yo lonsa, apa kompu tonga dero bnerse, ¹⁴pawak da se ene daya Kristus yo koe Roh yo kden sundok miye kompu tonga-Iyo se epo Allah jadi pendiye yo belo keo bila molon, anta merse kesong ai pengenanam taka ngket gawi gata taka yo belo tadah, apa taka kuli sembayang epo Allah yo bolum. ¹⁵Koe ene Io yodoko Pengetete ngket janji yo bayu, apa dero yo sundok benomba kuli bagi yo kden yo jenanji ene, koe Io sundok mate nte nous pensala-pensala yo sundok nelaku kola-kola janji yo des tla. ¹⁶Koe mbo mone keo penape, mbo mne arus pinotau nau umbang pengenate penampa penape ene. ¹⁷Koe penape ene bayu nangkan beta ena penampa penape ene sundok mate, koe io belo di penakai, kola-kola penampa penape ene aso bolum. ¹⁸Koe ene ka doko, moko janji yo tla belo di nangkan beta ena belo di keo daya. ¹⁹Koe des sundok Musa mmtau eka-eka prenta aturan Taurat epo pupus umat, io ngalek daya anak lembu ai daya domba song diang danum, ai bulu mea ai hisop, laju nemprik kitab ene se ai eka umat, ²⁰ulak ngulek: "Endo doko daya janji yo tnetap koe Allah nte ngkam." ²¹Ai low kemah ai eka kakas nte sembayang temprik iyo ktine ba diang daya. ²²Ai alang eka ise masam binorese ngaya aturan Taurat diang daya, ai ena belo keo pembaling daya belo keo ampun. ²³Jadi eka ise masam yo sama nau diang ise yo keo mbo sorga arus binorese diang sara ktine, tapi kakas surgawi se koe pendie-pendie yo pawak buen se ene. ²⁴Koe Kristus mba di sumba epo lang awa kudus tanpa ulun yo pulun sama nau tingen ngket yo beta-betaiyo, tapi epo lang sorga se nte ngadap onon Allah jodoiyo nte taka. ²⁵Ai Io mba di sumba nte bjuli-juli mie kompu -Iyo se, kati Imam Olay tongku taun sumba epo lang awa kudus diang daya yo makse daya iyo se. ²⁶Koe ena ktine Io arus bjuli-juli kiso kanam sesa ngket dnia endo tnampa. Tapi tempo ndo Io pulun sindai bute mkelak kompu-Iyo, des jman pngabis nte moding mrese dosa koe korban-Iyo. ²⁷Ai sama kati ulun tnetap nte mate pulun sindai bute, ai sundok ene pnutus koe Allah, ²⁸ktine low Kristus pulun sindai bute ngorban-Iyo se nte nanggung dosa ulun deo. Sundok ene Io anta mkelak kompu-Iyo sindai nua belo di diang nanggung dosa nte mie slamat epo dero, yo minte Io.

Chapter 10

¹Lang aturan torat pulun keo umbang prawet-prawet tingen nau umbang kslamat yo anta ene, pian se nau kslamat ene se. Koe ene diang korban ene due-due, yo tiap taun dor gnawi. Aturan torat belo anta nampa smpurna dero yo sundok lumpat lang gawi gata ene. ²Koe ena umbang ene kate jadi, pasti ulun belo anta mie korban prsmbahan oli. Koe dero yo nglaku ibadah ene belo dikingat oli se dosa ngket sundok kono bui sindai nte turai-turai. ³Tapi koe korban-korban ene ube ulun tongku taun pinoknop se keo dosa. ⁴Koe daya lmbu song ktine low daya domba song belo anta kuli ngisu ngloli dosa. ⁵Koe ene des Io sumba epo dnia, Io ngulek: "Korban ai die sokoi belo di tngkakan Ko tapi Iko sundok nydia kompu nte oki. ⁶Epo korban yo tnuna ai korban nte ngisu ngloli dosa belo di sngkono mbo-Iko. ⁷Laju Aku ngulek, beta-beta yo Aku se ulet; Lang Alkitab keo tnulis umbang Aku nte nglaku ptua-Ko, o Allah Ku". ⁸Ela ombo Io ngulek: "Koban ai die sokoi, korban yo tnuna ai korban nte ngisu ngloli dosa belo di tngkakan-Ko ai belo di sngkono mbo-Iko, beta ko die sokoi ene nyarak umbang aturan Torat. ⁹Ai ulek Io nua; "beta Aku ulet nte nglaku ptua-Ko. "Yo tla loli-Ko, apa kuli nengkuat yo kduo. ¹⁰Ai koe ptua-Iyo ene doko taka sundok pinoudus sindai bute nte turai-turai koe die sokoi kompu Yesus Kristus. ¹¹Sundok ene oli tongku imam nglaku tongku olo playanan ai dor bjuli-juli mie sokoi korban yo sama, yo belo anta kuli nte ngisu ngloli dosa. ¹²Tapi Io, sundok Io mie sokoi korban pulun sindai tingen koe dosa, Io tunge nte ndok kden ela tadah sanan Allah, ¹³ai tempondo Io minte jman yo tingen, des nte bali-bali-Iyo tnampa nte awa pnoda botis-Iyo. ¹⁴Koe diang erai korban tingen, Io sundok nampa ampurna nte ndok kden dero yo pinokudus koe-Iyo. ¹⁵Ai umbang nau ene Roh Kudus low ngulek epo taka, ¹⁶koe des sundok Io bpirman: Endo doko janji yo kakan tampa-Ku diang dero, sundok jman ene, "Io bpirman low: Aku kakan mayak aturan-Ku mbo lang kesong dero ai nulis yo mbo lang kno dero, ¹⁷Ai aku belo anta oli ngnop-ngnop nau dosa ai pnsala dero." ¹⁸Jadi ena koe eka ene kate pinokampun, belo di koyoh oli mie korban koe dosa. ¹⁹Jadi eraibuntung-eraibuntung, koe daya Kristus taka tempondo belo dikeo nte gaer oli nte kuli sumba epo lang awa kudus, ²⁰Koe Io sundok ngingkang boyan yo bayu ai yo bolum nte taka nglalo dinding pngekang, yo ene kompu tonga-Iyo se, ²¹ai taka keo Imam Olai nte pngutok Lou Allah. ²²Koe ene ale taka nyruku Allah diang kesong buen ai diang iman yo turon, koe kesong taka sundok binorse ngket kno kesong yo dat, ai kompu tonga taka sundok bnui diang danum yo lio. ²³Alo ka taka skurut miet epo ise yo sundok pili taka nte pnglawo bolum taka, koe Io yo ngnjanji ene stia. ²⁴Ai alo taka bako jni apa taka bako awat lang kasih ai lang gawi buen. ²⁵Nang beta taka belo lumpat mbo kumpulan-kumpulan ibadah taka, kati pnepet ulun-ulun yo mak, tapi alo taka bako tutui bako batuk, ai tambah moyoh nglaku ktine onon se olo Tuhan yo duni aut. ²⁶Koe ena taka diang ptua taka se memang nampa dosa, des sundok taka kuli pntau ubang ise yo kono, moko ene belo dikeo oli korban nte ngisu ngloli dosa ene. ²⁷Tapi yo keo ube yo doko pngnate, yo nte nampa kanam bol ktakut kanam nte itek kono ukum ai nte itek api yo raya beta, yo anta nte msia eka ulun tuju nglawan. ²⁸Ena keo ulun yo belo trima diang aturan Musa, io kono ukum pate ulak belo dikeo kanam kosang, leka ngket otang pmsara duo ena belo tolu kongo ulun saksi. ²⁹Aso pawak ries aso ukuman yo pinokitek epo io yo nganja Pea Allah, yo ngotus se lonsa daya prjanjian yo mkudus iyo, ai io yo nguja Roh kasih karunia? ³⁰Koe taka tau se Io yo ngulek. "Nte ngmbales ene mpun-Ku. Aku doko yo nuntut nte ngmbales." Ai aso: "Tuhan anta ngukum umat-Iyo." ³¹Bol-bol pngworing, ena toyak epo lang kayang Allah yo bolum. ³²Knop ka ikam nau umbang yo sundok lalo. Des sundok ikam kuli nte pa, ikam deo sesa koe ikam btahan lang bkokes bkomer ndok gulugali, ³³montuk ikam nte ulun eti koe nte reko toan ai nte kanam sesa, ktine lou montuk ikam lumpat kono sesa kati dero yo gnawi ktine. ³⁴Memang ikam sundok jadi lumpat kono lang ksesa ulun-ulun kono ukum ai des jman pngkeo kam kono alek diang pnaksa, ikam nrima umbang ene diang kanam ego, koe ikam tau, se ikam keo pngkeo yo pawak buen ai yo belo di tau waliu nau yo oli. ³⁵Koe ene nang beta ikam ngndikah kprcaya kam, koe roa upa yo minte ikam. ³⁶Koe ene ikam arus buket beta, apa des sundok ikam nglaku ptua Allah, ikam kuli ise yo sundok jnanji ene. ³⁷Koe belo di olah, toro ile-ile bute aso, ai Io yo kakan ulet, sundok keo, belo di anta nanggo pngulet-Iyo. ³⁸Tapi ulun-Ku yo, kono anta bolum koe iman, diang ena io ore lumpat, moko ene Aku belo dianta sngkono diang iyo." ³⁹Tapi taka makse ulun-ulun yo ore lumpat ai jadi nte mate, tapi ulun-ulun yo prcaya ai kuli bolum.

Chapter 11

¹Iman ene doko tondal ngket eka ise masam yo kundong taka ai bukti ngket eka ise masam yo belo di itan taka.

²Koe iman doko sundok dnie ksaksian epo itak kakah taka. ³Koe iman taka paham, se dña sundok tnampa koe firman Allah, sampe ise yo itan taka sundok tnampa ngket ise yo belo di melak. Koe iman Habel sundok mie epo Allah korban yo aso buen se korban Kain. Diang ktine io kuli ksaksian epo io se, se io kono, koe Allah sngkono kesong epo die sokoi iyo nte iyo nymbah ene ai koe iman io aso bsara, des sundok io mate. ⁵Koe iman Henokh rengkat, apa io belo kiso kanam mate, ai io belo di nruku, koe Allah sundok ngengkat-iyu. Koe onon io rengkat, io kuli ksaksian, se io sngkono mbo kesong Allah. ⁶Tapi ena belo keo iman belo anta ulun sngkono mbo kesong Allah. Koe ise-ise ulun yo skuleng epo Allah, io arus prsaya se Allah keo, ai se Allah mie upa epo ulun yo beta-beta meto Io. ⁷Koe iman, doko Nuh - diang tutui Allah nau umbang yo belo di pian melak - diang patoh ngraduh bahtra nte nylamat kluarga-iyu; ai koe iman ene io ngukum dña, ai io pinotoko nte nrima yo kono, sngkono diang iman-iyu. ⁸Koe iman Abraham patoh, des io bnomba nte jukat epo ja yo anta trima-iyu jadi tana psaka mpun-iyu, laju io jukat diang belo di tau epo awa pngitek io. ⁹Koe iman io nongos mbo tana yo jnanji ene ungka-ungka makse mbo tana io se ai mbo mne io nongos mbo pondok diang Ishak ai Yakub, yo lumpat jadi prsisin jnanji yo erai ene. ¹⁰Koe io minte-minte kota yo keo tondal, yo nrnsana ai tinongkuat koe Allah. ¹¹Koe iman io low ai Sara kuli pngkate nte keo upus, beta ko umur dero lalo aut, koe io tau se Io, yo mie janji ene stia. ¹²Koe ene doko, jadi ngket erai kongo ulun, ulak ube ulun yo sundok pate pusuk, nyoret deo upus, kati bintang mbo langit ai kati krsik mbo isan tasik, yo belo di taro itung kdeo-iyu. ¹³Lang iman eka dero endo sundok mate ulak jadi ulun-ulun yo belo di kuli ise yo jnanji ene, tapi yo kito tingen ngket oro ai nguai-nguai epo ene ai yo ngangkan, se dero ene ulun nyumba ai peri mbo dña endo. ¹⁴Koe dero yo ngulek ktine mkelak, se dero diang ngno beta meto danum tana. ¹⁵Ai ena ka lang nau umbang ene dero knop se tana ngket pngulet dero bai, yo sundok dikah dero, dero keo pnympt nte uli epo lane. ¹⁶Tapi tempo ndo dero ngno danum tana yo buen se ene, yo doko erai danum tana sorga. Koe ene Allah belo di mai nulek Allah dero, koe Io sundok nydia erai kota nte dero. ¹⁷Koe iman doko Abraham, des io snoba, mie Ishak nte korban. Io, yo nrima janji ene, bre-la-rela mie nte korban pea-iyu yo tunggu ene, ¹⁸betako epo io sundok nulek: "Upus yo ngket Ishak doko yo anta nulek upus ko". ¹⁹Koe san io, se Allah keo kuasa nte nmbolum ulun-ulun tontan ngket ekang ulun mate. Ai ngket lane io ungka-ungka sundok nrima-iyu nua. ²⁰Koe iman doko Ishak, ulak meti oro epo ono, mie berkat-iyu epo Yakub diang Esau. ²¹Koe iman doko Yakub, montuk des nte io duni mate, mie berkat epo duo kongo pea Yusuf, laju nymbah ulak bsrmpo mbo utok goloi-iyu. ²²Koe iman doko Yusuf onon io ngabis kesong nyampe nau mbang pmbaling ulun-ulun Israel ai mie pesan nau umbang tulang-tulang-iyu. ²³Koe iman doko Musa, sundok io kinomekus, nona kola tolu bulan koe ulun tuo-iyu, koe itan dero, se pea ene regok nau-iyu ai dero belo di takut se prenta raja. ²⁴Koe iman doko Musa, des bujang mba di ganggu nulek pea putri Firaun, ²⁵koe io gawal ube bolum bnasa diang umat Allah se nte ile-ile tingen kiso kanam bolum snang ngket dosa. ²⁶San io ene triaw koe Kristus ene doko ktatau yo pawak olai se eka-eka pngkeo Mesir, koe pngeti-iyu tadah io epo upa. ²⁷Koe iman doko io sundok ngndikah Mesir diang belo di takut epo pngmara raja. Io btahan sama kati io kito ise yo belo melak. ²⁸Koe iman doko io nampa Paskah ai nmprik daya, apa pngmpate pea-pea tuo tingen ene nang nngkil dero. ²⁹Koe iman doko dero sundok kentas Tasik Mea sama kati nglalo tana koreng, tapi ulun-ulun Mesir monsor, des dero nyoba low. ³⁰Koe iman doko roros dinding kota Yerikho, des sundok kota ene kinoliling turu olo kola-iyu. ³¹Koe iman doko Rahab, bawe lonte ene, belo di lumpat mate diang ulun-ulun triaw, koe io sundok nrima pngntori-pngntori ene diang buen. ³²Ai ise aso yo arus ulekku? Koe aku belo anta smpat, ena aku kakan nyrita nau umbang Gideon, Barak, Simson, Yefta, Daud diang Samuel ai deo nabi, ³³yo koe iman sundok kuret nglawan krajaan-krajaan, nggawi yo kono, kuli ise yo jnanji, nokom bowa singa-singa, ³⁴mlnsop api raya. Dero sundok lopos ngket daro mndau, sundok kuli pnggalak des kasa, sundok jadi galak des prang ai sundok mupuk malu sampe mundur buyo makat jut tntara musuh. ³⁵Bawe-bawe sundok nrima ulun-ulun dero yo sundok mate, koe pinosuli. Tapi ulun-ulun yo mak belo di nyanda kompu tonga-iyu knurow ai belo kakan ena nutis, apa dero kuli pngnyuli yo tambah buen. ³⁶Keo low yo knije ai knurow, sampe sniret ai pinosumba lang sper. ³⁷Dero tnurak diang batu, knoyot diang grgaji, pnate diang mndaw; dero nyabu ulak makai upak domba ai upak bembe ulak ssa koe kurang kambit, kbnasa ai knurow knsa. ³⁸Dña endo belo di pantas nte dero. Dero ngl sabu mbo padang gurun ai mbo tunden-tunden, lang liang-liang ai luang-luang ekang tunden. ³⁹Ai eka dero belo di kuli yo jnanji ene, betako iman dero sundok mie epo dero ksaksian yo buen. ⁴⁰Koe Allah sundok nydia yo aso buen ene nte taka, ena belo taka dero belo di kuli sampe epo smpurna.

Chapter 12

¹Koe taka deo saksi yo ka kati jaun yo nglekum taka, ale taka ngloas eka pnyekoit yo nte nengkoyat ai dosa yo kola ndo mombong taka. Ai buket bako awet lang bako awet yo arus gawi taka memang. ²Alo taka nggawi iyo diang mato yo btadah epo Yesus, yo ngayak taka lang iman, ai yo moit iman taka ene jadi bol kbuen, yo diang belo nyanda se nte uja, buket ngoson salip nte nganti kego yo sinodia nte Io, yo tempondo tunge ela tadah sanan Allah. ³Nang beta ikam kewot se-Io, Io yo buket nte kiso kanam kono lawan kdras ene mitek Io ngket tadah ulun-ulun bdosa, apa ikam nang jadi loma ai pungen. ⁴Koe lang kokes komer kam nglawan dosa belo pian ikam sampe baling daya. ⁵Ai sudok kewot be ikam se tutui batuk epo ikam kati tutui batuk bang tuo epo bang pea: "o pea-pea ku, nang ikam nau-nau diang tutui batuk Tuhan, ai nang ikam pungen ena ikam tnge-Iyo; ⁶koe Tuhan nokai tongku ulun yo tngkosang-Iyo, ai Io ngrempuk tongku ulun yo angkan-Iyo se pea-Iyo." ⁷Moko yo ikam trima ka diang rempuk ngket Allah anggap kam ka kati mpes ngket uma kam. Koe pini be keo pea yo belo pini kono mpes uma iyo? ⁸Ena ikam belo lumpat kono tokai kati pea yo mak, ene rti yo ikam makse se pea-Iyo memang. ⁹Ktine low kati taka keo uma mbo dnia endo. Io ngae ngo taka, ai taka ngnuon se io. Ne doko, ise aso diang Bapa rohani taka yo mbo sorga, arus yo taka bet-bet aso aya oyot diang-Iyo apa taka bolum. ¹⁰Ulun tuo taka yo mbo dnia endo nutui matuk taka keo jepen yo idok montuk sampe yo sngkono san dero. Tapi Allah ngae ngo taka nte taka se apa buen, apa taka kuli bagian lang kekudus-Iyo. ¹¹Memang ka des taka kono kae ko ene, itek pngmara ai mpes ene belo di buen kanam yo nte taka knanam, makse ko nte nampa taka dat pngnanam tingen. Tapi oli ngket ene, nte taka yo sundok kono kae ko ene, itek mara ai mpes ene nampa taka bolum kati ptua Allah, ai mkulet kanam buen mbo taka. ¹²Koe ene, pgalak tangan kam yo lome ai bokut kam yo ngrkluk ene! ¹³Malan ka dor mbo boyan yo belo gelut gensung, apa botis kam yo pengkal ene belo blesou, tapi ube jadi ale. ¹⁴Bkomer ka apa dor bolum nyung diang eka ulun. Bkomer low apa nte bolum Kudus, toko nte Tuhan. Koe ndok belo erai kongo ulun kuli kito Tuhan ena belo bolum kudus. ¹⁵Jaga kam beta-beta nang sampe ndok erai kongo ulun oro se kasih karunia Allah, apa nang keo yo kati kayu tau nte ngmelu ela ekang-ekang ikam yo tau nte nampa ikam pae ai mesesa deo ulun melu koe iyo. ¹⁶Jaga kam apa nang keo ulun yo bolum ngmoen pokeng, diang nang kati ulun-ulun yo keo kno belo kroan kati Esau, yo ngjual mpun pngkeo pea tuo tingen nte erai ktowong pnyokan. ¹⁷Ikam tau se Esau ene oli kakan se brkat ene ngket uma iyo, tapi io belo tinorima. Koe beta ko diang nangis nungul io meto sara nte nungkuen pnsala iyo, boyan nte ene belo dikeo oli. ¹⁸Eraibuntung-eraibuntung taka belo di ngadap kati umbang yo adap bangsa Israel bai bareh. Dero ngadap ise yo dapet bulem, yo ene tunden sinai diang keo api yo dolan; dero ngadap seom, ngelepting diang brubu; ¹⁹dero ngadap oyon temburi, diang oyon pirman. Des ulun-ulun Israel kringo oyon ene, dero tindu beta-beta apa oyon ene sdang oli bsara epo dero. ²⁰Keo dero belo klian kringo prenta yo ulet ngket oyon ene. Koe oyon ene ngulek, "Eka yo mulem tunden ene, belo nyanda tontan korik-kotok be ise ka, arus tnimpa diang batu ndok mate." ²¹Ise yo itan ulun-ulun Israel ene deras beta sampe Musa ngulek, "Aku takut ulak kanam ngrkitik beta!" ²²Mokin ka ube, ikam sundok ulet epo tunden Sion ai kota Allah yo bolum, yo ene Yerusalem sorga diang bribu mlekat iyo. ²³Ikam lumpat mbo awa mangkoruku yo rame, mangkoruku jut pea-pea Allah tuo tingen, yo karan-karan iyo keo tnulis lang sorga. Ikam ulet ngadap Allah, Akim nte eka ulun. Ikam ngadap roh-roh ulun yo kono, yo sundok pinojadi smpurna. ²⁴Ikam ulet ngadap Yesus, Pmetete janji yo bayu ene; ikam ngadap tmperik daya yo ngjamin umbang yo pawak aso buen se yo jnamin koe daya Habel. ²⁵Keo ene, jaga-jaga ikam nang sampe ikam belo kakan nrima Io yo bsara ene. Koe ena dero yo belo kakan nrima Io yo ulet epo dnia endo ai nyampe kabar ngket Allah, belo anta kuli buyo. Aso da taka endo yo kringo Io bsara ngket sorga! Ena taka belo kakan nempaning-Iyo, belo anta taka kate lopos! ²⁶Des jman ene oyon-Iyo nampa dnia skukui. Tapi tempondo Io keo janji, "Sindai nua, Aku anta kakan ngukui lngkat se dnia tingen tapi ndok langit low." ²⁷Pngesah "sindai nua" ene mkelak se pupus dnia yo sundok tnampa ene anta knukui ai kakan neloli, apa yo toro pulun iyo yo belo tau skukui. ²⁸Koe ene, moko yo taka bsukur beta epo Allah, koe taka kuli ngket Io Krajaan yo belo tau skukui. Moko yo taka bsukur ai nglaku ibadat epo Allah diang hormat ai takut, kati umbang yo ptua-Iyo se. ²⁹Keo Allah taka kati api yo tau msia.

Chapter 13

¹Nang dnikah bako kosang diang erai buntung ene! ²Nang ka ikam kewot mie awa singgah smole epoulun, koe diang gawi ktine keoulun yo kolan-kolan se sundok nrima mlekat.³Knonop ka se ulun-ulun yo nukum, koe ikam se low doko ulun-ulun nukum. Ai knop ka epo ulun-ulun yo kono gnonsa koe ulun-ulun yo keo kuasa, koe ikam se low aso bolum mbo dnia endo. ⁴Moko iyo ikam bol ngnuon epo pngempnan ai nang ka ikam ngremis awa pnurui, koe ulun-ulun lonte ai pokeng anta ukum Allah⁵Nang ka ikam jadi batak pitis sen ai puli ka diang yo keo mbo ikam. Koe Allah sundok keo firman: "Aku belo anta di belo nyanda se ikam ai Aku belo anta ngendikah ikam." ⁶Koe ene diang percaya taka kuli ngulek: "Tuhan ene doko Pngawatku. Aku belo anta takut. Ise yo dapet gawi ulun epo Aku?"⁷Knop ka diang pngutok-pngutok kam, yo sundok nyampe firman Allah epo ikam. Eti ka nau pnyundok bolum dero ai snarak ka nau iman dero. ⁸Yesus Kristus nokon sama, ngket pre ndok olo ndo sampe turai-turai. ⁹Nang ka ikam pinoketang koe tutui batuk ngket baling. Koe yo buen yo doko, se kesong kam pinoturon diang kasih karunia ai mba di diang bmasam okan kinan yo mba di keo jodo nte dero yo ngaya aturan-aturan okan kinan masam ene. ¹⁰Taka keo awa korban ai ulun-ulun yo ngurus kemah belo kate lumpat kuman yo ngket lang ne. ¹¹Koe kompu korik-korik yo daya iyo noit sumba epo awa kudus koe Imam Olay nte korban ngloli dosa, tnuna baling se kemah. ¹²Ene low ka doko moko Yesus sundok snesa ela baling se jawong pagar nte mkudus umat-Iyo diang daya-Iyo se. ¹³Koe ene alo taka malan ngompoh-Iyo ela baling se kemah ai nantai uja yo mitek-Iyo ene. ¹⁴Koe mbo mendo taka belo keo awa nongos yo kden; taka meto kota yo anta ulet. ¹⁵Koe ene alo taka, koe Io, dor mie korban sukur epo Allah, yo ene pnyurah yo ngmulia karan-Iyo. ¹⁶Ai nang ka ikam kewot gawi buen ai mie bantuan, koe korban-korban yo ktine ka doko yo sengkono epo Allah. ¹⁷Patoh ka epo pngutok-pngutok kam ai ngaya ka nte dero, koe dero ngenjaga diri nyawa kam, kati ulun-ulun yo arus nanggung ene. Diang ktine dero anta nggawi yo diang ego, mba di diang ngemamai, koe nau umbang ene belo di keo asil iyo nte ngkam. ¹⁸Bdoa ka dor nte kain; koe kain percaya, se pngenanam kesong kain buen, koe lang ise masam nau umbang kain kakan nau bolum yo buen. ¹⁹Ai diang sara pinotoko aku matuk ikam, apa ikam nglakuiyo, apa aku resi tinompuli epo ikam. ²⁰Jadi Allah damai sjahtra, yo koe daya janji yo kden sundok noit nua ngket ekang ulun mate Pngamu Yo Paling Ombo eka-eka domba, yo ene Yesus, Tuhan taka, ²¹mokoioyo nglengkap ikam diang eka-eka yo buen nte nglaku pengkakan-Iyo, ai nggawi mbo lang taka ise yo sengkono epo-Iyo, koe Yesus Kristus. Nte Io doko kmulia sampe turai-turai! Amin. ²²Ai aku matuk ikam, erai buntung-erai buntung, apa otang batuk endo trima kam diang kesong rela, beta ko idok tingen surat ku endo epo ikam. ²³Apa tau, se Timotius, erai buntung taka, sundok malan. Peles des io sundok ulet, aku anta nuntun ikam sama-sama diang io. ²⁴Snampe salam epo eka pngutok kam ai eka-eka ulun kudus. Tinorima salam ngket erai buntung-erai buntung mbo Italia. ²⁵Kasih karunia sama-sama diang ikam eka-eka.

1 Peter

Chapter 1

¹Engket Petrus, rasul Yesus Kristus, epo ulun-ulun penyumba, yo keo mupus mbo Pontus, Galatia, Kapadokia, Asia Kecil ai Bitinia, ²yoene ulun-ulun yo penili, yo sengkono diang petua Allah, Bapa taka, ai yo pinokudus koe Roh, apa patoh epo Yesus Kristus ai nerima tmperik daya-Iyo. Mokoioyo kasih karunia ai damai sejahtera mokin ruak ruaw ombon ikam. ³Puji ka Allah ai Bapa Tuhan taka Yesus Kristus, yo koe rahmat-Iyo yo olai sundok ngemekus taka nua koe pengenyuli Yesus Kristus ngket ekang ulun mate, epo bolum yo ponu pengundong, ⁴nte nrima bagi yo belo tau tumar, yo belo tau merota ai yo belo tau layo, yo bekona mbo sorga nte ngkam. ⁵Yoene ikam, yo nasi nado lang kegalak Allah koe imankam desung ikam minte slamat yo sundok senedia nte pkelak mbo jman penyundok. ⁶Ego ka mbo nau umbang ene, tontan tmpo ndo ene ikam ile-ile arus belo buen kanam koe bemasam pengkono pengkena. ⁷Jodo ekaiyo ene yodoko nte mkelak keliyo imankam - yo pawak ombo aso uman iyo se amas yo tau waliw, yo nikap keliyoioyo diang api - sampe ikam kuli kono puji ai kemulia ai pengenuon mbo olo Yesus Kristus mkelak kompu-Iyo. ⁸Beta ko ikam belo pini kito Io, tapi ikam nengkosang-Iyo. Ikam persaya epo Io, beta ko ikam tmpo ndo belo kito-Iyo. Ikam ego koe pengego yo mulia ai yo belo dpet kesah, ⁹koe ikam sundok kerapet pengitek imankam, yoene bolumkam slamat. ¹⁰Slamat ene doko yo sinompti ndok tuyu koe nabi-nabi, yo sundok knesah ono koe tau ngket Tuhan nau umbang kasih karunia yo pinotoko nte ngkam. ¹¹Ai dero nyemпти beta des mone ai ktimbe yo petua koe Roh Kristus, yo keo mbo lang dero, yoene Roh yo onon se ene miye penyurah eka

nau umbang kesesa yo anta mitek Kristus ai nau umbang eka kemulia yo nyendikui sundok ene.¹²Epo dero sundok pinokelak, se dero belo ngelayan dero se, tapi ngelayan ikam diang eka ise masam yo sundok senampe tmpo ndo epo ikam diang tete dero, yo koe Roh Kudus, yo senuyu ngket sorga, nyampe kabar Injil epo ikam, yo doko nau umbang-nau umbang yo mlekat-mlekat kakan tau.¹³Koe ene neraduh buen-buen ta akal buenkam, bejaga ta ai payak ta eka pengundongkam ombon kasih karunia yo bniye epo ikam mbo des pengulet Yesus Kristus.¹⁴Bolum ta kati pea-pea yo patoh ai nang ngaya pengkakan ngenakos yo mekalah ikam des jman kebungangkam,¹⁵Tapi mokoioyo ikam jadi kudus mbo lang eka bolumkam sama kati Io yo kudus, yo sundok momba ikam,¹⁶koe keo tenulis: Kudus ta ikam, koe Aku kudus.¹⁷Ai ena ikam ngulek-Iyo Bapa, yoene Io yo belo meti wae mutus plikara eka ulun ngaya gawi gataio, jadi mokoioyo ikam bolum diang takut epo-Iyo kola-kola ikam nongos mbo denia endo.¹⁸Koe ikam tau, se ikam sundok tnous ngket sara bolumkam yo belo keo jodo yo mpunkam ngket itak kakahkam ene makse diang kakas yo tau rusak, mak lou diang pirak, mak lou diang amas,¹⁹makse ko diang daya yo larang, yoene daya Kristus yo sama kati daya anak domba yo belo keo merota ai belo keo bila molon.²⁰Io sundok penili des onon denia tenampa, tapi - koe ikam- Io bayu mkelak kompu-Iyo mbo jman penyundok.²¹Koe Io doko ikam persaya epo Allah, yo sundok mesuli Io ngket ekang ulun mate ai yo sundok ngemulia-Iyo, sampe imankam ai pengundongkam betadah epo Allah.²²Koe ikam sundok ngemberse kompu tongakam koe kepatoh epo yo kono, sampe ikam kuli ngelaku kosang se erai buntung yo persaya diang bol pengananam kesong buen, mokoioyo ikam beta-beta bako kosang diang bol kesongkam.²³Koe ikam sundok kinomekus nua makse diang bini yo tau tumar, tapi ngket bini yo belo tau tumar, koe firman Allah, yo bolum ai yo kden.²⁴Koe: "Eka yo bolum ene kati dikut ai eka kemuliaioyo kati bungo dikut, dikut jadi krep, ai bungo yo nyorak,²⁵tapi firman Tuhan nokon ndok turai-turai." Endo ka doko firman yo sampe Injil epo ikam.

Chapter 2

¹Koe ene noding eka-eka gawi gata triaw, eka masam akal dat ai bemasam pengkro, belo gawal se erai-erai ai btetenah. ²Ai jadi ka sama kati taru yo bayu kinomekus, yo dor kakan se jatas tolen ai yo rohani, apa koe ene ikam menduan ai kuli slamat, ³ena ikam beta-beta sundok kiso kanam kbuen Tuhan. ⁴Ai kompo ka epo-Iyo, batu yo bolum ene, beta ko noding koe ulun, tapi yo pnili ai kinonuon mbo dempet Allah. ⁵Ai koe ka ikam low pnakai jadi batu bolum nte nengkuat lou rohani, nte imamat kudus, nte mie persembahan rohani yo koe Yesus Kristus sengkono mbo Allah. ⁶Koe keo tnulis lang Kitab Suci: "Sebeta iyo, Aku mayak mbo Sion erai botu batu yo bpili, erai botu batu pmeturon yo rarang, ai ise yo percaya epo-Iyo, belo anta kono kmai." ⁷Koe ene nte ngkam, yo percaya, io rarang, tapi nte dero yo belo percaya: "Batu yo sundok noding koe tukang-tukang, sundok jadi batu pmeturon, sundok low nte jadi batu nte btebow ai jadi batu nte sengkawit." ⁸Dero sengkawit mbo mne, koe dero belo dipatoh epo firman Allah; ai nte ene memang jodo dero. ⁹Tapi ikam doko bangsa yo sundok pnili, imamat nte raja, bangsa yo kudus, umat mpun Allah se, apa ikam nyampe gawi gata yo olay ngket Io, yo sundok momba ikam baling ngket lang seom epo pa-Iyo yo ajaib: ¹⁰ikam, yo bai makse umat Allah, tapi yo tempo ndo sundok jadi umat-Iyo, yo bai belo di tinongkosang tapi yo tempo ndo sundok kuli tengkosang. ¹¹Erai buntung- erai buntung ku yo knosang, aku nsehat ikam, apa kati ulun nyumba ai pendenge, ikam ngidar ngket pengkakan iwoy ruang yo bkomer nglawan diri nyawa. ¹²Alo makai nau bolum buen mbo ekang bangsa-bangsa makse Yahudi, apa ena dero mtenah ikam se ikam ulun triaw, dero kuli meti iyo ngket gawi gata kam yo buen ai ngmulia Allah des olo Io nuntun dero. ¹³Patoh ka, koe Allah, epo eka-eka ulun yo keo kuasa, ktine epo raja yo keo kuasa paling ombo, ¹⁴ktine low epo wakel-wakel yo suyu iyo nte ngukum ulun-ulun yo gawi triaw ai ngnuon ulun-ulun yo keo gawi buen. ¹⁵Koe endo doko ptua Allah, yo ene apa diang gawi buen ikam nokom bowa akal idok ulun-ulun bungang. ¹⁶Bolum ka kati ulun bebas ai mba di kati dero yo sala gnuna kbebas ene nte nokom gawi dat dero, tapi bolum ka kati batak Allah. ¹⁷Kinonuon ka eka-eka ulun, tinongkosang ka erai buntung-erai buntung kam, takut ka epo Allah, kinonuon ka raja! ¹⁸O ikam, batak-batak, patoh ka diang bol ktakut epo pngentuon kam, belo di epo yo buen tingen ai yo lami lamay, tapi low epo yo rusi. ¹⁹Koe ene doko kasih karunia, ena ulun koe kingat se ptua Allah kiso kanam sesa yo mbi di arus kono io. ²⁰Koe dapet be nulek pujian, ena ikam kiso kanam pupuk palu koe ikam nggawi dosa? Tapi ena ikam nggawi buen ai koe ene ikam arus sesa, jadi ene doko kasih karunia mbo Allah. ²¹Koe nte ene doko ikam bnomba, koe Kristus low sundok sesa nte ngkam ai nape sontoh nte ngkam, apa ikam nyarak kati nau-Iyo. ²²Io mba di keo nggawi dosa, ai nipu ngakal mba di keo lang bowa-Iyo. ²³Des Io pnator snumpah, Io mba di males diang pator sumpah; des Io sesa, Io mba di ngontam, tapi Io nyrah ene epo Io, yo ngukum diang adel. ²⁴Io se sundok moson dosa taka lang kompu-Iyo mbo kayu salib, apa taka, yo sundok mate koe dosa, bolum nte yo kono. Koe paya-paya jail-Iyo ikam pinokale. ²⁵ Koe bune ikam tang kati domba, tapi tempo ndo ikam sundok mulik epo yo keo pnyekamu ai mliara diri nyawa kam.

Chapter 3

¹Ktine lou ikam, o bang bawe, ngaya ka epo song panan kam, apa ena keo ngket dero yo belo patoh epo Firman, dero lou bdi koyoh diang pmensara jadi persaya epo Yesus koe gawi gata bawe iyo,²ena dero kito, ktimbe kberse ai bolum bawe dero yo takut se Allah.³Raji ragam kam nang yo melak ela baling tinggen, yo ene diang mindir-mindir balo, makai amas ena belo diang nyua pnyepakai yo buen-buen,⁴tapi raji ragam kam ene doko lang kesong yo melim diang raji ragam yo belo anta mapos yo ulet ngket roh yo lami lamai ai tenang, yo keo uman beta mbo mato Allah.⁵Koe ktineka doko umbang iyo bang bawe kudus bai bareh braji, yo ene bang bawe yo mayak pngundong iyo epo Allah; dero ngaya epo song iyo,⁶sama kati Sara patoh epo Abraham ai nmpapa se io tuan. Ai ikam ene doko pea-pea iyo, ena ikam nampa gawi buen ai belo takut nte ptako.Ktine lau ikam, o bang song, bolumka diang buen akal diang bawe kam, koe dero ene belo keo kuat kalu! Kinonuon ka dero nte tman sama ngempun ngket kasih karunia, yo ene pnyembolum, apa doa kam nang bbombong.⁸Ai pnyundok iyo, moko yo ikam eka-eka kerai surah kesah, kerai pngenanam, kosang se erai-erai buntung, sayang ai nang ngkeh-ngkeh,⁹ai nang ka ngbales gawi dat diang gawi dat ktine lou pator sumpah diang pator sumpah, tapi mokin ube, moko yo ikam mie berkat, koe nte ene doko ikam bnomba, yo ene nte kuli berkat. Koe :¹⁰" Ise yo kakan kakan gawal se bolum ai kakan kito olo-olo buen, io arus ngnjaga dola iyo epo yo dat ai teber iyo epo pmesara-pmesara yo ngakal. ¹¹Io arus oroh ngket yo dat ai nggawi yo buen, io arus meto bolum damai ai bkomer naket iyo.¹²Koe mato Tuhan btadah epo ulun-ulun kono, ai tlingo-Iyo epo pnindu dero yo tindu awat, tapi wae Tuhan nglawan ulun-ulun yo keo gawi gata dat. "¹³Ai ise ka yo anta keo gawi dat epo ikam, ena ikam moyoh keo gawi buen? ¹⁴Tapi betako ikam arus ssah lou koe yo kono, ikam anta ego beta. Koe ene nangka ikam takut ise yo takut dero ai nangka tkojet.¹⁵Tapi pinokudus ka Kristus mbo lang kesong kam nte Tuhan ! Ai siap-siap ka des jman ise ka nte nuing epo tongku-tongku ulun yo tindu nket ikam nau yo knundong io keo mbo ikam, tapi arus be diang lami lamai ai ngnuon ulun, ¹⁶ai diang pngenanam kesong yo brese, apa dero, yo mtenah ikam koe bolum kam yo buen lang Kristus, jadi mai koe ptenah dero ene.¹⁷Koe pawak buen ssesa ngke gawi buen, ena nau umbang ene mbo ptua Allah, se ssesa ngke gawi dat.¹⁸Koe Kristus lou sundok mate sindai bute nte eka-eka dosa taka, Io yo kono nte ulun-ulun yo belo kono, apa Io moit taka epo Allah; Io, yo sundok pnate lang umbai-Iyo kati ulun, tapi yo sundok pinosuli ngaya Roh, ¹⁹ai mbo lang Roh ene lou Io nyampe Injil epo roh-roh yo mbo lang sper, ²⁰yo ene epo roh-roh dero yo ono des jman Nuh belo patoh epo Allah, des Allah nokon minte diang doloh des Nuh desung ngraduh praw olai iyo, la mone pulun idik, yo ene walu kongo ulun, yo sinolamat ngke owa olai.²¹Ikam lou tmpondo sinolamat ngke pmerawet iyo, yo ene baptis - jodo iyo makse nte ngmberse kremis kompu tonga yo melak, tapi nte tindu keno kesong epo Allah - koe pngenyuli Yesus Kristus,²²yo tunge mbo tadah sanan Allah, sundok Io dombo epo sorga des sundok eka-eka mlekat, kuasa ai kegalak patoh epo-Iyo.

Chapter 4

¹Jadi, koe Kristus sundok kiso kanam ksesah kompu tonga, ikam low arus kendapo kompu tonga kam diang pengenanam yo ketine, koe ise yo sundok kiso kanam ksesah kompu tonga, io sundok sdang nampa dosa-, ² apa des yo aso toro nang pakai kam nte ngaya pengkakan ulun, tapi ngaya petua Allah.³Koe sundok deo jman pakai kam nte nglaku petua ulun-ulun yo belo tau se Allah. Ikam sundok bolum lang bebasam pengkakan ngempu, pengkakan, mauk, ungan ruak ruau, kumpulan ngisop ai nyembah berhala yo nusan. ⁴Koe ene dero eran, se ikam belo ngaya nyoso kompu tonga sama-sama dero mbo lang tenjulong yo belo keo tadah yo sama, ai dero metenah ikam. ⁵Tapi dero arus nanggung ene epo Io, yo sundok siap ba aut nte ngukum ulun yo bolum ai yo mate. ⁶ Koe ene doko moko Injil sundok snampe low epo ulun-ulun mate, apa dero, sama kati eka-eka ulun, nukum kati nlaku mbo ulun; tapi koe roh kuli bolum ngaya petua Allah.⁷Penyundok eka-eka yo ene sundok dmpet. Koe ene jnaga kompu tonga kam ai jadi ka tngang, apa ikam kuli bdoa. ⁸ Tapi yo paling ono: knosang beta-beta epo sama ikam se, koe kosang nokom deo beta dosa. ⁹Die ka awa nte singgah smole epo erai-erai belo di diang mara-mara.¹⁰Bako layan diang erai-erai, sengkono diang karunia yo sundok knuli tongku ulun yo jadi tukang atur yo buen ngket kasih karunia Allah. ¹¹ Ena keo ulun yo bsara, koe ka io bsara kati ulun yo nyampe firman Allah; ena keo ulun yo nglayan, koe ka io nglaku yo diang pngelian yo die Allah, apa Allah kino mulia lang eka ise masam koe Yesus Kristus. Io doko yo keo kemulia ai kuasa sampe turai-turai yo! Amin.¹²Erai buntung-erai buntung yo knosang, nang ka ikam bengong se dolan api kurow ksa yo ulet epo ikam nte ngikap, ungka-ungka keo-keo ka yo puga nte nengkono mitek ikam. ¹³Mokin ube, ego ka, sengkono diang bagian yo kuli kam lang ksesa Kristus, apa ikam low kate buen kanam ai ego beta des jeman Io mekelak kemulia-Iyo. ¹⁴Snang beta ka kanam bolum kam, ena ikam kono kesah triaw koe karan Kristus, koe Roh kemulia, yo ene Roh Allah keo ela ikam. ¹⁵Nang ka keo lelu mbo ikam yo arus sesa koe ngempate, ngako,gawi triaw, nggramas. ¹⁶Tapi, ena io sesa koe jadi ulun kristen, apa nang ka io mai, tapi koe ka io ngemulia Allah lang karan Kristus ene.¹⁷Koe tempondo sundok sampe des yo ukuman kakan tnindu, ai mbo blai Allah se yo arus yo tla snidang. Ai ena sidang ene tnindu mbo taka, ketimbe ka nau penyundok yo mbo dero yo belo persaya se Iljil Allah? ¹⁸ Ai ena ulun yo kono alang-alang belo sinolamat, ise yo anta tkono diang ulun triaw ai ulun bdosa? ¹⁹Koe ene buen ka low dero yo arus sesa koe petua Allah,nyrah diri nyawa io,diang dor keo gawi buen, epo Penampa yo stia.

Chapter 5

¹Aku matuk tuo-tuo sidang mbo ekang ikam, aku endo tman tuo-tuo sidang ai yo taw beta ksesa Kristus, yo low anta kuli bagian lang kmulia yo kakan pinokelak anta. ²Ginombala ka kowon domba Allah yo keo mbo ikam, nang diang pnaksa, tapi diang kesong rela sengkono diang ptua Allah, ai nang koe kakan meto asil, tapi diang bol kesong kakan nglayan. ³Nang ka ikam keo gawi ungka-ungka ikam kakan mrenta dero yo tnape epo ikam, tapi moko iyo ikam jadi sontoh nte kowon domba ene. ⁴Jadi ikam, ena Gembala yo Paling Mulia ene ulet, ikam anta nrima mahkota kmulia yo belo di anta layo. ⁵Ketine low ka ikam, o ulun-ulun yo aso burok, patoh ka epo ulun-ulun bang tuo. Ai ikam eka-eka, iwa-iwa ka nau bolum ne se erai-erai, koe : "Allah nglawan ulun yo belo kakan iwa se ulun yo mak, tapi ngkosang ulun yo kakan iwa pngenanam. ⁶Koe ene iwa-iwa ka umbang nau bolum kam mbo iwat tangan Tuhan yo galak, apa ikam pkombo-Iyo montuk des jman iyo ⁷Srah ka eka pngenanam kerong-kerong kam epo-Iyo, koe Io yo ngasi ngado ikam. ⁸Kingat ka ai bjaga-jaga ka! bali kam, io doko iblis, malan nglekum sama kati singa nmou-nmou ai meto ulun yo dapet tolon iyo. ⁹Lawan ka io diang iman yo turon, koe ikam- se tau se eka erai buntung kam mbo pupus dnia sama nantai kanam bnasa. ¹⁰Ai Allah, pngulet ekakasih karunia, yo sundok momba ikam lang Kristus epo kemulia -Iyo yo kden, anta bgenap, mentugur, mgalak, ai mturon ikam, des sundok ikam sesa ile-ile tinggen ka. ¹¹Io doko yo ngempun kuasa sampe turai-turai iyo! Amin. ¹²Diang tete Silwanus, yo sanku kati ulun erai buntung yo dapet nte persaya, aku nulis idok ka epo ikam nte matuk ai nampa ikam persaya, se endo doko kasih karunia yo beta-beta ngket Allah. Akat ka diang turon mbo lang ne! ¹³Salam epo ikam eka-eka ngket kawan kam yo sundok kono pili yo mbo Babilon, ai low ngket Markus, pea ku, ¹⁴Bako salam ka epo erai-erai diang arok olam yo kudus. Damai sjahtra sama-sama diang ikam eka-eka yo keo lang Kristus. Amin

1 John

Chapter 1

¹Ise yo sundok keo ngket tla, yo sundok dingo kain, yo sundok eti kain diang mato kain, yo sundok kesah kain ai yo sundok bulem kain diang kayang kain nau umbang Firman yo bolum- ene doko yo tulis kain epo ikam. ²Bolum ene sundok pinokelak, ai kain sundok metiiyo ai tmpo ndo kain keo kesah ai nyampe epo ikam nau umbang bolum yo kden, yo keo sama-sama diang Bapa ai yo sundok pinokelak epo kain. ³Ise yo sundok eti kain ai yo sundok dingo kain ene, sampe kain epo ikam lou, apa ikam lou kuli bekowon diang kain. Ai kowon kain ene doko kowon diang Bapa ai diang Pea-Iyo, Yesus Kristus. ⁴Ai eka endo tulis kain epo ikam, apa pengego kain jadi sempurna. ⁵Endolah kabar yo dingo kain tentang Io yo bere kain epo ikam, yoene Tuan Ala ene wala, seom belo keo lang Io. ⁶Ena taka ngulek se taka keo persekutuan lang Io, tapi taka aso bolum lang seom, taka nampa eta diang belo ngelaku yo beta. ⁷Tapi, ena taka malan lang wala, sama kati Io lang wala, taka kerai diang yo mak, dan daya Yesus, pea Io, merese eka dosa taka ⁸Ena taka ngulek, se taka belo di keo dosa, jadi taka ngakal taka se ai yo kono belo di keo mbo lang taka. ⁹Ena taka ngangkan dosa taka, jadi Io ene doko setia ai adil, senga Io anta ngampun eka dosa taka ai ngembrse taka ngket eka gawi gata dat. ¹⁰Ena taka ngulek, se taka belo keo nggawi dosa, jadi taka nampa Io jadi pnampa eta ai firman-Iyo mba di keo mbo lang taka.

Chapter 2

¹Pea-peaku, nau umbang endo tulisku nte ngkam,apa ikam nang nampa dosa, tapi ena keo ulun nampa dosa, taka keo ulun nte pngekang diang Bapa, yo ene Yesus Kristus, yo adil. ²Ai Io ene doko nte mendamai eka dosa taka, ai mba di nte dosa taka tingen, tapi nte dosa mupus dnia low. ³Ai endo doko tanda iyo, se taka tau se Allah, yo ene ena taka ngaya ptua-ptua-Iyo. ⁴Ise -ise yo ngulek: Aku tau se Io, tapi io belo ngaya ptua-Iyo, io ene ulun pnampa eta ai lang iyo belo keo yo beta. ⁵Tapi ise-ise yo ngaya firman-Iyo, lang ulun ene bol ksempurna kasih Allah; diang ene doko taka tau, se taka keo lang Io. ⁶Ise-ise yo ngulek, se io keo lang Io, io arus bolum sama kati Kristus yo bolum. ⁷Erai buntung-erai buntung yo knosang, makse ptua yo bayu yo tulis ku epo ikam, makse ko ptua yo sundok ola yo sundok keo mbo ikam ngket tla. Ptua ono ene doko firman yo sundok dingo kam. ⁸Tapi ptua bayu low yo tulisku epo ikam, sundok nyata beta mbo lang Io ai mbo lang ikam; koe seom sundok mapos ai pa yo beta sundok keo pa. ⁹Ise-ise yo ngulek, se io keo lang pa,tapi io kekey se erai buntung iyo, io ngawa lang seom sampe tempo ndo. ¹⁰Ise-ise yo nengkosang erai buntung iyo, io nokon ngawa lang pa, ai lang io belo keo nte mketang. ¹¹Tapi ise-ise yo kekey erai buntung iyo, io ngawa lang seom ai bolum lang seom. Io belo tau epo mbe io malan, koe seom ene sundok nampa mato io belo kito ise-ise. ¹²Aku nulis epo ikam, o pea-pea, koe dosa kam sundok nampun koe karan-Iyo. ¹³Aku nulis epo ikam, o bapa-bapa, koe ikam sundok tau se Io, yo keo ngket tla iyo. Aku nulis epo ikam, o ulun-ulun burok, koe ikam sundok mkalah yo dat. ¹⁴Aku nulis epo ikam, o pea-pea, koe ikam tau se Bapa. Aku nulis epo ikam, o bapa-bapa, koe ikam tau se Io, yo keo ngket tla iyo. Aku nulis epo ikam, o ulun-ulun burok, koe ikam galak ai firman Allah nongos lang ikam ai ikam sundok mkalah yo dat. ¹⁵Nang ka ikam neggawal dnia ai ise yo keo lang ne. Ena ulun nenggawal dnia, jadi penggawal epo Bapa belo keo mbo ulun ene. ¹⁶Koe eka yo keo lang dnia, yo ene pengkakan iwoy ruang ai penggawal mato diang bolum ksombong, belo di ulet ngket Bapa, tapi ngket dnia. ¹⁷Ai dnia endo desung kakan tumar eka diang pengkakan iwoy ruang ulun, tapi ulun yo nglaku ptua Allah nokon bolum turai-turai. ¹⁸Pea-peaku, des endo doko des iyo pngabis, ai kati yo sundok dingo kam, ulun antikristus anta ulet, tempo ndo sundok nyoret deo antikristus. Ene ka doko pleta iyo, se des endo beta-beta doko des yo pngabis. ¹⁹Memang dero nyoret ngket ekang taka, tapi dero belo di beta-beta sumba diang taka; koe ena dero beta-beta sumba diang taka, pasti dero nokon sama-sama diang taka. Tapi nau umbang ene jadi ktine, apa jadi melak, se belo di eka dero beta-beta sumba diang taka. ²⁰Tapi ikam sundok kuli pngurapan ngket Yo Kudus, ai diang ktine ikam eka tau. ²¹Aku nulis epo ikam, mba di koe ikam belo di tau yo kono, tapi ube koe ikam tau ene ai koe ikam low tau, se belo keo eta yo nyoret ngket yo beta. ²²Ise tukang nampa eta ene? Belo be io yo belo di ngangkan se Yesus ene doko Kristus? Io ene doko antikristus, yo ene io mba di ngangkan Bapa ktine low Pea. ²³Koe ise-ise ulun yo belo di ngangkan Pea, io low belo dingempun Bapa. Ise-ise ulun yo ngangkan Pea, io low ngempun Bapa. ²⁴Ai ikam, ise yo sundok dingo kam ngket tla, ene arus nokon ngawa mbo ikam. Ena ise yo sundok dingo kam ngket tla ene nokon ngawa lang ikam, jadi ikam nokon ngawa mbo lang Pea ai mbo lang Bapa. ²⁵Ai endo doko janji yo sundok janji-Iyo se epo taka, yo doko bolum yo kden. ²⁶Eka ene tulisku epo ikam, yo doko nau umbang ulun-ulun yo bkomer mketang ikam. ²⁸²⁷Koe lang ikam se dor keo pngurapan yo sundok trima kam ngket-Iyo. Koe ene ikam belo dikotoh batuk ulun mak. Tapi kati umbang pngurapan-Iyo nutui matuk ikam nau umbang eka ise masam-ai tutuy batuk-Iyo ene beta , belo di eta- ai kati umbang Io bay bareh sundok nutuy matuk ikam, ktine ka doko mokoioyo ikam dor ngawa mbo lang Io. ²⁸Jadi tempo ndo, pea-peaku, ngawa ka mbo lang Kristus, apa ena Io mkelak kompu tonga-Iyo, taka kuli pngeronu persaya ai belo di koyoh mai epo Io des olo pngulet-Iyo. ²⁹Ena ka ikam tau, se Io ene beta, ikam arus tau low, se tongku ulun, yo nggawi yo kono, kinomekus ngket-Iyo.

Chapter 3

¹Eti ta, bukan main kolai tngkosang yo die Bapa epo taka, sampe taka nulek pea-pea Allah, ai beta taka doko pea-pea Allah. Koe ene dnia belo tau se taka, koe dnia belo tau se Io.²Erai buntung-erai buntungku yo knosang, tmpondo doko taka pea-pea Allah, tapi belo pian melak ise nau umbang taka anta; tapi taka tau, ena des Kristus mmekelak diri nyawa-Iyo, taka anta jadi sama kati Io, koe taka anta kito Io lang nau umbang-Iyo yo se beta iyo.³Tongku kongo ulun yo mayak pengundong ene epo-Iyo, mlio mlius diri nyawa sama kati Io yo ene doko berse lio.,⁴Tongku ulun yo ngnjoun dosa, nglanggar lou aturan Allah, koe dosa ene blanggar diang aturan Allah.⁵Ai ikam tau, se Io sundok mkelak kompu tonga-Iyo, apa Io ngloli eka-eka dosa, ai mbo lang Io belo keo dosa.⁶Koe ene tongku ulun yo dor keo mbo lang Io, belo ngnjoun dosa oli; tongku ulun yo nokon ngnjoun dosa, belo kito ai belo tau se Io.⁷Pea-peaku, nang beta mie ndok erai kongo ulun yo mketang ikam. Ise-ise yo ngnjoun yo kono ene doko yo kono, sama kati Kristus ene doko yo kono ;⁸ise-ise yo nokon ngnjoun dosa, ene ulet ngket iblis, koe iblis nggawi dosa ngket tela. Nte ene doko Pea Allah mmekelak kompu tonga-Iyo, io ene apa Io mtumar gawi gata-gawi gata iblis ene.⁹Tongku ulun yo kinomekus ngket Allah, belo ngnjoun dosa oli ; koe bini Allah dor ngawa mbo lang io ai io belo kuli ngnjoun dosa, koe io kinomekus ngket Allah.¹⁰Endo doko pleta iyo pea-pea Allah ai pea-pea iblis : tongku ulun yo belo ngnjoun yo kono, pngulet io belo ngket Allah, ktine lou ise-ise yo belo di nengkosang erai buntung iyo.¹¹Koe endo doko kabar yo sundok dingo kam ngket tela, yo ene doko taka arus baku kosang ;¹²makse kati Kain, yo ulet ngket yo triaw ai yo ngmpate okong iyo. Ise tukun io ngmpate okong iyo ? Koe eka gawi gata iyo dat ai gawi gata okong iyo kono.¹³Nang ka ikam eran, erai buntung-erai buntung, ena dnia kekei se ikam.¹⁴Taka tau, se taka sundok wensut ngket maot epo lang bolum, yo ene koe taka nengkosang erai buntung taka. Ise-ise belo nengkosang, io nokon mbo lang maot.¹⁵Tongku ulun yo kekei erai buntung iyo, ene doko ulun pngempate ulun. Ai ikam tau, se belo keo ulun pngempate yo nokon keo bolum yo kden mbo lang kompu iyo.¹⁶Ktine ka doko taka tau se kosang Kristus, yo ene se Io sundok mie bolum-Iyo nte taka ; jadi taka lou arus mie bolum taka nte erai buntung-erai buntung taka.¹⁷Ise-ise yo keo pnyengkeo dnia endo ai kito se erai buntung iyo bolum bnasa tapi belo nyanda nau erai buntung iyo ene, ktimbe ka kosang Allah kuli nokon mbo lang kompu iyo?¹⁸Pea-peaku, alo taka nengkosang mba di diang pngesah tingin, tapi diang gawi gata ai lang yo kono.¹⁹Ktine ka doko taka tau, se taka ulet ngket yo kono. Ktine lou taka kate nympapoh kesong taka mbo onon Allah,²⁰koe ena taka tundruh iyo, Allah ene doko pawak olai se kesong taka diang tau eka ise masam.²¹Erai buntung-erai buntung yo tngkosang ku, ena kesong taka belo nundruh taka, jadi taka keo pngronu persaya nte ngompoh epo dmpet Allah,²²ia ise ka tindu taka, taka kuli ngket Iyo, koe taka ngaya eka-eka suyu-Iyo ai nggawi ise yo sngkono epo-Iyo.²³Ai endo doko suyu-Iyo ene : apa taka persaya karan Yesus Kristus, Pea-Iyo, ai apa taka baku tkosang sngkono diang suyu yo bie Kristus epo taka.²⁴Ise-ise ngaya eka suyu-Iyo, io mbo lang Allah ai Allah mbo lang io. Ai ktine ka taka tau, se Allah keo mbo lang taka, yo ene Roh yo sundok die Io epo taka.

Chapter 4

¹Erai buntung-erai buntung ku yo knosang, nang beta persaya epo tongku roh, tapi ntes ka roh-roh ene, beta be dero ulet ngket Allah; koe deo nabi-nabi plsu yo sundok nyoret ai- malan epo pupus dnia. ²Ktine low taka tau se Roh Allah: tongku roh yo ngangkan, se Yesus Kristus sundok ulet jadi ulun, ulet ngket Allah, ³ai tongku roh, yo belo di ngangkan Yesus, belo di ulet ngket Allah. Roh ene doko roh anti kristus ai umbang nau io ikam sundok kringo, se io anta ulet ai tempondo io sudok keo mbo lang dnia. ⁴Ikam ulet ngket Allah, pea-pea ku, ai ikam sundok mkalah nabi-nabi plesu ene; koe Roh yo keo mbo lang ikam pawak olai se Roh yo keo mbo lang dnia. ⁵Dero ulet ngket dnia; koe ene doko dero bkesah umbang mbo dnia ai dnia nempaning otang nte dero. ⁶Kain ulet ngket Allah: ise-ise io tau se Allah, io nmpaning kain; ise io belo ulet ngket Allah, io belo di nempaning nte kain. Ene doko tanda Roh yo beta ai roh nte mketang. ⁷Erai buntung-erai buntug ku yo knosang, alo taka mangko kosang, koe kosang ene pngulet yo ngket Allah; ai tongku ulun yo keo- kosang, kinomekus ngket Allah ai tau se Allah. ⁸Ise-ise yo belo keo kosang, io belo tau se Allah, koe Allah ene doko pngosang. ⁹Lang umbang endo doko kosang Allah pinokelak mbo ekang taka, yo doko se Allah nyuyu Pea-Iyo yo tunggel epo lang dnia, apa taka bolum koe-Iyo. ¹⁰Endo doko kosang ene: Belo di taka yo sundok nengkosang Allah, tapi Allah yo sundok ngekosang taka ai yo sundok nyemuyu Pea-Iyo jadi ngendamai nte dosa-dosa taka. ¹¹Erai buntung-erai buntungku yo knosang, ena Allah ktine nau nengkosang taka, jadi taka arus low bako tengkosang. ¹²Ndok belo erai kongo ulun pini kito Allah. Ena taka bako tengkosang, Allah dor lang taka, ai kosang-Iyo sempurna mbo lang taka. ¹³Ketine doko taka tau, se taka nokon keo mbo lang Allah ai io mbo lang taka: Io sundok miye taka kuli bagian lang Roh-Iyo. ¹⁴Ai kain sudok kito ai bkesah, se Bapa sundok nyemuyu Pea-Iyo nte Tukang nylamat dnia. ¹⁵Ise-ise yo ngangkan, se Yesus ene doko Pea Allah, Allah dor keo mbo lang io ai io mbo lang Allah. ¹⁶Taka sundok tau ai sundok persaya se Allah kosang epo taka. Allah ene doko kosang, ai ise-ise yo nokon keo mbo lang kosang, io dor keo mbo lang Allah ai Allah mbo lang io. ¹⁷Lang umbang endo doko kosang Alah sempurna mbo lang taka, yo ene ena tka keo pngeronu persaya des olo snidang, koe sama kati Io, taka low keo mbo lang dnia endo. ¹⁸Mbo lang kosang belo keo takut: kosang yo sempurna ngmapos takut; koe takut batok ukuman ai ise-ise yo takut, io belo sempurna mbo lang kosang. ¹⁹Taka mangko kosang, koe Allah ono se ene nengkosang taka. ²⁰Ena keo ulun ngulek: "Aku ngosang Allah, "ai io kekey se erai buntung iyo, jadi io ene tukang nampa eta, koe ise-ise yo belo kosang se erai buntung iyo yo itaniyo, belo anta io kosang se Allah, yo belo di itaniyo. ²¹Ai prenta endo trima taka ngket Io: Ise-ise nengkosang Allah, io arus low nengkosang erai buntungiyo.

Chapter 5

¹Tongku ulun yo persaya, se Yesus ene Kristus, kinomekus ngket Allah; ai tongku ulun yo nengkosang Io yo ngmekus, nengkosang low se Io yo kinomekus ngket Allah. ²Endo doko tandaiyo, se taka nengkosang pea-pea Allah, yo ene ena des taka nengkosang Allah diang nglaku prenta-prenta-Iyo. ³Koe endo doko kosang epo Allah, yo ene, se taka ngaya prenta-prenta-Iyo. Prenta-prenta-Iyo ene belo di poyo, ⁴Koe eka yo kinomekus ngket Allah, mkalah dnia. Ai endo doko pengkuret yo mkalah dnia: Iman taka. ⁵Ise yo mkalah dnia, makse se io yo persaya, se Yesus ene doko Pea Allah? ⁶Endo doko yo sundok ulet diang danum ai daya, yo ene Yesus Kristus, mba di diang danum tingen, tapi diang danum ai diang daya. Ai Roh doko yo mie pmensara, koe Roh ene doko yo kono. ⁷Koe keo tolu yo mie pmensara(mbo lang sorga: Bapa, Firman ai Roh Kudus; ai yo tolu ene eray. ⁸Ai keo tolu yo mie pmensara mbo dnia endo): Roh ai danum ai daya ai yo tolu ene eray. ⁹Taka nrima pmensara ulun, tapi pmensara Allah turon se ene. Koe ktine doko pmensara yi die Allah nau umbang Pea-Iyo. ¹⁰Ise-ise yo persaya epo Pea Allah, io ngempun pmensara ene lang kompu tongaiyo; ise-ise yo belo persaya epo Allah, io nampa Io jadi pnampa eta, koe io belo di persaya epo pmensara yo die Allah nau umbang Pea-Iyo. ¹¹Ai endo doko pmensara ene: Allah sundok mie bolum yo kden epo taka ai bolum ene keo mbo lang Pea-Iyo. ¹²Ise-ise yo ngempun Pea, io ngempun bolum; ise-ise yo belo ngempun Pea, io belo di ngempun bolum. ¹³Eka-eka ene tulis ku nte ngkam, apa ikam yo persaya epo karan Pea Allah, tau, se ikam ngempun bolum yo kden. ¹⁴Ai endo doko pngeronu persaya taka epo-Iyo, yo ene se Io mie yo doa taka, ena taka tindu ise-ise epo-Iyo ngaya ptua-Iyo. ¹⁵Ai ena taka tau, se Io mie ise ka yo pnindu taka, jadi taka tau low, se taka sundok kuli ise masam yo sundok tindu taka epo-Iyo. ¹⁶Ena keo ulun kito erai buntung iyo keo gawi dosa, yo ene dosa yo belo di nte moit mate, mokoioyo io bdoa epo Allah ai Io anta mie bolum epoiyo, yo ene dero, yo ngenjoun dosa yo belo di nte moit mate. Keo dosa yo nte moit mate: nau umbang ene aku belo di ngulek, se io arus bdoa. ¹⁷Eka-eka gawi triaw ene dosa, tapi keo dosa belo di nte ngelian. ¹⁸Taka tau, se kompu ulun yo kinomekus ngket Allah, belo di nampa dosa; tapi Io yo kinomekus ngket Allah nguguiyo, ai yo dat belo di kuli mulemiyo. ¹⁹Taka tau, se taka ulet ngket Allah ai mupus dnia keo ela iwat kuasa yo triaw. ²⁰Tapi taka tau, se Pea Allah sundok ulet ai sundok mie akal epo taka, apa taka tau Yo Beta; ai taka keo mbo lang Yo Beta, mbo lang Pea-Iyo Yesus Kristus. Io ene doko Allah yo kono ai bolum yo kden. ²¹Pea-peaku, ati-ati epo bmasam berala.

2 John

Chapter 1

¹Ngket pengetuo epo Ine yo kono pili ai pea-peaiyo yo beta-beta tengkosangu. Mbadi aku tingen yo kosang se ikam, tapi eka ulun yo sundok tau yo beta, ²koe yo kono yo dor lang taka ai yo anta lumpat diang taka sampe turai-turai. ³Kasih Karunia, rahmat ai damai sejahtera ngket Allah Bapa, ai ngket Yesus Kristus Pea Bapa, anta lumpat diang taka lang yo beta ai pengkosang. ⁴Aku ego beta, koe aku krapet, se tenu-tenu ngket pea-pea ko bolum lang yo beta sengkono diang prenta yo sundok trima taka ngket Bapa. ⁵Ai tmpo ndo aku tindu epo iko, Ine - belo di ungka-ungka aku nulis prenta yo bayu nte ngko, tapi ngaya prenta yo sundok keo mbo taka ngket tla - apa taka bako tengkosang. ⁶Ai endo doko pengkosang ene, yoene se taka arus bolum ngaya prenta-Iyo. Ai endo doko prenta ene, yoene se ikam arus bolum mbo lang pengkosang, sama kati yo sundok dingo kam ngket tla. ⁷Koe deo tukang ngwewong sundok nyoret ai malan epo mupus denia, yo belo di ngangkan, se Yesus Kristus sundok ulet jadi ulun. Ene doko tukang ngwewong ai antikristus. ⁸Bejaga-jaga, apa nang mapos ngket ikam ise yo sundok tampa kain ene, tapi apa ikam kuli upa kam bol-bol. ⁹Tongku ulun yo belo di makai tutuy batuk Kristus, tapi yo ngendikah baling ngket ene, belo di ngmpun Allah. Ise-ise ulun makai tutuy batuk ene, io ngmpun Bapa ai ngmpun Pea low. ¹⁰Ena ka keo ulun ulet epo ikam ai io belo di moit tutuy batuk endo, aut ka ikam nerima io lang lou kam ai nang ka miye salam epoiyo. ¹¹Koe ise-ise ulun miye salam epoiyo, io lumpat low lang gawi gataiyo yo triaw. ¹²Beta ko deo yo arus tulisku epo ikam, aku belo di kakan nggawiiyo diang buyang ai tentah, tapi aku se klawo ulet epo ikam ai besara sangko wae, apa sempurna pengego taka. ¹³Salam epo ikam ngket pea-pea erai buntung kam yo kono pili.

3 John

Chapter 1

¹Ngket tuo-tuo sidang epo Gayus yo knosang,yo knosang koe ku lang yo beta. ²Erai buntung ku yo knosang,aku bdoa,apa iko buen-buen ai slomai-slomai ka lang eka ise masam, sama kati kesong ko buen-buen ka. ³Koe aku bol pengego,des tenu-tenu erai buntung ulet ai mie pngesah nau umbang bolum ko lang yo beta,koe memang iko bolum lang yo beta. ⁴Nte oki belo keo pengego lengkat olai se kringo, se pea-pea ku bolum lang yo beta.⁵Erai buntung ku yo knosang,iko keo gawi kati ulun persaya,mbo mone iko nggawi eka ise masam nte erai buntung-erai buntung,betako dero ene ulun-ulun nyumba.⁶ Dero sundok miye pngesah mbo onon jemaat nau umbang kosang ko.Buen beta gawi gata ko,ena iko ngawat dero lang ju lang dero,diang sara yo sengkono epo Allah.⁷ Koe karan-Iyo dero sundok bju diang ndok belo nrima ise-ise ngket ulun-ulun yo belo tau se Allah. ⁸Taka arus nrima ulun-ulun yo ketine,apa taka kate ngalek bagian lang gawi gata dero nte yo beta.⁹Aku sundok nulis idi-idi epo jemaat,tapi Diotrefes yo kakan jadi ulun pinokolay mbo ekang dero,belo kakan ngangkan se kain.¹⁰ Koe ene,ena des aku ulet,aku anta tindu apa ikam tau beta gawi gata yo sundok nlaku koe iyo,koe io nampa surah kesah yo dat; ai belo pian puas diang ene, io se belo di suma belo kakan nrima erai buntung-erai buntung yo ulet,tapi io low ngusan ulun-ulun,yo kakan nrima dero ai nembaling ulun-ulun ene ngket jemaat.¹¹Erai buntung ku yo knosang,nang nyarak yo dat,tapi yo buen.Koe ise keo gawi buen,io ulet ngket Allah,tapi ise yo keo gawi dat,io belo pini kito Allah. ¹²Nau umbang Demetrius eka ulun miye pnyurah yo buen, yo kono se ube mie pnyurah ketine. Ai kain low mie pnyurah yo buen nau umbang io, ai iko tau,se pnyurah kain ene beta.¹³Deo nau umbang yo arus tulisku epo iko,tapi aku belo kakan nulis epo iko diang tenta ai pena. ¹⁴Aku kundong resi-resi mangkoruku diang iko ai bekesah sangko wae. ¹⁵Damai sejahtera sama-sama diang iko!Salam ngket teman-teman ko.Sampe ko salam ku epo tongku kongo teman-temanku.

Jude

Chapter 1

¹Ngket Yudas, batak Yesus Kristus ai eraibuntung Yakobus, epo dero yo bnomba, yo tinongkosang lang Allah Bapa, ai yo nasi nado nte Yesus Kristus. ²Rahmat, damai sjahtra ai kasih moko yo mroa mitek ikam.³Eraibuntung-eraibuntung yo tinongkosang, desung aku beta2 bkomer nulis surat epo ikam umbang kslamat yo sama-sama sundok taka kiso. Tapi tempondo aku kiso kanam se prlu memang nte nutui matuk ikam diang surat endo apa ikam dor bkokes bkomer nte memeturon iman yo sundok sindai die Allah turai ndok kden epo umat-Iyo. ⁴ Koe sundok tnoan se keo lelu ulun yo nylinop sumba epo ekang-ekang taka. Dero ene ulun-ulun akal triaw yo kakan ngenylemang otang nau umbang kasih karunia Allah taka, nte ngemundal pngkakan dero se akal triaw. Ai dero belo ngangkan se Yesus Kristus, se pulun-pulun iyo Pngutok ai Tuhan taka. Ngket bai bareh itek ukum epo dero sundok tnulis lang Alkitab.⁵Beta ko eka ene ikam sundok tau ai belo dikeo nte ngkam ragu umbang ene aut, tapi aku kakan mknop ikam nua ktimbe nau umbang Tuhan nylamat umat Israel baling ngket tana Mesir, tapi ngket ene oli sindai nua ngmpate ulun-ulun yo belo prcaya ekang dero. ⁶Knop-knop ikam lou se mlekat-mlekat yo nglmpe-nglmpe se jepan kuasa yo keo mbo dero, nampa dero ngendikah pnongos dero. Koe ene Allah mansong mlekat-mlekat ene diang rantai ndok kden, lang awa yo seom ela iwat dnia. Ela lane dero tnangkeng terus sampe ukum pinokitek epo dero mbo Olo yo kinonuon tinggen ene anta.⁷Knop-knop ikam low se kota Sodom ai Gomora diang kota-kota lekum mne, yo ulun-ulun iyo nggawi kati umbang gawi gata mlekat-mlekat ene, dero ngmoen gawi gata yo pokeng ai triaw, koe ene dero kono kurow diang itek ukum api yo kden, ene nampa nte mknop epo eka ulun. ⁸Ktine low ulun dero ene nungka mmekotang lang kno sampe dero nampa dosa epo kompu tonga dero se. Dero nyapa kekuasaan Allah ai nguja ise ka yo bolum mulia mbo sorga.⁹Tapi pngutok mlekat karan se Mikhael, des jman yo btulan diang iblis umbang nau antu Musa, belo ronun ngakim iblis ene diang pnyurah yo nte nguja, tapi ube ngulek: "Tau ka Tuhan nmpnger iko!" ¹⁰Tapi dero nguja ise masam yo dero belo tau. Dero sama kati korik kotok yo belo di keo akal, yo tau umbang ise masam diang pngnanam dero tinggen. Tapi koe ene ube doko yo tau nte ngempate dero. ¹¹Sesa beta ka doko dero, koe dero nyarak nau umbang gawi gata Kain andi Habel. Apa nte kuli sen, dero koe ka sntuyun lang awa yo tau nte nampa tang, sama kati Bileam. Ai dero low pnate koe nglawan kati Korah.¹²Des jman ikam nampa ungan nte kuman sama-sama, nau prangai ulun dero ene nampa dat nte itan. Koe dero kuman diang maruwola belo di keo mai-mai, ai pulun ka ngnuon nte dero se. Dero kati jaun yo kono siup riut, tapi belo di jadi uran. Dero ene low kati tonga kayu yo belo tau kbua tontan ko mbo musim bua, tondal kayu yo sundok rukat diang wakat ai pate sindai. ¹³Dero ene sama kati umbak olai mbo tasik yo mkulet bubus danum, ktine low dero ngmbubus gawi gata yo nte ngmai dero se. Dero ene sama kati bintang-bintang yo lanah landuh ai yo sundok sinodia awa koe Allah lang seom yo paling seom ndok turai-turai.¹⁴Henokh, murit membe kturu ngket Adam, bai bareh sundok ngulek pmere Tuhan umbang ulun-ulun ene. Henokh ngulek, "Sbeta iyo

Tuhan anta ulet diang bribu ulun-ulun-Iyo yo kudus¹⁵ nte ngakim eka ulun. Tuhan anta ngukum ulun-ulun akal triaw koe gawi gata dero yo gramas. Ai Io anta ngukum ulun bdosa ai paro nglawan koe eka surah nte nguja yo nyoret ngket lang bowa ulun akal traw ene epo Tuhan."¹⁶ "Ulun-ulun ene tuju ngrmbenu ai memesala ulun mak. Dero bolum nyronon pngkakan iwoi ruang dero epo yo dosa. Dero kesah opau umbang nau dero se, ai dero pura-pura nengkuen ulun apa dero kuli hasil¹⁷ Tapi eraibuntung-eraibuntung yo tngkosang ku, knop ka ikam ise yo bai bareh knesah koe rasul-rasul Tuhan taka Yesus Kristus.¹⁸ Dero mere ono-ono epo ikam se duni-duni se pngeka zaman anta nyoret ulun-ulun yo nguja ngreko ikam, yo ene ulun-ulun yo bolum nyronon iwoi ruang dero epo yo dosa.¹⁹ Dero ene doko ulun-ulun yo nampa ikam tau bbulang tuar. Dero belo di keo Roh Allah, makse ko epo ngaya pngkakan lang dnia endo.²⁰ Tapi ikam, eraibuntung-eraibuntung ku. Dor ka ikam bolum kati kprcaya kam se Yesus Kristus. Iman kam yo suci beta. Ulak bdoa ikam diang kuasa Roh Allah,²¹ ai dor ikam bolum imbat kasih ngket Allah kola-kola ikam minte rahmat Yesus Kristus Tuhan taka, yo anta mie epo ikam bolum yo beta ai kden.²² Epo ulun-ulun yo kerong-kerong kanam kesong iyo moko yo tinongkosang.²³ Durut kam ulun nte nbaling dero ngket lang api apa dero selamat. Epo ulun-ulun yo mak moko yo tinongkosang tapi diang kanam takut, tapi nang ikam gawal ndok diang pnypakai dero low yo kono kinoremis diang pngkakan dero epo yo dosa.²⁴ Allah, yo keo kuasa ngnjaga ikam apa ikam belo toyak, ai yo klian moit ikam epo awa-Iyo yo mulia diang kanam ego ai belo keo bila molon,²⁵ Io doko pulun-pulun iyo Allah, tukang nylamat taka tete Yesus Kristus Tuhan taka. Io doko Allah yo mulia, olai, jut kuasa ai keo wibawa ngket bai bareh sampe tempondo ai nte ndok turai-turai! amen.

Revelation

Chapter 1

¹Endo doko wahyu Yesus Kristus,yo die Allah epo-Iyo,apa tnutui koe-Iyo epo hamba-hamba-Iyo ise yo arus resi terjadi. Ai koe mlekat-Iyo yo suyu-Iyo.Io sundok mkelak iyo epo batac-Iyo Yohanes.² Yohanes sundok bsurah nau umbang firman Allah ai nau umbang pngesah yo die Yesus Kristus,yo ene eka ise masam yo sundok itaniyo.³ Ego beta io yo ngembaca ai dero yo nempaning pmensara pmere ngket Tuhan endo,ai yo ngaya ise yo keo tnulis lang ne,koe des yo sundok duni.⁴Ngket Yohanes epo turu jemaat yo mbo Asia Kecil:Kasih karunia ai damai sejahtera sama-sama diang ikam,ngket Io,io keo ai yo sundok keo ai yo anta ulet,ai ngket turu roh yo keo ela onon pnunge-Iyo,⁵ai ngket Yesus Kristus,saksi yo stia,yo tla nyuli ngket ekang ulun mate ai keo kuasa ombon raja-raja dnia endo.Nte Io,yo nengkosang taka ai yo sundok nglopos taka ngket dosa taka diang daya-Iyo-⁶ ai yo sundok nampa taka jadi krajaan,jadi imam-imam nte Allah,Bapa-Iyo,-nte Io doko kemulia ai kuasa se kola-kola yo.Amin.⁷Eti ta,Io ulet diang jaun-jaun ai tongku mato anta kito Io,dero low yo sundok nowok Io.Ai eka-eka bangsa mbo dnia anta ngendari Io.O',amin.⁸ Aku yo doko Alfa ai Omega,firman Tuhan Allah,yo keo ai yo sundok keo ai yo anta ulet,Yo Paling kuasa."¹⁴"Ai tulis ka epo mlekat jmaat mbo Laodikia: E"¹⁵¹⁶¹² Laju aku skuleng nte meti oyon yo bsara epo aku.Ai des aku skuleng,melak epo aku turu botis awa dian ngket amas.¹³ Ai ela ekang botis dian ene keo erai kongo ulun kerai nau Pea Ulun,makai jubah yo kanjang yo sampe ela botis,ai dada iyo bebolit ktinggang ngket amas.¹⁴ Utok ai balo-Iyo bura kati nau bulu yo bura sak,ai mato-Iyo kati nau dolan api.¹⁵ Ai botis-Iyo ngrensilau kati nau tembaga mea lang api;oyon-Iyo kati umbang oyon kserow danum owa olay.¹⁶ Ai mbo kayang sanan-Iyo Io ngop turu bintang ai ngket bowa-Iyo baling erai babak mendau yo takei daro duo,ai wae-Iyo baling pa kati nau mato olo des olo dotu.¹⁷ Des aku kito Io,nyongkop aku mbo onon botis-Iyo sama kati nau ulun yo mate;tapi Io mayak kayang sanan-Iyo ban aku, laju ngulek:"Nang takut!Aku doko Yo Tla ai Yo Pnyundok,¹⁸ ai Yo Bolum.Aku sundok mate,tapi eti ka,Aku bolum,sampe turai-turai yo ai ngop eka-eka kungsi maot ai kerajaan maot.¹⁹ Koe ene tulis ka ise yo sundok itan ko, ktine yo terjadi tempondo ktine low yo anta terjadi sundok endo.²⁰ Ai pngemelim turu bintang yo sundok itan ko ela kayang sanan-Ku ai turu botis dian amas ene:turu bintang ene yo doko mlekat turu jmaat ai turu botis dian ene doko turu jmaat."

Chapter 2

¹"Tulis ka epo mlekat jmaat mbo Efesus: Endo doko firman ngket Io, yo ngop turu bintang ene mbo kayang sanan-Iyo ai malan ela ekang turu botis dian amas ene. ²Aku tau eka gawi gata kam: ai poruk pgel ai kselentuo kam. Aku tau, se ikam belo di doloh epo ulun-ulun triaw, se ikam sundok nyoba dero yo ngangkan se iyo rasul, tapi yo sebeta iyo mba di ktine, se ikam sundok tau se dero pnampa eta. ³ Ai ikam nokon doloh ai sesa koe karan-Ku; ai ikam belo tau basa mole. ⁴Beta ko ktine Aku mensala ikam, koe ikam sundok ngendikah pengkosang kam yo tla. ⁵Koe ene knop ka se lontop beta ikam sundok toyak! Btobat ka ai gnawi nua ise yo tla gawi kam. Ena belo ktine, Aku anta ulet epo ikam ai Aku anta ngalek botis dian kam ngket awaiyo, ena ikam belo btobat. ⁶ Tapi ndo yo keo mbo ikam, yo ene ikam ngekey eka gawi gata ulun-ulun yo lumpat Nikolaus, yo Aku kekey low. ⁷Ise yo keo tlingo, moko yo nempaning ise yo ulek Roh epo jmaat-jmaat: Ise-ise yo kuret, io anta die Ku kuman ngket tonga nte nembolum yo keo mbo Taman Firdaus Allah." ⁸ "Ai tnulis ka epo mlekat-mlekat jmaat mbo Smirna: Endo doko firman ngket Yo Tla ai Yo Pngabis, yo sundok mate ai sundok bolum nua: ⁹Aku tau kbenasa kam ai kekao kam - tapi ikam tataw - ai ptenah dero, yo ngulek io se ulun Yahudi, tapi yo sebeta iyo mba di ktine: mokin ube dero ene doko jmaah Iblis. ¹⁰ Nang takut epo ise yo nyesa ikam! Sbeta iyo Iblis anta nurak tenu-tenu kongo ngket ikam epo lang sper apa ikam nikap ai ikam anta kiso kanam bnasa kola spulu olo. Moko yo ikam stia sampe mate, ai Aku anta mie epo ikam mahkota pnyembolum. ¹¹Ise yo keo tlingo, moko iyo io nempaning ise yo ulek Roh epo jmaat-jmaat: Ise-ise yo kuret, io belo anta kiso kanam bnasa koe pngemate yo kduo." ¹² "Ai tulis ka epo mlekat jmaat mbo Pergamus: Endo doko firman Io, yo makai mendau tarom ai duo daro: ¹³ Aku tau mbo mone ikam nongos, yo ene mbo lane, mbo awa pnunge Iblis; ai ikam sgop mbo karan-Ku, ai ikam belo di ngendikah iman kam epo Aku, belo low de jman Antipas, saksi-Ku, yo stia epo Aku, yo pnate mbo onon ikam, mbo mone Iblis nongos. ¹⁴ Tapi Aku keo tenu-tenu kberatan epo ikam: ngket ikam keo tenu-tenu kongo yo lumpat tutuy batuk Bileam, yo mie nasehat epo Balak nte mketang ulun Israel, apa dero kuman persembahan berhala ai gawi jinah. ¹⁵ Ktine low keo mbo ikam ulun-ulun yo ngaya epo tutuy batuk ulun yo lumpat Nikolaus. ¹⁶ Koe ene btobat ka! Ena belo ktine, Aku anta resi ulet epo ikam ai Aku anta ngembali dero diang mendaw yo mbo howa-Ku endo. ¹⁷ Ise ise yo keo tlingo, moko iyo io nempaning ise yo ulek Roh epo jmaat-jmaat: Ise-ise yo kuret, epo iyo anta die Ku ngket manna yo melim; ai Aku anta mie epo iyo batu bura, yo ban ne tnulis karan bayu, yo belo tnoan koe ise-ise ulun, makse ko koe io yo nrima ene." ¹⁸ "Ai tulis ka epo mlekat jmaat mbo Tiatira: Endo doko firman Pea Allah, yo mato-Iyo kati dolan api ai botis-Iyo kati loyang: ¹⁹ Aku tau eka-eka gawi kata kam: buen kosang ktine low iman kam, buen playanan kam ktine low kbuket kam. Aku tau, se gawi gata kam yo sori pawak deo se yo tla. ²⁰ Tapi Aku mensala ikam, jkoe ikam belo nyanda bawe Izebel, yo ngulek se io se nabi bawe, nutuy matuk ai ngwewong batak-batak Ku apa dero nggawi jinah ai kuman okan singkap yo dnle epo berhala. ²¹ Ai Aku sundok mie io jman nte btobat, tapi io belo kakan btobat ngket jinah ene. ²² Eti ka, Aku anta nurak io epo ban ranjang ulun kroton ai dero yo nggawi jinah diang io anta turak Ku epo lang kbenasa yo olay, ena dero belo btobat ngket gawi gata bawe ene. ²³ Ai pea-pea iyo anta pate-Ku ai eka jmaat anta tau, se Aku doko yo nyoba pngenanam ai kesong ulun, ai se Aku anta males epo ikam tongku ulun sengkono diang gawi gata iyo. ²⁴ Tapi epo ikam, yo doko ulun-ulun yo mak mbo Tiatira, yo belo di lumpat tutuy batuk ene ai yo belo di nyemti ise yo ulek dero nau umbang Iblis, epo ikam Aku ngulek: Aku belo kakan nengkoyat yo mak epo ikam. ²⁵ Tapi ise yo keo mbo ikam, gop ka ene sampe Aku ulet. ²⁶ Ai ise-ise kuret ai ngenjoun gawi gata-Ku sampe pnyundok iyoi, epo iyo die Ku kuasa ombon bangsa-bangsa; ²⁷ ai io anta mrenta dero diang goloy bsi; dero anta pinotme kati priuk blanga tana tukang priuk - sama kati yo trima Ku ngket Bapa-Ku - ²⁸ ai epo iyo anta die-Ku bintang timur. ²⁹ Ise yo keo tlingo, moko yo io nempaning ise yo ulek Roh epo jmaat-jmaat."

Chapter 3

¹ "Ai tnulis ka epo mlekat jmaat mbo Sardis: Endo doko firman Io, yo ngempun turu Roh Allah ai turu bintang ene: Aku tau eka-eka gawi gata kam: ikam nulek bolum, padahal ikam mate! ²Uat aut, ai pinoturon ka ise yo aso toro yo sundok duni mate, koe ndok belo erai gawi gata kam itan Ku yo sempurna ela onon Allah-Ku. ³ Koe ene knop-knop ta, ktimbe ikam sundok nrima ai nempaning ene; aya ka ene ai btobat! Koe ena ikam belo bjaga-jaga, Aku anta ulet kati pngako ai ikam belo tau jman Aku kolan-kolan ulet ngompoh ikam. ⁴Tapi mbo Sardis tenu-tenu kongo ulun belo di ngemerota pnyepakai iyo; dero anta malan diang Aku dian pnyepakai bura, koe dero sengkono nte ene. ⁵ Ise-ise ulun yo kuret, io anta snua pnyepakai bura yo ktine; Aku belo anta ngeloli karan iyo ngket kitab awa karan ulun yo kuli bolum kden, Aku ube anta ngangkan karan iyo mbo onon Bapa-Ku ai mbo onon mlekat-mlekat-Iyo. ⁶Ise yo keo tlingo, moko iyo io nempaning ise yo ulek Roh epo jmaat-jmaat." ⁷ "Ai tulis ka epo mlekat jmaat mbo Filadelfia: Endo doko firman ngket Yo Kudus, Yo Beta, yo ngop kungsi Daud; ena Io ngingkang, mba keo yo kuli nokom; ena Io nokom, mba di keo yo kuli ngingkang. ⁸Aku tau eka-eka gawi gata kam: Eti ka, Aku sundok ngingkang jawong nte ngkam, yo ndok belo erai kongo ulun kuli nokom iyo. Aku tau se pngelian kam belo keo ise-ise, tapi ikam ngaya firman-Ku ai ikam belo di belo ngangkan karan-Ku. ⁹ Eti ka, tenu-tenu kongo ngket umat Iblis, yo doko dero yo ngulek se dero ene ulun Yahudi, tapi yo sbetaiyo belo di ktine, tapi eta, anta srah Ku epo ikam. Sbeta-beta iyo Aku anta nyemuyu dero ngompoh ai nyongkop mbo onon botis kam ai ngangkan, se Aku nengkosang ikam. ¹⁰ Koe ikam ngaya firman-Ku, nte trus sabar minte Aku, jadi Aku low anta ngenjaga ngawat ikam ngket olo pngikap yo anta ulet mbo mupus dnia nte ngikap dero yo nongos mbo dnia. ¹¹Aku duni ulet. Negop ka ise yo keo mbo ikam, apa ndok belo erai kongo ngalek mahkota kam. ¹² Ise-ise ulun yo kuret, io anta nampa Ku jadi sokoguru mbo lang Bait Suci Allah-Ku, ai io belo baling oli ngket mne; ai mbo iyo anta tulis-Ku karan Allah-Ku, karan kota Allah-Ku, yo doko Yerusalem bayu, yo diwa ngket sorga ngket Allah-Ku, ai karan-Ku yo bayu. ¹³Ise yo keo tlingo, moko iyo io nempaning ise yo ulek Roh epo jmaat-jmaat." ¹⁴ "Ai tulis ka epo mlekat jmaat mbo Laodikia: Endo doko firman ngket Amin, Saksi yo stia ai yo beta, pnyemula ngket pnyentampa Allah: ¹⁵Aku tau eka-eka gawi gata kam: ikam belom di rongin ai belo di layong. Buen ube ena ikam rongin ena belo layong! ¹⁶Jadi koe ikam layong-layong kulum, ai belo di rongin belo low di layong, ikam anta okek-Ku ngket bowa-Ku. ¹⁷ Koe ikam ngulek: Aku tataw ai aku sundok mtataw aku se ai aku belo di kurang ngambit ise masam, ai koe ikam belo di tau, se ikam bol bnasa ai sial, kao, posa ai blayi blanyang, ¹⁸jadi Aku ngnasehat ikam, apa ikam moli ngket Aku amas yo sundok pinolio lang api, apa ikam jadi tataw, ai low pnyepakai bura, apa ikam makai iyo, apa nang melak se ikam blayi blanyang yo ngemai; ai low lnga nte mkolat mato kam, apa ikam kuli meti. ¹⁹ Ise-ise ulun yo tengkosang-Ku, io kae-Ku ai tokai-Ku; koe ene srah kesong kam ai btobat ka! ²⁰Eti, Aku akat mbo onon jawong ai ngetok; ena keo ulun yo krinngo oyon-Ku ai ngingkang jawong, Aku anta sumba nyeruku iyo ai Aku kuman sama-sama diang io, ai io sama-sama diang Aku. ²¹ Ise-ise ulun yo kuret, io anta pentunge-Ku sama-sama diang Aku mbo ban pnunge-Ku, kati Aku low sundok kuret ai tunge sama-sama diang Bapa-Ku ban pnunge-Iyo. ²²Ise yo keo tlingo, moko yo io nempaning ise yo ulek Roh epo jmaat-jmaat."

Chapter 4

¹ Des sundok ene aku kito: Sbeta-beta iyo, erai jawong wingkang mbo sorga ai oyon yo prene yo sundok dingo ku, ngulek epo aku kati oyon temhuri, ulek iyo: Dombo ka epo dido ai Aku anta mkelak epo iko ise yo arus terjadi sundok endo. ² Peles aku sumba Roh ai eti ta, erai pnunge raja mbo sorga, ai pnunge raja ene tunge Erai kongo. ³ Ai Io yo tunge ban pnunge raja ene nau iyo kati permata yaspis ai permata sardis; ai keo juwata lekum pnunge raja ene trang beta kati zamrud nau iyo. ⁴ Ai nglekum pnunge Raja ene keo duo pulu opat pnunge raja, ai mbo pnunge-pnunge raja ene tunge duo pulu opat pngentuo-pngentuo, yo spakai bura ai mahkota amas mbo utok dero. ⁵ Ai ngket pnunge Raja ene nyoret ilap ai oyon nayu ries, ai turu dmet dolan onon pnunge Raja ene: ene doko kturu Roh Allah. ⁶ Ai ela onon pnunge Raja ene keo tasik kaca kati intan; mbo tenga-tenga pnunge Raja ene ai nglekum iyo keo opat korik ponu diang mato, mbo tadah ono ai mbo tadah sori. ⁷ Nau korik yo tla kati nau singa, ai korik yo kduo kati anak lembu, ai korik yo ktolu kati wae kati ulun, ai korik yo keopat sama kati mpulu koniw yo desung tmiling. ⁸ Ai keopat korik ene masing-masing keo onom olar, nglekum iyo ai mbo ngket tadah dalom iyo ponu diang mato, ai belo keo sdang-sdang iyo dero nyentongaw molo malom: "Kudus, kudus, kudus ka Tuhan Allah, Yo Paling kuasa, yo sundok keo ai yo keo ai yo anta ulet." ⁹ Ai tongku derang korik-korik ene mie puji-pujian, ai ormat ai ngulek sukur epo Io, yo tunge ban pnunge Raja ene ai yo bolum sampe turai-turai, ¹⁰ jadi nyongkop ka doko kduo pulu opat pngentuo-pngentuo ene mbo ononm Io yo tunge ban pnunge Raja ene, ai dero nyembah Io yo bolum sampe turai-turai. Ai dero nebir mahkota dero ela onon pnunge Raja ene, ulak ngulek: ¹¹ "O Tuhan ai Allah kain, Iko sengkono nrima puji-pujian ai ormat ai kuasa; koe iko sundok nampa eka-eka ise masam; ai koe ptua-Ko eka ene keo ai tnapa."

Chapter 5

¹Jadi aku kito mbo kayang- sanan Io yo tunge la ombon pnunge raja ene, erai gulung kitab, yo tnulis ngket tadah dalom ai engket tadah baling iyo ai tnanda segel diang turu tanda segel. ²Ai- aku kito erai kongo mlekat yo paguh, yo nyntongaw diang oyon ries, ulek yo: "Ise ka yo kate nte ngekar gulung kitab ene ai nglumpik tanda-tanda segel iyo?"³Tapi ndok belo erai kongo yo sorga ktine low yo mbo dnia ktine low yo mbo imbat dnia, yo kuli ngekar gulungan kitab ene ktine low yo kuli meti ngket tadah dalom iyo. ⁴Koe ene nangis ka doko aku ndok ngsepon, koe ndok belo erai kongo ulun yo sngkono kate ngekar gulung kitap ene ai ktine low meti ela dalom iyo. ⁵Laju keo ka doko erai kongo ulun tuo ngulek epo aku: "Nang iko nangis! Sbetayo timang ngket suku Yehuda, yo ene suli Daud, sundok kuret, ene doko io yo kate ngekar gulung kitab ene ai ngelumpik turu tanda segel iyo."⁶Des ene aku kito mbo ekang pnunge raja ai opat korik ene ai mbo ekang tuo-tuo ene akat erai kukui Anak Domba kati sundok sinomble, keo tanduk turu ai keo mato turu: io doko ene turu Roh Allah yo snuyu epo mupus dnia. ⁷Laju ulet ka doko Anak Domba ene ai nrima gulung kitab ene ngket kayang Yo yo tunge ban pnunge raja ene.⁸Des Io ngalek gulung kitab ene, nyongkop ka doko opat korik ai duo pulu opat pngntuo-pngntuo ene ela onon Anak Domba ene, tongku dero ngop erai ksapi ai erai ktowong amas, ponu diang jombu: ene doko doa ulun-ulun kudus.⁹Ai dero slegu legu bayu, ulek io: "Iko kate nrima gulung kitab ene ai nglumpik tanda-tanda segel iyo; koe Iko sundok sinomble ai diang daya- Ko Iko sundok moli dero nte Allah ngket tongku-tongku suku ai basa ai kaum ai bangsa. ¹⁰AI Iko sundok nampa dero jadi krajaan ai jadi imam-imam nte Allah taka, ai dero anta jadi pmrenta kati raja mbo dnia."¹¹Des ene aku kito ai kringo oyon deo mlekat nglekum pnunge raja, korik-korik ai tuwo-tuwo ene kdeo dero bribu-ribu ai bjuta-juta, ¹²ulek yo diang oyon ries: "Anak Domba yo sinomble ene kate nte nrima kuasa, ai pngkeo, ai pntau, ai pnggalak, ai knuon, ai kmulia, ai puji-puji!"¹³Ai aku kringo eka korik yo mbo sorga ai yo mbo dnia ai yo mbo imbat dnia ai yo mbo lang tasik ai eka yo keo mbo lang ne, ngulek:"Nte Io yo tunge ban pnunge raja ai nte Anak Domba, ene doko puji-puji ai knuon ai kmulia ai kuasa ndok turai-turai!" ¹⁴Ai opat korik ene ngulek: "Amin". Ai tuo-tuo ene pukan nyongkop ai nymbah.

Chapter 6

¹Sundok ene aku kito anak domba ene ngingkang segel yo tla ngket turu segel ene. Laju aku kringo erai ngket opat korik ene ngulek, "Dido!" ulek Oyon ene ulak kati oyon nayu. ²Kito ka doko aku, melak erai kukui kuda bura. Keoulun ban kuda ene yo mulem pana, ai mbo io dne mahkota. Io maju katiulun kuret yo bju naket pngkuret. ³Sundok ene oli anak domba ene ngingkang segel yo kduo, ai aku kringo korik yo kduo ene ngulek, "Dido!" ⁴Laju erai kukui kuda yo mak baling nua. Kuda ene mea sak sura iyo. Ulun yo ban kuda ene dne kuasa nte ngmapos umbang yo damai ngket pupus dnia, apa ulun bako pate. Ene doko io dne mndau olai. ⁵Sundok ene oli anak domba ngingkang segel yo ktolu. Aku kringo korik yo ktolu ngulek, "Dido!" Aku kito, Melak doko erai kukui kuda buyung. Ban kuda ene keoulun mulem erai dasing nte nimbang mbo kayang iyo. ⁶Ai aku kringo kati ungka oyon yo dingo ngket ekang opat kukui korik ene. Oyon ene ngulek, "Erai liter gandong yo buen kati uman upa gawi erai olo, ai tolu liter jelai sama kati uman upa gawi erai olo low. Tapi nang kinorusak lnga zaitun ai anggur!" ⁷Sundok ene anak domba ene ngingkang segel yo kopat. Ai aku kringo korik yo kopat ene ngulek, "Dido!" ⁸Aku kito, melak erai kukuy kuda yo ijau lemit. ulun yo ban kuda ene karan se Maot ai krajaan maot lumpat iyo. Bagi opat dnia snrah epo dero nte pate diang mndau, diang lau, diang roton ngndlanan ai diang korik kotok paru popak. ⁹Sundok ene anak domba ene ngingkang segel yo klimo. Aku kito se ela iwat mezbah ruo-ruo ulun-ulun yo kono lian pate koe dero mturon pnyampe ngket Allah diang pngesah dero. ¹⁰Dero nengow diang oyon ries, "O Tuhan yo Jutkuasa, yo suci ai yo kono! Kola-kola aso moko iko ngadil ulun mbo dnia ai ngukum dero koe sundok ngmpate kain?" ¹¹Tongku dero dne erai jubah yo bura. Laju dero snuyu smole ile, Sampe ndok sukup kdeo tman-tman yo kerai kokes komer ai eraibuntung-eraibuntung dero yo anta pnate kati dero. ¹²Sundok ene aku kito anak domba ene ngingkang segel yo konom. Ulet ka doko klakui yo dras beta. Mato olo jadi buyung kati diris buyung, ai bulan jadi mea kati daya. ¹³Bintong-bintong ngrpoya ngket langit mitek dnia kati bua ara yo belo pian nsak ngrpotop ngket lai iyo kono skukui koe brubu. ¹⁴Langit krurut kati buyang gnulung, ai eka tunden diang pulou bkensor ngket awa iyo. ¹⁵Sundok ene raja-raja dnia, ulun-ulun pjabat, plima-plima, ulun-ulun tatau ai ulun-ulun bkuasa, ai ulun-ulun yo mak, yo ulun batak ktine low ulun-ulun yo bebas, eka nyona lang liang-liang ai ela ekang-ekang batu tuong. ¹⁶Epo tunden-tunden diang batu-batu ene, dero ngulek, "Roros ta nyngkinan kain! Ona kam kain ngket pngeti Io yo tunge ela ombon tahta, ai ngket pngmara roa Anak Domba ene! ¹⁷Koe sundok ulet olo olai pmriek ai dero ai ise yo klian nantai?

Chapter 7

¹Lipas ene aku kito opat mlekat akat montuk opat tadah dnia ai dero nahan opat wayat dnia, apa nang keo wayat bsiup mbo tana ombo, ai mbo tasik ena belo mbo lati alas. ²Ai aku kito erai kongo mlekat yo mak ulet ngket pngulet olo. Io moit meterai Allah yo bolum ; ai io nngow diang oyon ries epo opat mlekat yo snuyu nte ngrusak dnia diang tasik, ³ulek iyo : " Nang ka ngrusak dnia, ktine lou tasik ktine lou lati alas onon se kain nampa tanda segel se batak-batak Allah kain mbo dai dero ! " ⁴Ai aku kringo kdeo dero yo tnanada segel ene : jatus opat pulu opat ribu yo sundok tnanda segel ngket eka-eka suku murud mmbe upus Israel. ⁵Ngket suku Yehuda duo blas ribu yo tnanda segel, ngket suku Ruben duo blas ribu, ngket suku Gad duo blas ribu, ⁶ngket suku Asyer duo blas ribu, ngket suku Naftali duo blas ribu, ngket suku Manasye duo blas ribu, ⁷ngket suku Simeon duo blas ribu, ngket suku Lewi duo blas ribu, ngket suku Isakhar duo blas ribu, ⁸ngket suku Zebulon duo blas ribu, ngket suku Yusuf duo blas ribu, ngket suku Benyamin duo blas ribu. ⁹Sundok ene aku kito : sebeta-beta iyo, keo kowon ulun deo yo belo dapet itung kdeo iyo, ngket eka bangsa ai suku ai kaum diang basa, akat mbo onon pnunge raja ai mbo onon Anak Domba, makai jubah bura ai mulem daon-daon pinang mbo tangan dero. ¹⁰Ai diang oyon ries dero nngow : " Selamat nte Allah kain yo tunge mbo ombon pnunge raja ai nte Anak Domba ! " ¹¹Ai eka-eka mlekat akat nglekum pnunge raja ai pnngntuo-pngntuo ai opat korik ene ; dero nyongkop mbo onon pnunge raja ene ai nyembah Allah, ¹²ulek ngulek : "Amin ! puji-puji ai kmulia, ai hikmat ai syukur, ai ormat ai kuasa ai kgalak nte Allah taka sampe turai-turai ! Amin ! " ¹³Ai erai kongo ngket pngntuo-pngntuo ene ngulek epo aku : " Ise dero yo makai jubah bura ene ai ngket mone dero ulet ? " ¹⁴Jadi ulek ku epo iyo : " Tuanku, tuan yo tau ene. " Laju io ngulek epo aku : " Dero endo doko ulun-ulun yo selamat ngket kurow ksa yo dras ; ai dero sundok npas jubah dero ai nampa iyo jadi bura lang daya Anak Domba. ¹⁵Koe ene dero akat mbo onon pnunge Allah ai nglayan Io molo malom mbo Bait Suci-Iyo. Ai Io yo tunge mbo ombon pnunge raja ene anta nguar sapo srapo-Iyo mbo ombon dero. ¹⁶Dero belo anta lau ai krengan oli, ai layong matolo belo anta kono dero oli. ¹⁷Koe Anak Domba yo mbo ekang pnunge raja ene, anta ngjaga ngasi ngamu dero ai anta ngajuh dero epo mato danum nte pnyembolum. Ai Allah anta ngisu olu ngket mato dero. "

Chapter 8

¹Ai des Anak Domba ene ngingkang mtraí sampe yo mmturu, jadi lngngongo ka belo keo oyon mbo sorga, kira-kira tenga jam kola-iyó.²Laju aku kito turu mlaekat yo akat onon Allah, ai epo dero dnie turu tmburi.³Jadi ulet mlaekat yo mak, ai io malan epo akat dmpet mezbah diang erai prapen amas. Ai epo-iyó dnie roa jombu nte io die sama-sama diang doa eka-eka ulun kudus ban mezbah amas onon awa pnunge Raja ene.⁴Jadi dombo doko utut jombu sama-sama diang doa ulun-ulun kudus ene ngket kayang mlaekat ene epo onon Allah.⁵Laju mlaekat ene ngalek prapen ene, ngatok-iyó diang api ngket mezbah, ai nurak-iyó epo dnía endo. Jadi motu doko oyon nayu, diang ilap ai klakui.⁶Ai eka turu mlaekat yo ngop turu tmburi ene siap-siap nte nyiup tmburi.⁷Laju mlaekat yo tla nyiup tmburi-iyó ai ulet doko uran es, ai api, sampur daya; ai eka-eka yo ene tnurak epo dnía endo: jadi sia doko bagi tolu ngket dnía endo ai bagi tolu ngket tonga-tonga kayu ai eka sia doko pupus dikut-dikut ijau.⁸Laju mlaekat yo mmduo nyiup tmburi-iyó ai keo yo kati tunden olai, yo dolan raya koe api, tnurak epo lang tasik. Jadi bagi tolu ngket tasik ene jadi daya,⁹ai mate ka doko bagi tolu ngket eka-eka yo tnampa yo keo kesong lang tasik ai tomo doko bagi tolu ngket eka-eka kpal danum.¹⁰Laju mlaekat yo mmtolu nyiup tmburi-iyó ai toyak doko ngket langit erai bintang olai, dolan raya kati dmet, ai io latu nakin bagi tolu ngket lowak-lowak ai mato danum-mato danum.¹¹Karan bintang ene yo doko Apsintus. Koe ene bagi tolu ngket eka-eka danum jadi apsintus, ai deo ulun mate koe danum ene, koe sundok jadi pait.Laju mlaekat yo mmkopat nyiup tmburi-iyó ai btebow bagi tolu ngket mato olo ai bagi tolu ngket bulan bagi tolu ngket bintang-bintang, sampe bagi tolu ngket dero ene jadi seom ai bagi tolu ngket molo belo di keo pa ai ktine low malom.Laju aku kito: aku kringo erai kukui koniw tmiling mbo lqngit ai ngulek diang oyon ries: ssa beta, ssa beta, ssa beta doko dero yo nongos mbo dnía koe oyon tmburi tolu mlaekat yo mak, yo aso anta nyiup tmburi-iyó,"

Chapter 9

¹Laju mlekat yo klimo nyiup temburi iyo, ai aku kito erai bintang yo latu ngket langit epo ban dnia, ai epo iyo dnine kungsi luang jurang maot. ²Jadi ingkang iyo doko jawong luang jurang maot ene, laju dombo doko utut ngket luang ene kati utut bliku olay, ai mato olo ai langit jadi seom koe utut luang ene. ³Ai ngket utut ene nglepopot baling upan-upan ban dnia ai epo dero dnine kuasa sama kati kuasa kremau-kremau mbo dnia. ⁴Ai epo dero nulek, apa dero nang ngrusak dikut-dikut mbo dnine ktine low oti-oti ktine low tonga-tonga kayu, tapi pulun ulun yo belo di makai mtraai Allah mbo dai iyo. ⁵Ai dero belo di snie nte ngempate ulun, tapi pulun ngurow ngesa dero limo bulan kola iyo, ai kurow ksa ene kati kurow ksa ngremau, ena io ngikit ulun. ⁶Ai des jman ene ulun-ulun anta meto mate, tapi dero belo anta ruku, ai dero anta kakan mate, tapi mate ene buyo ngket dero. ⁷Ai nau upan-upan ene sama kati kuda yo nraduh nte prang, ai ban utok dero keo yo kati-kati nau mahkota amas, ai wae dero sama kati nau wae ulun, ⁸ai balo dero sama kati balo bang bawe ai kukut dero sama kati kukut singa, ⁹ai dada dero sama kati baju bsi, ai oyon olar dero kati oyon grobak-grobak yo patak deo kuda, yo desung monsit epo awa prang. ¹⁰Ai ikuy dero sama kati ngremau ai keo pnyingot iyo, ai mbo lang ikuy dero ene keo kuasa dero nte msiet ulun, limo bulan kola iyo. ¹¹Ai raja yo mrenta dero yo doko mlekat jurang maot; karan iyo lang basa Ibrani yo doko Abadon ai lang basa Yunani yo doko Apolion. ¹²Sesa beta yo tla sundok lalo. Tempo ndo anta nyarak duo ksesa nua. ¹³Laju mlekat yo ke onom nyiup temburi iyo, ai aku kringo keo oyon baling ngket ke opat tanduk mesbah amas yo mbo onon Allah, ¹⁴ai ngulek epo mlekat yo ke onom yo ngop temburi ene: "Utis ka ke opat mlekat yo bsiret dempet lowak olay Efrat ene." ¹⁵Jadi utis iyo ka ke opat mlekat yo sundok sniap nte jam ai olo, bulan ai taun nte ngempate bagi tolu ngket eka ulun. ¹⁶Ai kdeo tentara ene yo doko duo ratus juta psukan bkuda; dingo ku kdeo dero. ¹⁷Jadi ktine ka doko aku kito lang pengkito endo kuda-kuda ai ulun-ulun yo nendung iyo; dero makai baju bsi, mea api ai biru ai lemit blerang tako iyo; utok kuda-kuda ene sama kati utok singa, ai ngket bowa iyo baling api, ai utut ai blerang. ¹⁸Koe tolu slaka endo pnate bagfi tolu ngket eka ulun, yo doko koe api, ai utut ai blerang, yo baling ngket lang bowa iyo. ¹⁹Koe kuasa kuda-kuda ene keo mbo lang bowa iyo ai mbo lang ikuy iyo. Koe ikuy iyo sama kati nipo; dero keo utok ai diang utok dero ene dero ngrusak. ²⁰Tapi ulun yo mak, yo belo di mate koe slaka ene, nokon belo btobat ngket gawi gata tangan dero: dero belo di kakan sdang nyembah roh-roh triaw ai berhala-berhala ngket amas ai pirak, ngket loyang, batu ai kayu yo belo di tau meti ai nempaning ai malan, ²¹ai dero belo tobat ngket ngempate, lmu amal, ngalut pokeng ai ngako.

Chapter 10

¹Ai aku kito erai kongo mlekat yo mak yo galak diwa ngket sorga, bsengkulop lang jaun, ai juata keo mbo ombon utok iyo ai wae iyo sama kati nau matolo, ai botis iyo kati nau ori api. ²Lang kayang iyo io nggop erai gulungan kitab idi yo bkuar. Botis sanan Io stoda mbo tasik ai botis sei Io stoda mbo tana ombo, ³ai io nyntongaw diang oyon ries sama kati oyon singa yo nmou. Ai des sundok io nyntongaw, turu gregu ene mmringo oyon iyo. ⁴Ai lipas turu gregu ene sundok bsara, aku kakan nulis iyo, tapi aku kringo keo oyon ngket sorga ngulek : "Tnanda segel ka ise yo nulek koe turu gregu ene ai autka iko nulis iyo !" ⁵Ai mlekat yo itan ku akat mbo ban tasik ai mbo tana ombo, ngengkat tangan sana iyo epo tadah langit, ⁶ai io bsumpah makai karan Io yo bolum sampe turai-turai, yo sundok nampa langit ai eka-eka atok iyo, ai dnia diang eka atok iyo, ai tasik diang eka atok iyo, ulek iyo : "Belo anta tnanggo oli !" Tapi montuk des oyon tmburi ngket mlekat yo mmturu, yo ene ena des io nyiup tmburi iyo, jadi anta sampe des mutus yo melim ngket Allah, kati yo sundok sampe Io epo batak-batak-Iyo, yo ene nabi-nabi." ⁸Ai oyon yo sundok dingo ku ngket langit ene ngulek lou epo aku, ulek iyo : "Malan ka, alek ka gulung kitab yo wekar mbo kayang mlekat, yo akat mbo ombon tasik ai mbo ombon tana ombo ene. " ⁹Laju aku malan ngompoh mlekat ene ai tindu epo iyo, apa io mie gulung kitab ene epo aku. Ulek iyo epo aku : "Alek ka ai okan ka io; io anta nampa buntung kiso kanam pait, tapi mbo lang bowa ko ai anta kiso kanam mamis kati dita wani. " ¹⁰Laju aku ngalek kitab ene ngket kayang mlekat ene, ai kuman iyo : mbo lang b owa ku io mamis kati dita wani, tapi des sundok aku kuman iyo buntungku jadi pait kanam iyo. ¹¹Jadi io ngulek epo aku : "Iko arus keo pmere nua epo deo bangsa ai suku-suku ai basa ai raja. "

Chapter 11

¹Sundo ene dnie epo erai batang bulu, kati goloy pnyukat nau iyo, diang pmensara ktindo: "Uat ta ai snukat Bait Allah ai mezbah ai dero yo sembayang mbo lang ne. ²Tapi nang snukat natar Bait Suci yo tadah baling, nang ka iko nyukat iyo, koe io sundok dnie epo bangsa-bangsa yo mak ai dero anta nganja Kota Suci opat pulu duo bulan kola iyo." ³Ai Aku anta mie gawi epo duo saksi-Ku, apa dero keo pmere ulak nyoru, sribu duo jatus onom pulu olo kola iyo. ⁴Dero ene kduo tonga zaitun ai kduo botis plita yo akat mbo onon Tuhan mupus dnja. ⁵Ai ena keo ulun yo kakan mensiet dero, baling ka api ngket bowa dero mesia eka bali dero. Ai ena keo ulun yo kakan mensiet dero, arus mate ktine low. ⁶Dero keo kuasa nokom langit, apa nang diwa uran kola-kola dero keo pmere; ai dero keo kuasa epo eka-eka danum nte ngensut iyo jadi daya, ai nte nengkau dnja dia bemasam jnis pengkono pengkna, tongku derang dero memetua iyo. ⁷Ai ena dero sundok msundok ksaksian dero, jadi korik yo nyoret ngket lang luang maot, anta mrang dero ai mkalah diang ngempate dero. ⁸Ai antu dero anta pnayak ban tembok kota olay, yo diang sara rohani nulek Sodom ai Mesir, mbo mone low Tuhan dero snalib. ⁹Ai ulun-ulun ngket eka bangsa ai suku ai basa ai kaum, kito antu dero tolu olo stenga kola iyo ai ulun-ulun ene ngusan antu dero nlowong. ¹⁰Ai dero yo nongos mbo dnja ego ai ego beta koe dero ene ai pesta ai bako die adiah, koe kduo nabi ene sundok jadi kurow ksa nte nengkono eka ulun yo nongos mbo dnja. ¹¹Tolu olo stenga nua sundok ene sumba doko roh bolum ngket Allah epo lang dero, sampe dero nyuli ai eka ulun yo kito dero jadi takut beta. ¹²Ai ulun-ulun ene kringo keo oyon yo ries ngket sorga ngulek epo dero: "Dombo ka epo dido!" Laju dombo ka dero epo langit, tokom jaun, itan koe eka-eka bali-bali dero. ¹³Des ene keo ka doko klakuy olay ai bagi spulu ngket kota ene roros, ai turu ribu kongo ulkun mate koe klakuy ene ai ulun-ulun yo mak takut beta, laju ngemulia Allah yo mbo sorga. ¹⁴Pmenasa yo kduo sundok lalo: Eti ta, kbenasa yo ktolu duni ulet. ¹⁵Laju mlekat yo kturu nyiup temburi iyo, ai dingo ka oyon-oyon ries mbo lang sorga, ulek iyo: "Pmerenta dnja gop Tuhan taka ai Io yo sundok diurapi-Iyo, ai Io anta mrenta kati raja sampe turai-turai." ¹⁶Ai kduo pulu opat pngentuo-pngentuo, yo tunge ela onon Allah mbo ban pnunge dero, nyongkop ai nyembah Allah, ¹⁷ulak ngulek: "Kain ngulek sukur epo Iko, o Tuhan, Allah, Yo Paling kuasa, yo keo ai yo sundok keo, koe Iko sundok nrma kuasa Ko yo olay ai sundok nindu mrenta jadi raja ¹⁸ai eka bangsa sundok mara, tapi pngemara Ko sundok ulet ai des nte ulun-ulun mate nte pnutus ai nte mie upa epo batak-batak Ko, nabi-nabi ai ulun-ulun kudus ai epo dero yo takut se karan-Ko, epo ulun-ulun alus ai ulun-ulun kodai ai nte ngempate ise-ise ulun yo ngempate mbo dnja." ¹⁹Wingkang ka doko Bait Suci Allah mbo sorga, ai melak ka doko oli pti janji-Iyo mbo lang Bait Suci ene ai keo ka doko ilap ai oyon nayu ries ai klakuy ai uran es ulak lopa.

Chapter 12

¹Jadi melak ka tanda olay mbo langit: Erai kongo ulun bawe bsua diang mato olo, ai bulan iwat botisiyo ai erai mahkota ngket duo blas bintang ombon utok iyo. ²Io desung klandung kiso buntung ai kbenasa iyo kakan mekus io nontoy kanam siet. ³Jadi melak ka keo tanda yo mak mbo langit; ai eti tah, erai kukui loden mea sak yo olai, keo utok turu ai btanduk spulu, ai ban utok yo keo turu mahkota. ⁴Ai ikui yo matak bagi tolu bintang-bintang mbo langit ai nurak iyo epo ban dnia. Ai loden ene akat onon bawe yo kakan mekus ene, nte nolon Pea iyo, peles des sundok bawe ene ngmekus-Iyo. ⁵Jadi io ngmekus erai kongo Pea song, yo anta nte moit eka bangsa diang glegada bsi; ngolan-ngolan Pea iyo ene nrampas ai noyit buyo epo Allah ai epo takhta-Iyo. ⁶bawe ene buyo epo padang gurun, mbo mne sundok tnampa erai awa nte iyo koe Allah, apa io jnaga mbo mne seribu duo jatus onom pulu olo kola iyo. ⁷Jadi des ene timbul ka doko prang mbo sorga. Mikhael ai mlekat-mlekatiyo prang glawan loden ene, ai loden ene awat koe mlekat-mlekatiyo, ⁸tapi dero belo klian nantai; dero belo kuli awa oli mbo sorga. ⁹Ai loden olai ene, tinondero nipo tuwo, yo nulek iblis ena belo setan, yo mketang pupus dnia, tnurak epo iwa; io tnurak epo dnia, nrendu diang mlekat-mlekat-iyo. Ai aku kringo oyon yo ries mbo sorga ngulek: "Tempo endo sundok ulet slamat ai kuasa ai pmerenta Allah taka, ai kuasa Io di urapi -Iyo, koe sundok tnurak epo iwa tukang tundruh erai buntung-erai buntung taka, yo nundruh dero molo malom mbo onon Allah taka. ¹¹Ai dero mkalah io koe daya Anak Domba, ai koe pmensara pngesah dero. Koe dero belo kosang bolum dero ndok mate. ¹² Koe ene snang-snang ka, o sorga ai ikam eka-eka yo nongos lang ne, bnasa ka doko ikam, o dnia ai tasik! koe iblis sundok diwa epo ikam, lang ngriteniyo mroa, koe io tau, se des iyo sundok duni. ¹³Ai des loden ene kingat, se io sundok tnurak epo lang dnia, io ngendasu bawe yo ngmekus Pea song ene. ¹⁴Epo bawe ene dnine duo olar mpulu nasar yo olai, apa io tmiling epo awa yo mbo padang gurun, mbo mne io jnaga oro ngket awa nipo ene kola-kola erai masa ai duo masa ai tenga masa. ¹⁵Laju nipo ene nyembur danum ngket lang bowa iyo, kolai atang lowak, epo tadah bawe ene, apa io anyut lang lowak ene. ¹⁶Tapi dnine ulet ngawat bawe ene. Io ngingkang bowa iyo, ai nolon lowak io smbur loden ene ngket bowa iyo. ¹⁷Jadi mara beta loden ene epo bawe ene, laju malan mrang upus iyo yo mak, yo ngaya aturan-aturan Allah ai keo pmensara nau umbang Yesus. ¹⁸Ai yo nongos akat mbo pantai tasik.

Chapter 13

¹ Ai io nongos akat mbo pantai tasik. Laju aku kito erai kukuy korik nyoret ngket lang tasik, ktanduk spulu keo utok turu; mbo ombon tanduk-tanduk iyo keo spulu mahkota ai mbo utok iyo tnulis karan-karan uja. ² Korik yo itan ku ene kerai nau diang kuli, ai botis iyo kati botis biwang ai bowa iyo kati bowa singa. Ai loden ene mie epo iyo penggalak iyo, ai pnunge iyo ai kuasa iyo yo olay. ³ Jadi melak epo aku erai ngket utok-utok ene ungka kono jail yo tau nte moit mate, tapi jail yo nte moit mate iyo ene ale. Pupus dnia eran, laju lumpat korik ene. ⁴ Ai dero nyembah loden ene, koe io mie kuasa epo korik ene. Ai dero nyembah korik ene, ulak ngulek: "Ise po sama kati korik endo? Ai ise po yo klian prang nglawan io?" ⁵ Ai epo korik ene dnine bowa, yo bol ksombong ai uja; epo iyo dnine low kuasa nte nggawi ene opat pulu duo bulan kola iyo. ⁶ Laju io ngingkang bowa iyo nte nguja Allah, nguja karan-Iyo ai lou awa nongos-Iyo ai eka dero yo nongos mbo sorga. ⁷ Ai io dnine apa kate nte prang nglawan ulun-ulun kudus ai nte mkalah dero; ai epo iyo dnine kuasa ombon tongku suku ai umat ai basa ai bangsa. ⁸ Ai eka-eka ulun yo nongos mbo dnine anta nyembah iyo, yo doko tongku ulun yo karan iyo belo di tnulis ngket des dnine tnampa mbo lang kitab bolum ngket Anak Domba, yo sundok sinomble. ⁹ Ise-ise ulun yo keo tlingo, moko io nempaning! ¹⁰ Ise-ise ulun yo kono tangkeng koe kalah, io anta tnangkeng koe kalah; ise-ise ulun yo pinotoko nte pate diang mendaw, io arus pnate diang mendaw. Yo penting mbo mendo ene yo doko butal ai iman ulun-ulun kudus. ¹¹ Ai aku kito erai kukuy korik yo mak nyoret ngket lang tana ai ktanduk duo sama kati anak domba ai io bsara kati erai kukuy loden. ¹² Ai eka kuasa korik yo tla ene joun iyo onon mato iyo. Koe io mupus dnine ai eka yo ngawa mne nyembah korik yo tla, yo jail olay iyo sundok ale. ¹³ Ai io nampa tanda-tanda yo puga beta, sampe io mendiwa api ngket langit epo dnine ela onon wae mato eka ulun. ¹⁴ Io memektang dero yo nongos mnbo dnine ia diang tanda-tanda, yo sundok dnine epoiyo nte ngenjoun ene ela onon wae mato korik ene. Ai io nyemuyu dero yo nongos mbo dnine, apa dero nengkuat sempatung nte ngenuon korik yo jail kono mendaw, tapi yo nokon bolum ene. ¹⁵ Ai epo io dnine kuasa nte mie kesong epo sempatung korik ene, jadi sempatung korik ene bsara low oli, keo gawi gata bemasam, jadi eka ulun, yo belo di nyembah sempatung korik ene, pnate. ¹⁶ Ai koe io, sampe epo eka-eka ulun, alus kodan, tataw kao, bebas ai batak, dnine tanda mbo tangan sanan iyo ai mbo dai iyo, ¹⁷ ai ndok belo erai kongo ulun yo kuli sboli ktine low bjual makse se dero yo makai tanda ene, yo ene karan korik ene ai angka karan iyo. ¹⁸ Yo penting mbo mendo yo ene pentau: ise-ise ulun yo tau bah, alo io ngitung angka korik ene, koe angka ene doko angka erai kongo ulun, ai angka yo ene doko onom jatus onom pulu onom.

Chapter 14

¹Ai aku kito: beta-beta yo, Anak Domba akat mbo tunden Sion ai sama-sama diang Io jatus opat pulu opat ribu kongo ulun ai mbo dai dero btulis karan-Iyo diang karan Bapa-Iyo. ²Ai aku kringo oyon ngket langit kati ksrow danum owa olai ai kati oyon otu nayu ries. Ai oyon yo dingo ku ene kati oyon ulun main kecapi yo nitik kecapi-iyoy. ³Dero slegu lagu bayu mbo onon pnunge Raja ene ai mbo onon opat korik ai pngntuo-pngntuo ene, ai ndok belo erai kongo yo kuli tau lagu ene ena makse yo jatus opat pulu opat ribu ulun yo sundok tnous ngket dnia endo ene. ⁴Dero ene ulun-ulun yo belo di ngrmis dirinyawa dero diang bawe-bawe, koe dero brse sama kati bawe ngelok. Dero ene ulun-ulun yo lumpat Anak Domba ene epo mombe ka Io malan. Dero tnous ngket ekang ulun jadi korban-korban ono tingen nte Allah ai nte Anak Domba ene. ⁵Ai mbo lang bowa dero belo keo eta; dero belo keo bila molon. ⁶Ai aku kito erai kongo mlaekat yo mak tmiling mbo tenga-tenga langit ai mbo-iyoy keo Injil yo kden nte sampe epo dero yo nongos mbo dnia endo ai epo eka-eka bangsa ai suku ai basa ai klompok, ⁷ai io nongau diang oyon ries: "Arus takut se Allah ai arus kinomulia Io, koe sundok ulet des nte Io ngukum, ai arus snmbah Io yo sundok nampa langit ai dnia endo ai tasik ai eka-eka mato danum."⁸ Ai erai kongo mlaekat yo mak, mlaekat kduo, nyndikui io ai ngulek: "Sundok roros, sundok roros Babel, kota olai ene, yo sundok ngmauk eka-eka bangsa diang anggur pngkakan ngempu rmis-iyoy"⁹ Ai erai kongo mlaekat yo mak, mlaekat ktolu, nyndikui dero, ai ngulek diang oyon ries: "Ena keo ulun yo nymbah bnatang ai smpatung-iyoy ene, ai nrima tanda mbo dai-iyoy ktine low mbo tangan-iyoy, ¹⁰koe ene io anta ngisop anggur mara roa Allah, yo sinodia belo di snampur lang ktowong mara roa-Iyoy; ai io anta knssa diang api ai blerang mbo onon mato mlaekat-mlaekat kudus ai mbo onon mato Anak Domba."¹¹ Jadi utut api yo ngurow ngsa dero ene dombo epo ombo ndok kden, ai molo malom dero belo di brnti-brnti knurow knsa, yo doko dero yo nymbah bnatang ai smpatung-iyoy ene, ai ise-ise ulun yo sundok nrima tanda karan-iyoy."¹² Yo pnting mbo mndo ene kturon pngnanam nte stia ulun-ulun kudus, yo ngaya prenta Allah ai iman epo Yesus. ¹³ Ai aku kringo oyon ngket sorga ngulek: Tulis ka: "Ego beta doko ulun-ulun mate yo mate lang Tuhan, ngket tempo ndo endo." "Beta-beta yo, "ulek Roh, "apa dero kuli smole ngket poruk pgel dero, koe eka-eka gawigata dero lumpat dero."¹⁴ Ai aku kito: beta-beta yo, keo jaun bura, ai mbo ombon jaun ene tunge erai kongo kati Pea Ulun diang erai topi pangkat ngket amas mbo utok-Iyoy ai erai sabit takei mbo kayang-Iyoy. ¹⁵ Jadi baling doko erai mlaekat yo mak ngket Bait Suci; ai io momba diang oyon ries epo Io yo tunge ombon jaun ene: "Ewis aut sabit-Ko ene ai utik ka, koe sundok sampe des-iyoy nte ngutik; koe bua pnykulo mbo dnia sundok nsak."¹⁶ Ai Io, yo tunge mbo ombon jaun ene, ngewis sabit-Iyoy epo ombon dnia, jadi nutik doko dnia. ¹⁷ Ai erai kongo mlaekat yo mak baling ngket Bait Suci yo mbo sorga; mbo-iyoy keo low sabit takei. ¹⁸ Ai erai kongo mlaekat yo mak ulet ngket mezbah; io keo kuasa nte ngatur api ai io nyntongau diang oyon ries epo mlaekat yo ngop sabit takei ene, ulek-iyoy: "Ewis ka aut sabit takei ko ene ai totok bua-bua anggur mbo dnia, koe bua-iyoy sundok nsak."¹⁹ Laju mlaekat ene ngewis sabit-iyoy epo ombon dnia, ai notok bua tonga anggur mbo snia ai nurak-iyoy epo lang pmia olai, yo doko mara roa Allah. ²⁰ Ai bua-bua anggur ene pnia ela baling se kota jadi ngket pmia ene smalir daya, kombo-iyoy sampe mbo tali pngatur dalan kuda ai koro-iyoy tolu jatus kilu.

Chapter 15

¹Ai aku kito keo tanda yo mak mbo langit, olai ai ajaib: turu mlekat diang turu pengkono pengkena yo paling sori, koe diang ene sundok doko oli kmara roa Allah.²Ai aku kito ise-ise katinau tasik kasa sampur api, ai mbo isan tasik kasa ene akat ulun-ulun yo sundok mkalah korik ene ai sempatung iyo ai angka karan iyo. Ela dero keo kcapu Allah.³Ai dero blegu legu Musa, batak Allah, ai legu Anak Domba, otang iyo: "Olai ai ajaib eka-eka gawi gata-Ko, o'Tuhan, Allah, Yo Paling Kuasa! Adil ai beta eka-eka boyan-Ko, o'Raja eka-eka bangsa! 'Ise yo belo takut, o' Tuhan, ai yo belo ngmulia karan-Ko? Koe Iko bute yo brese; koe eka-eka bangsa anta ulet ai sujud nyembah Iko, koe sundok tnoan yo kono eka-eka hukum-Ko."⁴Trus ngket ene aku kito ulun ngengau Bait Suci-kemah ksaksian-mbo Sorga. ⁵ai turu mlekat diang turu pengkono pengkena ene, baling ngket Bait Suci, makai lenan yo bura brese ai ngrensilau ai dada iyo pinolilit ketinggang ngket amas.⁶Ai erai ngket opat korik ene miye epo turu mlekat ene turu ketowong ngket amas yo ponu atok kmara Allah, yo ene Allah yo bolum sampe turai-turai. ⁷Ai Bait Suci ene ponu utut koe kmulia Allah ai koe kuasa-Iyo, ai ndok belo erai kongo ulun kuli sumba Bait Suci ene, onon se penyundok turu pengkono pengkena ngket turu mlekat ene.

Chapter 16

¹Sundok ene aku kringo oyon ries lang Bait Allah ngulek epo turu mlekat ene: "Daro ikam ai tudak kam atok turu ktowong pngmara Allah ene epo ban dnia!"²Jadi mlekat yo tla daro laju nudak atok ktowong-Iyo epo ban dnia. Jadi tumbu ka doko smbolot yo boto ai payah beta epo ekaulun yo keo tanda korik ene, ai epo ulun-ulun yo nymbah smpatung iyo.³Sundok ene mlekat yo kduo nudak atok ktowong iyo epo tasik. Koe ene danum ene jadi daya, kati daya ulun mate ai jadi mate ka ise yo keo kesong, yo bolum lang tasik.⁴Sundok ene mlekat yo ktolu nudak atok ktowong ene epo lowak-lowak ai epo mato-mato danum, eka ka doko danum jadi daya.⁵Aku kringo se mlekat yo keo kuasa epo danum ngulek, "Iko adil, Iko yo keo ai sundok keo, Iko yo kudus, yo sundok mkitek ukum endo."⁶Koe dero sundok nembaling daya ulun-ulun kudus ai nabi-nabi. Iko low sundok mie dero ngisop daya; umbang ene sngkono memang nte dero!"⁷Ai aku kringo mesbah ene ngulek: "O Tuhan, Allah, Yo Paling kuasa, beta ai adil eka putus-Ko."⁸Ai mlekat yo keopat nudak atok ktowong ene epo mato olo, ai epo iyo dnier kuasa nte nuna ulun diang api.⁹Ai ulun sia koe layong api yo dras, ai dero nguja karan Allah yo mpun kuasa epo pngkono pngknan ene ai dero belo btobat nte ngmulia Io.¹⁰Ai mlekat klimo nudak atok ktowong iyo mitek pnunge tuon korik ene ai krajaan iyo jadi seom, ai dero ngikit dola dero koe mtikas kanam nantai siet,¹¹ai dero nguja Allah yo mbo sorga koe kanam siet ai koe smbolot dero ene, tapi belo jokat dero btobat ngket umbang gawi-gata dero.¹²Ai mlekat yo keonom nudak atok ktowongiyo mitek lowak olai, atang Efrat, laju koreng ka doko danum iyo, apa buen nte boyan raja-raja yo ulet ngket tadah timur.¹³Ai aku kito ngket bowa loden ai ngket bowa korik ai ngket bowa nabi plsu baling tolu roh mrota yo memenau bekok.¹⁴Ene doko ene roh-roh setan yo tau nampa gawigata yo ajaib, ai dero malan nyruku raja-raja mbo pupus dnier, nte ngumpul dero nte bprang des Olo yo kinonuon, yo ene olo Allah yo Paling kuasa!¹⁵"Eti tah, Aku ulet kati pngako. Ego beta ulun yo dor bjaga-jaga ai meti nau pnypakai iyo, apo io nang malan diang blai blanyang ai belo di mai koe blai."¹⁶Sundok ene io ngumpul dero mbo awa yo lang basa Ibrani nulek se Harmagedon.¹⁷Ai mlekat yo kturu nudak atok ktowong iyo epo tadah langit. Dingo ka doko oyon yo ries ngket pnunge Raja mbo Bait Allah, yo ngulek, "Sundok gnawi aut!"¹⁸sundok ene keo ka ilap bebeap salotuntung ai oyon grgu nayu ngrpuntum, diang klakui yo olay. Belo pini keo klakui kekolay ene ngket des ulun tnampa. ene doko klakui yo olay tingen!¹⁹Laju beboka ka doko kota olai ene jadi bagi tolu ai roros ka doko kota-kota bangsa-bangsa yo belo tau se Allah. Jadi knop ka doko Allah se Babel yo olai ene nte mie epo iyo ktowong yo ponu batok anggur pngmara-Iyo!²⁰Ai eka pulau mapos, ai belo dikeo nruku oli tunden-tunden.²¹Ai uran botu es olai, koyat iyo limo pulu kilu tongku botu, toyak ngket langit mitek ulun-ulun, ai ulun-ulun nguja Allah koe pngkono pengkna itek uran botu es ene, koe umbang itek pngkono ene dras beta.

Chapter 17

¹Laju ulet doko erai kongo ngket turu mlekat, yo moit turu ketowong ene ai ngulek epo aku: "Epo ndo, aku anta nutui epo iko putusan nte lonte olai, yo tunge mbo awa yo deo danum yo. ² Diang io raja-raja mbo dnja sundok keo gawi pokeng, ai ulun-ulun yo ngawa mbo dnja sundok mauk koe anggur pokeng iyo."³Lang roh aku oit io epo padang gurun. Ai aku kito erai kongo bawe tunge ela ombon erai kukui korik yo meya ungu,yo ponu tnulis diang karan-karan uja. Korik ene keo turu utok ai spulu tanduk. ⁴ Ai bawe ene makai diris ungu ai diris kirmizi yo tnako diang amas, permata ai mutiara, ai mbo kayang iyo keo erai ketowong amas ponu diang eka-eka gawi triaw ai kmerota pokeng iyo. ⁵ Ai ela dai iyo tnulis karan, yo melim: "Babel olai, ine ngket bawe-bawe lonte ai ngket kteriaw dnja."⁶Ai aku kito bawe ene mauk koe daya ulun-ulun kudus ai daya saksi-saksi Yesus. Ai des aku kito iyo, aku eran beta. ⁷ Laju ulek mlekat ene epo aku: "Ise moko iko eran? Aku anta ngulek epo iko yo melim ngket bawe ene ai yo melim ngket korik yo moson iyo, korik yo keo utok turu ai keo tanduk spulu ene."⁸Jadi korik yo sundok itan ko ene, sundok keo, tapi belo keo, io anta ulet ngket liang mate, ai io tadah epo bnasa. Ai dero yo nongos mbo dnja, yo ene dero yo belo keo tnulis mbo lang kitab kehidupan des dnja tnampa, anta eran,e na dero kito, se korik ene sundok keo, tapi belo keo, ai anta ulet nua.⁹Yo penting mbo mendo io doko akal yo keo atok pentau: turu utok ene yo doko turu tunden, yo ela ombon yo bawe ene tunge, ¹⁰ turu yo ene low turu raja: Limo mbo ekang yo sundok toyak, yo erai keo ai yo mak belo pian ulet, ai ena io ulet, io anta nongos ile-ile bute.¹¹Ai korik yo pini keo ai yo tempo ndo belo keo ene,iyo se ene doko raja ke walu ai beta ko ktine erai ngket turu ene ai io btadah epo mate.¹²Ai ksepulu tanduk yo sundok itan ko ene yo doko spulu raja, yo belopian mulai mrenta, tapi erai jam kola yo dero anta nrima kuasa jadi raja, sama-sama diang korik ene. ¹³ Dero erai kesah surah, penggalak ai kuasa dero diye dero epo korik ene. ¹⁴Dero anta prang bali Anak Domba.Tapi Anak Domba anta mekalah dero, koe Io ene doko Tuon ngombo eka-eka se tuon ai Raja ngombo se eka-eka raja. Dero sama-sama diang Io low anta kuret, yo ene dero yo benomba, yo sundok pnili ai yo stia."¹⁵Laju io ngulek epo aku: "Eka danum yo sundok itan ko, ela mone bawe lonte ene tunge, yo ene bangsa-bangsa ai rayat deo ai suku-suku ai basa."¹⁶Ai ke sepulu tanduk yo sundok itan ko ene diang korik ene anta ngekei lonte ene ai dero anta nampa iyo jadi lengoh ai blayi, ai dero anta kuman isi iyo ai nuna yo diang api. ¹⁷ Koe Allah sundok nampa pa nte kesong dero nte nggawi petua-Iyo diang kerai kesah surah ai nte miye pmerenta dero epo korik ene. Sampe eka-eka firman Allah sundok gnenap."¹⁸Ai bawe yo sundok itan ko ene, yo ene kota olai yo mrenta ombon raja-raja mbo dnja."

Chapter 18

¹Sundok ngket ene aku kito erai kongo mlaekat yo mak diwa ngket sorga. Io keo kuasa olai ai dnia jadi pa koe kmulia-iyoy. ²Ai io momba diang oyon ries, ulek-iyoy: "Sundok roros, sundok roros Babel, kota olai ene, ai io sundok jadi awa nongos roh-roh triaw ai awa nyona eka-eka roh rmis ai awa nyona eka-eka mpulu-mpulu yo rmis ai yo knekei, ³koe eka-eka bangsa sundok ngisop anggur gawal ngmundal pokeng iyo ai raja-raja mbo dnia sundok nggawi yo rmis diang io, ai ulun-ulun dagang mbo dnia sundok jadi tatau koe ruak ruaw ngket pnggawal ngempu-iyoy ene." ⁴Trus aku kringo oyon yo mak ngket sorga ngulek: "Malan ikam aut, o umat-Ku, malan aut ngket mne apa ikam nang ngalek bagian lang dosa-dosa-iyoy, ai apa ikam nang lumpat sngkinan pngkono pngkna-iyoy. ⁵Koe dosa-dosa-iyoy sundok btumpuk-tumpuk sampe langit, ai Allah sundok knop eka-eka gawi gata triaw-iyoy. ⁶Bales ka epo-iyoy, sama kati io low males, ai die ka epo-iyoy duo lipat kati gawi-iyoy, snampur ka nte-iyoy duo lipat mbo lang ktowong pnyampur-iyoy, ⁷die ka epo-iyoy kurow ksa ai pngluai, kati kdeo kmulia ai keo ba, yo sundok io kiso. Koe io ngulek lang kesong-iyoy: Aku ban pnunge raja kati ratu, aku makse balu, aku belo anta pini luai. ⁸Koe ene eka-eka pngkono pngkna-iyoy anta ulet lang erai olo, yo doko pripit ai pngnyoru ai suyung; ai io anta tnuna diang api, koe Tuhan Allah, yo mutus nte io, ene galak, ⁹Ai raja-raja mbo dnia, yo sundok nggawi yo rmis ai kanam bolum ruak ruaw diang io, anta nangis nungul koe io, ena dero kito utut api yo nuna-iyoy. ¹⁰Dero anta akat oro-oro koe takut nau pmnasa-iyoy ai dero anta ngulek: "Beta-beta ssa, beta-beta ssa iko, o kota yo olai, Babel, o kota to turon, koe lang erai jam bute iko sundok kono ukum!" ¹¹Ai ulun-ulun dagang mbo dnia nangis ai nyoru koe io, koe belo keo ulun oli yo moli barang-barang dero, ¹²yo doko barang-barang mas ai pirak, prnata ai mutiara, ngket lenan solo ai diris ungu, ngket sutra ai diris kirmizi, bmasam jnis barang ngket kayu yo buen kewo-iyoy, bmasam jnis barang ngket tanduk, bmasam jnis barang ngket kayu yo rarang, ngket loyang, bsi ai pualam, ¹³upak kayu manis ai rmpa-rmpa, kewo-kewo, mur ai jombu, anggur, lnga, jlpong alus ai gandong, lmbu sapi, domba, kuda ai kreta, batak, sampe pan kesong ulun. ¹⁴Ai dero anta ngulek: "Sundok mapos bua-bua yo tinongkakan kesong kam, ai eka-eka yo mroa ogot ai bang buen mapos ba ngket ikam, ai mba anta di nruku oli." ¹⁵Dero yo ngndagang barang ene, yo sundok tatau koe io, anta akat oro-oro koe takut se pmnsasaiyo, ai ulak nangis nungul, ¹⁶dero ngulek: "Beta-beta ssa, beta-beta ssa, kota olai, yo bpakai lenan solo, ai diris ungu ai diris kirmizi, ai yo tnako diang amas, diang prnata ai mutiara, koe lang erai jam bute ktataw kroa ene sundok eka". ¹⁷Ai tongku tukang ngmudi ai ulun blayar ai anak bua kpal ai eka-eka ulun yo pnytaket-iyoy mbo tasik, akat oro-oro, ¹⁸ai nongaw, des dero kito utut api yo nuna-iyoy, ulek-iyoy: "Kota mone yo sama diang kota olai endo?" ¹⁹Ai dero mewet bondul ombon utok dero ai nongaw, ulak nangis nungul, ulek dero: "Beta-beta ssa, beta-beta ssa, kota olai, yo koe-iyoy eka-eka ulun, yo mpun kpal mbo tasik sundok jadi tataw koe barang-iyoy yo rarang, koe lang erai jam bute io sundok eka rusak ba. ²⁰Snang kesong doko koe io, o sorga, ai ikam, o ulun-ulun kudus, rasul-rasul ai nabi-nabi, koe Allah sundok mkitek ukuman nte io koe ikam". ²¹Ai erai kongo mlaekat yo galak, ngenkat erai botu batu kolai batu pnggiling, laju nurak-iyoy epo lang tasik, ulek-iyoy: "Ktindo doko Babel, kota olai ene, anta tnurak ndok ries epo iwa, ai io belo anta di nruku oli. ²²Ai oyon ulun-ulun tukang nitik kecapai ai ulun-ulun tukang slegu, ai pnyiup-pnyiup nsuling ai tmburi, belo anta dningo oli mbo lang iko, ai budah erai kongo yo paling tukang stampa belo anta nruku oli mbo lang iko, ai oyon ngnggiling belo anta dningo oli mbo lang iko. ²³Ai pa lampu belo anta kuwala oli mbo lang iko, oyon song bawe nika kawen belo anta dingo oli mbo lang iko. Koe ulun-ulun dagang ko ene tuon-tuon ulun hebat mbo dnia, koe lmu amal-ko eka-eka bangsa pinoktang." ²⁴Ai mbo lang mne keo daya nabi-nabi ai ulun-ulun kudus ai daya eka-eka ulun, yo pnate mbo dnia.

Chapter 19

¹ Sundok ngket ene aku kringo oyon ries ngket jutulun deo mbo sorga, ulek iyo: "Haleluya! Slamat ai kmulia ai kuasa keo mbo Allah taka, ²koe beta ai adil eka-eka pmutus-Iyo, koe Io ka doko yo sundok mutus lonte nguto ene, yo ngrusak dnia diang pmokeng iyo; ai Io ka doko yo sundok males daya batak-batak-Iyo epo lonte ene."³ Ai nte kduo derang iyo dero ngulek: "Haleluya! O, utut iyo dombo sampe turai-turai." ⁴Ai kduo pulu opat pngentuo ai keopat korik ene nyongkop ai nyembah Allah yo tunge ban pnunge Raja ene, ai dero ngulek: "Amin, Haleluya."⁵ Jadi dingo ka doko keo oyon ngket pnunge Raja ene: "Pnuji ka Allah taka, o eka ikam batak-Iyo, ikam yo takut se Io, ktine yo alus ktine low yo nuon!"⁶ Laju aku kringo oyon kati oyon jutulun deo, kati kserow danum owa ai kati oyon nayu ries, ulek iyo: "Haleluya! Koe Tuhan, Allah taka, Yo Paling kuasa, sundok jadi raja."⁷ Alo taka ego ai bdia-dia, ai ngmulia Io! Koe olo nika kawen Anak Domba sundok sampe, ai pnganten-Iyo sundok siap aut. ⁸Ai epo iyo dnies apa spakai diris lenan solo yo ngrensilau ai yo bura sak! [Lenan solo ene doko gawi gata yo buen ngket ulun-ulun kudus.]⁹ Laju io ngulek epo aku: "Tnulis ka: Ego beta dero yo pnakot epo ungan kawen Anak Domba." Ulek iyo nua epo aku: "Pmensara endo beta, pmensara-pmensara ngket Allah."¹⁰ Jadi nyongkop ka doko aku ela onon botis iyo nte nyembah io, tapi io ngulek epo aku: "Nang gawi ktine! Aku endo batak sama diang iko erai buntung -erai buntung ko, yo ngempun pnyurah nau umbang Yesus. Sembah ka Allah! Koe pngesah nau umbang Yesus ene doko roh pmere."¹¹ Laju aku kito sorga wingkang: sbeta-beta iyo, keo erai kukuy kuda bura; ai Io yo ban ne nan karan se: "Yo Stia ai Yo Kono", Io mutus ai prang diang adel. ¹²Ai mato-Iyo kati nau dolan api ai ombon utok-Iyo keo deo mahkota ai mbno-Iyo ke tnulis karan yo belo ndok erai ulun tau, makse Io se. ¹³Ai Io makai jubah yo sundok snoso lang daya ai karan-Iyo yo doko: "Firman Allah."¹⁴ Ai eka psukan yo mbo sorga nyarak Io; dero nendung kuda bura ai makai lena solo yo bura sak. ¹⁵Ai ngket bowa-Iyo nyoret erai babak mendaw takei yo anta ngrembas eka bangsa. Ai Io anta ngayak dero diang goloy bsi ai Io anta mia anggur lang pmia anggur, yo doko pngemara ngriten Allah, Yo Paling kuasa. ¹⁶Ai mbo jubah-Iyo ai po-Iyo tnulis karan, yo doko: "Raja eka-eka raja ai Tuan ombo se eka-eka tuan."¹⁷ Laju aku kito erai kongo akat lang mato olo ai io nyentongau diang oyon ries epo eka mpulu yo tmiling ela ombo, ulek iyo: "Dido epo mendo ai bkumpul ka nte lumpat ungan Allah, ungan yo olay, ¹⁸apa ikam kuman isi eka-eka raja ai isi eka-eka pngelima ai isi eka-eka ulun yo kois nglawan musu ai isi eka-eka kuda ai eka isi ulun yo nendung iyo ai isi eka ulun, ktine dero yo bebas ktine low ulun batak, ktine low yo alus ene low ulun yo olay."¹⁹ Ai aku kito korik ene ai raja-raja mbo dnia diang tentara-tentara dero sundok bkumpul nte prang nglawan Penendung kuda ene ai tentara-Iyo. ²⁰Jadi tngangop ka korik ene ai sama-sama diang io nabi plesu, yo sundok keo tanda-tanda mbo onon wae mato iyo, ai diang ktine io nguwwong dero yo sundok nrima tanda ngket korik ene ai io sundok nyembah sempatung ene. Dero duo tenurak sanko bolum epo lang tasik api yo dolan raya koe blerang.²¹ Ai eka-eka ulun yo mak pnate diang mendaw, yo baling ngket bowa Pnendung kuda ene; ai eka mpulu boting koe isi dero.

Chapter 20

¹Laju aku kito erai kongo mlekat diwa ngket sorga ngop kungsi jurang maot ai keo rantai olai mbo kayang iyo ; ²io nangop loden, nipo tuo ene, io ene Iblis ai setan. Ai io nyiret iyo sribu taun kola iyo, ³Laju nurak iyo epo lang jurang maot, ai nokom jurang maot ene ai nyegel iyo mbo ombon iyo, apa io nang oli mketang bangsa-bangsa, onon se pnyundok jman sribu taun ene ; Sundok ene io anta nutis ile-ile. Laju aku kito pnunge-pnunge raja ai ulun-ulun yo tunge ban ne ; epo dero dnie kuasa nte ngukum. Aku lou kito ruo-ruo dero, yo sundok nempung biungi dero koe pngesah nau umbang Yesus ai koe firman Allah ; yo belo nyembah koring ene ai smpatung iyo ai belo lou nrima tanda iyo mbo dai ai tangan dero ; ai dero bolum nua ai mrenta kati raja sama-sama diang Kristus nte jman sribu taun. ⁵Tapi ulun-ulun mate yo mak belo nyuli onon sundok jman yo sribu taun ene. Endo doko pnyuli yo tela. ⁶Ego beta ai kudus doko io, yo kuli bagi lang pnyuli yo tela ene. pngemate kduo belo keo kuasa oli epo dero, tapi dero anta jadi imam-imam Allah ai Kristus, ai dero anta mrenta kati raja sama-sama diang Io, sribu taun kola iyo. ⁷Ai lipas jman sribu taun ene abis, Iblis anta nutis ngket sper iyo, ⁸ai io anta malan mmktang bangsa-bangsa mbo ompat tadah dnia, io ene Gog ai Magog, ai ngumpul dero nte perang ai kdeo dero sama diang kdeo krsik mbo tasik. ⁹Jadi dombo ka dero epo mupus tana ombo mbo dnia, laju ngepong awa kemah tntara ulun-ulun kudus ai kota yo tinongkosang ene. Tapi ngket langit diwa ka api nuna dero, ¹⁰ai Iblis, yo mmketang dero, tnurak epo lang tasik api ai blerang, io ene awa korik ai nabi plsu ene, ai dero knurow knesa molo malom sampe turai-turai. ¹¹Laju aku kito keo pnunge raja yo bura yo olai ai Io, yo tunge ban ne. Ngket onon-Iyo blmas ka dnia ai langit ai belo dinruku oli awa iyo. ¹²Ai aku kito ulun-ulun mate, alus kodai, akat mb o onon pnunge raja ene. Laju ngekar eka kitab. Ai ningkang lou kitab io mak, io ene kitab bolum. Ai ulun-ulun mate pnutus plikara dero sengkono diang gawi gata dero, kati ise yo keo tnulis lang kitab-kitab ene. ¹³Jadi tasik nyerah ulun-ulun mate yo keo mbo lang ne, ai maot ai kerajaan maot nyerah ulun-ulun mate keo mbo lang ne, ai dero pnutus plikara dero masing-masing diang gawi gata dero. ¹⁴Laju kerajaan maot ene tnurak epo lang tasik api. Ene ka doko pngnate yo kduo : tasi k api. ¹⁵Ai tongku ulun yo belo nruku karan iyo tnulis mbo lang kitab bolum ene, io tnurak epo lang tasik api ene.

Chapter 21

¹ Laju aku kito langit yo bayu ai dnia yo bayu, koe langit yo ono ai dnia yo ono sundok belo keo, ai ndok tasik belo keo oli. ² Ai aku kito kota yo kudus, Yerusalem yo bayu, diwa ngket sorga, ngket Allah, yo braji kati pnganten bawe yo nraji nte song iyo. ³ Laju aku kringo oyon ries ngket pnunge Raja ene ngulek: "Eti ta, kemah Allah keo mbo ekang ulun ai lo anta nongos sama-sama diang dero. Dero anta jadi umat-Iyo ai lo anta jadi Allah dero. ⁴ Ai lo anta ngloli eka-eka olu mato ngket mato dero, ai maot belo anta keo opli; belo anta keo oli pngeluai, ktine low tangis tungul, ene low pngenyoru, koe eka ise masam yo usang ene sundok mapos." ⁵ Io yo tunge mbo ban pnunge Raja ene ngulek: "Eti ta, Aku nampa ise masam jadi bayu!" Ai firman-Iyo: "Tulis ka, koe eka pmensara endo pas-pas mbo nau ai beta." ⁶ Firman-Iyo nua epo aku: "Eka-eka ene sundok terjadi. Akuendo doko Alfa ai Omega, Yo Tla ai Yo Pngabis. Ulun yo krengan anta die Ku ngisop diang die tingen ngket mato danum nte bolum. ⁷ Ise-ise ulun yo kuret, io anta kuli eka-eka iyo ene, ai Aku anta jadi Allah iyo ai io anta jadi pea-Ku. ⁸ Tapi ulun-ulun yo pnakut, ulun-ulun yo belo percaya, ulun-ulun gramas, ulun-ulun pngempate, ulun-ulun lonte, tukang-tukang keo pentoan, tukang nyembah berhala ai eka pnampa eta, dero anta kuli awa dero mbo lang tata api kati tasik yo dolan raya ai blerang; endo doko pngemate yo kduo." ⁹ Jadi ulet ka doko erai kongo ngket turu mlekat yo ngop turu ktowong, yo ponu diang turu pengkono pengkna pngabis ene, laju io ngulek epo aku, ulek iyo: "Dido epo mendo, aku anta nutuy epo iko pnganten bawe, mempelai Anak Domba." ¹⁰ Laju, mbo lang roh io moit aku epo ombon tunden yo olay ulak ombo ai io nutuy epo aku kota yo kudus ene, Yerusalem, diwa ngket sorga, ngket Allah. ¹¹ Kota ene ponu diang kmulia Allah ai pa iyo sama kati permata yuo paling buen, kati permata yaspis, lio kati kristal. ¹² Ai dinding iyo sae ulak ombo ai jawong pnyumba iyo dua blas ; ai mbo ombon jawong pnyumba ene keo dua blas mlekat ai ela ombon iyo tnulis karan duo blas suku Israel. ¹³ Ngket tadah timur keo tolu jawong pnyumba ai ngket tadah utara tolu jawong pnyumba ai ngket tadah slatan tolu jawong pnyumba ai ngket tadah barat tolu jawong pnyumba. ¹⁴ Ai dinding kota ene keo dua blas batu pendasi ai mbo ban ne tnulis dua blas karan dua blas rasul Anak Domba ene. ¹⁵ Ai io, yo bsara diang aku, keo goloy pnyukat ngket amas nte nyukat kota ene diang jawong-jawong pnyumba iyo ai dinding iyo. ¹⁶ Kota ene nau iyo kompan opat, kangjang iyo sama diang ksae iyo. Ai io nyukat kota ene diang goloy ene: dua blas ribu stadia; kanjang iyo ai ksae iyo ai kekombo iyo sama. ¹⁷ Laju io nyukat dinding iyo: jatus opat pulu opat hasta, ngaya pnyukat ulun, yo ene low pnyukat mlekat. ¹⁸ Dinding ene tnampa ngket permata yaspis; ai kota ene se ngket amas tolen, kati kasa lio. ¹⁹ Ai pendasi-pendasi dinding kota ene tnako diang bmasam jnis permata. Pendasi yo tla batu yaspis, pendasi yo kduo batu nilam, pendasi yo ktolu batu mirah, pendasi yo keopat batu zamrud, ²⁰ pendasi yo klimo batu unam, pendasi yo keonom batu sardis, pendasi yo kturu batu ratna cempaka, yo kewalu batu beril, yo kesie batu krisolit, yo ksepulu batu krisopas, yo kseblas batu lazuardi ai yo kduo blas batu kcubung. ²¹ Ai kduo blas jawong pnyumba ene yo doko duo blas mutiara: tongku jawong pnyumba tnampa ngket erai mutiara ai boyan-boyana kota ene ngket amas tolen kati kasa lio. ²² Ai aku belo di kito Bait Suci mbo lang ne; koe Allah, Tuhan Yo Paling Kuasa, ene doko Bait Suci iyo, ktine low Anak Domba ene. ²³ Ai kota ene belo perlu mato olo ai bulan nte ngwala iyo, koe kmulia Allah ngwala ai Anak Domba ene doko lampu iyo. ²⁴ Ai bangsa-bangsa anta malan lang pa iyo ai raja-raja mbo dnia moit pengkeo dero epo iyo; ²⁵ ai jawong-jawong pnyumba iyo belo anta di tnokom des molo, koe malom belo anta keo oli mbo lane; ²⁶ ai pengkeo ai ormat bangsa-bangsa anta noit epo iyo. ²⁷ Tapi belo anta sumba epo lang ne ise-ise yo rmis roma, ktine low ulun yo ngenjoun yo triaw ktine low pnampa eta, tapi puluun dero yo karan iyo tnulis mbo lang kitab bolum Anak Domba ene.

Chapter 22

¹Sundok ene io nutui epo aku lowak danum nte bolum. Lowak ene lio ngrmpiat kati intan ai smalir ngket pnunge Allah ai pnunge Anak Domba ene, ²ela tenga-tenga boyan mbo kota ene. Ela isan lowak ene, ela mpai-mpai lowak ene keo tonga kayu nte bolum yo kbua duoblas derang, tongku bulan sindai; Ai daon kayu ene pnakai nte mkale bangsa-bangsa. ³Jadi belo keo oli pengkono pengkna koe pator sumpah. Pnunge Allah ai pnunge Anak Domba ene anta keo mbo lang ne ai batak-batak-Iyo anta sembayang epo-Iyo, ⁴ai dero anta kito wae-Iyo, ai karan-Iyo anta tnulis mbo dai dero. ⁵Ai malom belo anta keo oli mbo lane, ai dero belo di koyoh makai pa lampu ai pa mato olo, koe Tuhan Allah anta jadi pa epo dero, ai dero anta mrenta kati raja sampe turai-turai. ⁶Laju io ngulek epo aku: "Pmensara-pmensara endo montuk ai beta, ai Tuhan, Allah yo mie roh epo nabi-nabi, sundok nyuyu mlekat-mlekat-Iyo nte nutuy epo batak-batak-Iyo ise yo arus duni terjadi." ⁷"Beta-beta yo Aku duni ulet. Ego beta ka doko ulun yo ngaya pmensara-pmensara pmere kitab endo!" ⁸Jadi aku, Yohanes, aku ka doko yo sundok kringo ai kito eka-eka ene. Ai des sundok aku kringo ai kito ene, aku nyongkop ela onon botis mlekat, yo sundok mkelak eka-eka ene epo aku, nte nyembah iyo. ⁹Tapi io ngulek epo aku: "Nang ktine gawi! Aku endo batak, sama kati iko ai erai buntung-erai butung ko, nabi-nabi ai eka-eka dero yo ngaya eka pmensara kitab endo. Sembah ka Allah!" ¹⁰Laju io ngulek epo aku: "Nang ngemetrai pmensara-pmensara pmere ngket kitab endo, koe des iyo duni aut. ¹¹Ise-ise ulun yo gawi gata dat, koe ka io dor gawi gata triaw; ise-ise ulun yo rmis mrota, koe ka io dor rmis mrota; ai ise-ise ulun yo bolum beta, koe ka io dor keo gawi gata yo beta; ise-ise ulun yo kudus, koe ka io dor mkudus io se!" ¹²"Beta-beta iyo Aku duni ulet ai Aku moit upa-Ku nte males epo tongku ulun sengkono diang gawi gata iyo. ¹³Aku endo doko Alfa ai Omega, Yo Tla ai Yo Sori tingin, Yo Tla ai Yo Pngabis." ¹⁴Ego beta ka doko dero yo npas jubah iyo. Dero anta kuli ngempun tobnga-tonga kayu nte bolum ene ai sumba tete jawong-jawong pagar epo lang kota ene. ¹⁵Tapi koko-koko ai tukang-tukang ulun roa atok lmu, ulun-ulun lonte, ulun-ulun paro pate, nyembah-nyembah berhala ai tongku ulun yo gawal nampa eta ai yo ngenjouniyo, nongos ela baling. ¹⁶"Aku, Yesus, sundok nyemuyu mlekat-Ku nte mie pnyurah nau umbang eka-eka endo epo iko nte jmaat-jmaat. Aku doko suli, yo ene upus Daud, bintang timur yo trang beta." ¹⁷Roh ai pnganten bawe ene ngulek: "Mendo ka!" Ai ise-ise yo kringo iyo, moko io ngulek: "Mendo!" Ai ise-ise yo krengan, moko io ulet, ai ise-ise yo kakan, moko io ngalek danum nte bolum diang dnue tingin-tingin!" ¹⁸Aku bsara epo tongku ulun yo kringo pmensara-pmensara pmere ngket kitab endo: "Ena keo ulun yo nambah ise-ise epo pmensara-pmensara endo, koe ene Allah anta nambah pengkono pengkna epo io yo tnulis lang kitab endo. ¹⁹Ai ena keo ulun mkurang ise-ise ngket pmensara-pmensara ngket kitab pmere endo, koe ene Allah anta ngalek mpun iyo ngket kayu nte bolum ai ngket kota kudus, kati yo tnulis lang kitab endo." ²⁰Io yo mie pnyurah nau umbang eka-eka endo, bfirman: "Ooh, Aku duni ulet!" Amin, ulet ka, Tuhan Yesus! ²¹Kasih karunia Tuhan Yesus sama-sama diang ikam eka-eka! Amin.